


*image  
not  
available*



B









# THEOLOGIA SCOTI

A PROLIXITATE,  
ET SUBTILITAS EJUS

AB OBSCURITATE  
LIBERA ET VINDICATA:

<sup>S E U</sup>  
OPUS THEOLOGICUM  
STUDENTIBUS

SIC ATTEMPERATUM,

UT IN ILLO HABEANT AD MANUS  
Theologiæ Scholasticæ integritatem brevem  
& profunditatem planam.

*Auctore V. P. IOANNE GABRIELE BOIVIN  
in Provinciâ Franco-Parisiâ strictioris  
Observantiæ*

Lectore Theologiæ jubilato.

*Et apud FF. Minores Virienses emerito Professore;  
ex eâdem urbe oriundo.*

IN QUATUOR PARTES DIVISA.

PRIMA PARS.

Quinta Editio correctior.



PARISIIS,

Apud EDMUNDUM COUTEROT, viâ  
Jacobæ, sub signo boni Pastoris.



M. DC. LXXXII.

*Cum Approbatione & Privilegio Regis.*







ILLUSTRISSIMO ECCLESIAE PRINCIPI

FRANCISCO  
DE NESMOND

BAJOCENSIVM EPISCOPO,  
REGI A SANCTIORIBUS CONSILIIS,  
FR. JOANNES-GABRIEL BOYVIN,  
PRIOREM OPERIS SUI THEOLOGICI PARTEM  
O. D. C.



*VM primùm , ILLUSTRIS-  
ECCLESIAE PRINCEPS,  
nostras de rebus Theologicis Disser-  
tationes, mole quidem exiguas, sed  
argumento magnas, publici juris  
facere & in lucem edere nuper co-  
gitarem ; nec diu, nec multum deliberavi, quem  
adversus tot obtrectatores, vel benevolum patro-  
num advocarem mihi, vel honorarium sumerem  
arbitrum, vel judicem legitimum in hoc periculosa  
pleno alea negotio appellarem. Quorundam splen-  
dida sanguinis nobilitas; dignitas aliorum amplif-  
sima, summaque auctoritas; plurium singularis  
eruditio, & eximia virtutes; praclara etiam non-  
nullorum de me & de nostri Instituti hominibus  
merita obversabantur animo: qua cuncta in Te uno  
cùm se sinit obutere mihi, ut huic tuum Operi  
a ij*

## EPISTOLA:

patrocinium exposcerem, seligerem arbitrium, judicium adhiberem, non me commoverunt modo; sed etiam, quamquam non invitum, vehementer impulerunt. Tuorum splendorem natalium, **AMPLISSIME PRÆSUL!** & antiquam nobilissimi tui generis prosapiam impetenti, majores singulos, paternos inquam, & maternos, præcipuis belli, togaque fortiter & sapienter perfunctos muneribus, & inter clarissima non Aquitania tantum, sed Galliâ totius lumina recensere, hic liceret: at illustrissimos tum Patrem, cum Avunculum, quos viros dicam? Parisiensis Senatus clarissimos Principes, ad tua gloria commendationem, & gentis immortale decus, satit sit commemorasse. Hoc uno ab iis dissides; quod uterque foro præsideat, tu Templo: uterque supremam Christianissimi Regis curiam regat, tu Christi Ecclesiam: ambo inter Patres conscriptos primores emineant; tu inter Normania Præsules ab Archipræsule primus, & à Primate proximus sed eas & Primicerius: illi, pro eâ quâ pollent auctoritate, de vita & morte decernunt; tu salutem animarum curas & promoves: illi denique nocentes plecti jubent: tu Dei & hominum sequester, miseris misericordiam, ingratis gratiam, peccatoribus veniam, justis lauream deprecaris & exoras. Enimvero dignitatis tua, quam non ambitu, sed virtute comparatam; non questam, sed ultro oblatam accepisti, ea est præstantia; ut sacra unctio gradu succedens Apostolico, summus sacerdos, ac beatissimorum Bajocensis Ecclesiæ Pastorum talis successor à Pontifice Alexandro maximo, Ludovici maximi delectu, ut omnium commodis, sic omnium votis sis constitutus, qualem Episcoporum Magister

## EPISTOLA.

& Ecclesiarum Ordinator D. Paulus præceptis  
 sanctissimi instituit & informat. Sacra tua,  
 ILLUSTRISIME PRÆSUL! non inanis  
 & prophana, quæ inflat scientia; tot testes habes,  
 quot auditores; qui, cum propter Sion non taces,  
 nec unum tantum tuba, sed tribus in ea cernis; te  
 veteris, novique Testamenti, & Patrum Orthodo-  
 xorum sententias, magna populi frequentia, in  
 Templis personantem, aut de arduis scholastica,  
 positiva & moralis Theologia questionibus in scho-  
 lis differentem admirantur. Quin cum memineris  
 præcipuum esse Episcopi munus docere, cunctos  
 doctrina tua radiis illustras: nec voce tantum, sed  
 quod majus est, vita & moribus, cæteris præluces.  
 Prudentiam, justitiam, fortitudinem, & tempe-  
 rantiam, quæ veluti quadrigæ concita, te Christi  
 aurigam ad cælestem metam ferent, & insignes  
 alias quas in te veneramur virtutes, quis pro merito  
 satis differere queat? Has quidem licet invitus ego  
 prætereo; ne modestiam tuam, quæ inter eas non  
 postremum locum obtinet, sermo iste, verus licet,  
 & ab omni adulationis suspitione alienus, onerare  
 videatur: Pietatem tamen, charitatem, vigilan-  
 tiam & humanitatem hic silere, crederem piaculum.  
 Sinceram illam & non fucatam, quam stu-  
 diosè colis pietatem, aliis verbo insinuas & exem-  
 plo; precibus assiduis Deum tibi & nobis concilias;  
 neque ei salutarem hostiam, quod facis sapissimè,  
 offers, quin te prius eidem quasi rationale obse-  
 quium præbueris. Eam sectaris charitatem quæ  
 benigna est atque patiens, quæque sua non quarit,  
 sed quæ Christi. Gregi tuo sic invigilas, ut Ecclesia  
 etiam absens, quod rarissimè contingit, animo  
 adsis, & cura consulas. Humanitatem nemo est

## EPISTOLA:

qui non exprobiatur. Egenos iuvas & pascis liberalissime, ut qui scilicet patrimonium Christi, patrimonium pauperum esse non ignoras. Zelum Dei habes, sed secundum scientiam. Oves, hæreticos dico, ab ovili tuo devias, & in terra Calvinii deserta, invia & inaquosa errantes leniter reducis, & in Catholica Ecclesia septa, non nisi rationum vi & momentis compellis intrare. Erga omnes ita comis es & urbanus; ut cum te adire sit honorificum, te consulere utilissimum, sic te videre, te alloqui, te audire sit perjucundum. De tua denique in me meosque sodales incredibili benevolentia pluribus dicere percuperem; nisi vererer, ne quis me gloriari forsitan succenseat; quod tua nos beneficentia non indignos sic judicasti, ut (quod à professionis nostra legibus est alienum) jam beneficiarii inter tuos audiamus. Ha causa plures, & ut nemo non intelligit, gravissima, ILLUSTRISSIMÆ ECCLESIAE PRINCEPS, id consilii facile in animum induxerunt meum, ut hoc Theologiae Opusculum, in gratiam divinæ illius scientiæ & scientiarum reginae studioforum, non multa arte, sed aliqua methodo pro mei tenuitate ingenii elaboratum, illustrissimo tuo nomini inscriberem, tuæ amplissima dignitati voverem, tuæ etiam tutela committerem atque defensionis; quod præterea tanquam æternum mea in te gratitudinis anathema tibi sic appendo, ut monumentum quoque perpetua venerationis & observantia apud omnes extet sempiternum.

Vale;



ॐ नमो भगवते वासुदेवाय ॥ ॐ नमो भगवते वासुदेवाय ॥ ॐ नमो भगवते वासुदेवाय ॥  
 ॐ नमो भगवते वासुदेवाय ॥ ॐ नमो भगवते वासुदेवाय ॥ ॐ नमो भगवते वासुदेवाय ॥  
 ॐ नमो भगवते वासुदेवाय ॥ ॐ नमो भगवते वासुदेवाय ॥ ॐ नमो भगवते वासुदेवाय ॥

# PRÆFATIO

## TOTIVS OPERIS

*dispositionem continens.*



U t si Theologia investigare  
 volenti respondebit ipsissima no-  
 minis ethimologia ; nihil aliud  
 esse , quàm scientiam de supre-  
 mo Ente discurrentem , non na-  
 turali , sed divino lumine innixam ; & ita  
 prorsus homini viatori necessariam , ut si relin-  
 quatur sibi mens humana , suæ salutis incapax  
 semper esse videatur. Cùm ergo hujus scien-  
 tiæ præcipuus finis sit Dei speculatio , ut po-  
 steà ex illustratione intellectus , amore tan-  
 dem accendatur voluntas ; hinc est quòd  
 Deum in suâ infinitâ , licet indivisibili lati-  
 tudine percurrere volens , eorum omnium ,  
 quæ de ipso dici sunt solita ; eò libentius ex-  
 plicationem aggredior ; quo mihi major scri-  
 bendi necessitas incumbit. Multa erant sanè  
 quibus maximè deterrebar , ne in edendis  
 Theologiæ lucubrationibus operam darem &  
 vigilias . utpote ingenii tenuitas , hujus scientiæ  
 à iiij

## P R Æ Q U A T I O.


gravitas , & tot librorum majestas qui hæc-  
 nus prodierunt in lucem ; nihilque non dictum  
 reliquerunt ; sed amicorum consilium , Supe-  
 riorum imperium , & scholares nostros adju-  
 vandi desiderium , me ita persuasum fecere , ut  
 renuere non potuerim , quin conceptum sermo-  
 nem omnibus propalare decernam , & publi-  
 cum facere quod antea inter privatos parietes  
 recondere statueram tanquam inutile , & mino-  
 ri splendore conspicuum , quam ut prælo com-  
 mitti deberet. Nihil certè novi in hoc Opuscu-  
 lo reperiēs , A M A N T I S S I M E L E C T O R !  
 doctrina enim nova non turior antiqua ; sed  
 novus scribendi modus non ingratus fortè cen-  
 sebitur , si videris stilum non ita concisum , ut  
 quædam non dicta aut improbata relinquat ;  
 nec ita diffusum , ut lectorum mentem suâ  
 prolixitate obruat , sed ita concinnatum , ut  
 quæ docenda sunt , doceat ; & quæ sunt inuti-  
 lia rejiciat. Quantum ad ordinem : totus ab  
 objecto desumetur : cùm enim & Deum ipsum ,  
 & quæ Dei sunt , Theologo incumbat exami-  
 nare , ante omnia naturam divinam & divi-  
 nas perfectiones explicare conabimur : Quia  
 verò ipsius naturæ D. fœcunditas illam plu-  
 ribus suppositis communicat , videbimus fe-  
 cundò in unâ , simplici & indivisibili essen-  
 tiâ personarum Trinitatem : Quia harum  
 personarum secunda incarnata est , & propter  
 ipsam omnes creaturæ instauratæ sunt , age-  
 mus tertio & quarto de creatione mundi , &  
 de Verbi D. Incarnatione : Quia præcipuus  
 incarnationis fructus fuit gratiæ communi-  
 catio , quam nobis meruit Christus redemptor

## P R Æ F A T I O.

noſter, de ipſâ diſcurrēmus quintò, & diſſuſiùs proponemus; & ſolvemus omnes huiusce temporis quæſtiones adverſus Janſeniſtas: Sextò de Sacramentis in genere & in ſpecie examinandis; quæ ſunt veluti viæ quædam per quas gratia Salvatoris infunditur. Septimò de actibus humanis per gratiam dirigendis in finem ſupernaturalem, ubi etiam agetur tum de legibus & de pœnis Eccleſiaſticis ( nempe cenſuris ) contra infraſtores legum; tum de peccatis & virtutibus; tum denique de præceptis Decalogi quæ ad legem divinam pertinent: Octavo, opusculum noſtrum in quatuor partes diviſum abſolvemus per Tractatum ultimum, qui erit de Virtutibus Theologicis, & Vitiis oppoſitis; de Eccleſia, & Summo Pontifice; de Conciliis, & Summorum Pontificum ſerie,



## ELOGIUM SCOTI.

 I c penè ante subtilis fuit, quàm homo esset: occultavit patriam suam dum nascitur, ut subtiliter nasci posset. Tria regna de eo sic disputant, ut nullibi ferè natus sit, dum ubique nascitur: Cessare lites, ibi Scoto patria est, unde illi subtilitas venit.

SUBTILITATEM infans ab ea petiit, quæ subtilis esse debuit, ut Deipara esset: accepit ea lege, ut conceptæ Matris puritatem defenderet: inde illi subtilitas tanta, ut etiam ipsius nomen subtile sit. Nec alius esse debuit alumnus Virginis, & futurus patronus.

PHILOSOPHIAM sic excoluit, ut ejus inventore esse posset, nisi natam invenisset: ita Aristotelis discipulus, ut doceri ab eo Aristoteles vellet, si viveret.

IN Theologiâ æquavit D. Thomam, dum superare non potuit: & ne unicus Theologiæ Princeps esset, eam in duo regna divisit. Mysteria fidei ita seivit, ut penè non crederet: extinxisset scientia fidem, nisi cæca simul & oculata esse posset. Naturam Dei ita

descripsit , quasi aspexisset : arcana sapientiæ  
divinæ , quasi penetrasset : delicias alterius vitæ ,  
quasi expertus esset.

Sed nihil melius probavit acumen Scoti ,  
quam subtilitas Conceptæ Virginis : Agita-  
batur à filiis origo Matris , quam Scotus im-  
puram nolebat , ne Deum inficeret. Ducenta  
adversariorum argumenta ita repetiit , ut du-  
bitatum sit , an Deus suggereret ; ita dissolvit ,  
ut nemo dubitaret quin Deus cum homine  
responderet.

ADDUXIT rationes tam sacras , ut in ejus  
verba Sorbona juraverit ; decretum est , ne  
quis admitteretur ad lauream ; nisi hæc in parte  
Scotista esset. Adjectum est votum celebrandæ  
Conceptionis , ut quotannis cum Virgine  
Scotus triumpharet.

NON arrogavit sibi eam victoriam , quam  
miraculum pepererat ; dum ad pugnam per-  
git , oravit Virginem in imagine , & imago  
respondit : inclinavit caput imago saxea , ut  
opem annueret ; adhuc perseverat inclina-  
tio , ne quis de antiqua victoria dubitet quæ  
quotidie nova est. Attollere hæc omnia Sco-  
tum poterant , nisi Minorita esset. Coloniam  
destinatus , ut ibi sapientiæ coloniam insti-  
tueret ; perrexerat insalutatis Parisiis , ut obe-  
dientia cæca esset. Ibat pedes vir triumpho di-  
gnus , satis oneratus Scoto , nisi Scotus subtilis  
esset.

**PRŌGRESSA** obviam Colonia eo majorem  
generata est, quò aspexit Minorem.

**REDINTEGRATA** Conceptionis pugna  
renovavit victoriam; vicit Discipulos Colo-  
niæ, qui Parisiis Magistros vicerat: non in-  
cruenta tamen victoria, dum post pugnam in-  
terit: Martyr Conceptæ Virginis appellan-  
dus, seu merita vitæ, seu mortis calumnias  
spectes.

Tu ne fabulis credas, miracula consule,  
& mirare ingenium Scoti, dum mortem oc-  
cultavit, qui natales celaverat. Tam occultè in-  
terit, ut adhuc de mortis genere dubitetur,  
scilicet subtiliter mori voluit, quia subtiliter  
natus erat: ipse etiam mortis annus incertus  
est, ut sit ætas tota subtilis.

ILLUD certum est, paucis annis tam multa  
scripsisse, ut iis legendis vix alter sufficiat; pu-  
gnat voluminibus cum Divo Thoma, scriptu-  
rus plura, si scripsisset minus subtiliter.

**UTERQUE** Doctor, ille Angelicus; hic  
Subtilis: sed hic subtilis esse non posset, nisi  
Angelicus esset.

**PETRVS L'ABBE** Bituricens  
Soc. Jesu Theologus,



V. P A T R I .

JOANNI GABRIELI  
BOYVINO,  
EX

Religiosissimâ Franciscanorum strictioris ob-  
servantiæ Familiâ , in Provinciâ Franco-Pa-  
risinâ Doctissimo Theologo , & Jo Scoti  
Doctoris Subtilis Clarissimo Interpreti,

E L E G I A .

**Q**UA, BOYVINE , dedit tibi quondam pluri-  
ma Scotus ,

*Rèddere jam grandi fœnore cuncta parvas,  
Obscura arguti referans nunc sensa magistri  
Suscipis huic lucem conciliare novam;  
Atque hîc sic Scoti subtile relucet acumen ,  
Lumine ut ille tuo desinat esse Exor-  
idem opus insignes sic ambo illustrat , ut undâ  
Vnius studio clarus uterque micet ;  
Quin quoque pergratos tu flores fructibus addis ,  
Scotique in spinis colligis usque rosas.  
Ne mundo inscribis scriptum ; quo nempe patrono  
Non ausit quisquam carpere censor opus ;  
Nobilium illustri majorum sanguine cœtus  
Hic centum Hæron enumeraret Aves ;*

**PRŌGRESSA** obviam Colonia eo majorem  
generata est, quò aspexit Minorem.

**REDI NTEGRATA** Conceptionis pugna  
renovavit victoriam, vicit Discipulos Colo-  
niæ, qui Parisiis Magistros vicerat: non in-  
cruenta tamen victoria, dum post pugnam in-  
terit: Martyr Conceptæ Virginis appellan-  
dus, seu merita vitæ, seu mortis calumnias  
spectes.

Tu ne fabulis credas, miracula consule,  
& mirare ingenium Scoti, dum mortem oc-  
cultavit, qui natales celaverat. Tam occultè in-  
terit, ut adhuc de mortis genere dubitetur,  
scilicet subtiliter mori voluit, quia subtiliter  
natus erat: ipse etiam mortis annus incertus  
est, ut sit ætas tota subtilis.

**ILLUD** certum est, paucis annis tam multa  
scripsisse, ut iis legendis vix alter sufficiat; pu-  
gnat voluminibus cum Divo Thoma, scriptu-  
rus plura, si scripsisset minus subtiliter.

**UTERQUE** Doctor, ille Angelicus; hic  
Subtilis: sed hic subtilis esse non posset, nisi  
Angelicus esset.

**PETRVS L'ABBE** Bituricens  
Soc. Jesu Theologus,





V. P A T R I .

JOANNI GABRIELI  
BOYVINO,  
EX

Religiosissimâ Franciscanorum strictioris ob-  
servantiæ Familiâ , in Provinciâ Franco-Pa-  
risinâ Doctissimo Theologo , & Jo Scoti  
Doctoris Subtilis Clarissimo Interpreti,


E L E G I A.

**Q**UA, BOYVINE , dedit tibi quondam pluriâ  
ma Scotus ,

Reddere jam grandi fœnore cuncta parus,  
Obscura arguti referans nunc sensa magistri  
Suscipis huic lucem conciliare novam;  
Atque hic sic Scoti subtile relucet acumen ,  
Lumine ut ille tuo desinat esse Exores  
Idem opus insignes sic ambo illustrat , ut una  
Vnius studio clarus uterque micet ;  
Quin quoque pergratos tu flores fructibus addis ,  
Scotique in spinis colligis usque rosas.  
Ne mundo inscribis scriptum ; quo nempe patrono ,  
Non ausit quisquam carpere censor opus ;  
Nobilium illustri majorum sanguine cretus  
Hic centum Heroes enumeraret Avos ;

*Maternos seu tu numeret : numeroe sue paternos ;*  
*Nam domus est titulis utraque clara suis ;*  
*Inclita Sorbonica meritis cui præmia palma*  
*Bajoca exornat sacra Thiara caput ;*  
*Hæres nam Spiri divinum spirat amorem ,*  
*Atque Renobertum moribus usque refert ;*  
*Successorque Lupi , securum perpate curâ*  
*Pastor , ab Hæreticis servat Ovile lupis ;*  
*Elius exæquat summum mens alta vigorem ,*  
*Vivida dum grato flore juvena viget.*  
*Sacra animo attente puro mysteria tractans ,*  
*Deque Deo semper , cumque Deo loquitur.*  
*Nullius virtutis egens , pietatis amator ,*  
*Non hic Doctoris nomen inano gerit ;*  
*Sed sermone potens , sacunda & munere lingua*  
*Intonat in templis , fulminat inque scholis.*  
*Morali , historico sensu , typicoque sonantem*  
*Triplice mirantur Fœdus utrumque tuba ,*  
*Pontificum decreta , Patrumque effata recenset ,*  
*Huncque Augustini pagina nulla fugit.*  
*Dixerunt quidquid Lombardus , Divus Aquinas ,*  
*Scotus , & Ochartus , singula mente capit.*  
*Impia Lutheri , & Calvini dicta refellit ,*  
*Et damnat , recens themata Iansenii.*  
*Tanto exgo felix gaude BOYVINE Patrone ;*  
*Teque siccante diu gaudeat ille precor.*  
*Et ferat , Ossati dignus virtute , galerum ,*  
*Inter purpureos assideatque Patres.*

JOAN. BAPT. BELLENGERUS CRETTEAUS ,  
 In Academiâ Pictavâ ,  
 L. V. D.



RELIGIOSO PATRI,  
P. JOANNI-GABRIELI  
BOYVIN;  
SUO FRATRI AMANTISSIMO.

## EPIGRAMMA:

**U***t quondam Scotus doctrina & acumine  
mentis  
Subtilis nomen praeiit ipse sibi:  
Tempore sic nostro gaudebis nomine Clari,  
Subtilis Scoti dogmata clarificans;  
Si Scoto debes, multum tibi debet & ille,  
Materiam peperit, clarius esse parat.  
Scoti solvendo Scotos, sic frater amande,  
Tempore venturo gloria compar erit.*

ROGERIUS BOYVIN in Senatu Viricensi  
Patronus, Frater auctoris.

1  
AUCTORI, SUO PATRUO

COLENDISSIMO.

EPIGRAMMA.

**P**LYRIMA digna Deo multi sunt lapsi locuti,  
Et libros luci sponte dedere suos:  
Publica prompsorunt ac cum sua scripta diei.  
Expurgata umbris dogmata nemo dedit:  
Dum tua, sed tenebris vacuata volumina Scriptor?  
Pandimus, in scriptis nulla fit umbra tuis.  
Sic super hos te multa manent sperare trophæa,  
Ad famamque tibi jam datur ire prius:  
Quippe suos tantum potuerunt promere luci,  
Tu lucem libris promis at ipse tuis.

GUILLIELMUS BOYVIN in Senatu Virzō  
Patronus, Auctoris à Fratre nepos.

CUM Venerabilis P. GABRIEL BOYVIN  
nostræ Provinciæ Franciæ-Parisiensis Re-  
formatæ Religiosus , & in Sacrà Theologiâ  
Lector jubilatus nobis exposuerit , se plures  
Theologiæ Tractatus in diversis nostris Con-  
ventibus docuisse , quos ( acceptâ nostra licen-  
tiâ ) in lucem edere vellet ; Nos de suâ sanâ  
doctrinâ & subtili scientiâ , quàm in concer-  
tationibus publicis , magno cum assistentium  
applausu multoties audivimus , sufficienter in-  
structi ; ut hujusmodi Tractatus Theologici  
typis mandentur , libenter concedimus , modò  
accedat ut moris est , Doctorum approbatio.  
Datum Parisiis in Monasterio nostro Ave-Ma-  
riano hâc die secundâ Januarii 1664.

FR. JOANNES LE FEBVRE  
Minister Provincialis.

NOS infra scripti JULIANUS COLLARDIN  
nobilis ex utroque parente , Presbyter ,  
in sacrà Facultate Theologiæ Parisiensis Do-  
ctor Sorbonicus , Dominus temporalis de Mon-  
tibus ; Frater Stephanus de Roissei Ordinis  
Cisterciensis , in Normaniâ Vicarius genera-  
lis , ejusdem Facultatis Doctor , & Franciscus  
le Chartier Rector de Novâ Villâ Viriæ De-  
canus , etiam Doctor Theologus Parisiensis ,

testamur oblatam nobis fuisse à V. P. Joanne-  
Gabriele Boyvin, Lectore Theologo jubilato,  
Ordinis sancti Francisci Minorum de Obser-  
vantia, Conventus Viriæ, primam partem qua-  
tuor, quibus constat Opus Theologicum, cui  
titulus, *Theologia Scoti à prolixitate, & subtilitate  
ejus ab obscuritate libera & vindicata*; ab ipso  
ita elaboratam, ut nobis accuratè legentibus,  
non modo grata, sed ex rei veritate visa sit planè  
digna quæ edatur in lucem. In ea nihil fidei  
Orthodoxæ contrarium, nulla erroris suspicio,  
aut suspectæ novitatis: imò singula sunt &  
Doctoris Subtilis doctrinæ conformia, & tanta  
cum facilitate ac elucidatione proposita & ex-  
plicata, pro rerum de quibus agit gravitate ac  
subtilitate, ut non modo in eorum ad quos diri-  
gitur, singularem utilitatem, sed in communem  
omnium ad quos pervenire poterit, pareat ela-  
borata. In cujus rei fidem huic præsentì testi-  
monio manu propria subscripsimus, die vi-  
gesima quinta mensis Junii, anno reparatæ sa-  
lutis supra millesimum sexcentesimo sexagesi-  
mo quarto,

COLLARDIN, DE ROISSET.

LE CHARTIER.

*Approbatio Doctorum Ordinis.*

**N**os infraſcripti Doctores Pariſienſes Ordinis Mē-  
norum, opus Theologicum elaboratum per R. P.  
JOANNEM-GABRIELEM BOYVEN Minoritam, Provin-  
ciæ Franciæ Pariſienſis emeritum Lectorem, & actua-  
lem Profeſſorem perlegimus, cujus ſubtilem ſolidum-  
que ſtilum ſuperfluum eſt commendare, aſtutē ſiqui-  
dem effundit frameam, & concludit adverſus verita-  
tem impugnantes: acuminibus mitis penetrat adverſa,  
ponderibus gratis illidit ſubjecta: magnam paſſim  
exhibet doctrinæ varietatem, rationum ſubtilitatem  
oſtendit, nedumque ſuum ructur Doctorem: ſed auge-  
t, acuit & illuſtrat. Quidquid concludit, non eſt inanibus  
verborum fucis concinnatum, ſed Scotiſticæ doctrinæ  
fundamenti innixum & in baſi veritatis firmatum.  
Opus denique fidei Catholicæ, boniſque moribus pla-  
nè conſentaneum advertimus, & eruditione multi-  
plici reſertum: idcirco velut profeſſoribus Ordinis  
noſtri ſtudentibusque proficuum & utile, typis eſſe  
mandandum judicavimus. Actum Vernoni hac die 22.  
Octobris 1663.

FR. GUILLEL. LE COUPIL.  
FR. PETRUS LE NORMAND.

*Approbatio Profeſſorum Provinciæ.*

**J**AMPRIDEM deſiderabatur quod promittit titulus  
& promiſſum fideliter æquè ac Catholicè adimplet  
opus. Sic ſentimus & teſtamur nos in Provinciâ Fran-  
co-Pariſinâ S. Theologiæ Profeſſores, hâc die vigeſimâ  
octavâ menſis Auguſti, anno Domini milleſ. ſexcent.  
ſexageſimo quarto.

FR. PETRUS DAVID, Lector Theologiæ jubilatus.  
FR. JOAN. BAPT. NEEL, Lector Theologiæ  
jubilatus.  
FR. JOAN FRANCISCUS SCELLES,  
Theologiæ Profeſſor Rothomagenſis,

# THEOLOGIÆ

## PROLOGUS.

**M**ATERIARUM amplitudinem, de quibus agit Theologiā, præcedere debet ipsius Theologiæ explicatio; unde priusquā singulares difficultates Theologicas enodare laboremus, quasdam quæstiones proœmiales exponere & breviter solvere necessarium videtur; & quatuor præsertim, quarum prima erit de necessitate Theologiæ: Secunda, an sit scientia aut sapientia: Tertia, an sit speculativa vel practica: Quarta tandem, quodnam sit ipſius objectum.

Quantū ad Theologiæ necessitatem; si sumatur latè pro habitu fidei, absolutè necessaria est cuilibet viatori ut salutem obtineat; *sine fide enim impossibile est placere Deo*: Si sumatur autem strictè, pro habitu aliquo supernaturali, quo res per fidem intellectas explicare, persuadere, ac contra hæreticos propugnare volumus; non est singulis hominibus necessaria; aliās omnes homines esse deberent Theologi, quod nullus unquam dicet; *qui crediderit enim, & baptisatus fuerit, salvus erit*. Est tamen necessaria toti communitati Fidelium, seu toti Ecclesiæ; cui cura incumbit de



## THEOLOGICÆ PROLOGUS.

providendis doctoribus, qui difficultates circa mysteria fidei oriundas solvere valeant. Solvuntur autem illæ difficultates, & veritates ipsis contrariæ probantur ex locis quibusdam Theologicis, ex quibus argumenta Theologica eruuntur: & hi loci sunt præsertim, Scriptura, Apostolica Traditio, Consensus Ecclesiæ, Conciliorum autoritas, & Doctorum Catholicorum explorata & unanimis sententia. Scriptura, inquam, est præcipua sedes argumentorum Theologiæ; si non secundum sensum spirituales, ex quo raro argumentum efficax repeti potest; quia vix de illo constat quinam sit: saltem secundum litteralem, qui ita verus est, ut non possit illi subesse falsum. Est ergo duplex Scripturæ sensus; literalis scilicet, qui immediatè significatur per verba; & spiritualis, in quo primò significatur res, & mediantibus rebus, aliud importatur. Iste est triplex: si enim illud quod importatur per sensum spirituales, significet quid agendum, est sensus moralis; si significet quid credendum, est allegoricus: si significet quid sperandum, est sensus anagogicus; unde hi tres sensus referuntur ad tres virtutes Theolog. moralis ad charitatem, allegoricus ad fidem, & ad spem anagogicus, secundum hos versus;

*Littera gesta docet; quid credas, allegoria;*

*Moralis, quid agas; quo tendas, anagogia.*

Antequam videamus quænam sit ratio Theologiæ; sciendum est ipsam posse spectari, vel ut est in Deo; vel ut est in Beatis, aut in viatoribus; & tunc vocatur Theologia Dei, Beato-

## THEÓLOGIÆ

rum & viatorum: Potest insuper sumi per respectum ad veritates necessarias, vel contingentes: ut cum dicitur, Deus est unus, trinus, intelligens, &c. talis cognitio vocatur Theologia necessariorum; vel cum intelligitur, quod Deus creavit mundum, Verbum fuit incarnatum, &c. & est Theologia contingentium. Hoc posito: Dico 1. quod Theologia in se, & in quocumque intellectu, sit sapientia; est enim cognitio rerum altissimarum, nempe Dei & divinorum, quæ habetur per rationes altissimas, scilicet per fidem, per lumen gloriæ, & per essentiam D. secundum diversa subiecta in quibus est. Dico 2. quod Theologia Dei non est propriè scientia; quia ad rationem scientiæ requiritur discursus; seu progressus à minus notis ad notiora; Deus verò omnia unico actu intelligit. Dico 3. Theologiam Beatorum de necessariis esse scientiam; est enim certa, quia medium ejus, nempe essentia D. in quâ omnia cognoscunt, est certissimum: est evidens, quia vident per lumen gloriæ: est deinde circa objectum necessarium; & tandem habetur per discursum; quia ex Scoto Beati prius, saltem naturâ, intelligunt quidditatem rei, quam ejus proprietates. Dico 4. Theologiam viatorum non esse propriè scientiam; nititur enim in fide, & sic deest illi evidentia: potest tamen dici scientia, latè sumendo scientiam pro cognitione ita certa, ut ipsius certitudo æquipolleat evidentiae. Dico 5. Theologiam contingentium non esse scientiam; quia scientia est de objecto necessario.

Videndum ulterius est, an Theologia sit

## P R O L O G U S.

practica , vel speculativa. Scientiam autem illam vocamus practicam , quæ est regulativa & directiva praxis ; & praxis est operatio voluntatis , vel alterius potentiaæ externæ , cujus actus potest benè , vel malè fieri ; consequenter ergo Theologia dicetur practica , si est regulativa voluntatis ; & speculativa , si maneat in contemplatione objecti , nec insuper voluntatem dirigat. Unde , dico 1. Theologiam Dei non esse practicam , sed speculativam ; quia intellectus D. non potest regulare voluntatem D. illa enim voluntas non est regulabilis , cujus actus non possunt benè & malè fieri ; voluntas autem D. quæ est summè recta & regula omnium , non potest habere malos actus ; ergo non est regulabilis ; ergo Theologia Dei non est regulativa , nec practica. Verum quidem est , quòd intellectus D. ostendat voluntati quod est bonum , vel malum , in quo consistit ostensio praxis ; quia non est voluntatis cognoscere : sed illa cognitio non dirigit voluntatem ; quia non excitat illam , nec adducit rationes , ut illi persuadeat bonum faciendum , vel malum fugiendum , in quo consistit directio praxis : sed voluntas , modò bonum & malum appareant , fertur illicò ad bonum propter sui rectitudinem ? Unde licet Theologia Dei sit ostensiva praxis , non est tamen directiva praxis ; & sic non est practica. Dico secundò , Theologiam Beatorum & nostram esse practicam ; non quia operatur objectum , sed quia operatur circa objectum , ipsum diligendo , non quòd etiam versetur circa objectum contingens , sed quia dirigit actiones

## THEOLOGIAE PROLOGUS.

nostræ voluntatis quæ sunt contingentes , & possunt benè vel malè fieri : denique est practica , quia non manet in contemplatione Dei , sed excitat voluntatem ad Deum amandum , & sic dirigit praxim. Quòd si dicatur , voluntates Beatorum non esse regulabiles , quia non possunt esse malæ ; hoc est per accidens , ratione scilicet objecti beatifici cui fortiter inhzrent ; ex se tamen regulabiles sunt , quia in quantum humanæ , sunt obliquabiles.

Superest tandem , ut breviter dicamus , objectum Theologiæ esse Deum , ut patet tum ex ipsius nomine ; idè enim vocatur Theologia , quia est scientia , vel sermo de Deo : tum ex hoc quod omnia , de quibus agitur in Theologia , Deum respiciunt , directè scilicet , vel indirectè , ut videre est : agit enim ipsa de unitate Dei & ipsius attributis ; de pluralitate personarum : de creatione mundi , ubi & de productione Angeli & hominis , de Incarnatione Verbi , seu de Christo , de gratia quam ipse nobis meruit , de Sacramentis quæ sunt signa effectiva gratiæ , & tandem de actibus humanis , quibus subsunt virtutes , quæ nos ad Deum conducunt ; & peccata , quæ nos avertunt ab ipso. Cùm ergo omnia hæc aliquomodò Deum respiciant , nonne jure merito dicimus Deum esse objectum Theologiæ ?

*Extrait*



THEOLOGIÆ SCOTI  
PRIMA PARS  
UNITATEM ESSENTIÆ D.  
ET  
PERSONARUM TRINITATEM  
EXPLICANS.

---

TRACTATUS PRIMI DISPOSITIO

*De Deo Vno.*



I solem in aquâ, in creaturâ Creatorem & invisibilia Dei in illis quæ facta sunt conspicere liceat; ea, quæ in hoc Tractatu de Deo uno nobis dicenda sunt, alio ordine non mihi disponenda videntur, nisi per illa quæ dici deberent de homine, si quis ipsius naturam totaliter explicandam susceperet. Si ergo quatuor de homine examinari solent, nimirum ipsius Essentia, Modi intrinseci, Proprietates denique & Operationes: sic etiam hunc Tractatum de Deo in quatuor

Tom. I.

A



## QUÆSTIO PRIMA.

*Quid Nomine Dei intelligi debeat.*

**H**OC Nomen in sacrâ Scripturâ pluribus rebus tribuitur, ob aliquam perfectionem repertam in illis, sive sit vera, sive tantum apparens. Primò, sumitur denominativè, Ps. 95. *Omnes dii gentium demon. a.* Secundò, adoptivè, Ps. 18. *Ego dixi dii estis;* & sic quilibet electus Dei filius dici potest. Tertiò, dignificativè, pro erectis ad dignitatem. Exod. 32. *Dii non detrahes.* Quartò, potestativè Exod 3. ubi Deus Moysen constituit Deum Pharaonis. Quintò, sollicitudinariè, Philipp. 3. *Quorum Deus ventris est;* id est, talem de ventre curam habent, qualem de Deo deberent habere. Sextò tandem, Nomen Dei sumitur propriè; quatenus convenit illi supremo Enti, quod verè & propriè Deus est. Et de Nomine Dei sic sumpto nostra quæstio intelligenda venit.

## CONCLUSIO.

**N**OMEN Dei in suo conceptu communi importat primum Ens, omnium supremum, sine sicut principio carens, omnibus dans esse, & à nullo accipiens, summè bonum, in suâ naturâ infinitum, hominum menti prorsus incomprehensibile, & sibi soli effabile. Per hæc omnia verba, & quam plurima alia, quæ diversimodè afferunt Theologi, exprimitur tantum conceptus communis Dei, non verò proprius, nec singularis: talem enim habere crea-

tura non potest : unde ipsum Deum potius circumloqui quam definire debemus ; & dicere , ut ajunt , quid non sit , quam quid sit. Si autem nominis Dei queratur etymologia , Deus venit ab uno verbo Hebraïco quod significat esse , quia Deus est omnium Entium præstantissimum , juxta illud Exod. 3. *Ego sum qui sum* : vel Græcè vocatur *deus* : quæ vox ducta est à verbo Græco *θάω* , quod est currere , in quantum per Providentiam Deus omnia percurrit ut confoveat : à vocabulo autem Græco *deus* per nominis corruptionem vox latina ( Deus ) derivata est : nisi velitis , Deum Latinè sic denominari ; quia nihil ipsi deest , vel quasi omnibus det omnia.

## QUESTIO II.

*Utrum Deus verè dici possit Substantia.*

CERTUM semper fuit omnibus , Essentiam D. esse Ens reale ; ens enim rationis præsupponit ens reale à quo fingatur ; Deus verò nihil præsupponit , aliàs non esset primum Ens , contra id quod diximus. Constat etiam esse Ens absolutum ; quia est Ens à se , non ab alio productum. Tandem clarum est , quòd eadem Essentia D. sit de se Hæc ( Singularis , & Indivisibilis ) ubi enim est , tota est : sed utrum sit Substantia , improbare videbantur Manichæi , contententes lucem istam corpoream , Dei esse naturam , quæ cum modò crescat , modò decrescat ; modò adsit , modo absit , re-



manentibus subjectis ; proinde Deum esse quoddam accidens putaverunt.

## CONCLUSIO.

**V**ERE & propriè Deus est substantia. Primò qui causa non debet esse deterioris conditionis quàm effectus ; sed Deus est causa prima omnium substantiarum ; ergo ipsemet debet esse substantia ; maximè cùm sit major perfectio esse substantiam , quàm accidens. Secundò , quia accidens à substantiâ dependet , & sine illâ , saltem naturaliter , existere non potest : Cum ergo Deus sit Ens omninò independens , accidens esse nequit. Tertiò , quia Deus ex Script. ut dicemus aliquando ; est Perfectus , Immutabilis , Æternus , vitâ & ratione præditus , quæ omnia soli substantiæ conveniunt. Adde quòd in symbolo , Pater & Filius dicuntur esse consubstantiales.

Obijci possunt aliqui Patres dicentes Deum non esse substantiam , sed supersubstantiam : at solvendi sunt duplici distinctione. Primò , Deus non est substantia ; categorica , conc. quia hæc finita est & limitata , ut aiunt Philosophi : non est substantia transcendens , quæ categoriarum cancellos supergreditur , nego : Secundò , Deus non est substantia , si substantia dicatur à substando accidentibus , conc. nullum enim accidens recipere potest ; ut dicetur disp. de Simpliciter. D. si substantia dicatur à per se subsistendo , nego : Excellenter enim Deus per se subsistit.

QUESTIO III.

*Vtrum Deus sit Substantia completa  
& spiritualis.*

**Q**ui Deum esse Materiam omnibus formis onustam præsumebant, ipsum reputabant esse Substantiam incompletam; sicut & illi, qui cum ad modum animæ mundi concipiebant. Illi etiam, qui sibi finxerunt similitudinem inter Deum & hominem se tenere ex parte corporis, habebant concludere, Essentiam D. esse corpoream. In hoc errore fuerunt Anthropomorphitæ.

CONCLUSIO.

**D**eus est Substantia completa, non corporea, sed spiritualis. Ratio primæ partis est, quia Deus est infinitè perfectus, ut probabitur agendo de Infinitate D. non est proinde incompletus; quod enim incompletum est, aliquo caret, quo compleatur & perficiatur: Cum ergo nulla perfectio desit Essentiæ D. omnimodè completa censenda est. Ratio secundæ est, quia, si Deus haberet corpus; vel esset corpus physicum, vel mathematicum, quod constat trinâ dimensione; sed non potest Deus habere corpus physicum, quia tale corpus constat materiâ & formâ, quæ sunt partes incompletæ, & quæ separari possunt: & sic tale corpus posset destrui, quod est contra naturam Dei, quæ est summè ne-

## DE DEO UNO.

cessaria. Non potest etiam habere corpus mathematicum, nec constare trinâ dimensione; quia illæ dimensiones essent finitæ, vel infinitæ. Si essent finitæ, Deus esset finitus: si infinitæ, nihil esset in mundo præter Deum istum corporeum, quod absurdum est. Nostræ conclusioni subscribit Scriptura, quæ Joan. 4. dicit, *Deus spiritus est*, & multis in locis asserit, Deum esse Immensum, Immutabilem & Invisibilem, quæ omnia corporibus competere non possunt,

**OBJICIUNT** Anthropomorphitæ illud quod habetur Genes. 1. ubi Deus loquens dicit: *Faciamus hominem ad imaginem & similitudinem nostram*: Unde inferunt, quod si homo, qui corporeus sit Deo similis; Deus etiam corporeus censendus est: sed his Resp. quòd talis similitudo non se teneat ex parte corporis, sed animæ. Quòd si eadem Scriptura partes corporis, ut oculos, manus, brachia, & pedes, attribuat Deo: hæc omnia sumi debent metaphoricè, ut quando vocatur Lapis, Agnus, Leo, &c. ita ut hæc omnia significant aliquid quod est in Deo; per oculos enim Scientia denotatur; per brachia & manus Potentia, & Præsentia per pedes. Scriptura autem hac Metaphorâ utens, humanæ mentis imbecillitatem adjuvate contendit, ducens per cognitionem corporalium, ad spiritualium intellectionem,

## QUÆSTIO IV.

*Verum, Deum esse, sit propositio per se nota.*

**D**ISSIDENT in resolutione hujus Quæstionis Thomistæ & Scotistæ. Illi prætendunt propositionem per se notam, talem dici per respectum ad intellectum; ita quòd eadem propositio quæ erit per se nota alicui, non erit per se nota alteri: unde quia sapientes hanc propositionem, *Deus est*, in dubium revocare non possunt, *insipiens* verò dixit in corde suo, Non est Deus; ideo concludunt esse propositionem per se notam sapientibus, non verò insipientibus. Scotistæ è contra volentes propositionem dici per se notam ex suâ natura, non habitâ ratione ad intellectum, sed ad solos terminos, arguunt Thomistas, quòd non debeant dividere propositionem per se notam in per se notam secundùm se; & per se notam nobis; nec in per se notam sapientibus, & insipientibus: volunt enim quòd propositio, quæ est per se nota, sit talis ex naturâ suâ, quando scilicet est necessaria & essentialis connexio inter terminos ejus, etiamsi à nullo intellectu cognosceretur, unde definitur secundùm eos propositio per se nota, Ea quæ ex terminis propriis, & non aliundè evidentem sui parit notitiam. V. g. hæc propositio: Totum est majus suâ parte, est per se nota; quia, si aliquis cognosceret distinctè quid sit totum, & quid sit pars, & quid sit unum esse majus altero; illicò infer-

ret totum esse majus suâ parte; imò, etsi nullus haberet intelligentiam talis propositionis, non minùs esset per se nota; quia ratio, cur eam non cognosceret, esset quia ignoraret terminos ejus; ubi, si illos cognosceret distinctè, videret esse talem connexionem inter eos, ut de eâ dubitare non posset. Cùm ergo explicatio Thomistarum mihi minùs videatur consona terminis quæstionis propositæ, ideo præcisa erit contra eos nostra.

## CONCLUSIO.

**H**Æc propositio, Deus est, sive Deus existit, est per se nota. Hoc præallato fundamento nititur, quo scilicet diximus, illam propositionem esse per se notam, quæ (cognitis distinctè terminis,) evidentem parit sui notitiam. Sed sic est ista propositio: qui enim apprehenderet distinctè quid est *Deus*, & quid est *existere*, cognosceret eodem instanti ita esse necessariam & essentialem connexionem inter hos terminos, ut nullo modo dubitare posset de illorum complexione, sicut apprehensis his terminis, totum & pars, non potest intellectus, quin evidentissimè cognoscat totum esse majus suâ parte. Quòd si actu ab omnibus non cognoscatur veritas nostræ propositionis, hoc procedit, quòd hi termini, *Deus* & *existere*, non innotescant omnibus; & hoc non tollit rationem propositionis per se notæ; quia aliquid non dicitur per se notum per respectum ad intellectum cognoscentem, sed per respectum ad objectum: proinde, quamvis nullus cognosceret Deum existere, non minùs per se

notum esset; quia est necessaria & essentialis connexio inter Deum & Existentiam ejus, ut videbitur in sequenti *Quæstione*, ubi dicemus Existentiam esse de Essentiâ Dei. Clamitant ergo perperam Thomistæ, volentes prædictam propositionem esse tantum notam Sapientibus; imò pronuntiant contra titulum *Quæstionis*, qui est, de Propositione notâ per se; si enim est nota per se & ex suâ naturâ, cur quærunt an sit nota sapientibus, vel insipientibus?

*Obj. c.* Propositio per se nota secundum Scotum est ea quæ cognoscitur ex solis terminis: Sed ista propositio: Deus est, aliundè quam ex terminis cognosci potest; creaturæ enim evidenter demonstrant existentiam Creatoris: ergo non est nota per se. *R.* Quòd una propositio potest duplici modo probari. A priori, & à posteriori: hoc est per causam, & effectus: quo posito, dist. majorem: Propositio per se nota non potest cognosci nisi ex terminis; à priori, conc. à posteriori nego. Quando autem dicitur in minori, quòd existentia Dei per existentiam creaturæ probari potest; hoc fit à posteriori, seu per effectus; & sic talis probatio non excludit rationem propositionis per se notæ. Exemplificari potest de homine. Quando dicitur: Homo est animal rationale, hæc propositio est per se nota; quia prædicatum convenit essentialiter subjecto: tamen probatur à posteriori quòd homo sit animal rationale; quia actu ratiocinatur; & sic sola probatio à priori impedit propositionem per se notam; & ob hanc rationem, hæc propositiones: Deus est Infinitus, summè Bonus, Trinus, &c. non sunt

## DE DEO UNO.

II

per se notæ; quia datur aliqua ratio quasi à priori, cur Deo conveniant.

---

### QUÆSTIO V.

*Utrum Existentia sit de essentia Dei.*

**Q**UIA Conclusionis præcedentis probatio à solutione præsentis Quæstionis omninò dependet, hanc illi subungere necessarium est. Si enim Existentia sit de essentiâ Dei, verum est dicere quòd hæc propositio: Deus existit, sit per se nota; quia essentialiter & immediatè Prædicatum convenit Subjecto: si autem non sit de quidditate ejus, ruit Conclusio præcedens; quia existentia posset probari de Deo per aliquam rationem quasi à priori desumptam; quod est contra rationem Propositionis per se notæ, quæ ex solis terminis cognoscitur, & omnem probationem à priori excludit. Scotistarum aliqui ad Quæstionem propositam affirmativè respondent; alii negativè; putantes existentiam esse tantum Modum intrinsecum in Deo, sicut in creaturis, & mentem Scoti dicunt esse in hoc problematicam, quod tamen verum esse non judico; maxime cum Doctor Subt. in 1. dist. 2. q. 2. §. ex his ad quæstionem, doceat, Esse seu E istere prædicari de Deo in primo modo dicendi per se, tanquam Prædicatum Immediatissimum, ad quod resolvuntur omnia prædicata de Deo, qualitercunque conceptu enuntiabilia; Quod autem convenit imme-

diatissimè alicui, est de quidditate ejus, & sic de opinione Scoti nulli dubitare licet.

## CONCLUSIO.

**E**XISTENTIA est de essentiâ Dei & de formali conceptu illius. Exod. enim 3. dùm quæreret Moyses Nomen Dei, ut illud significaret Pharaoni; respondit ipsemet Deus, *Ego sum qui sum: Dices ad eos: Qui est me misit ad vos.* Quo posito, sic ratiocinari licet: Moyses quærebat Nomen proprium Dei, ut posset per illud probare à quo mitteretur: suum Deus etiam illi indidit Nomen speciale, quo deberet Deus distingui à creaturis. Sed, si Existencia esset tantum Modus intrinsecus Dei, sicut est Modus intrinsecus creaturarum, per tale nomen Deus non distingueretur à creaturis: Ergo per talem responsionem insinuare Deus voluit, Existere esse sibi essentialē.

**CONFIRMATUR CONCLUSIO.** Quod convenit alicui rei, & non est de ipsius essentiâ, hoc debet illi convenire per aliquam rationem à priori. V. g. quia risibile competit homini, & non est de ejus essentiâ, illi convenit per rationalitatem, quæ est ratio à priori risibilitatis: Sed per nullam rationem priorem Existencia potest convenire Deo: Ergo remanet ut sit de ejus essentiâ. Prob. Min. Si Existencia Deo conveniret per aliquam rationem à priori, v. g. per essentialitatem; in illo priori signo, in quo intelligeretur essentia ante existentiam, vel essentia existeret vel non existeret; neutrum autem potest esse; quia, si primum esset verum, essentia existeret antequam existeret;



quod est contradictorium; & si secundum daretur, esset aliquod instans, in quo essentia sine existentia posset concipi, & pro tunc potentialitatem admitteret, quæ est imperfectio entis simplici repugnans.

**O b j e c t.** Quæstio, An sit Deus, distinguitur à quæstione, Quid sit Deus; Sed per primam quæstionem, quæritur Existentia Dei, & per secundam, quæritur Essentia: Ergo secundum omnes Theologos qui has sic distinctè proponunt quæstiones, Existentia & Essentia in Deo distinguuntur; & sic unum non est de Essentiâ alterius. **R.** quòd hæc Quæstiones ex parte objecti non differunt, licet distinguantur ex parte intellectus nostri; qui propter sui tenuitatem de increatis ac de creatis permiscuè discurrere cogitur. Si tamen intellectus noster ad visionem Dei intuitivam elevaretur, videret sanè has Quæstiones solo nomine distingui, & Existentiâ non esse quid distinctum ab Essentiâ.

**O b j e c t.** Existentia creata non est de essentiâ creaturæ: Ergo existentia Dei non est de essentiâ ejus. Probatur consequentia: Quando aliqua duo conveniunt in aliquo communi; si illud commune sit de essentia unius, erit de essentiâ alterius; & vice versâ, si illud non sit de essentiâ unius, non erit de essentiâ alterius: Sed existentia creata & increata conveniunt in existentia in se: Ergo cum existentia increata non sit de essentiâ creaturæ, existentia increata non erit de essentiâ Dei. **R.** neg. consequentiâ. Ad probationem dico, hoc verum esse quando illa ratio communis participatur ab inferioribus, quæ sunt

ejusdem naturæ & prædicamenti ; ut patet de animali , quod est æquè de essentia bruti , ac de essentia hominis ; non sic autem quando fit comparatio inter entia , quorum unum est transcendens & aliud categoricum , vel unum est creatum , & increatum aliud.

Discurrendum est de Substantiâ communi , sicut de Existentiâ ; quod scilicet sit de essentia Dei. Dico de substantiâ communi & essentiali , quæ Deo competit , ut Deus est ; non verò de Substantiâ notionali , quæ Personis divinis propria est ; sicut enim Personæ non sunt de quidditate Dei ; sic nec erunt Substantiæ personales.

#### QUÆSTIO ULTIMA.

*An Existentia Dei possit demonstrari.  
naturaliter.*

**N**ON loquimur de probatione supernaturali quæ fit per revelationem , Scripturæ enim nihil aliud inculcare videntur , quam Existentiam Dei : sed de probatione naturali , quæ rationi humanæ nititur. Non loquimur etiam de probatione naturali , quæ à priori fiat ; ista enim est impossibilis ; cum debeat esse per causam , quam nullo modo Deus agnoscit. Quæstio ergo est ; utrum viâ naturali , à posteriori saltem , & per effectus , Existentia Dei probari valeat ,

**E**VIDENTER demonstrari potest Existentia Dei à posteriori, viâ scilicet creaturarum : & hoc habetur Rom. 1. *Invisibilia Dei per ea quæ facta sunt intellecta conspiciuntur.* Sap. 13. *A magnitudine speciei & creatura poterit Creator omnium videri cognoscibiliter.* Ps. 13. *Cæli enarrant gloriam Dei.* Job 12. *Interroga jumenta & docebunt te : volatilia cæli, & indicabunt tibi : loquere terra, & tibi respondebit.* Hæc assertio fuit semper omnibus Patribus communis ; unde explicantes locum Ps. 13. *Dixit insipiens in corde suo : Non est Deus,* observant, impium hoc dicere in corde suo, & in occulto, quia non audet exterius tantam prodere insaniam. Post Scripturarum allegationem & Patrum testimonia, quæ in tali sunt numero, ut ea recensere impossibile esset ; superest ut demonstrationes afferamus, quibus naturaliter Existentia Dei comprobari possit.

PROBATUR ergo. Multæ sunt res productæ, & quæ quotidie generantur, ut metalla, plantæ, animalia, &c. illa ergo omnia vel sunt à se ipsis producta, vel ab aliis producta fuerunt. Primum est impossibile, nihil enim se producere potest ; imò quidquid producitur, ab alio semper producitur, ex communi axioma quod nullus Philosophorum unquam negavit : Ergo remanet ut ab alio producantur. Illud autem aliud, vel est à se, vel ab alio ; Non à se, ut diximus, ergo ab alio : Si ab alio, illud tertium erit à quarto, quartum à quinto, & sic admittendus esset processus in infinitum.

tum, quod nullus unquam audebit asserere: vel deveniendum ad aliquod primum Ens, quod erit omnium causa & principium, & à nullo alio produceretur; & istud erit Deus. Ad corroborationem hujus argumenti requiritur probatio horum principiorum: Quidquid producitur, ab alio producitur; & in causis subordinatis non potest dari processus in infinitum: sed hoc ostendetur in solutione primæ objectionis. Posset probari secundò, ex mundi conservatione, qui, cum componatur ex elementis semper inter se pugnantibus, non posset conservari, nisi esset aliquis supremus Dominator, cui elementa velut herofamuli obtemperarent. Posset probari tertio, ex mundi pulchritudine, creaturarum gubernatione & semper æquo cælorum & planetarum motu, qui diù non se tam uniformiter haberet; nisi sub lege Dei, qui hæc omnia ita disposuit. Posset probari quarto ex studio hominum ad virtutem, quod inane esset, nisi existeret Deus bonorum remunerator, & ultor impiorum. Posset probari quinto ex naturali hominum inclinatione ad beatitudinem, non naturalem, quia non satiat appetitum; sed supernaturalem, quæ est Deus. Tandem potest probari ex omnium populorum consensu, quorum plurimi maluerunt habere falsum Deum, quàm nullum.

Objic. contra primum principium, quod sic habet, Quidquid producitur, ab alio producitur: Dicent Athæi, hoc esse falsum; quando quidem non solum Ethnici, & Gentiles; sed etiam Ecclesiæ Doctores, & præsertim Tertul. l. de Resurrect. carnis cap. 13. re-

ferunt historiam Phœnicis, qui dicitur naturaliter seipsum reproducere; unde utuntur exemplo illius ad probandam Resurrectionem. Resp. primò, historiam Phœnicis esse prorsus incertam & dubiam; plerique enim illam omnino negant. Resp. secundò, licet historia Phœnicis esset vera, quam plurima de eo dici quæ sunt fabulosa. R. tertio, quamvis per hypothese[m] renasceretur ex suis cineribus; illum, qui reproducitur, non esse eundem numero, sed tantum specie. Resp. quarto, quod Patres, assumendo Phœnicem ad probandam Resurrectionem, non volunt tamen inferre quod sit idem numero reproductus & produciens; sed insinuare peroptant, quod non sit aptior similitudo; licet enim in hoc claudicer, quod eadem numero corpora resurgent, & non idem numero Phœnix reproducatur; in hoc tamen congrua videtur, quod ista avis renascatur paucis post diebus, sine patre & sine matre, postquam etiam in cineres reducta est. R. quinto, quod, si quis quærat rationem cur id quod producitur ab alio produci debeat; in promptu hæc erit; quia, si idem produceret seipsum; unum & idem esset simul in actu, & in potentiâ, existeretque simul & non existeret: existeret inquam, quia produceret; & ad esse sequitur operari: non existeret verò, quia quod producitur, antea non existerat; & sic remanet veritas nostri principii.

Objec. contra secundum principium, nullam reperiri contradictionem, quod in ordinatione causarum admittatur processus in infi-

nitum. Resp. hoc axioma esse Arist. qui 2.<sup>o</sup> Meth. cap. 2. sic habet, In causis essentialiter subordinatis, i. quarum una ab aliâ dependet, non procedendum est ad infinitum: Non gratis ergo fingitur à nobis hoc principium. Deinde ostenditur esse contradictionem in tali processu ad infinitum: si enim in causarum subordinatione non deveniretur ad aliquam primam & independentem, à quâ cæteræ dependeant, tota collectio causarum esset simpl. dependens & independentens. Esset primò dependens; quia in illâ collectione causarum nulla est causa quæ non dependeat ab aliâ; ergo tota collectio dependet; quia quod negatur de omnibus partibus collectivis, negatur de tota collectione; collectio enim nihil aliud est, quàm partes collectæ. Esset secundò independentens; quia si dependeret, vel dependeret ab aliquâ causâ quæ esset extra illam collectionem, quod est falsum; quia supponimus esse collectionem omnium causarum, & sic nullam esse extra illam collectionem; vel dependeret ab aliquâ causâ quæ esset intra illam latitudinem, quod etiam verum esse nequit; alias totum dependeret adæquatè ab aliquâ sui parte. Ut tollatur ergo ista contradictio, deveniendum est ad aliquam primam causam, à quâ aliæ dependeant, & hæc erit Deus.

O B J E C T. Si Deus demonstraretur, hoc esset per effectus, sed prima causa per effectus demonstrari non potest: Nam, ut effectus possit demonstrare causam, debet illi esse proportionatus: Sed nullus effectus potest proportionari primæ causæ; omnes enim sunt finiti, &



alia sunt extra essentiam, ut proprietates, v. g. esse risibilis, doctrinæ capax, &c. & hæc prædicantur de homine in secundo modo dicendi per se. Prima possunt subdividi; ita quod alia sunt purè essentialia, ut esse animal; alia sunt non purè essentialia, ut esse rationalis; quia ut patet ex Logicâ, rationalitas non prædicatur simpliciter in quid de homine, sed in quale quid, & sic est prædicatum non purè quidditativum, sed quidditativum qualificativum: & licet utrumque prædicetur de homine in primo modo dicendi per se; tamen animalitas prædicatur in primo gradu, & rationalitas in secundo. Sic ergo, de Deo proportionatè differere volentes, dicimus quod prædicata, quæ illi conveniunt essentialiter, sunt etiam in duplici differentiâ: alia enim sunt putè essentialia, ut ea de quibus loquuti fuimus; & alia sunt non purè essentialia, ut modi intrinseci; & licet utraque prædicentur de Deo essentialiter, & illi conveniant in primo modo dicendi per se; prima tamen conveniunt Deo in primo gradu; alia in secundo; & hæc est germana ratio, quare illa, quæ in præcedenti Capite explicata sunt, vocantur Prædicata purè quidditativa, & illa, quæ in præsentī explicabuntur, dicuntur non purè quidditativa, ac tandem ea de quibus agemus in tertio, quæ sunt Attributa, appellantur purè non quidditativa, quia sunt extra essentiam Dei & illi tantum conveniunt in secundo modo dicendi per se, tanquam proprietates ipsius. Antequam Modorum intrinsecorum rationem explicemus in particulari, ali-



qua dicenda sunt de illis in communi, quæ certis quibusdam Quæstiunculis dilucidabuntur.

QUÆRES quid sit modus intrinsecus in se? Resp. illud sic describi: Id quod additum rei, non variat rationem formalem & essentialem ipsius, ut finitas & infinitas, ens enim finitum & infinitum non differunt formaliter essentialiter, sicut nec linea finita & infinita, inquit Scotus: unde si Deus, qui est infinitus, & homo, qui est finitus, differunt essentialiter; hæc differentia, essentialis non petitur à finitate aut finitate; sed hoc procedit, quòd Deus sit talis naturæ, i. Naturæ D. cui infinitas propria est, & homo sit talis naturæ, nempe humanæ, quæ revera est finita.

QUÆRES quænam distinctio sit inter Modum intrinsecum, & differentiam? Resp. desumi ex antedictis, quòd scilicet Differentia faciat differre essentialiter rem cujus est Differentia; Modus verò intrinsecus faciat tantum differre modaliter rem cujus est modus. Sic v. g. Rationale & Irrationale faciunt differre hominem essentialiter à bruto; Infinitas verò & Finitas faciunt tantum differre modaliter calorem infinitum & finitum; unde, si daretur calor infinitus, esset ejusdem speciei ac calor finitus, sicut calor intensus ut octo est, ejusdem essentialis & speciei ac calor ut duo.

QUÆRES quomodo differant Modus intrinsecus, & Differentia? Resp. in hoc differre quòd Differentia sit realitas adveniens realitati generis, quâ specificatur genus & determinatur ad speciem. Modus verò intrinsecus est tantum gradus realitatis, quo modificatur superius, &

explicatur esse in tali vel tali gradu V. g. Rationalitas, quæ est una realitas addita Animalitati, est differentia; quia specificat ipsum animal quod est genus, & ex illo facit speciem. Finitas verò & infinitas advenientes Enti, non sunt novæ realitates, sed sunt tantum gradus qui rationem Entis explicant; & exprimunt an sit magis vel minus, finitè vel infinitè intensum.

**QUÆRES** an insuper detur alia ratio, quæ distinguat Modum intrinsecum & Differentiam? **R.** Hanc adhuc reperiri; quod realitas generis possit in quocunque gradu sibi debito, perfectè concipi sine realitate Differentiæ; non sic autem realitas modificari sine suo modo. Exemplum primi: In quocunque gradu concipiatur Animalitas, nunquam concipietur Rationalitas; quia est quid illi extrinsecum. Exemplum secundi; si ens concipiatur cum omni gradu sibi debito, necessario concipi debet tanquam finitum aut infinitum; & si non concipiatur cum istis modis, talis conceptus erit inadæquatus, & imperfectus, ubi conceptus generis sine suis differentiis, erit perfectus & adæquatus.

**QUÆRES** quemodo vocari debeat illa distinctio, quæ est inter Genus & Differentiam, & illa quæ reperitur inter Modum & Modificatum? **Resp.** quòd Genus & Differentia distinguantur formaliter simpliciter; quia, ut diximus, genus est una formalitas seu realitas, & differentia est alia; distinctio autem, quæ est inter duas formalitates, debet dici simpliciter formalis. **Resp.** 2. distinctionem, quæ est inter Modificatum & Modum, v. g. inter ens & infinitum, non debere dici formalem simplici-

cer ; quia non est inter duas formalitates , sed formalem modalem ; quia est inter rem & modum seu gradum ejus.

**Q**UÆRES quid sit modus intrinsecus Essentia D. Explicatâ ratione Modi intrinseci in se considerati , nunc ad Modos intrinsecos Naturæ D. transeundum est. **R**espondetur quod sit prædicatum intimum , soli Essentia D. conveniens , per quod removentur à Deo imperfectiones creaturarum , & sine quo ipsa Essentia adæquatè concipi non potest. Dicitur 1. Prædicatum , in quo convenit cum Attributo , quod est etiam Prædicatum Dei. Dicitur 2. Intimum ; quia est in primo modo dicendi per se , licet in secundo gradu ; ubi Attributa non sunt in primo , nec secundo gradu , sed in secundo modo. Dicitur 3. soli Essentia D. conveniens : & in hoc insuper ab Attributo distinguitur , quod creaturæ convenit & attribuitur Deo , seclusâ imperfectione , ut patet in Intellectu , Voluntate , Unitate , Veritate & Bonitate ; quæ Attributa sunt , & competunt creaturæ ; non sic autem de Modis Intrinsecis ; soli enim Deo attribuuntur , ut Infinitas , Immensitas , &c. Dicitur 4. per quod à Deo removentur imperfectiones creaturarum ; per Infinitatem enim removetur à Deo ratio entis finiti : per Æternitatem arcetur ratio essendi in tempore ; per Immensitatem tollitur limitatio ad unum locum ; & sic de cæteris Adjungitur tandem , sine quo Essentia D. adæquatè concipi nequit ; quia , si quis velit intelligere perfectè Essentiam D. cum omni gradu sibi debito , intelliget sanè illam esse infinitam. Exemplificari potest de albedine existente in

pariete. Potest intelligi adæquatè, & inadæquatè : intelligetur tantùm inadæquate, si in eâ consideretur sola ratio albedinis in quantum scilicet est qualitas disgregativa visus : intelligetur autem adæquatè & perfectè, si consideretur cum omni gradu sibi convenienti: 1. quomodo sit intensa, an ut duo aut quatuor. Sic à pari de Essentiâ D. si intelligatur tantùm inadæquatè, ut Essentia D. est, potest concipi sive Modis intrinsecis, v. g. sine infinitate; ut autem perfectè concipiatur cum omni gradu sibi debito, debet concipi cum illis, & consequenter cum infinitate; & sic bene definitur Modus Intrinsecus Dei, prædicatum sine quo Essentia D. distinctè & adæquatè nequit intelligi.


QUÆRES in quo conveniunt Prædicata purè quidditativa cum Modis intrinsecis, & Modi cum Attributis, & quomodo disconveniunt? Hæc omnia jam dicta sunt; distinctiùs tamen hic recensenda, ne aliquis remaneat ambigendi locus: & hoc magis scitu necessarium est, quò videmus omnes Theologos, exceptis Scotistis, permiscuè agere de Modis intrinsecis & de Attributis, unde. Resp. 1. in hoc convenire Prædicata purè quidditativa cum Modis intrins. quia utraque prædicantur de Deo in primo modo dicendi per se; & in hoc disconveniunt, quod prædicata purè quidditativa, de Deo dicuntur in primo gradu, & ideò vocantur purè quidditativa; & Modi intrinseci in secundo; & ob hoc nuncupantur Prædicata non purè quidditativa: Exemplum adduximus de homine, ubi Animalitas

malitas dicitur Prædicatum purè quidditativum, & Rationalitas non purè quidditativum; quia est qualificativum; quoniam Differentia prædicatur in Quale quid de subjecto. Resp. 2. quòd in multis conveniant Modi & Attribute. Primò, quòd utraque competant Deo; dicitur enim de illo quòd sit Infinitus, Immenſus, Æternus, qui ſunt Modi; & quòd ſit Unus, Verus, Bonus, Intelligens, & Volens, quæ ſunt Attribute. Conveniunt ſecundò in hoc quòd utraque ſint idem realiter cum Eſſentiâ; quicquid enim eſt in Deo, realiter eſt Deus. Tertiò, conveniunt in eo quòd tam Modi; quàm Attribute dicant in Deo perfectionem ſine imperfectione; & ſic Deo formaliter competunt & non tantum eminenter; ut eſſe equus, eſſe homo, &c. Quartò, utraque pullulant ab Eſſentiâ D. licet aliquâ prioritate priùs pullulent Modi, quàm Attribute. Resp. 3. in tribus differre. Primò, quia Attribute reperiuntur in creaturis; non verò Modi: nullum enim ens creatum eſt infinitum, immenſum, neq; æternum. Secundò, quia Attribute ſunt in ſecundo modo dicendi, & modi in primo. Tertiò, quia Attribute diſtinguuntur formaliter ab Eſſentiâ & ex naturâ rei, ut dicitur aliquando; Modi verò non diſtinguuntur, niſi modaliter. Quòd ut pateat.

QUÆRES, quænam ſit diſtinctio inter Modos intrinſecos & Eſſentiam D. Resp. non diſtingui formaliter poſitivè; ſed tantum formaliter negativè, ſeu formaliter modaliter. Diſtinctio autem formalis poſitiva, eſt ea quæ eſt inter duas realitates, ſeu formalitates, quarum una

est distinctè conceptibilis sine alia. v. g. quia albedo & dulcedo in lacte sunt duæ formalitates seorsim conceptibiles; ideo distinguuntur formaliter positivè. Distinctio verò formalis modalis, seu negativa, est ea quæ reperitur inter formalitatem & gradum, seu modum ejus: V. g. detur albedo intensâ ut duo; albedo est formalitas, intensio verò non est alia formalitas, sed tantum gradus formalitatis: & sic albedo & intensio albedinis non distinguuntur formaliter positivè; quia non sunt duæ formalitates: sed distinguuntur formaliter modaliter, tanquam formalitas à modo suo. Sic dicendum est de Essentiâ D. & Modis intrinsecis: quia, inquam, Infinitas v. g. non est alia formalitas ab Essentiâ D. ideo non distinguuntur formaliter positivè: quia tamen est modus superadditus Essentiæ, qui dicit aliquid plusquam Essentia, ideo distinguuntur formaliter modaliter, vel formaliter negativè, quia negatur formalitas positiva: vel tandem formaliter inadæquatè, non formaliter adæquatè, ut dicunt alii Scotistæ, qui ponunt distinctionem formalem adæquatam inter Attributa & Deum, & formalem inadæquatam inter Essentiam & Modos. His ergo omnibus prælibatis, deveniamus ad explicationem particularem Modorum intrinsecorum, qui sunt Infinitas, simplicitas, Immutabilitas, Immensitas, Æternitas, Invisibilitas, Incomprehensibilitas, & Ineffabilitas.





## DISPUTATIO PRIMA,

*De Infinitate Dei.*

**E**X præludio antecedenti clarum est, quòd non immeritò distinguamus Modos Intrinsecos ab Attributis, & quòd jure instituamus diversa capita de illis diversis Prædicatis, quæ diversimodè Deo conveniunt. Sumendum autem est exordium ab Infirmitate, quæ secundum nostrum concipiendi modum, videtur præcedere alios Modos, & esse veluti ratio illorum: si peteretur enim, quare Deus est Immensus, Æternus, Immutabilis, Incomprehensibilis, & Ineffabilis, posset aliquo modo responderi; quia Infinitus est.

---

 QVÆSTIO PRIMA.
*An Deus sit infinitus.*

**I**ST A duo vocabula, Finitum & Infinitum; attribuuntur quantitati, sive sit molis, sive perfectionis. Hic non quærimus, an Deus dicatur Infinitus quantitate molis; talem enim probavimus procul esse à Deo, resolventes Deum non esse substantiam corpoream: & sic quæstio intelligitur an Deus sit infinitus quantitate perfectionis, vel potius in perfectione. Quid sit ens infinitum in perfectione, explicat

Scotus dupliciter : comparatè scilicet , & absolute. Primo modo , est quod excedit in proportionem quodcumque ens finitum , ultra omnem determinatam & determinabilem proportionem. Hæc descriptio est comparata & relativa : quia datur per comparisonem entis infiniti ad ens finitum. Secundo modo , est illud , cui nihil entitatis & perfectionis deest , eo modo quo potest habere. Hoc est , ens infinitum est illud , quod habet omnes omnium entium perfectiones , sive formaliter , sive eminenter. Quid sit autem continere aliquid formaliter , aut eminenter , habetur in questione sequenti.

## CONCLUSIO.

**D**Eus est simpliciter Infinitus. Hoc est de fide, & habetur in Concil. Latèran. cap. firmiter. Sic etiam in S. Script. Baruch. 3. *Magnus & non habet finem, excelsus & immensus. Ps. 144. Magnitudinis ejus non est finis.* Revelationi D. subscribunt Patres. Dionys. de Divin. nomin. cap. 9. *Magnus est super omnem magnitudinem, omnem transiliens infinitatem.* Damasc. lib. 1. de fide Orthodoxa, cap. 4. *Infinitus est Deus atque incomprehensibilis, & hoc unum de ipso percipi potest, quod nimirum ipse infinitus sit.* Sic & quamplurimi alii.

**PROBATUR** ratione. Primò , quia nullum datur ens limitatum , nisi habeat aliquam causam suæ limitationis ; unde si entia creata sunt limitata , hoc est , quia eorum causa efficiens , vel non potuit dare suo effectui ulteriorem



perfectiorem, vel non voluit; ut quando Deus creavit mundum, vel Angelos, non voluit illos creare perfectiores; imò ita omnia statuit disponere, ut essent in numero, pondere, & mensura: Sed à nullo Deus potest limitari: Ergò. Secundò, quia omni ente non potest dari aliquod majus; sed si Deo posset dari majus, non esset Deus; per Deum enim intelligimus omnium entium perfectissimum & præstantissimum. Tertiò, quia nulla est perfectio actualis, vel possibilis, quæ in Deo non reperiatur in gradu infinito, ut patet consideranti: Est enim infinitus in duratione ratione suæ æternitatis; infinitam habet inexistentiã, ratione suæ immensitatis; est infinite bonus, potens, intelligens, volens, &c. ergo est infinitus simpliciter.

**O B J E C T.** Si Deus esset Infinitus, esset infinite bonus; & si esset infinite bonus, nullum malum sineret esse in mundo: si enim unum contrarium infinitum esset intra mundum, omne sibi contrarium penitus destrueret: quoniam: ergo videmus oriri quotidie mala, signum est quod Deus non sit infinite bonus. **R e s p.** Deum esse & Infinitum secundum substantiam, & Infinitum in bonitate; non tenetur tamen omne malum destruere. Quando ergo objectio dicit, Vnum contrarium infinitum destruit aliud; dist. Quando est agens necessarium quod ad extremum suæ potentia agit; conc. quando est agens liberum, uti est Deus, qui ad extrã non agit per naturam, sed per summam libertatem; nego.

**O B J E C T.** Quod est tantum in uno loco, & non in alio, est finitum secundum locum,

quod est tantum in uno tempore & non in alio, est limitatum secundum tempus; & quod est ita hæc substantia, ut non sit alia, est finitum secundum substantiam; Sed Deus est ita substantia sua, ut non sit substantia lapidis, nec equi, nec plantæ: Ergo secundum substantiam est finitus. R. ad majorem: Quod est ita substantia hæc, ut non sit alia, est finitum secundum substantiam; dist. Si non sit alia, nec formaliter, nec eminenter, conc. si sit alia vel formaliter, vel eminenter, nego. Ad Min. Sed Deus non est substantia lapidis; dist. formaliter, conc. eminenter, nego: Hæc patebunt inferius.

Objic. Si Deus aliquo modo est substantia lapidis, plantæ, aut equi: Ergo in se continet substantiam equi, lapidis, aut plantæ: Ergo poterit denominari ab illis, tum planta, tum equus, tum lapis continens enim denominatur à contento, ut homo doctus à doctrinâ quam continet, paries albus, & ignis calidus, ab albedine & calore in illis existentibus: quis autem vellet Deum denominare corporeum à plantâ, & brutum ab equo? Resp. Deum esse eminenter prædictas substantias, & illas etiam continere eminenter; ab illis tamen non debere denominari: continens enim denominatur tantum ab illis quæ continet formaliter, ut patet in allatis exemplis de homine, pariete, & igne, qui continent formaliter doctrinam, albedinem, & calorem; non verò ab illis quæ eminenter continet: licet enim sol contineat eminenter, vel quasi eminenter ranam, aut vermes: non tamen ver-

mis aut rana solet denominari : sic nec Deus debet dici planta , equus , aut lapis.

## Q U Æ S T I O II.

*Quid sit Continentia formalis, & quid eminentialis.*

**S**ÆPÈ sæpiùs contingit , quòd defectu cognitionis terminorum quæstiones , conclusiones & responsiones non innotescant ; ideo quia jam perfunctoriè diximus , & postea dicemus ex professo , Deum ratione Infinitatis suæ continere omnes omninò perfectiones , diversimodè tamen ; alias nimirum formaliter , alias verò eminenter , ideo priùs aperiendum est , quid sit continere aliquid formaliter ; & quid sit continere eminenter.

### C O N C L U S I O.

**C**O N T I N E N T I A formalis est ea , quæ unum continet aliud secundum suam essentiam , & rationem formalem ; ita quòd à continente denominari queat : sic homo dicitur formaliter continere rationalitatem ; nix albedinem , & ignis calorem ; quia quidditas rationalitatis est actu in homine , ratio formalis albedinis est propriè in nive , & caloris essentia est in igne : homo etiam propriè à rationalitate dicitur rationalis ; nix alba ab albedine ; & ignis calidus , à calore. Continentia eminentialis est ea , quæ unum potest aliud producere , & actiones ejus ; estque nobiliori modo contentum in continente , quam in seipso : sic dice-

B. iij

mus postea, quòd Deus multas perfectiones, quæ sunt in creaturis, contineat & sic est differentia inter Continentiam eminentialem, & Continentiam virtualementem: Continentia enim virtualis est quâ continens habet virtutem producendi aliud, & non actiones ejus: continens autem habet virtutem producendi actiones contenti, non verò ipsum contentum: sic sol continet virtualiter ranam, quia potest illam producere, & non actiones ejus: sic etiam anima rationalis continet sensitivam virtualiter, in quantum illius actiones elicere valet; licet illam animam producerenequeat. Continentia autem eminentia est ea, quâ unum aliud producere potest, & actiones ejus; ubi etiam contentum est nobiliori modo in continente, quàm in se: sic Deus continet eminenter angelum, hominem, bruta, &c. quia potest substantias angeli, hominis, & brutorum producere, & actiones illorum; & insuper illa omnia sunt nobiliori modo in Deo, quàm in seipsis; quia in seipsis, vel sunt irrationalia, vel corpora, vel finita & limitata; in Deo verò sunt intellectualia, spiritualia, & infinita; nam quidquid in Deo est, Deus ipse est. Porro diximus, quòd à continentia formali continens denominetur; non verò à virtuali, nec ab eminentiali; sol enim non denominabitur vermis, à verme, quem continet virtualiter; nec Deus vocabitur corpus à corpore, quod eminenter includit: benè tamen justus à justitia; quia ratio justitiæ est formaliter in illo, & non tantum eminenter.

---

 QUÆSTIO III.

*Quid sit perfectio simpliciter, & perfectio secundum quid.*

**C**VILIBET Theologorum volumina lægenti constabit, alias esse perfectiones simpliciter, alias verò secundum quid: sed non sine labore improbo penetrabit quid sit utraque; maxime ob definitionem D. Anselm. cap. 14. Monolog. cujus verba ita obscura videntur, ut sine explicatione prævia Theologiæ candidati illam penetrare non possint. Quia ergo talium perfectionum natura innotescere debet, ut quilibet respondere possit, quæ sint illæ perfectiones, quas Deus continet formaliter, & quas eminenter: idè definitionis D. Anselmi elucidationem aggredimur.

## CONCLUSIO.

**P**ERFECTIO simpliciter est ea quæ in unoquoque est melior ipsa quàm non ipsa. Ita de Ansel. loco citato. Sed ut hoc pateat, duo explicanda sunt. 1. quid intelligat præfatus Doctor per illam particulam, *quàm non ipsa*. 2. quid intelligere debeamus, per aliam particulam, *in unoquoque*. Unde ad primum dico, quòd ly non ipsa, non sumi debeat contradictoriè, pro negatione sui; quia pro tunc quælibet perfectio esset perfectio simpliciter; est enim melior, quàm sui negatio: v. g. esse corpus, melius est, quàm non esse corpus, præcisè loquendo; negatio enim non est perfectio: sed

debet sumi contrariè, ita quòd sit sensus; Perfectio simpliciter est ea, quæ est melior ipsa, quam non ipsa; hoc est, quàm alia perfectio positiva sibi repugnans & impossibilis; v. g. esse corpus, & esse spiritus, sunt duæ perfectiones impossibiles & repugnantes ad esse in eodem subjecto; esse spiritus, erit perfectio simpliciter; quia spiritualitas est melior corporeitate, quæ est perfectio contraria & repugnans: è contra esse corpus, non erit perfectio simpliciter, sed tantum secundum quid; quia licet esset quid melius homini esse corpus, quàm non esse corpus; melius tamen esset illi; esse Angelus & spiritualis. Superest ergo examinanda alia particula, *in uno quocumque*; si enim per illam vocem intelligeretur quodcumque suppositum entis, ut suppositum talis entis est, pro tunc quælibet perfectio esset perfectio simpliciter; quia melior est in tali ente, ut tale ens est, quàm alia sibi repugnans, etiam si sit præstantior: v. g. esse corpus, esse lapis, esse equus, non sunt perfectiones simpliciter; melius tamen est corpori, ut corpus est, esse corpus, quàm esse spiritus: & lapidi, ut lapidi, esse lapis, quàm esse homo. Alio modo explicanda est igitur talis particula, scilicet de supposito entis, ut ens est: ita quòd hic sit sensus definitionis secundum Scotum & alios: Perfectio simpliciter est ea, quæ est melior ipsa, quam sibi contraria in unoquoque supposito entis, ut suppositum entis est: & sic esse corpus, non est perfectio simpliciter, quia licet melius sit v. g. lapidi, ut lapis est, esse lapis, quàm Angelus; attamen melius esset lapidi,

ut ens est, esse Angelus: licet etiam homini, ut homo est, melius esset esse homo, quam Angelus; si consideretur tamen ut est ens, melius illi esset, esse Angelus. Hæc est ergo propria distinctio inter perfectionem simpliciter & perfectionem secundum quid, quod illa sit melior in totâ latitudine entis, quam sibi contraria; ista verò sit tantum melior in certo genere entis, & in naturâ determinatâ. In hanc doctrinam redit quod aliqui dicunt, perfectionem simpliciter esse quæ non admittit imperfectionem; perfectionem verò secundum quid, quæ admixtam imperfectionem habet.

#### Q U Æ S T I O I V.

*Qualiter Deus omnes Perfectiones contineat:*

**N**ON amplius superest multa difficultas in solvendâ hac quæstione; cum enim dixerimus in primâ Deum esse simpliciter Infinitum; in secundâ examinaverimus Continentiam formalem, & eminentialem, qui sunt modi quibus Deus aliquid continere dicitur; & in præcedenti conati fuerimus explicare differentiam quæ reperitur inter perfectionem simpliciter, & perfectionem secundum quid; nunc remanet, ut expeditè concludamus, quomodo istas includat.

#### C O N C L U S I O.

**D**EUS continet perfectiones simpliciter, putâ Vitam, Sapientiam, Veritatem,  
B vj

Unitatem , Bonitatem , Misericordiam , Justitiam , Intellectum , Voluntatem & cæteras hujusmodi , Continentiâ formali ; unde ab illis denominatur Vivens , Sapiens , Verus , Unus , Bonus , Misericors , &c. Ratio hujus est ; quia non involvunt imperfectionem ; & sic nihil obest quin illas includat secundum earum quidditatem & rationem formalem : imò Infinitas Dei hoc exigit. Perfectiones autem secundum quid , ut esse Corpus , esse lapis , esse Brutum , esse Homo , esse planta , &c. continet tantum eminenter , & ab illis non potest denominari nec Corpus , nec Lapis , nec Brutum , &c. à continentiâ enim eminentiali , ut diximus , non sumitur denominatio. Quòd autem illæ perfectione , non sint in Deo formaliter , patet ; quia involvunt imperfectionem , aliquæ compositionem , aliæ corporeitatem , aliæ potentialitatem , & omnes dependentiam : nihil autem imperfectum est in Deo formaliter.

O b j e c. Perfectiones quæ sunt in creaturis , ut bonitas , misericordia , intellectus & voluntas , sunt perfectiones secundum quid ; sed illæ sunt in Deo formaliter : Ergo perfectiones secundum quid , sunt formaliter in illo. Resp. hæc perfectiones , v. g. intellectum & voluntatem , &c. posse concipi , vel in se , vel ut sunt in creaturis. Si considerentur ut sunt in creaturis , seu ut sunt quid creatum , finitum & limitatum ; sunt reverà perfectiones secundum quid ; & pro tunc non sunt in Deo nisi eminenter : Si verò spectentur in se , & secundum suam naturam , sunt perfectiones simplices ; & pro tunc in Deo formaliter existunt.



## Q U Æ S T I O V.

*Quid sit Infinitas divina.*

**N**EMINEM latet quin Infinitas sit prædicatum quoddam intrinsecum Deo conveniens propriè, & quo omnes creaturarum perfectiones dicuntur esse in illo; sed cujus rationis sit illud Prædicatum, hoc est quod quaeritur; an scilicet sit Prædicatum purè quidditativum; aut non purè quidditativum, seu Modus intrinsecus; aut denique purè non quidditativum, seu Attributum, Hoc docebit

## C O N C L U S I O.

**I**NFINITAS est Modus intrinsecus Essentiae D. quia vel est Prædicatum purè essentialiale, vel Modus intrinsecus; vel Attributum; Sed non est Prædicatum essentialiale, nec Attributum: ergo remanet quòd sit Modus intrinsecus. Probatur prima pars minoris; quod Infinitas non sit de quidditate Dei; ex Scotto in 1. dist. 2. quaest. 1. §. ad 1. quaest. & q. 2. §. ad quaestionem, ubi dicit Doctor, quòd Infinitas sit à priori demonstrabilis, scilicet ab illo qui haberet conceptum Dei quidditativum: quæ autem sunt de quidditate rei, à priori demonstrari non possunt. Ratio Scoti est, quòd sicut Finitas videtur pullulare ex quidditate creaturæ, & intensio

ex qualitate determinatâ; sic etiam Infinitas videtur radicari in Essentiâ D. jam constituta suis Prædicatis essentialibus. Probatur 2. pars minoris, quia Attributa reperiuntur in creaturis, & per viam emanentiz attribuuntur Deo; Nulla autem creatura Infinitatem habere potest: Ergo non est Attributum; & sic remanet quoddam sit Modus: unde definitur rectè Modus intrinsecus naturæ D. per quem Deo nihil deest entitatis, eo modo quo potest habere, hoc est, sive formaliter, sive eminenter.

Obj. c. Patres describunt Essentiâ D. per Infinitatem; unde Damasc. dicit Deitatem esse infinitum essendi pelagus; Quod autem ingreditur definitionem alicujus, est illi essentialiale: Ergo. Resp. Patres definire Deum, per Infinitum, tanquam per primum conceptum, quem habere possumus de Deo pro hoc statu; conc. tanquam per primum conceptum, qui possit haberi de eo à parte rei; nego. Quia si quis Essentiâ D. videret intuitivè, videret etiam Infinitatem emanare ab Essentiâ & ab Essentialibus.

Obj. c. Ex Scoto, qui in 1. dist. 4. q. 3. §. ad primum, docet Ens infinitum prius intelligi esse infinitum, quam hoc ens: sed Hæcceitas, sive Singularitas, est de Essentiâ Dei: ergo & Infinitas. Resp. Ens est prius infinitum, quàm hoc, secundum nostrum concipiendi modum; conc. à parte rei; nego: licet enim communiter Ens dividatur prius in finitum & infinitum, quàm in substantiam & accidens; à parte rei tamen ratio substan-

tiæ & talis substantiæ usque ad singularitatem, prius convenit enti, quàm finitas & infinitas: non est enim ens *simpliciter*, quod dicitur finitum, aut infinitum, sed hoc ens: & sic singulariter prius convenit enti quàm infinitas: sicut albedo prius est hæc, quàm sit intensa ut duo, aut ut quatuor.

Objic. Essentiam non posse concipi sine Infinitate Dist. Non potest concipi adæquatè, conc. inadæquatè, nego. Si Scotus dicat in 1. dist. 1. qu. 3. Deum ut est individuum entis formaliter, includere infinitum; quod autem formaliter includitur in alio, est de essentiâ illius. Dist. Includitur formaliter, hoc est non eminenter, conc. formaliter id est essentialiter, nego Dist. 2. Includitur formaliter positivè, conc. quia non habet duas formalitates positivas; Formaliter negativè, nego: quia Infinitas habet formalitatem non omninò eandem cum Essentiâ D. dicit enim quid magis explicativum, quàm Essentia sola.

Objic. Quamplurimos Doctores maximi momenti, qui docent Infinitatem esse de essentiâ Dei. Resp. quòd licet cuique abundare in suo sensu, in propositionibus quæ non sunt de fide, qualis est ista; & ideo negari possunt. Quia tamen sunt multum mihi colendi, cum distinctione Resp. Infinitas est de essentiâ Dei; non purè, conc. unde Modos intrinsecos vocavimus multoties Prædicata non purè quidditativa; purè, nego. Distinguimus enim Prædicata purè quidditativa, de quibus in cap. præcedenti, à Prædicatis

non purè quidditativis, de quibus in isto. Ratio autem quare Modi intrinseci sunt de essentiâ D. aliquo modo, est quia conveniunt Deo in primo modo dicendi per se; non sunt tamen purè de essentiâ quia conveniunt tantùm in secundo gradu.

Hic quærere solent aliqui. An possit dari aliqua creatura, quæ sit per potentiam D. infinita? Sed de his agunt Physici; unde tantum dicam: quidquid Deus faciat in creaturâ, nunquam illam efficiet infinitè perfectam; erit enim semper dependens, quod adversatur infinito.

\*\*\*

## DISPUTATIO SECUNDA.

### *De Simplicitate Dei.*

**Q**UONIAM Simplicitas opponitur Compositioni, sicut Unitas Divisioni & Identitas Distinctioni; ideò majori in parte explicabitur divina Simplicitas per negationem Compositionis: si enim possimus probare Deum non esse compositum, concludetur facilè ipsum esse Simplicem. Quid de his dicendum sit, aperietur in hac Disputatione, in qua quinque Quæstiones proponentur. Prima, quid sit D. Simplicitas? Secunda, an Deus sit omninò, Simplex! Tertia, an sit compositus physicè ex materiâ aut formâ, vel ex subjecto & accidente? Quarta, an sit metaphysicè compositus ex naturâ, & subst.

stentia, vel ex essentiâ & existienciâ, vel ex naturâ & supposito? Quinto tandem, an aliqua creatura sit perfectè Simplex? Quoad Compositionem Logicam, cum Philosophis asseruimus aliquando, in Deo non reperiiri; quoniam ratio Generis & Differentiæ locum non habet ab eo.

---

## QUÆSTIO PRIMA.

### *Quid sit Simplicitas Dei.*

**I**LLUD dicitur simpliciter Simplex, quod in suâ ratione formali non est resolubile in plures conceptus, licet sit componibile compositione cum his. Solum Ens ut sit, est simpliciter simplex; habet enim tantum hunc conceptum in suâ formalitate, quod sit id quod est: si enim ente reperiantur conceptus, veri boni, & unius, pertinent ad ipsius proprietates. Ens etiam est componibile, non compositione ex his, i. ex partibus; sed cum his, i. cum inferioribus; componitur enim cum substantiâ, cum corpore, cum homine; &c. Illud verò dicitur summè simplex, quod non est componibile ex his, nec cum his, licet in suâ adæquatâ formalitate habeat plures conceptus. Sic dicemus Deum esse Simplicem; partes enim non habet, nec venire potest in compositionem inferiorum: ut Ens, Substantia, Animal; licet in suo conceptu adæquato habeat plures conceptus, scilicet Infiniti, Æterni, Immensi, &c. De hac

Simplicitate summâ agendum est.

CONCLUSIO.

**S**IMPLICITAS communiter dicitur negatio compositionis, seu unionis plurium distinctorum, quorum unum sit actus, aliud potentia. Licet hæc descriptio fiat per negationem, tamen quid positivum importat; vult enim August. Deum dici Simplicem, quia est hoc quod habet; ubi dicendo, est hoc, innuit entitatem positivam. Adde quod perfectio simpliciter est positiva, Simplicitas verò est perfectio simpliciter, quâ repugnat Deo compositio & componibilitas. Quia tamen negatio compositionis, quam importat entitas positiva Simplicitatis, est notior ipso positivo, ideò Simplicitem explicant Theologi per negationem compositionis, seu, ut diximus, unionis plurium, quorum unum sit actus & aliud potentia: & ob hoc licet Attribute & Personæ distinguantur in Deo, non tollunt simplicitatem; quia nullum ex iis se habet ut potentia; sed omnia quæ sunt in Deo, sunt actus simplices.

QUESTIO II.

*An Deus sit omnino Simplex.*

**H**ÆC Questio est generalis, cui sequentes succedent tanquam confirmativæ Conclusionis quæ præsentī Questioni respondet. Probando enim, ut faciemus postea, Deum non esse compositum, nec physicè, nec

metaphysicè; confirmare est, illum esse Simplicem omninò.

## CONCLUSIO.

**D**eus est omninò simplex. Sic in Conc. Lateran. cap. firmiter de summâ Trinit. ubi habetur tres Personnas D. esse Substantiam omnino simplicem.

PROBATUR, quia non est compositus ex partibus, nec componibilis cum inferioribus. Ratio primi est, quia si Deus haberet partes; vel essent necessariae, & infinitae; vel essent contingentes & finitae. Primum non potest fieri; quia si essent plura necessaria & infinita, essent plures dii. Secundum etiam est impossibile; quia si illae partes essent finitae & contingentes, Deus esset finitus & contingens; ex pluribus enim finitis & contingentibus non potest fieri ens necessarium & infinitum. Deinde, si illae partes essent infinitae, totum non esset majus sua parte; infinito enim non potest dari majus. Ratio secundi est, quia idè superius venit in compositionem cum inferiori, ut ab illo acquirat aliquam perfectionem, quam antea non habebat; sed nullâ Deus caret perfectione, & sic undeque est simplex; quia excludit compositionem & componibilitatem, tum ex his, i. ex partibus; tum cum his, i. cum inferioribus.

OBJIC. Ubi forma dat esse materiae, ibi est compositio; Sed hoc fit in Deo, ubi Essentia dat esse essentiale Personis, & Personae dant esse Personale Essentiae. Resp. Essentia dat esse Personis; per communicationem, conc.

per compositionem, nego; quia Essentia non communicatur Personis, tanquam potentia, sed ut actus essentialis, qui communicatur actui rationali.

### QUESTIO III.

*An Deus sit physicè Compositus.*

**A**SSERVIMUS in præcedenti Quæstione Deum esse Simplicem, hoc etiam probavimus per negationem compositionis & componibilitatis in communi; nunc magis ad particularia descendentes, videre habemus, an ulla compositio physica ipsi conveniat; ex materiâ scilicet & formâ; vel ex subiecto & accidente.

#### CONCLUSIO.

**D**EUS non est physicè Compositus, nec ex materiâ, & formâ, nec ex subiecto & accidente. Primum probo primò, quia Deus non esset primum ens; partes enim componentes sunt priores composito. Secundò, quia Deus esset quid corporeum, quod refutavimus. Tertiò, quia materia & forma sunt imperfectæ; quoniam materia dicit potentiam, & forma dependentiam à materiâ per quam sustentatur. Probo etiam secundum; si enim esset ullum accidens in Deo, vel materiale, ut albedo, quantitas, &c. vel spirituale, ut gratia, scientia, &c. hæc absurda sequerentur: quòd omnia quæ sunt in Deo, non essent ipsa Dei substantia; quòd Deus posset perfici, si re-



aperet aliquod accidens; omne enim accidens reale, est perfectio quædam realis, quæ in Deo recepta ipsius Divinitatem perficeret; quod tandem esset in Deo potentia passiva, seu receptiva, & proinde carentia rei quam posset recipere; & hoc pugnat cum infinita Dei perfectione.

Objic. Tertullianum, qui asserit Deum esse corporeum, sicut de illo commemorat D. Aug. hæresi 86. Ergo componitur ex materiâ & formâ. Resp. quod ipsemet Augustinus excusare contendit Tertullianum, dicens quod per corporeum intelligat ens verum & reale, ita ut insinquare voluerit, Deum esse aliquod ens non fictitium & inane; sed verum & reale, quod ob hoc vocat corporeum. Porro si hoc seriò & in proprio sensu auderet dicere Tertullianus, facilè ab omnibus dimittendus esset,

#### QUESTIO IV.

*An Deus sit Compositus metaphysicè.*

**I**N nostrâ Logicâ dicitur communiter Ens esse univocum respectu Dei & creaturæ, attamen non esse genus; quia nec ratio generis, nec differentiarum comperunt Deo; & hoc est dicere, in Deo non esse Compositionem logicam. Superius etiam probavimus physicam ab illo arceri: videre ergo superest, an etiam Compositionis metaphysicæ immunis & expers existat: hæc autem sit vel ex naturâ &

subsistentia, vel ex essentia & existentia; vel ex natura & supposito.

Conclusio.

**N**ULLA reperitur in Deo Compositio metaphysica. Non imponitur enim ex natura & substantia, nec ex essentia, & existentia; nec ex natura & supposito: quia ut diximus in 3. quæst. primi cap. hæc omnia non distinguuntur in Deo, licet distinguantur in nobis, tanquam Modi à natura quam modificant: existentia enim est modus essentia, quo essentia intelligitur esse extra causas suas, & substantia est modus substantia, quo natura substantialis concipitur subsistere & existere independentem à subjecto. Licet autem hæc omnia in nobis distinguantur, saltem formaliter modaliter, & proinde faciant Compositionem saltem modalem; in Deo tamen sunt unum & idem: Ego compositionem non faciunt in in illo; compositio enim est plurimum distinctorum simul positio; & sic non fit compositio, ubi non est distinctio: Non fit ergo in divinis compositio, ex Essentiâ D. & ex existentia, nec ex substantia; quia unum eorum est de conceptu formali alterius. Non fit etiam Compositio ex natura & supposito; licet enim sint plura supposita, seu plures personæ in Essentiâ D. quia tamen natura Dei non est in potentia ad illa supposita, imo est ex se perfectissima in essendo & in existendo sine Personis; ideo non fit compositio. Sciendum enim quòd Compositio ex natura & supposito fiat tantum in illis entibus, ubi natura est de se incompleta, & accipit à suo supposito

ultimum essendi complementum ; quod non fit in Deo , ubi Natura D. in se considerata sine Personis , perfecte & completè existit , & est hæc , & singularis.

Objic. Essentia D. sine Personis non existit incommunicabiliter ; potest enim communicari Patri , Filio , & Spiritui sancto ; quando verò est in Personis , existit incommunicabiliter : Ergo Personæ dant aliquam formam existendi Essentiæ : Ergo Essentia accipit aliquod existendi complementum à Supposito : Ergo est in potentiâ ad Suppositum : Ergo ex illâ & Supposito resultat compositio metaphysica. Resp. in Deo esse duplicem Existentiâ , ut videbitur tract. de Trinit. Unam absolutam & communicabilem , aliam incommunicabilem & relativam. Prima dicit perfectionem , secunda verò nec est perfecta , nec imperfecta , ut illic probabitur agendo de Relationibus , quæ non sunt perfectæ nec imperfectæ Quo posito , Resp. ad argumentum : Personæ dant aliquam formam existendi Essentiæ ; dist. Quæ ipsam reddat incommunicabilem , non perficiendo nec complendo illam , conc. quæ perficiat & compleat existentiam essentiæ , nego. Sine enim Personis existentia essentiæ est de se hæc , singularis , & completè existens ; & sic aliæ consequentiæ negandæ sunt. Est ergo maxima differentia inter entia creata , quæ ex natura & supposito componuntur , & Ens increatum ; quod talem non agnoscit compositionem. Ideò enim illa componuntur , quia habent naturam , quæ ex se perfecte & com-

pletè non existit; imò recipit ultimè suam existendi perfectionem à supposito: & sic talis natura est in potentia à supposito, & ut à supposito perficitur. Deus autem non sic se habet; licet enim Natura D. desumat Existenti-  
 am incommunicabilem à Personis; quia tamen Deus ut sic, est completè & perfectè existens, & nullam sumit perfectionem à Personis (esset enim ita perfectus sine illis, ac cum illis, ideò non est in potentiâ ad Personas; & sic de Natura D. & Personis D. non fit Compositio; quia fieri debet tantùm ex illis, quorum unum est potentia, & aliud actus, ut diximus.

Objic. Licet Deus non componatur ut Deus, tamen Persona D. componitur ex Essentia & Relatione. Resp. Personam D. dici quidem constitutam ex Essentia & Relatione, non verò componi. Est ergo in nostro proposito talis differentia inter Componi & Constitui; quòd illud dicatur Componi, quod veluti resultat ex pluribus, quorum unum est potentia, & aliud actus: Constitui verò dicitur illud, quod exurgit ex pluribus quorum utrumque est actus; Persona autem D. coalescit ex duobus actibus, nempe ex Essentia, quæ est actus essentialis, & ex Relatione, quæ est actus notionalis; & sic constituitur, non verò componitur, quia Essentia non est in potentiâ ad suppositum, ut diximus.

Dices, Quod resultat ex Essentia & Relatione, est unum: sed non est unum per accidens, per aggregationem: ergo per compositionem. Resp. esse unum per identitatem. Essentia  
 epim

enim infinita est, & quod est infinitum, identificat sibi omne aliud, saltem realiter; & sic Essentia D. in qualibet Personâ identificat sibi Relationem; non quidem formaliter, sed realiter.

### QUESTIO ULTIMA.

*Utrum aliqua Creatura sit omnino simplex.*

**A**LICUÆ creaturæ sunt aliquo modo simplices; ut Angeli, qui simplices dicuntur respectu materiæ & formæ, quam non habent; sic etiam Elementa apud Physicos simplicia sunt, prout simplex opponitur mixto: quia quatuor qualitatum adunationem non admittunt in suâ compositione; componuntur tamen ex materiâ & formâ, sicut orbes cœlestes: sed quærimus, utrum aliqua Creatura ita sit simplex, ut omnem compositionem arceat. Hoc negabit.

### CONCLUSIO.

**N**ULLA Creatura est perfectè simplex: simplicitas enim est. Modus intrinsecus Divinitatis, & modus intrinsecus soli Deo convenit, ad distinctionem Attributorum. Deinde, omnis creatura componitur vel ex naturâ & supposito, ut Angeli; vel ex materiâ & formâ, ut substantiæ corporales; vel ex potentiâ objectivâ & ex actu entitativo, ut omnia entia creata, quæ transierunt à non esse ad esse; vel ex positivo & privativo, ut omnes etiam creaturæ, quæ quantumvis perfectæ sint, multis tamen perfectionibus careant; vel denique est componibilis cum aliâ, ut accidens, quod est componibile cum subiecto.

## DISPUTATIO TERTIA.

*De Immutabilitate divina.*

**Q**VONIAM de Deo per analogiam ad creaturas loqui intendimus, quarum cognitio nos veluti manuducit ad cognitionem Creatoris, videndum est quot & quibus modis creatura intellectualis mutari possit, ut percipiamus ex illis, quot modis Deus sit Immutabilis. Quintupliciter autem homo, vel Angelus potest mutari. Primò objectivè, seu secundum existentiam, quando scilicet transit à non esse ad esse, vel è contra. Secundò subjectivè, quando recipit accidentia, quæ antea non habebat. Tertiò quoad locum, quando de uno loco in alium transit. Quartò secundum scientiam, quando cognoscit nunc aliquid, quod nesciebat antea, vel è contra. Quintò quoad decreta quæ non volebat, & vice versâ. Istis quinque mutabilitatibus, quæ sunt in homine, tot oppositæ immutabilitates reperiuntur in Deo, de quibus sigillatim agendum.

## QVÆSTIO PRIMA.

*An Deus sit Immutabilis quoad existentiam.*

**V**EL, an Deus sit objectivè Immutabilis. Esse enim in potentia objectiva secundum Logi-

## DE DEO UNO.

cos, est esse in potentia ad recipiendam existentiam, quam vocant esse entitativum, & sic quod transit à potentia objectiva ad actum entitativum, dicitur mutabile objectivè.

### CONCLUSIO.

**D**eus est Immutabilis objectivè: non potest enim transire à non esse ad esse; quia per suam æternitatem semper fuit; nec etiam transire potest ab esse ad non esse; quia semper erit; nec deficere potest, aut deperdere suam existentiam; aliàs non esset ens summè necessarium; imò esset contingens, si modò posset esse, modò non esse. Quia hæc quæstio de se satis patet, non est quòd immorari debeamus in ejus probationes si enim nasci in eà possit aliqua difficultas, solvetur agendo de Æternitate.

## QUESTIO II.

*An Deus sit Immutabilis quoad accidentia.*

**H**oc est etiam; an Deus sit Immutabilis subjectivè; quod enim potest aliquod accidens recipere, dicitur mutabile subjectivè; potest enim esse subjectum alicujus accidentis quod antea non habebat: accidentium autem alia sunt absoluta, ut albedo, quantitas, &c. alia relativa, ut paternitas filiatio, &c. De utrisque loquimur.

### CONCLUSIO.

**D**eus non potest ullum accidens, sive absolutum, sive relativum suscipere; unde jure dicimus ipsum esse subjectivè im-

C ij

mutabilem. Primum patet ex his quæ diximus in 3. q. disput. præcedentis, ubi probavimus Deum non componi ex ~~subjecto~~ & accidente. Quod etiam non possit recipere accidens relativum, seu relationem realem ad creaturam in tempore, probatur; quia quidquid est in Deo, est necessarium; est enim Deus ipse, qui per suam infinitatem omnia sibi identificat realiter; sed illa relatio, quæ Deo adveniret in tempore ad creaturam, non esset necessaria, imò posset corrumpi & destrui: ergo non potest esse in Deo, aliàs Deus destrueretur. Prob. Min. Destructo termino, relatio destruitur: Sed omnis creatura est destructibilis: Ergo non esset necessaria illa relatio.

Objic. Deus in tempore dicitur Creator, quia creat in tempore: Ergo relationem Creatoris in tempore recipit. Resp. Recipit reverà relationem, vel potius denominationem Creatoris; sed illa relatio non est realis ex parte Creatoris; quia quando creaturæ incipiunt existere, nihil novi accipit Deus, quod non habuerit ab æterno; & sic non mutatur: illa tamen relatio est realis ex parte creaturæ: quia creatura, quæ producitur, recipit aliquid de novo, nempe existentiam. Si ergo quis quærat quid adveniat Deo, quando ex non Creatore fit Creator: dicendum est, quod adveniat tantum illi esse terminus relationis realis quæ est in creaturâ; & ob hoc non mutatur; sicut nec paries mutari dicitur, quando terminat meam visionem, quæ in me realis est, & rationis tantum in parie-



## DE DEO UNO:

3

te : sicut ergo non mutatur paries ex eo quod denominetur visus , sic nec Deus propterea quod denominetur Creator , & hoc est quod August. dicit , l. 7. de civit. Dei cap. 16. *Quod Deus temporaliter dicitur incipere , quod antea non dicebatur , hoc non est secundum accidens Dei , sed creatura.*

Objic. Quod de non agente fit agens , mutatur secundum actionem , quæ est relatio : Sed Deus de non Creante fit Creans : Ergo mutatur. Resp. dist. maj. Si agat actione novâ & operatione distinctâ à suâ essentiâ , concedo ; quia tunc actionem reciperet , & sic mutaretur : Si agat actione æternâ ; quæ semper fuit , & quæ est indistincta à suâ essentiâ , nego : quia nihil de novo recipit. Quando autem Deus de non Creante fit Creans , non denominatur Creator , quasi recipiat aliquam actionem , vel volitionem de novo , quæ sit distincta à suâ essentiâ : sed omnes creaturæ incipiunt existere per volitionem æternam , quâ ab æterno decrevit , quod creaturæ existerent pro tali tempore ; quæ quidem volitio est ipsamet Dei essentia. Quandoquidem ergo in illo instanti , quo creaturæ incipiunt existere , Deus non recipit novam actionem , nec volitionem ; idè non mutatur : mutatur tamen creatura , quando de non agente fit agens ; quia non dicitur agere , nisi quia recipit actionem realem , quam antea non habebat : v. g. novam volitionem , vel aliam actionem.

Objic. Si ratio aliqua datetur , propter quam Deus relationem realem in tempore non reciperet , maxime quia mutaretur per

illam; sed talis relatio non mutat subiectum cui advenit; quia dato quod hodie producat homo in Indiâ, recipit relationem identitatis cum illo, attamen non mutatur: ergo receptio relationis non mutat Deum. Resp. quod Deus mutaretur; quidem in se; sed mutaretur ad aliud: sicut etiam licet Petrus non mutetur in se, & ad se, quando producit homo in Indiâ, mutatur tamen ad aliud; quia de novo recipit relationem realem identitatis ad illum hominem de novo productum. Ut ergo tollatur omnis mutabilitas à Deo, dicimus illum in tempore nullas relationes reales recipere. Dices, Est in Deo inæqualitas cum creatura: Sed inæqualitas est relatio realis; quia relationes fundatæ super quantitatem, sunt reales, ex Philosopho. Resp. talem inæqualitatem esse tantum relationem rationis: unde ad Aristotelem, dico, quod relationes fundatæ super quantitatem sunt reales; si fundentur super duas quantitates, quarum utraque sit finita; si verò una sit finita, altera infinita, inæqualitas erit relatio realis ex parte quantitatis finitæ, & rationis ex parte quantitatis infinitæ; quia non est capax relationis, propter rationem in conclusione allatam.

---

### QUESTIO III.

*An Deus sit Immutabilis quantum ad Locum.*

**H**Æc difficultas videretur debere reservari ad disputationem de Immensitate;

quia tamen esse in loco, est aliquod accidens adveniens rei locatæ, debet hîc proponi, ut nullus remaneat dubitandi locus, quod Deus subsit alicui accidenti.

## CONCLUSIO.

**Q**UANTUM ad locum, Deus est prorsus Immutabilis: quod enim Immensum est, non potest de loco in locum mutari; quoniam loci mutatio fit tantum ut acquiratur nova præsentia in alio loco: sed Deus Immensus est, ut probabitur aliquando; & in omnibus locis existit: ergo localiter mutari non potest. Quod si Psalmista dicat Deum esse in cœlo: *Ad te levavi oculos meos, qui habitas in cœlis*, non excludit per hoc præsentiam Dei ab aliis rebus: sed idè hoc insinuat, quia nobiliores effectus producit in cœlo, ubi se intuitivè videndum præbet.

## QUESTIO IV.

*Utrum Deus sit Immutabilis secundum Scientiam.*

**A**LIE mutationes, de quibus loquuti fuimus, sunt communes omnibus creaturis, sive sint corporeæ tantum, sive sint intellectuales: duæ verò hæ ultimæ possunt competere soli substantiæ intellectuali, quæ sola capax est scientiæ & volitionis. Loquentes autem hîc tantum de scientiâ, quærimus utrum sicut homo potest modo scire quod antea nesciebat, & modò non scire per obli-

vionem quæ antea cognoscebat, sic etiam Deus se habeat.

#### CONCLUSIO.

**D**eus est Immutabilis quoad scientiam: Scientia enim Dei est infinita & necessaria, sicut & Deus ipse. Si autem est infinita, ab æterno scit omnia, quæ sciri possunt: Ergo non potest hodie scire quod antea nesciebat. Si etiam est necessaria, non potest ignorare aliquid eorum quæ antea cognoverit.

**OBJECIES.** Deus cognoscit hodie Antichristum nasciturum, & aliquando cognoscet illum natum: Ergo Scientia Dei mutatur. Resp. dist. consequentiam. Scientia Dei mutatur, objectivè & terminativè, conc. quia objectum illius mutatur: formaliter & in se, nego. Scientia enim Dei secundum se nihil aliud est, quàm essentia Dei per modum actus se habens: Sicut ergo essentia Dei est immutabilis, sic etiam scientia ejus formaliter considerata, est immutabilis; licet objectivè possit mutari; quando scilicet objectum ejus secundarium mutatur.

**INSTABIS.** Sed in nobis mutato objecto, mutatur Scientia in se: Ergo & in Deo. Resp. neg. consequentiam, & paritatem: ideo enim nostra cognitio mutatur, quando mutatur ejus objectum; quia nostra cognitio est actio vitalis distincta realiter à substantia intellectus nostri: quæ dependet in sua entitate formali ab objecto; & sic illo mutato, mutatur scientia, scientia verò Dei, quæ habet duplex objectum, unum primarium, scilicet essentiam D. & aliud secundarium, nempe creaturas in

essentiâ D. velut in speculo relucens, non dependet, nec movetur ab objecto secundo, scilicet à creatura; sed tantum terminatur ad illam; nec est etiam actio vitalis distincta ab essentia D. quæ de novo producat; sed est eadem, qua Deus ab æterno se cognoscit, quatenus tamen ad creaturas terminatur: Ergo mutato objecto, non mutatur scientia Dei, sed tantum mutatur terminatio illius, quæ est ens rationis, & quæ potest abesse & adesse in Deo, & modò esse talis, modò alia; licet entitas realis scientiæ D. quæ habet pro objecto formali essentiam D. nunquam mutetur.

---

### QUESTIO V.

*Utrum Deus sit Immutabilis secundum  
Voluntatem.*

**D**UPLEX est Voluntas in Deo, nempe una producat ad intra, quâ Pater, & Verbum in unitate principii Spiritum S. producat: alia est voluntas operans ad extra, quâ Deus vult creaturas. De primâ non loquimur; pertinet enim ad tractatum de Trinit. sed tantum de secunda, de qua querimus, an sit similis vel dissimilis voluntati humanæ, quæ ob suam volubilitatem aliquando vult quod antea non volebat.

### CONCLUSIO.

**D**eus non habet Voluntatem mutabilem in suis decretis; imò quod voluit ab æterno, vult adhuc nunc; & quod nunc vult,

C V

ab æterno voluit. Sic S. Script. Proverb. 19.  
*Multa cogitationes in corde viri, voluntas au-*  
*tem Dei in æternum manet.* Et Numer. 37.  
*Non est Deus quasi homo, ut mutetur.*

PROBATUR ratione. Quia Deus ab æterno determinavit omnia futura sine ullâ acceptione; ita quod nihil de novo determinaturus sit: Ergo tales determinationes, seu talia decreta mutare non potest. Prob. antecedens. Quia si Deus debuit velle aliquid novi progressu temporum, nulla est ratio, quare illud non voluerit ab instanti æternitatis, & ob quam debuisset manere indeterminatus circa illud, & suspendere actum suæ voluntatis; nam omnia ab illo instanti ita explorata habuit, ac si infinito tempore illa examinasset: Non potuit ergo esse in illo suspensio consilii, sicut vulgò in nobis reperitur, qui propter imperfectionem intellectus, non perfectè omnia cognoscentes primo intuitu, suspendimus nostram determinationem circa aliquod objectum, donec illud examinaverimus: & sic Deus omnia ab æterno determinavit. Prob. consequentia, quod non possit mutare aliquando, quod determinavit semel; quando enim determinavit aliquod objectum producendum, vel præscivisset se mutaturum propositum, & tunc esset levitatis nota; cur enim determinasset quod postea vellet non determinasse? vel non præscivisset, & sic ejus scientia esset imperfecta, non præsciendo id quod futurum est: quod non nisi impii vel dicere, vel cogitare attentabunt.

**O B J E C T.** Pœnitentia non potest esse sine mutatione voluntatis; sed Scriptura testatur Deum pœnitere, Genes. 6. feciste hominem, & 2. Reg. 17. constituisse Saül in Regem: Ergo mutatur aliquando voluntas Dei. Resp. Pœnitentia non est sine mutatione voluntatis: dist. propria, conc. consistit enim in retractatione facti, vel voliti, in quantum fieri potest: pœnitentia metaphorica, nego: Deum autem pœnituit metaphoricè, non propriè. Ad pœnitentiam enim propriam duo requiruntur: nempe internus animi dolor, quo pœnitens detestatur suum factum, & effectus interni doloris, nempe destructio sui facti, quando est possibilis: hoc posterius sine primo habet rationem pœnitentiæ tantum metaphoricæ: unde quia Deus destruxit hominem, destituit Saül suo regno; idèd habuit pœnitentiam metaphoricam: quia verò fecit utrumque sine animi dolore interno; idèd non habuit propriam, quæ tamen ad mutationem voluntatis requiritur. Quòd si Scriptura addat, Deum fuisse tactum dolore cordis intrinsecus: hoc debet etiam intelligi metaphoricè; i. ita se gessit, ac si fuisset tactus dolore. Porro ratio quare in nostra pœnitentia reperitur dolor animi, non in Deo, est quia quando aliquid decernimus, non prospicimus omnia quæ possunt evenire ex nostro decreto; unde quando post nostram determinationem, videmus aliqua evenire, quæ nobis displicent; dolemus de tali decreto, & vellemus non facta esse quæ facta sunt; quia autem Deus omnes eventus prospexit ab æterno, non dolet vi-

dendo evenire quæ prævidit.


O b j e c. Deum multa prædixisse, quæ non evenerunt, ut 4. Reg. 20. quod Ezechias Rex esset moriturus statim; & Jonæ 3. quod civitas Ninive post quadraginta dies esset subvertenda: si autem hæc prædixit, est signum quod voluerit ea evenire; & si non evenerunt, signum est quod voluntatem mutaverit. Resp. Deum multa diversis modis prædicere. Primò, aliqua prædicat absolute, & hæc semper eveniunt, ut quando prædixit Christum venturum. Secundò, aliqua prædicat sub conditione, & eà positâ, vel non positâ, eveniunt aut non eveniunt; sic prædixit Ninivitas perituros, si scilicet non agerent pœnitentiam; unde quia egerunt, non perierunt. Tertiò tandem, alia prædicat futura secundum cursum causarum naturalium; sic prædixit Ezechiam moriturum, qui certè naturaliter fuisset moriturus, si Deus illum non præservasset. Quo posito, ad minorem resp. Quæ prædixit, signum, est quod illa voluerit: dist. si illa prædixit absolute, conc. si illa prædixit tantum sub conditione, aut secundum cursum causarum naturalium, nego; & sic mortem Ezechiz, & destructionem Ninivitarum prænuntiavit.

O b j e c. Qui decretum mutare non potest, non est liber; sed Deus liber est: ergo. Resp. negando maj. libertas enim non consistit in mutatione decreti; sed in hoc, quod ille qui decernit aliquid, potuerit non decernere illud: quia ergo Deus potuit non determinare ea quæ determinavit, ideo liber est; & quia



posita determinatione, non potest resilire à suo decreto, ideo est immutabilis.

Obj. c. Res existunt per volitionem D. quæ ab omnibus dicitur causa rerum: sed res accipiunt suum esse in tempore: ergo hoc fit per volitionem temporaneam: ergo Deus mutatur secundum voluntatem, quoniam de novo volitionem recipit. Resp. ad minor. Creaturæ habent suum esse in tempore, dist. per volitionem Dei æternam, conc. temporaneam, nego. Deus enim ab æterno voluit creaturas pro tempore, id est voluit ab æterno, quod in tali tempore existant; quando ergo existunt, non existunt quia Deus de novo voluit illas existere; pro tunc enim mutaretur; sed idè existunt quia venit tempus, pro quo Deus ab æterno voluit illas existere.



## DISPUTATIO QUARTA.

*De Æternitate.*

**Q**UIA multimodè sumitur Æternitas & Æternum in S. Script. idè antequam videamus quid propriè sit Æternitas quæ Deo convenit tanquam modus intrinsecus essentia D. & quæ de illa dicenda sunt: sciendum est Æternum primò sumi pro eo quod est antiquum; sic Genes. 49. Messias dicitur desiderium collium æternorum. Secundò, pro eo quod longius durat; Genes. 14. Dabo tibi terram Chanana in possessionem æternam. Tercò

tiò pro eo quod habet principium, & non finem; sic Gloria dicitur æterna, ignis æternus; animæ æternæ. Quartò, pro eo quod habet principium & finem, quæ tamen in Scripturâ non exprimuntur; sic Hebr. 7. dicitur, *sine patre, sine matre, nec initium nec finem dierum habuit Melchisedech*. Quintò, pro eo quod licet intelligatur sine principio & fine, potest tamen utrumque habere; sic si Angelus fuisset creatus ab æterno, æternus diceretur. Sextò, sumitur propriè, pro eo quod nec habet, nec habere potest principium & finem; sic solus Deus Æternus est: & de Æternitate sic sumptâ nobis loquendum.

## QUÆSTIO PRIMA.

### *Quid sit Æternitas.*

**I**NTER plurimas Æternitatis descriptiones, quas Theologi afferunt, accuratior mihi videtur illa, quam tradit Boëtius lib. 5. de Consol. prosâ sextâ, & quam explicare aggredimur.

### CONCLUSIO.

**Æ**TERNITAS est interminabilis vitæ tota simul & perfecta possessio. Si dicatur primo, *interminabilis*, hoc excludit tùm terminum à parte ante (hoc est principium) tùm terminum à parte post (hoc est finem) imò hæc particula excludit terminum actuale, & possibilem: unde si Angelum Deus creasset ab æterno, ille non esset propriè æternus; quia licet haberet esse interminatum, haberet ta-

## DE DEO UNO.

men esse terminabile ; quia potuisset non fuisse creatus ab æterno. Secundò , cùm dicitur , *vira* , per vitam intelligitur existentia actualis , & sic Æternum habet existentiam interminabilem. Tertiò , additur , *totum simul* , & hoc denotat Æternitatem non esse divisibilem , nec habere unam partem suæ durationis post aliam ; & sic Æternitati omnia sunt præsentia. Subjungitur , *perfecta possessio* ; quæ particula tollit dependentiam ; unde si aliquod ens esset ab æterno productum , non deberet dici æternum ; quia haberet suam existentiam dependenter à Deo.

Objic. Æternitas non est tota simul ; quoniam S. Script. attribuit Deo , qui est æternus , præsens , præteritum & futurum , Apocal. 1. *Qui est , qui erat , & qui venturus est*. Resp. has differentias temporis non attribui Deo formaliter & propriè ; sed tantùm accommodatè ad nostrum intelligendi modum , ut concipiamus scilicet Deum semper fuisse , & semper fore : & in hoc Scriptura nos non decipit , imò nos instruit , docendo invisibilia per visibilia ; sicut quando Deo attribuit brachia , pedes , oculos , &c.

Objic. Æternitas non est indivisibilis , nec tota simul ; quoniam potest suscipere magis & minus ; plus enim duravit hodie , quàm heri ; quia majori tempori coëxstitit. Resp. Æternitatem non suscipere magis , nec minus ; & licet majori tempori coëxtiterit hodie , non tamen plus duravit ; & potest tantùm ex hoc inferri , quòd coëxistentia Æternitatis sit divisibilis , ut dicemus ; non verò ipsius duratio

aut existentia. Dices, Angelus dicitur plus durasse, quando majori tempori coëxistit: ergo sic dicendum de Deo. Resp. neg. conseq. Ratio disparitatis est, quia Angelus potest semper annihilari, & continuò recipit nova accidentia, v. g. novas volitiones & intelligentias; & ideo pro illa duratione, in quâ majori tempori coëxistit, in quâ non fuit annihilatus, & in qua nova accidentia realia recipit, dicitur plus durasse, & habere existentiam divisibilem, non quidem secundum substantiam, sed secundum accidentia, ut dicitur; quoniam illa successivè recipit: Deus verò non debet dici plus durasse; quia non potest annihilari, nec ullas actiones de novo accipere; unde quando majori tempori coëxistit, nihil recipit reale; sed tantum relationem coëxistentiæ ad tempus, quæ rationis est.

---

### QUESTIO II.

*An Deus, & ipse solus sit Æternus.*

**D**E BUI MUS scire quid sit æternitas in se, antequam videamus ipsam Deo competere. Quoniam ergo ratio æternitatis nobis innotescit; probandum, superest Deum verè & propriè esse æternum.

### CONCLUSIO.

**D**EUS reverà æternus est, & ipse solus. Ratio primæ partis est, quia Deus est immutabilis: ergo non potuit transire à non esse ad esse; nec ab esse ad non esse transire valet.

Deinde est summè perfectus ; non potuit ergo incipere , & desinere nequit ; hoc enim maximam imperfectionem redolet. Tandem est ens absolutè necessarium , ergo & æternum. Unde Psal. 9. *Deus regnabit in æternum.* Hebr. 10. *Tu autem permanes & anni tui non deficient.* Unde Athan. in Symb. *Æternus Pater, Æternus Filius, &c.* Ratio secundæ partis est, quia Deus in tempore creavit omnia, ut habetur Genes. 1. *In principio creavit Deus cælum & terram.* Imò si Deus ab æterno creasset Angelum, non esset propriè æternus ; quia potuisset ab æterno non creari, & nunc annihilari posset ; quod autem æternum est, non tantùm debet esse interminatum, sed etiam interminabile.

O b j e c. Æternitas est duratio ; sed omnis duratio est divisibilis & successiva ; ergo non potest æternitas Deo convenire. Resp. negando minorem ; licet enim Philosophi solas durationes creatas agnoscentes, dixerint omnem durationem esse divisibilem, nos tamen qui per fidem Deum novimus, & qui percipimus durationem Dei esse permanentem, Philosophos debemus negare, vel saltem distinguere. Omnis duratio est divisibilis ; creata, conc. Increata, qualis est æternitas, nego.

---

### Q U Æ S T I O. I I I.

*Vtrum Æternitas sit quid positivum.*

**D**EFINITIO Æternitatis quam attulimus, ortum dare potest huic difficultati ; explicuimus enim æternitatem per negationem

terminabilitatis & successionis ; dicendo quòd sit interminabilis , & tota simul , quod innuere videretur ipsam esse quiddam negativum : sed attendendum est , quòd plura explicentur per nomina positiva , quæ sunt tamen negativa , ut cæcitas , surditas , tenebræ : & alia sub nominibus negativis innotescant , quæ tamen positiva sunt ; ut Bruta quæ definiuntur per irrationalitatem , licet positiva sint : hujusmodi est æternitas , sicut & immutabilitas , invisibilitas , immensitas , incomprehensibilitas , &c.

### CONCLUSIO.

**ÆTERNITAS** est quid positivum. Sic Scotus quotlib. 6. cum D. Dionys. lib. de D. Nomin. cap. 7. Ratio est , quia æternitas est modus intrinsecus & perfectio simpliciter : ergo est positiva. Deinde æternitas est duratio divini Esse ; duratio verò est permanentia existentia , & permanentia existentia tùm in Deo , tùm in creaturis est quid positivum. Triplicem tamen negationem importat æternitas. Primò , negationem terminabilitatis tùm à parte antè , tùm à parte pòst ; unde vocatur interminabilis. Secundò , negationem successionis , unde dicitur tota simul. Tertiò , negationem dependentia , unde perfecta nuncupatur.

Objic. Scotum dicentem æternitatem nihil addere positivum existentia Resp. Nihil addit existentia duranti , conc. nihil addit existentia simpliciter , nego : Æternitas enim addit aliquid positivum existentia Dei , nempe permanentiam ; & aliquid negativum ; nempe

interminabilitatem, seu durationem interminabilem. Quod si quis dicat; Duratio nihil est quàm existentia rei: sed si nihil addiat existentiae duranti, ut vult Scotus; nihil addet existentiae ut sic. Negatur antecedens; duratio enim non est existentia rei; sed est mora, seu continuatio existentiae.

---

### QUESTIO IV.

*Quomodo differant Tempus, Ævum & Æternitas.*

**H**Æ sunt præcipuæ durationes omnium rerum. Res corporeæ mensurantur tempore; Angeli & animæ in cœlo ævo mensurantur; & æternitate Deus. Extrinsecè hæ durationes differunt, quod scilicet æternitas careat principio & fine; ævum fine, non principio; tempus verò habeat principium & finem: sed quia hæ differentiae sunt tantum extrinsecæ & accidentales, ut volunt D. Thom. & Scotus; quippe quæ solum pendent à terminis, qui non sunt de essentia rei, ideo aliam assignabit differentiam.

### CONCLUSIO.

**I**N hoc differunt æternitas, ævum & tempus, quod æternitas sit duratio entis indefectibilis & permanentis secundum substantiam, & accidentia; & sic solus Deus æternitatem habet; quia solus est indefectibilis, & suam substantiam habet simul, & omnia quæ de ipso dicuntur, v. g. suas actiones; simul enim om-

nia cognovit, & voluit, & nihil successivè cognoscit, aut vult. *Ævum est duratio rei defectibilis, saltem ab extrinseco, & permanentis secundum substantiam, non verò secundum accidentia.* Hæc duratio Angelis & animabus competit; sunt enim defectibiles; quia possunt annihilari à Deo; & licet habeant suam substantiam simul, & non unam partem post aliam; habent tamen sua accidentia, scilicet suas actiones, successivè; unam v. g. cognitionem, aut volitionem post aliam. *Tempus est duratio rei defectibilis, & successiva, tum secundum substantiam, tum secundum accidentia;* res enim corporeæ accipiunt successivè suam substantiam, scilicet unam partem corporis post aliam, mediante augmentatione; & successivè sua accidentia recipiunt, modò unum, & modò aliud.

#### Q U Æ S T I O V.

*An Deus per Æternitatem temporì coëxistat.*

**C**OEXISTENTIA est plurium simultanea existentia, & sic quæ simul existunt, coëxistere dicuntur; unde hæc est differentia inter existentiam & coëxistentiam; quod existentia sit absoluta duratio rei; coëxistentia verò est relativa; quia est duratio unius rei comparata cum duratione alterius. Quando v. g. dicitur, Petrus existit, adest quid absolutum; quando verò dicitur; Petrus coëxistit Paulo, adest quid relativum; quia exi-



stentia Petri comparatur cum existentia Pauli. Quando ergo querimus, an Deus coexistat cuilibet differentie temporis, hoc est querere, an Deus existat simul cum tempore præterito, præsentis & futuro.

## CONCLUSIO.

**D**EUS coexistit omnibus temporum differentiis. Non quod omnes differentie temporum simul existant; hoc enim est impossibile: sed quia singulæ partes temporis, dum existunt; coexistunt æternitati, & æternitas coexistit illis. Sic Apocal. 1. dicitur, *qui est, qui erat, & qui venturus est*; sic etiam Richardus à S. Victore 2. de Trinit. 23. *Sicut omni loco est præsentialiter, & in nullo localiter; sic in omni tempore est æternaliter & in nullo temporaliter*: si autem est in omni tempore æternaliter, coexistit omni tempori. Ratio est, quia sicut nunc est verum dicere, Deus existit; sic semper verum etiam est dicere, Deus existit, & Deus existet: ergo sicut per immensitatem Deus omni loco inexistit, sic per æternitatem coexistit omni tempori.

**O B J E C T.** Coexistentia est existentiarum unio; sed Deus est super omne tempus: ergo non coexistit tempori. Dist. min. Est super omne tempus, ratione existentie, conc. quia existebat ab æterno; ubi nondum tempus aderat: ratione coexistentie, nego; existentia enim temporis facit coexistentiam Dei; & si non esset tempus aut alia duratio, Deus non diceretur coexistere; tempus enim est terminus coexistentie æternitatis, & pereunte termino, relatio perit.

**Obje.** Quæ coëxistunt, in quadam mensura communi existunt, ideò enim Petrus & Paulus coëxistunt, quia sunt in eodem tempore: sed æternitas & tempus non habent mensuram communem; quia illa ætæ, vel æternitas, vel tempus. Non æternitas: quia tempus æternitate non mensuratur: nec tempus; quia æternitas non potest mensurari tempore: ergo non coëxistunt. Resp. neg. maj. coëxistere enim non est commensurari; sed est simul existere: unde quia Deus existit, quando existit tempus, ideò dicuntur coëxistere: si enim Petrus existeret in cœlo, & Paulus in terra, coëxisterent; licet non mensurarentur eadem mensura communi; Petrus enim mensuraretur ævo, & Paulus tempore.

---

#### QUESTIO V.

*An Deus coëxistat tempori divisibiliter  
& successive.*

**D**eus ex præcedenti quæstione coëxistit omnibus temporum differentiis; quando ergo tempora incœperunt existere, Deus acquisivit aliquid, quod ab æterno non habebat; non quidem aliquid reale, quia mutaretur; sed aliquam relationem rationis, nimirum relationem coëxistentiæ: quærimus autem, an illa coëxistentia sit divisibilis, & illa relatio successiva.

## CONCLUSIO.

**C**OEXISTENTIA Dei ad temporis differentias divisibilis est, ac successiva, juxta successionem, & divisibilitatem temporum. Hodie enim dicitur, quod majori tempori coëxistit, quam heri; quia coëxistit hodie uni parti temporis, cui heri non coëxistebat; anno etiam sequenti major erit Dei coëxistentia, quam anno præsentis: & sic illius coëxistentia est divisibilis; quia recipit magis & minus.

Objic. Si Deus coëxistat tempori divisibiliter, coëxistit tempori per partes suæ existentia; sed existentia Dei non habet partes; est enim tota simul: ergo non coëxistit divisibiliter. Resp. negando sequelam majoris; quia existentia Dei coëxistit tota simul cuilibet differentia temporis, & non per partes: sicut anima habet inexistenciam divisibilem in toto corpore; quia partes corporis sunt divisibiles; licet non existat per sui partes, sed tota sit in toto corpore, & tota in qualibet parte corporis.

---

## QUÆSTIO ULTIMA.

*An res temporales coëxistant Æternitati  
ab æterno.*

**Q**UIA diximus æternitatem coëxistere tempori; idèd dicendum est etiam tempus æternitati coëxistere; quia quando existit tempus, existit etiam æternitas: an verò ab æterno etiam differentia temporis coëxtiterint æternitati, negabit.

**D**Es temporaneæ non coëxistunt æternitati ab æterno: quia coëxistere supponit existere: sed res temporales, nec differentię temporis existunt ab æterno: ergo non coëxistunt ab æterno, licet coëxistant æternitati in tempore. Deinde, sicut loca non replentur per immensitatem ab æterno, quia non sunt ab æterno; sic res temporales non coëxistunt ab æterno, quia non existunt ab æterno.

**O b j e c t.** Quæ coëxistunt æternitati, coëxistunt toti æternitati; quia æternitas non habet partes: sed quæ coëxistunt toti æternitati, coëxistunt semper æternitati: ergo ab æterno res temporaneæ æternitati coëxistunt. Resp. neg. minorem; licet enim coëxistant toti æternitati, non coëxistunt tamen semper æternitati; & hoc est quod alii dicunt, Res temporaneæ coëxistunt toti æternitati, quia indivisibilis est, non coëxistunt tamen totaliter æternitati; aliàs quando existeret æternitas, existerent semper res temporales, quod est falsum; quia ante creationem mundi æternitas existebat, ubi non existebant tempora. Dices ex Patribus; Deus ab æterno omnia novit, quia omnia illi erant præsentia ab æterno. Resp. Erant præsentia objectivè, concedo: quia ab æterno omnia videbat Deus in sua essentia, ac si fuissent actu: præsentia reali & actuali, nego.



DISPUTATIO.



## DISPUTATIO QUINTA.

*De Immensitate.*

**I**MMENSITAS Dei est modus intrinsecus naturæ D. quo Deus aptus est ad esse præsens in omni loco. Ex immensitate, quæ est æterna, sequitur ubiquitas in tempore, tanquam actus secundus ex actu primo; ita ut ubiquitas sit præsentia actualis, quâ Deus dicitur esse in rebus actualiter; quæ alio nomine vocatur Inexistentia: Immensitas verò est perfectio Dei, quâ natus est inexistere in rebus, quando existunt ipsæ res; unde immensitas est quid absolutum Deo ab æterno conveniens; ubiquitas verò est quid relativum Deo in tempore adveniens; Deus enim per ubiquitatem habet respectum rationis ad loca, in quibus est præsens.

---

 QUÆSTIO PRIMA.
*An Deus sit Immensus.*

**I**N hac quæstione duo simul discutienda sunt; scilicet an Deus sit immensus & an sit ubique; quæ tamen eâdem responsione solvuntur. Si enim Deus est immensus ab æterno, est ubique in tempore; per immensitatem enim natus est ad esse in omnibus

locis, quando existunt; ergo nunc ubi sunt loca, Deus debet illis omnibus inexistere.

## CONCLUSIO.

**I**MMENSUS est Deus, & ubique existit. Sic Baruc 3. *Immensus est, & non habet finem*: Quod confirmat Athana. in Symb. *Immensus Pater, Immensus Filius, Immensus Spiritus S.* Ratio est, quia non esset infinitus, si non esset natus ad esse præsens ubique; & de loco in locum posset mutari, si esset aliquis locus in quo actu non existeret: & sic patet, quod sit immensus, & ubique simul.

Objic. Si est ubique, erit in locis sordidis & foetentibus, quibus posset inquinari. Resp. esse reverà in talibus locis; non tamen inquinari posse; est enim substantia spiritualis, quæ non inquinatur à loco foetido, sicut nec anima à corpore leproso.

## QUESTIO II.

*Qui sint modi communes, quibus Deus in rebus existit.*

**L**ICET sit veritas certissima in fide, Deum esse immensum & ubique, tamen progrediendum est & explicandum, quot & quibus modis Deus sit in illis rebus, quibus inexistit.

## CONCLUSIO.

**S**UNT tres modi communes quibus Deus dicitur in omnibus rebus inexistere; nimirum per essentiam, per præsentiam, & per po-

tentiam. Esse in rebus per essentiam, est essentiam & substantiam Dei esse indistantem à quacumque re, sicut anima est indistans à corpore; quia ergo Dei essentia est intimè præsens omnibus rebus; & præsentialior quàm anima corpori, idèd dicitur esse in rebus per essentiam. Isse in rebus per præsentialiam, est esse in illis per scientiam & per cognitionem, vel est illas distinctè cognoscere; quoniam autem omnia sunt nuda, aperta & præsentialia oculis Dei, idèd dicitur esse in omnibus per præsentialiam. Tandem esse in rebus per potentiam, est esse in illis per operationem, seu in illis operari; unde Deus est in omnibus per potentiam, quia ex 1. ad Corinth. *operatur omnia in omnibus.*

Objic. S. Scripturam dicentem Deum aliqua nescire, ut Esai. 55. *Jejunavimus & non aspexisti, humiliavimus animas nostras, & nescisti.* Resp. duplicem esse scientiam in Deo: unam visionis, quâ omnia tùm bona, tùm mala videt; aliam approbationis, quâ solum bona dicitur cognoscere & approbare: unde distinguo textum Scripturæ; Deus nescivit humilia-  
tiones jejunantium; scientiâ approbationis, conc. quia non erant ex debito motivo: scientiâ visionis, nego. Quèd si multoties Psalmista dicat, *Deus Deus! meus respice in me*; ex hoc non sequitur, quèd sit aliquod instans, in quo Deus nos non cognoscat; sed per hoc David expostulat auxilia Dei specialia; unde addit, *quare me dereliquisti?*

---

 QUÆSTIO III.

*Qui sint modi speciales, quibus Deus certis in rebus existit.*

**H**Vjus quæstionis solutio necessaria est, ut intelligantur plures contextus sacræ Scripturæ, quibus videtur Deum non esse in omnibus, quia v. g. dicitur accedere; vel recedere, abesse à peccatoribus, & adesse in justis.

## CONCLUSIO.

**P**RÆTER modos communes, quibus Deus in omnibus rebus existit, sunt aliqui alii, quibus dicitur esse specialiter in aliquibus creaturis. Primò, est in Humanitate Christi per unionem hypostaticam; unde Paulus ad Corinth. dicit, *Era: Deus in Christo mundum reconcilians sibi.* Secundò, est in justis per gratiam, & per auxilia specialia; & isto modo dicitur aliquando accedere & recedere; abesse & adesse: ut Proverb. 13. *Longè est Deus ab impiis*: hoc per gratiam, non per naturam. Tertiò, est in Beatis, & in cœlo per gloriam, quia illic se intuitivè videndum præbet. Quartò, est in inferno per justitiam vindicativam. Quintò, est in Ecclesiâ per assistentiam & directionem specialem. Sextò, est in templo per exauditionem. Septimò, in aliquibus hominibus per gratias gratis datas, v. g. per donum prophetiæ, linguarum, miraculorum, &c.



Ostendit, in locis, & rebus inanimatis per visiones & apparitiones, ut in rubo ardenti, & in monte Sinai, ubi dictum fuit quod gloria Domini habitavit, & in loco ubi scalam vidit Jacob, & exclamavit, *Verè Dominus est in loco isto.*

#### QUESTIO IV.

*Utrum Deus sit in rebus ut in loco:*

**A**LIIQUI ex Patribus dixerunt, Deum non esse in loco; unde posset forsitan inferri, ipsum non esse ubique, nec proinde immensum: Ergo ut solvatur hæc difficultas; sciendum, aliquid posse esse dupliciter in loco. Primò, ita ut sit præsens in loco, tanquam locatum in locante; sicut aqua est in lagenâ. Secundò, ita ut non suscipiat leges locati; licet sit indistans à loco, & sit præsens in illo. Deus primo modo non est in loco, benè autem secundo.

#### CONCLUSIO.

**L**ICET Deus sit in omni loco, non tamen est in rebus, nec in locis, ut locatum in loco. Si enim Deus esset sic in rebus, susciperet leges locati, quod falsum est; quia si susciperet leges locati, esset in rebus circumscriptivè, vel definitivè; quod autem est circumscriptivè vel definitivè in loco, ambitur, circumscribitur, & definitur à limitibus loci, ita ut sit tantum intra limites loci, non verò in ipsis limitibus; aliàs non definiretur, nec circumscriberetur: sed Deus non est ita in

loco, quā sit etiam in limitibus, & extra limites loci : ergo non suscipit leges locati. Unde dicendum est, quod Deus sit in loco materialiter ; quia est præsens cuilibet rei ; non verò est in loco formaliter ; quia non est ullibi, ut locatum in loco : & hoc est quod Patres dicunt, Deum esse in locis illocaliter.

Objic. contra id quod diximus. Quod est definitivè in loco, est tantum intra limites loci, non verò in limitibus ; Anima rationalis est definitivè in corpore, attamen est in extremitatibus corporis, sicut in medio. Resp. cum Arist. animam non esse in corpore, ut in loco ; sed est ut forma in materia. Dices : Anima est quid creatum : ergo est in aliquo loco, qui non potest alius esse, quàm corpus. Resp. Omne creatum esse in loco, vel ratione sui, vel ratione totius, quod componit : anima ergo est in loco ratione hominis quem componit, vel ratione corporis quod informat, & ubi est corpus, ibi est anima : corpus scilicet circumscriptivè, & anima definitivè ; quia quælibet pars corporis respondet cuilibet parti loci ; anima verò est tota in toto loco, & tota in quælibet parte, & utrumque definitur & terminatur limitibus loci, ubi est homo.



## QUARTIO V.

*Utrum Existentia Dei in rebus, ritè colligatur  
ex ejus operatione in illis.*

**Q**uia Apostolus asserit Deum omnia in omnibus operari; ex eo concludit Divus Thomas; Deum in omnibus existere; Scotus verò improbat consequentiam D. Thomæ, & vult ex operatione Dei in omnibus non benè inferri ipsius præsentiam in illis.

## CONCLUSIO.

**E**XISTENTIA Dei secundum substantiam non benè colligitur esse in omnibus, quia omnia in illis operatur; & sic non benè concluditur: Deus operatur omnia in omnibus: ergo est in illis. Quia si per impossibile, Deus esset tantum in cœlo, posset operari & in terra, & in inferno: ergo si possit agere ubi non est, non benè infertur ipsius præsentia in tali loco, ex ejus operatione in illo. Quodd autem Deus possit agere ubi non est (si per impossibile non esset alicubi) patet: quia quo major est virtus agentis, eo magis remotè potest agere; virtus autem Dei est infinita: ergo non debet coarctari propinquitate loci. Deinde; Deus est agens per voluntatem; sed potest velle distans: ergo operari in distans & sic licet agens creatum non possit agere in distans, hoc tamen non est denegandum agenti increato.

## CONCLUSIO.

**D**eus est extra mundum, id est limites mundi supergreditur in infinitum; non est verò extra mundum, tanquam in aliquo loco reali distincto à se. Prima pars habetur in S. Script. Paralip. 2. *Quem cæli capere non poterant.* Job. 11. *Excelsior cælo & profundior inferno.* Et hoc est quod confirmant Patres, qui asserunt Deum esse supra & infra omnia, & complecti machinam mundi, sicut mare spongiam. Ratio est, quia sicut Deus per æternitatem omni tempori coexistit, & omne tempus excedit in infinitum; sic per immensitatem omni loco inexistit, & totum mundum infinitè excedit. Ratio secundæ partis est, quia si Deus extra mundum esset, tanquam in aliquo loco reali à se distincto, esset aliqua superficies corporis extra mundum; locus enim est superficies corporis ambientis; & si esset aliqua superficies, esset aliquod corpus, quoniam superficies est corporis extremitas: absurdum autem est dicere, extra mundum esse aliquod corpus, quandoquidem per mundum intelligimus uniuersam collectionem corporum; & sic Deus non potest esse extra mundum tanquam in aliquo reali distincto à se, licèt mundi limites supergrediatur. Et hoc est quod perbellè dicit D. Bonaventura his verbis: si quærat an Deus si extra mundum; resp. quòd, *extra*, dicit uno modo situm & positionem in aliquo; & sic impossibile est ut sit extra mundum; sicut impossibile est, quòd sit ante tempus, si, *ante*, dicat tempus. Alio-

D v.

isto, esset in utroque, & in vacuitate, quæ remaneret inter utrumque mundum, aliàs à se distaret: ergo nunq̃ potest dici quod extra mundum sit in aliquo, nempe in vacuitate quæ est super cœlos. Resp. quòd talis vacuitas est imaginaria; unde dico, quòd si mundum de novo crearet, esset Deus in utroque, non tamen à seipso distaret; quia extra illos mundos esset in seipso; & sic respectu horum mundorum haberet existentiam relativam, quæ vocaretur inexistencia; respectu autem vacuitatis, quæ fingitur esse inter utrumque mundum, haberet existentiam absolutam; quia non diceret relationem ad ullum locum.

### QUESTIO VI.

*Vtrum Immensitas alicui creaturæ competere possit.*

**I**N præcedentibus probavimus Deum esse immensum, & explicuimus modos, tum communes, quibus in omnibus & singulis rebus existit: tum speciales, quibus in certis quibusdam specialiter adesse dicitur, videndum remanet, an hæc perfectio alicui creaturæ convenire possit.

### CONCLUSIO.

**N**ULLI enti creato possibilis est immensitas. Est enim modus intrinsecus divinitatis, & modus intrinsecus soli Deo convenit, in quo ab attributo distinguitur, ut diximus.

multoties : imò nec ubiquitas in creaturâ reperitur ; nulla enim ubique est maximè secundum totam suam entitatem ; licèt enim mundus secundum sui partes sit ubique , non tamen secundum se totum .

Objic. contra primum : Deus potest creare Angelum ita perfectum , ut extendere se possit ad universas mundi partes secundum se totum ; quia hic est modus existendi substantiarum spiritualium , ut sint totæ in toto loco , & totæ in qualibet parte : sed ille Angelus esset immensus ; ergo immensitas est enti creato possibilis . Resp. negando minorem ; licèt enim posset Deus creare Angelum ubique diffusum , non tamen esset immensus ; quia non haberet illam præsentialitatem necessariò , & ex suâ naturâ ; sed contingenter , & ex voluntate Dei .

Objic. contra secundum : Universalia ex Philosopho sunt ubique : ergo ubiquitas in creaturâ reperitur . Resp. dist. ad Philosophum : Universalia sunt ubique negativè , concedo , quia non sunt in loco determinato ; sed sunt in omnibus locis , ubi reperiuntur singularia : Sunt ubique positivè , nego : quia sunt tantum ubi sunt singularia , & singularia non existunt ubique .

\*\*\*

## DISPUTATIO SEXTA.

*De visibilitate & invisibilitate Dei.*

**Q**UIA Deus est invisibilis oculo corporeo , & etiam intellectui naturaliter

agenti ; & quia etiam visibilis est ab intellectu per lumen gloriæ elevato , idcirco hæc disputatio aget tum de visibilitate , tum de invisibilitate Dei.

---

### QUÆSTIO PRIMA.

*Verum Deus sit visibilis ab intellectu creato ;*

**C**REDIDERUNT Armeni Deum non posse videri in se ab intellectu creato , etiam beatificato , & elevato lumine gloriæ ; putarunt quæ Angelos & homines beatos solum videre quandam Essentiæ D. claritatem & splendorem eximium. In eodem errore fuit Abailardus apud D. Bernardum Epist. 170. Contra eos assignabitur.

#### CONCLUSIO.

**D**EUS ab intellectu creato , saltem in patriâ , visibilis est. Joan. enim 14. habetur : *Qui diligit me , diligam eum . & manifestabo ei meipsum.* 1. Corinth. 13. *Nunc videmus per speculum & in enigmate , tunc autem facie ad faciem.* Joan 3. *Videbimus eum sicuti est* Matth. 5. *Beati mundo corde , quoniam ipsi Deum videbunt.* Ratio est , quia homo naturaliter desiderat cognoscere causam , cujus videt aliquem effectum ; sed videmus plurimos effectus , qui à Deo emanant : ergo naturaliter Deum cognoscere desideramus : sed talis appetitus inanis esse non debet : ergo debet expleri , saltem in beatis , ut habetur Ps. 1. *Satiabor cum apparueris gloria tua* & ergo Beati ipsum videre debent ,

Objic. Homo magis à Deo distat, quàm lapis ab homine; quia Deus est infinitus & homo finitus, lapis autem & homo sunt finiti: sed lapis non potest videre hominem: ergo nec homo Deum. Resp. dist. majorem. Magis distant Deus & homo, in modo entis, conc. quia Deus est infinitus & homo finitus; finitas verò & infinitas sunt modi entis: magis distant in natura entis, nego: homo enim est naturæ intellectualis, sicut & Deus: unde licet lapis non possit intelligere hominem, quia lapis non est intellectivus, homo tamen poterit intelligere Deum.

Objic. Paulum 1. Timoth. 2. dicere; Deum esse invisibilem, *Regi saeculorum immortalis & invisibili*. Resp. Deum esse invisibilem oculo corporeo, esse verò visibilem per intellectum elevatum lumine gloriæ. Sic responderi debet ad Joan. 4. *Deum nemo vidit unquam*, Si Chrysostomus Hom. 4. dicat, *Deum nemo vidit unquam; non viderunt eum Prophetæ, non Angeli, nec Archangeli, & si eos interrogemus, nihil dicent de substantia Dei, sed tantum referint, Gloria in excelsis Deo*: Res. ipsum loqui de cognitione comprehensivâ, quam non habuerunt, nec habere possunt Angeli, ut dicemus sequenti disputatione, non de intuitivâ.





---

 QUÆSTIO II.

*An Deus possit videri oculo corporeo.*

**H**OC intelligitur tum de potentiâ Dei ordinariâ, tum, de absolutâ ; ita quòd sensus quæstionis sit iste : An Deus de potentiâ extraordinariâ possit elevare oculum corporeum ad sui visionem : quod negabit.

## C O N C L U S I O.

**D**EUS non potest oculo corporeo videri, etiam de potentiâ absolutâ ; Deus enim est spiritus : sed oculus corporeus nullo modo potest videre substantiam spiritualem : ergo, &c. Probatur minor, quia repugnat quòd facultas feratur extra suum objectum formale : sed objectum formale oculi corporei, est quid corporeum, ut color, lux vel corpus colore, aut luce affectum : ergo nullo modo potest videre substantiam spiritualem. Probatur major, quia objectum formale est illud, quod ita essentialiter determinat potentiam, ut non possit ferri extra illud ; si ergo aliquid corporeum est objectum formale oculi corporei, ille non poterit videre aliquid spirituale, qualis est Deus.

**CONFIRMATUR.** Est minor proportio inter facultatem corpoream & objectum spirituale, quàm inter oculum corporeum & sonum ; quia ista duo corporea sunt, & plus conveniunt duo corporea, quàm duo entia, quorum unum est corporale, & aliud spiri-

tuale : sed repugnat quòd oculus videat sonum ; & quòd os gustet colorem : ergo à fortiori repugnat quòd oculus corporeus attingat objectum spirituale , & consequenter videat Deum , & sic potest concludi cum Athanasio orat. contra idololat. *grandem esse verecundiam , si quis fingat Deum esse visibilem oculo corporeo.*

Ob j. c. Sanctos Patriarchas & Prophetas Deum aliquando vidisse ; sed erant corporibus conjuncti ; ergo ipsum viderunt oculo corporeo : ergo non repugnat ipsum sic videri posse per potentiam Dei absolutam. Resp. hoc intelligi , vel de visione imaginariâ , quam Deus in illis suscitavit per phantasmata sensuum interiorum ; vel de visione corporali & externâ sub aliquo signo sensibili , v. g. sub formâ nubis , luminis , rubi ardentis , vel sub formâ Angeli in aliquo corpore assumptâ apparentis. Quòd si Job 41. dicat Deo loquens , *Auditus auris audivi te , nunc autem oculus meus videt te* ; ipse loquitur de sensibili cognitione Providentiæ divinæ per experientiam ; ita ut sit sensus , *Multa audiveram , ô Deus ! de tuâ providentiâ circa homines , nunc autem quæ audivi , in me experior ; mirabilis enim est circa me tuæ providentiæ dispositio.* Si idem Job dicat : *In carne mea videbo Deum* ; loquitur de Christo , addit enim *Salvatorem meum* , quem visurus erat in cœlo post resurrectionem. Deinde , si hoc diceret de Deo quem sperabat videre , hoc esset intelligendum sic , quòd post resurrectionem in carne existens , speraret Deum videre per oculos mentis.

**O B J E C T.** Deus potest ferre potentiam extra sphæram suæ activitatis, ita ut possim audire sonum etiam pluribus leucis distantem: ergo potest ferre potentiam extra suum objectum formale, faciendo quodd oculus corporeus videat substantiam spirituales. **R E S.** concedendo antecedens, negando consequentiam: potest enim primum facere Deus; quia ferre potentiam extra sphæram activitatis, se habet in genere causæ efficientis, quam Deus supplere potest, adjuvando potentiam, vel fortificando objectum & speciem ejus: non potest autem facere secundum; quia ferre potentiam extra suum objectum formale & adæquatum, se habet in genere causæ formalis, quam Deus supplere non potest: Vnde licet possit facere Deus, ut Parisiis existens, audiam campanam Romæ pulsantem; non tamen facere potest, ut oculus meus percipiat sonum, aut videat substantiam spirituales. Dices: Deus potest elevare rem corpoream, ut producat effectus spirituales & supernaturales: v. g. aquam baptismi ut producat gratiam: ergo poterit elevare oculum corporeum, ut substantiam spirituales percipiat. Conceditur antecedens, & negatur consequentia. Ratio disparitatis est, quia aqua baptismi, sicut & alia sacramenta, non producit gratiam physicè, sed tantum moraliter.



---

 Q U Æ S T I O III.

*Utrum Deus naturaliter possit videri ab intellectu conjuncto.*

**I**N primâ quæstione statuimus, Deum posse videri secundum se ab intellectu creato; in sequentibus videndum est, quænam requirantur in intellectu, ut visionem Dei attingere possit. Quia ergo intellectus potest concipi, vel ut conjunctus, vel ut separatus, vel ut naturaliter agens, vel ut elevatus lumine gloriæ; hæc omnia seorsim videnda sunt. Incipiendum est igitur ab intellectu conjuncto, & quærendum utrum propriis suis viribus Deum intelligere valeat intuitivè, idest secundum se, & non per speciem, ut aliquando dicemus.

## C O N C L U S I O.

**I**NTELLECTUS conjunctus naturaliter agens non potest Deum intuitivè videre. Si enim in Concil. Viennensi damnantur Begardi & Beguinz, qui dicebant intellectum separatum naturaliter posse Deum intueri; à fortiori damnandi sunt illi, qui dicunt intellectum conjunctum posse naturaliter Deum videre. Ratio est, quia objectum intellectus conjuncti est quidditas rei materialis & sensibilis: ergo non potest ferri in objectum spirituale & insensibile. Antecedens patet ex communi axioma, *Nihil est in intellectu, quin prius fuerit in sensu*: sed sensus non potest affici nisi

speciebus rerum materialium : ergo nec intellectus conjunctus.

Objic. Ut aliquid cognoscatur intuitivè, sufficit quòd actu sit præsens potentiz : sed Deus est ubique præsens : ergo ab intellectu conjuncto potest naturaliter cognosci intuitivè. Resp. neg. majorem. Non sufficit enim quòd sit actu præsens, sed requiritur quòd actu moveat potentiam. Ut paries enim v. g. possit cognosci, non sufficit quòd sit præsens ; sed ulterius debet movere potentiam per speciem sui, quam imprimit oculo corporeo & quæ transit ad sensum communem, de sensu communi ad phantasiâ, & de phantasiâ ad intellectum. Licet ergo Deus sit ubique præsens ; quia tamen non movet intellectum, nisi quando vult, ideò naturaliter non potest illum intueri intellectus conjunctus.

---

#### Q U Æ S T I O I V :

*An supernaturaliter intellectus conjunctus possit Deum videre.*

C O N S T A T hoc non posse fieri de potentia Dei ordinaria ; quia Deus ordinavit, quòd intellectus conjunctus non operetur in hoc mundo, nisi per organa corporis, quæ sunt materialia, & sic de lege communi ferri non possunt nisi circa objecta materialia : sed quæstio nostra est de potentia Dei absolutâ : Vtrum scilicet intellectus corpori immerfus, lumine gloriæ adjutus, possit

## CONCLUSIO.

**I**NTELLECTUS conjunctus potest cum auxilio supernaturali Deum videre intuitivè de potentiâ Dei absoluta. Quia si pro hoc statu intellectus non operetur, nisi per sensus & per species corporeas derivatas ab objectis, hoc oritur ex lege authoris naturæ, qui talem dependentiam voluit esse inter animam & corpus, quoddam anima operari non possit, nisi corporis & sensuum interventu; sed de facili Deus potest dispensare super hanc legem communem, quam posuit: ergo potest facere ut intellectus à sensibus non dependeat in operando; & sic intellectus, qui est facultas intellectualis, poterit percipere objectum spirituale, qualis est Deus. Quod si hoc vellet facere Deus: Primò alligaret sensus externos, suspendendo illis suum concursum, ne ageret: Secundò daret intellectui lumen gloriæ, quo elevaretur ad visionem Dei, ut pater de Christo, qui in hoc mundo fuit beatus, & Deum intuitivè vidit, etiam pro illo tempore, quo sensibus immersus erat; quod autem factum est in Christo, potest in alio fieri, ubi adest absoluta Dei potentia.

**O**BJEC. Ex dictis potentia non potest ferri extra suum objectum adæquatum: sed ex præcedenti quæst. objectum adæquatum intellectus conjuncti est res materialis: ergo intellectus conjunctus nullo modo potest Deum videre. Resp. dist. minorem: Objectum intellectus conjuncti est quidditas rei materialis, si intel-

lectus agat viâ communi, & interventione sensuum externorum, concedo; quia sensus externi sunt corporei; & sic non possunt ferri, nisi circa objecta corporea: si intellectus agat ex se, & sine ministerio sensuum, nego.

---

### QUESTIO V.

*An aliqui in via Deum viderint.*

**H**Oc fieri potuit; quia diximus intellectum conjunctum posse Deum videre de potentia Dei absolutâ, sed an de facto aliqui per intellectum conjunctum Deum viderint in hoc mundo, ut aliqui sentiunt de Moyse, Stephano, Paulo, & aliis; negabit

### CONCLUSIO.

**N**ec Moyse, nec Stephanus, nec Paulus nec ulli alii Deum intuitivè viderunt in hac vitâ mortali. Sic sentiunt communiter Doctores, conformiter ad sacram Scripturam. Joan. 4. *Deum nemo vidit unquam.* 1. ad Timoth. 6. ubi Paulus post raptum suum dicit: *Quem nemo hominum vidit, nec videre potest.* Exod. 33. dixit Deus Moyse: *Non poteris videre faciem meam, non enim videbit me homo & vivet: Et ibidem: Posteriora mea videbis; faciem autem meam videre non poteris.* Per posteriora autem intelliguntur quædam signa corporea, in quibus Deus apparuit Moyse, ut in rubo, Quoad rationem conclusionis, nullam asserimus; quia hoc pender à solâ Dei volunta-

te, qui potuit se videndum præstare intellectui conjuncto; unde si negamus ipsum sic visum fuisse, non negamus tanquam aliquid impossibile, sed tanquam aliquid, de quo Scriptura non affert sufficiens testimonium, imò contrarium asserit, ut allegavimus.

OBJEC. Deum visum fuisse à Moyse; dixit enim illi Deus, *Ostendam tibi omne bonum*, idest Deum, qui solus summè bonus est: ergo suum promissum implevit: ergo illum vidit. Resp. talem promissionem non fuisse adimpletam in hac vitâ, sed in aliâ. Deinde vidit omne bonum, scilicet Deum, per posteriora, idest per signa corporea. Si Deus dicat Numer. 12. *Si quis fuerit inter vos Prophetæ Domini, in visione loquar illi, vel per somnium; non sic autem servus meus Moyses, ore enim ad os loquor ei, & palàm, & non per figuras Dominum videt.* Resp. Non propter hoc Moyses Deum vidit intuitivè; dixit enim illi Deus: *Faciem meam videre non poteris*: sed significatur tantùm, quòd Deus apparuerit aliis Prophetis, & loquutus fuerit per somnia & imagines in phantasiâ impressas; Moyse verò per signa quædam corporea, & per vocem sensibilem, ut quando ipsum vocavit de rubo. Quòd si dicatur, Deum alloquutum fuisse Moysem facie ad faciem; dicendum est, hoc verbum, *facie ad faciem*, esse ambiguum; aliquando enim sumitur pro intuitiva visione, ut quando Paulus dixit, *Nunc videmus per speculum, tunc autem facie ad faciem*: & aliquando sumitur pro verâ, reali & corporeâ visione, ita quòd in primo



sensu, *facie ad faciem* opponitur fidei; in secundo opponitur visioni imaginariæ; Deus ergo conversabatur cum aliis Prophetis per visiones & loquutiones imaginarias; cum Moyse autem conversabatur per visiones, & voces reales & corporeas.

Objic. Paulum vidisse Essentiam D. in raptu suo ad paradysum, ubi audivit *arcana verba quæ non licet homini loqui*. Resp. Paulum non cognovisse illa arcana in essentia D. quam viderit; sed illa cognovit per revelationem: Vnde dixit: *Ne magnitudo revelationum extollat me*. Si postea Paulus dicat se esse testem eorum quæ vidit; hoc intelligitur tantum de Resurrectione Christi, quam prædica- vit Paulus, & cujus testis fuit; quoniam Christus Paulo apparuit eunti in Damascum. Porro quòd Paulus Deum non viderit in raptu, patet; quia iste raptus contigit, antequam scriberet Epist. ad Timotheum, & antequam Joannes suum traderet Evangelium; uterque tamen scribit, nullum hominum Deum vidisse unquam.

Objic. quòd Stephanus Deum viderit; quia Act. 5. dicit, *Ecce vides cælos apertos*. Resp. Stephanum intelligi debere de Christo; addit enim, & *iesum stantem*. Instabis, Stephanus subjungit; *à dextri virtutis Dei*: Non potest autem aliquis videri à dextris alterius, nisi alter videatur. Resp. Non dicit quòd viderit Christum à dextris Dei simpliciter; sed à dextris virtutis Dei; idest à dextris alicujus splendoris, & lucis eximæ, quæ erat symbolum Divinitatis, à cujus dextris stabat Christus,

fic dicendum de B. Virg. Francisco, & aliis,  
qui Deum vidisse assertuntur.

---

### QUESTIO VI.

*An intellectus separatus, naturaliter agens,  
possit Deum videre.*

**Q**UÆ hujusque diximus, probant nec oculum corporeum posse Deum videre, etiam de potentiâ Dei absolutâ; nec intellectum conjunctum in viâ, nisi per potentiam Dei extraordinariam; nunc ad intellectum separatum transeuntes, quærimus, an naturaliter queat visionem intuitivam Dei elicere. Hic fuit error Begardorum & Beguinarum hæreticorum Germaniæ; qui asserere ausi fuerunt solam conjunctionem intellectus cum corpore, & dependentiam à sensibus impedire Dei visionem; ita quòd eodem instanti, quo esset separatus à carne, posset illicò Deum intuitivè videre: Quia ergo tales hæretici damnati fuerunt in Concil. Viennensi sub Clemente V. in Clementinâ, ad nostram, extra. De hæreticis, idèò erit

#### CONCLUSIO.

**D**Eus non potest intuitivè videri ab intellectu separato, si agat naturaliter: Quia intellectus creatus non potest naturaliter videre Deum nisi possit naturaliter uniri Essentia divina cum intellectu creato; visio enim corporalis, & intellectio non possunt fieri, nisi objectum uniatur potentix vel per

per se, vel per speciem : sed talis unio essentia  
D. cum intellectu creato est purè libera ex  
parte Dei ; ita quòd Deus se cognoscendum  
præstet tantum quando vult, ubi vult, cui vult,  
& quomodo vult : ergo naturaliter non potest  
videri. Deinde, si intellectus separatus natu-  
raliter posset Deum videre, dæmones & animæ  
damnatae Deum viderent. Tandem debet esse  
proportio inter objectum & potentiam ; sed  
Deus est objectum supernaturale : ergo intel-  
lectus debet elevari per lumen gloriæ, ut pos-  
sit Deum videre.

Objic. Deus per absolutam potentiam  
potest producere speciem sui ipsius repræsentati-  
viam, & Angelus potest illam naturaliter vi-  
dere : ergo & Deum videbit naturaliter. Quod  
autem Angelus possit talem videre speciem,  
patet ; quia illa esset finita & creata. Resp. quòd  
etiamsi hoc fieret, non tamen videret Deum  
Angelus naturaliter, & ex sua virtute ; sed  
mediante illâ specie, quæ esset supernaturalis.  
Dices ; Intellectus conjunctus potest evidenter  
demonstrare Deum existere, esse infinitum,  
immensum, &c. sed non potest hæc demon-  
strare, nisi evidenter illa cognoscat : ergo à for-  
tiori intellectus separatus ea omnia cognos-  
cet. Resp. hæc omnia posse cognosci abstrac-  
tivè per argumentationem ; non verò intui-  
tivè per claram visionem. Deinde, Licet co-  
gnosceretur Deus ut author naturæ, non ta-  
men ut author gratiæ, nec ut trinus, nec ut  
incarnatus, nec ut glorificator. Dices : Ocu-  
lus potest naturaliter videre omne visibile :  
ergo intellectus potest intelligere omne in-

telligibile; sed Deus est intelligibilis : ergo potest cognosci naturaliter. Negatur consequentia, Instabis : Intellectus ergo est imperfectior visu. Negatur; quia talis impotentia non procedit ex imperfectione intellectus, qui omne intelligibile naturale cognoscere potest; sed ex altitudine objecti, quod est supernaturale; & sic ut percipiatur, intellectus debet elevari.

---

### QUESTIO VII.

*An intellectus ad videndum Deum indigeat lumine gloria.*

**A**D intellectionem duo concurrunt, nempe potentia intellectiva, & objectum intelligibile. Objectum autem potest dupliciter concurrere. Primò, per se, & immediatè, sine ullà interventione speciei; sic beati Deum immediatè per essentiam, & sine specie vident. Secundò, per speciem derivatam ab objecto, vices gerentem objecti, & hoc fit quando objectum non est præsens, ut quando nunc intelligo urbem Rothomagnum per speciem in phantasiâ derelictam. Vel quando objectum est præsens, non tamen potest uniri potentia. Sic quando video, aut intelligo parietem, qui est præsens; hoc debet fieri per speciem parietis; quia paries ut sic, non potest ingredi meum oculum, aut intellectum. In sequenti questione dicemus intellectum Beatorum non indigere specie, ut Deum videant: hinc videndum est,

an ex parte intellectus requiratur aliquod auxilium supernaturale, quod lumen gloriæ vocatur, quo intellectus elevetur ad Deum intuitivè cognoscendum.

## CONCLUSIO.

**A**D Deum intuitivè videndum lumen gloriæ requiritur. Hoc habetur ex Concilio Viennensi præcitato, quod damnavit Begardos & Beguinas, qui in hoc errore versabantur. Ratio nostra est, quia si intellectus separatus posset per solas naturæ vires Deum videre, illi qui haberent æqualem intellectum, æqualiter Deum viderent, licet haberent inæqualia merita; imò qui haberent intellectum perspicaciorum, & minora merita, Deum clarius viderent, & essent beatiorez illis qui majora haberent merita, quod est absurdum. Deinde, Inter potentiam & objectum debet esse proportio; sed Deus est objectum supernaturale: ergo intellectus supernaturalis fieri debet per lumen gloriæ, quod est quædam supernaturalis qualitas intellectum elevans ad ordinem supernaturalem. Tandem Visio beatifica non est minùs supernaturalis, quàm assensus fidei; fidei enim succedit visio, tanquàm perfectus imperfectiori; sed ad assensum fidei non sufficit sola revelatio ex parte objecti, sed requiritur lumen fidei in intellectu: ergo ad visionem beatificam non sufficit quòd Deus sit in se præsens, sed ex parte intellectus requiritur lumen gloriæ.

**OBJECI.** Si lumen gloriæ juvaret intellex.

E ij

ctum; hoc faceret vel augendo ipsius potentiam, quod non potest fieri; quia substantia non suscipit magis aut minus: vel hoc fieret concurrendo cum illo tanquam causa partialis, quod etiam nequit esse; quia quando agentia partialia producant eundem effectum, quodlibet eorum potest illum producere, vel saltem aliquam ejus partem; si enim duo homines possent ferre centum libras, quilibet posset ferre quinquaginta: sed nec lumen gloriæ potest unam partem visionis beatificæ elicere, nec intellectus solus aliam: ergo lumen gloriæ non requiritur. Resp. quod lumen gloriæ possit juvare intellectum, non intendendo potentiam, sed operationem ejus: potest etiam concurrere cum intellectu, ut causa partialis: Et quando affertur, quod duæ causæ partiales possunt seorsim producere aliquam partem effectus; Dist. Quando causæ non sunt subordinatæ, ut in allato exemplo, concedo: quando sunt subordinatæ, ut in proposito, ubi lumen gloriæ subordinatur intellectui, tanquam instrumentum potentiae vitali, nego. Exemplificatur de calamo & manu, quæ sunt causæ partiales scripturæ, neutra tamen sine aliâ potest scribere, quia sunt causæ subordinatæ.

Objc. Si lumen gloriæ exigatur, maximè, ut per illud intellectus proportionetur cum objecto; sed intellectus illustratus lumine gloriæ est semper finitus, & Deus infinitus. Resp. Mediante lumine gloriæ, intellectus non est proportionatus cum Deo in gradu infinitatis, concedo: in ordine supernaturali-

tatis, nego. Pro tunc enim est veluti ordinis divini. Dices: Finitum ad infinitum nulla est proportio. Dist. Geometrica & entitativa, conc. quantumcumque enim finitum multiplicetur, nunquam infinitum fiet: Nulla est est proportio ordinis & habitudinis potentiae ad objectum, nego: Deus enim statuit ut potentia finita ordinaretur ad objectum infinitum videndum; maxime ubi specialis advenit concursus Dei. Dices. Si visio est à lumine gloriae, & lumen gloriae à Deo, non erit visio hominis, sed Dei. Negatur, quia illa visio non recipitur in Deo, sed in homine. Deinde, Lumen gloriae non concurrat vitaliter, & principaliter ad illam visionem, sed tantum instrumentaliter: Si quis dicat, Species & lumen sunt unum & idem: sed non datur species, ut Deus videatur: ergo nec lumen. Resp. negando majorem, quia species est medium, quo res cognoscitur, se tenens ex parte objecti, & gerens vicem illius; lumen verò est medium quo, se tenens ex parte potentiae, & illam corroborans.

### Q U A E S T I O V I I I.

*An intellectus indigeat specie intelligibili ad videndum Deum.*

**C** O N S T A T ergo, ut Deus intuitivè videatur, requiri aliquid ex parte potentiae, quod intellectum elevet, scilicet lumen  
E iij

gloriæ : sed potest dubitari, an etiam *aliquid* aliud exigatur ex parte objecti, nempe species, quæ Deum repræsentet intellectui, sicut fit in omnibus aliis intellectionibus, quas non producimus, nisi per species derivatas ab objectis.

## CONCLUSIO.

**N**ON indigent Beati specie intelligibili, ut Deum videant, sed ipsum immediatè & per essentiam intuentur. Ratio nostra est, quia species duobus tantùm casibus requiritur: Vel quando objectum est materiale, & sic non potest concurrere ad intellectionem, quæ immaterialis est; unde objectum debet suppleri per speciem, quæ licet primò sit materialis, spiritualisatur tamen virtute intellectus: Vel requiritur species, quando objectum non est sufficienter conjunctum potentia; tunc enim absente objecto, requiritur species, mediante quâ, objectum potentia conjungatur, v. g. ut possit intellectus cognoscere Angelum distantem, debet infundi in intellectu agente species illius Angeli, mediante quâ, intellectus patiens producat intellectionem Angeli: sed Essentia D. quæ est objectum visionis beatificæ, immaterialis est, & præsens intimè intellectui creato: ergo ex se potest concurrere ad visionem beatificam; & proinde non requiritur species; frustra enim fit per plura, quod potest fieri per pauciora.

OBJEC. Lumen gloriæ nihil est aliud, quàm expressio objecti beatifici, vel qualitas quædam supernaturalis Deum repræsentans; sed species est etiam talis expressio, seu talis qua-



litas : ergo si requiratur lumen , requiritur etiam species. Resp. Quod lumen gloriæ sit qualitas repræsentans Deum ex parte potentiz, species verò repræsentat ex parte objecti ; & in hoc distinguuntur , quod lumen gloriæ elevet potentiam , & species gerat vices objecti ; & sic licet requiratur lumen , non tamen requiritur species.

### QUESTIO IX.

*An Visiones beatificæ sint æquales.*

**I**OVINIANUS, teste Hieronymo, vult omnes Beatos æqualiter Deum videre, & visionem beatificam esse indivisibilem ; nos verò qui in illâ visione beatificâ admittimus latitudinem graduum, habemus quod aliter respondeamus.

#### CONCLUSIO.

**O**MNES visiones beatificæ non sunt æquales ; imò Beati pro inæqualitate meritorum, inæqualiter Deum vident. Joann. 14. *In domo Patris mei mansiones multe sunt.* 1. Corinth. 15. *Sicut stella differt à stella, sic in resurrectione mortuorum.* Et cap. 3. *Vnusquisque propriam mercedem recipiet, juxta laborem suum.* Et 2. Corinth. 9. *Qui parce seminat, parce & metet.* Ratio conclusionis est, quia sicut merita sunt inæqualia, sic & præmia inæqualia esse debent, Deinde, Pœna damnatorum est inæqualis. Apocal. 18. *Quantum glorificavit se, tantum dante illi tormentum.*

Deum videre in hoc mundo.

## CONCLUSIO.

**I**NTELLECTUS conjunctus potest cum auxilio supernaturali Deum videre intuitivè de potentiâ Dei absoluta. Quia si pro hoc statu intellectus non operetur, nisi per sensus & per species corporeas derivatas ab objectis, hoc oritur ex lege authoris naturæ, qui talem dependentiam voluit esse inter animam & corpus, quod anima operari non possit, nisi corporis & sensuum interventu; sed de facili Deus potest dispensare super hanc legem communem, quam posuit: ergo potest facere ut intellectus à sensibus non dependeat in operando: & sic intellectus, qui est facultas intellectualis, poterit percipere objectum spirituale, qualis est Deus. Quod si hoc vellet facere Deus: Primò alligaret sensus externos, suspendendo illis suum concursum, ne ageret: Secundò daret intellectui lumen gloriæ, quo elevaretur ad visionem Dei, ut patet de Christo, qui in hoc mundo fuit beatus, & Deum intuitivè vidit, etiam pro illo tempore, quo sensibus immerfus erat; quod autem factum est in Christo, potest in alio fieri, ubi adest absoluta Dei potentia.

**O**bjec. Ex dictis potentia non potest ferri extra suum objectum adæquatum: sed ex præcedenti quæst. objectum adæquatum intellectus conjuncti est res materialis: ergo intellectus conjunctus nullo modo potest Deum videre. Resp. dist. minorem: Objectum intellectus conjuncti est quidditas rei materialis, si intel-

lectus agat viâ communi, & interventione sensuum externorum, concedo; quia sensus externi sunt corporei; & sic non possunt ferri, nisi circa objecta corporea: si intellectus agat ex se, & sine ministerio sensuum, nego.

---

### QUESTIO V.

*An aliqui in via Deum viderint;*

**H**Oc fieri potuit; quia diximus intellectum conjunctum posse Deum videre de potentiâ Dei absolutâ; sed an de facto aliqui per intellectum conjunctum Deum viderint in hoc mundo, ut aliqui sentiunt de Moyse, Stephano, Paulo, & aliis; negabit

### CONCLUSIO.

**N**Ec Moyse, nec Stephanus, nec Paulus nec ulli alii Deum intuitivè viderunt in hac vitâ mortali. Sic sentiunt communiter Doctores, conformiter ad sacram Scripturam. Joan. 4. *Deum nemo vidit unquam.* 1. ad Timoth. 6. ubi Paulus post raptum suum dicit: *Quem nemo hominum vidit, nec videre potest.* Exod. 33. dixit Deus Moyse: *Non poteris videre faciem meam, non enim videbis me homo & vivet: Et ibidem: Posteriora mea videbis; faciem autem meam videre non poteris.* Per posteriora autem intelliguntur quædam signa corporea, in quibus Deus apparuit Moyse, ut in rubo, Quoad rationem conclusionis, nullam afferimus; quia hoc pendet à solâ Dei volunta-

te, qui potuit se videndum præstare intellectui conjuncto; unde si negamus ipsum sic visum fuisse, non negamus tanquam aliquid impossibile, sed tanquam aliquid, de quo Scriptura non affert sufficiens testimonium, imò contrarium asserit, ut allegavimus.

OBJEC. Deum visum fuisse à Moyse; dixit enim illi Deus, *Ostendam tibi omne bonum*, idest Deum, qui solus summè bonus est: ergo suum promissum implevit: ergo illum vidit. Resp. talem promissionem non fuisse adimpletam in hac vitâ, sed in aliâ. Deinde vidit omne bonum, scilicet Deum, per posteriora, idest per signa corporea. Si Deus dicat Numer. 12. *Si quis fuerit inter vós Propheta Domini, in visione loquar illi, vel per somnium; non sic autem servus meus Moyses, ore enim ad os loquor ei, & palàm, & non per figuras Dominum videt.* Resp. Non propter hoc Moyses Deum vidit intuitivè; dixit enim illi Deus: *Faciem meam videre non poteris*: sed significatur tantùm, quòd Deus apparuerit aliis Prophetis, & loquutus fuerit per somnia & imagines in phantasiâ impressas; Moyse verò per signa quædam corporea, & per vocem sensibilem, ut quando ipsum vocavit de rubo. Quòd si dicatur, Deum alloquutum fuisse Moysem facie ad faciem; dicendum est, hoc verbum, *facie ad faciem*, esse ambiguum; aliquando enim sumitur pro intuitiva visione, ut quando Paulus dixit, *Nunc videmus per speculum, tunc autem facie ad faciem*: & aliquando sumitur pro verâ, reali & corporeâ visione, ita quòd in primo

sensu, *facie ad faciem* opponitur fidei; in secundo opponitur visioni imaginariæ; Deus ergo conversabatur cum aliis Prophetis per visiones & loquutiones imaginarias; cum Moyse autem conversabatur per visiones, & voces reales & corporeas.

O b j e c. Paulum vidisse Essentiam D. in raptu suo ad paradysum, ubi audivit *arcana verba quæ non licet homini loqui*. Resp. Paulum non cognovisse illa arcana in essentia D. quam viderit; sed illa cognovit per revelationem: Vnde dixit: *Ne magnitudo revelationum extollat me*. Si postea Paulus dicat se esse testem eorum quæ vidit; hoc intelligitur tantum de Resurrectione Christi, quam prædica- vit Paulus, & cujus testis fuit; quoniam Christus Paulo apparuit eunti in Damascum. Porro quòd Paulus Deum non viderit in raptu, patet; quia iste raptus contigit, antequam scriberet Epist. ad Timotheum, & antequam Joannes suum traderet Evangelium; uterque tamen scribit, nullum hominum Deum vidisse unquam.

O b j e c. quòd Stephanus Deum viderit; quia Act. 5. dicit, *Ecce video cælos apertos*. Resp. Stephanum intelligi debere de Christo; addit enim, & *iesum stantem*. Instabis, Stephanus subjungit; à *dextri virtutis Dei*: Non potest autem aliquis videri à dextris alterius, nisi alter videatur. Resp. Non dicit quòd viderit Christum à dextris Dei simpliciter; sed à dextris virtutis Dei; idest à dextris alicujus splendoris, & lucis eximie, quæ erat symbolum Divinitatis, à cujus dextris stabat Christus,

per se, vel per speciem : sed talis unio essentia  
D. cum intellectu creato est purè libera ex  
parte Dei ; ita quòd Deus se cognoscendum  
præstet tantùm quando vult, ubi vult, cui vult,  
& quomodo vult : ergo naturaliter non potest  
videri. Deinde, si intellectus separatus natu-  
raliter posset Deum videre, dæmones & animæ  
damnatae Deum viderent. Tandem debet esse  
proportio inter objectum & potentiam ; sed  
Deus est objectum supernaturale : ergo intel-  
lectus debet elevari per lumen gloriæ, ut pos-  
sit Deum videre.

Objic. Deus per absolutam potentiam  
potest producere speciem sui ipsius repræsentati-  
viam, & Angelus potest illam naturaliter vi-  
dere : ergo & Deum videbit naturaliter. Quod  
autem Angelus possit talem videre speciem,  
patet ; quia illa esset finita & creata. Resp. quòd  
etiamsi hoc fieret, non tamen videret Deum  
Angelus naturaliter, & ex sua virtute ; sed  
mediante illâ specie, quæ esset supernaturalis.  
Dices ; Intellectus conjunctus potest evidenter  
demonstrare Deum existere, esse infinitum,  
immensum, &c. sed non potest hæc demon-  
strare, nisi evidenter illa cognoscat : ergo à for-  
tiori intellectus separatus ea omnia cognos-  
cet. Resp. hæc omnia posse cognosci abstrac-  
tivè per argumentationem ; non verò intui-  
tivè per claram visionem. Deinde, Licet co-  
gnosceretur Deus ut author naturæ, non ta-  
men ut author gratiæ, nec ut trinus, nec ut  
incarnatus, nec ut glorificator. Dices : Ocu-  
lus potest naturaliter videre omne visibile ;  
ergo intellectus potest intelligere omne in-

telligibile; sed Deus est intelligibilis : ergo potest cognosci naturaliter. Negatur consequentia, Instabis : Intellectus ergo est imperfectior visu. Negatur ; quia talis impotentia non procedit ex imperfectione intellectus , qui omne intelligibile naturale cognoscere potest ; sed ex altitudine objecti , quod est supernaturale ; & sic ut percipiatur , intellectus debet elevari.

---

### QUESTIO VII.

*An intellectus ad videndum Deum indigeat lumine gloria.*

**A**D intellectionem duo concurrunt , nempe potentia intellectiva , & objectum intelligibile. Objectum autem potest dupliciter concurrere. Primò , per se , & immediatè , sine ullâ interventione speciei ; sic beati Deum immediatè per essentiam , & sine specie vident. Secundò , per speciem derivatam ab objecto , vices gerentem objecti , & hoc fit quando objectum non est præsens , ut quando nunc intelligo urbem Rothomagnum per speciem in phantasiâ derelictam. Vel quando objectum est præsens , non tamen potest uniri potentia. Sic quando video , aut intelligo parietem , qui est præsens ; hoc debet fieri per speciem parietis ; quia paries ut sic , non potest ingredi meum oculum , aut intellectum. In sequenti questione dicemus intellectum Beatorum non indigere specie , ut Deum videant : hinc videndum est ,

an ex parte intellectus requiratur aliquod auxilium supernaturale, quod lumen gloriæ vocatur, quo intellectus elevetur ad Deum intuitivè cognoscendum.

## CONCLUSIO.

**A**D Deum intuitivè videndum lumen gloriæ requiritur. Hoc habetur ex Concilio Viennensi præcitato, quod damnavit Begardos & Beguinas, qui in hoc errore versabantur. Ratio nostra est, quia si intellectus separatus posset per solas naturæ vires Deum videre, illi qui haberent æqualem intellectum, æqualiter Deum viderent, licet haberent inæqualia merita; imò qui haberent intellectum perspicaciorum, & minora merita, Deum clariùs viderent, & essent beatiorez illis qui majora haberent merita, quod est absurdum. Deinde, Inter potentiam & objectum debet esse proportio; sed Deus est objectum supernaturale; ergo intellectus supernaturalis fieri debet per lumen gloriæ, quod est quædam supernaturalis qualitas intellectum elevans ad ordinem supernaturalem. Tandem Visio beatifica non est minùs supernaturalis, quàm assensus fidei; fidei enim succedit visio, tanquàm perfectus imperfectiori; sed ad assensum fidei non sufficit sola revelatio ex parte objecti, sed requiritur lumen fidei in intellectu: ergo ad visionem beatificam non sufficit quòd Deus sit in se præsens, sed ex parte intellectus requiritur lumen gloriæ.

**O b j e c t.** Si lumen gloriæ juvaret intellex.

E ij



ctum; hoc faceret vel augendo ipsius potentiam, quod non potest fieri; quia substantia non suscipit magis aut minus: vel hoc fieret concurrente cum illo tanquam causa partialis, quod etiam nequit esse; quia quando agentia partialia producant eundem effectum, quodlibet eorum potest illum producere, vel saltem aliquam ejus partem; si enim duo homines possent ferre centum libras, quilibet posset ferre quinquaginta: sed nec lumen gloriæ potest unam partem visionis beatificæ elicere, nec intellectus solus aliam: ergo lumen gloriæ non requiritur. Resp. quod lumen gloriæ possit juvare intellectum, non intendendo potentiam, sed operationem ejus: potest etiam concurrere cum intellectu, ut causa partialis: Et quando affertur, quod duæ causæ partiales possunt seorsim producere aliquam partem effectus; Dist. Quando causæ non sunt subordinatæ, ut in allato exemplo, concedo: quando sunt subordinatæ, ut in proposito, ubi lumen gloriæ subordinatur intellectui, tanquam instrumentum potentiae vitali, nego. Exemplificatur de calamo & manu, quæ sunt causæ partiales scripturæ, neutra tamen sine aliâ potest scribere, quia sunt causæ subordinatæ.

Objc. Si lumen gloriæ exigatur, maxime, ut per illud intellectus proportionetur cum objecto; sed intellectus illustratus lumine gloriæ est semper finitus, & Deus infinitus. Resp. Mediante lumine gloriæ, intellectus non est proportionatus cum Deo in gradu infinitatis, concedo: in ordine supernaturali-

tatis, nego. Pro tunc enim est veluti ordinis divini. Dices : Finitum ad infinitum nulla est proportio. Dist. Geometrica & entitativa, conc. quantumcumque enim finitum multiplicetur, nunquam infinitum fiet : Nulla est est proportio ordinis & habitudinis potentiae ad objectum, nego : Deus enim statuit ut potentia finita ordinaretur ad objectum infinitum videndum ; maximè ubi specialis advenit concursus Dei. Dices. Si visio est à lumine gloriæ, & lumen gloriæ à Deo, non erit visio hominis, sed Dei. Negatur, quia illa visio non recipitur in Deo, sed in homine. Deinde, Lumen gloriæ non concurrit vitaliter, & principaliter ad illam visionem, sed tantum instrumentaliter : Si quis dicat, Species & lumen sunt unum & idem : sed non datur species, ut Deus videatur : ergo nec lumen. Resp. negando majorem, quia species est medium, quo res cognoscitur, se tenens ex parte objecti, & gerens vicem illius ; lumen verò est medium quo, se tenens ex parte potentiae, & illam corroborans.

### Q U A S T I O V I I I.

*An intellectus indigeat specie intelligibili ad videndum Deum.*

**C** O N S T A T ergo, ut Deus intuitivè videatur, requiri aliquid ex parte potentiae, quod intellectum eleveret, scilicet lumen  
E iij

gloriæ : sed potest dubitari, an etiam aliquid aliud exigatur ex parte objecti, nempe species, quæ Deum repræsentet intellectui, sicut fit in omnibus aliis intellectionibus, quas non producimus, nisi per species derivatas ab objectis.

## CONCLUSIO.

**N**ON indigent Beati specie intelligibili, ut Deum videant, sed ipsum immediate & per essentiam intuentur. Ratio nostra est, quia species duobus tantum casibus requiritur: Vel quando objectum est materiale, & sic non potest concurrere ad intellectionem, quæ immaterialis est; unde objectum debet suppleri per speciem, quæ licet primò sit materialis, spiritualisatur tamen virtute intellectus: Vel requiritur species, quando objectum non est sufficienter conjunctum potentie; tunc enim absente objecto, requiritur species, mediante quâ, objectum potentie conjungatur, v. g. ut possit intellectus cognoscere Angelum distantem, debet infundi in intellectu agente species illius Angeli, mediante quâ, intellectus patiens producat intellectionem Angeli: sed Essentia D. quæ est objectum visionis beatificæ, immaterialis est, & præsens intimè intellectui creato: ergo ex se potest concurrere ad visionem beatificam; & proinde non requiritur species; frustra enim fit per plura, quod potest fieri per pauciora.

**O b j e c t.** Lumen gloriæ nihil est aliud, quàm expressio objecti beatifici, vel qualitas quædam supernaturalis Deum repræsentans; sed species est etiam talis expressio, seu talis qua-

litas : ergo si requiratur lumen , requiritur etiam species. Resp. Quod lumen gloriæ sit qualitas repræsentans Deum ex parte potentia, species verò repræsentat ex parte objecti ; & in hoc distinguuntur , quod lumen gloriæ elevet potentiam , & species gerat vices objecti ; & sic licet requiratur lumen , non tamen requiritur species.

### QUESTIO IX.

*An Visiones beatifica sint æquales.*

**I**OVINIANUS, teste Hieronymo, vult omnes Beatos æqualiter Deum videre, & visionem beatificam esse indivisibilem ; nos verò qui in illâ visione beatificâ admittimus latitudinem graduum, habemus quod aliter respondeamus.

#### CONCLUSIO.

**O**MNES visiones beatificæ non sunt æquales ; imò Beati pro inæqualitate meritum, inæqualiter Deum vident. Joann. 14. *In domo Patris mei mansiones multe sunt.* 1. Corinth. 15. *Sicut stella differt à stella, sic in resurrectione mortuorum.* Et cap. 3. *Vnusquisque propriam mercedem recipiet, juxta laborem suum.* Et 2. Corinth. 9. *Qui parce seminat, parce & metet.* Ratio conclusionis est, quia sicut merita sunt inæqualia, sic & præmia inæqualia esse debent. Deinde, Poena damnatorum est inæqualis. Apocal. 18. *Quantum glorificavit se, tantum dante illi tormentum :*

ergo gloria iustorum inæqualis esse debet. Vnde Greg. l. 4. Moral. habet. *Quia in hac vita est discretio operum, erit in illa proculdubio discretio dignitatum.*

Objic. Jovinianus parabolam Matth. 20. ubi qui parum laboraverunt & serò venerunt, habuerunt æqualem denarium diurnum, sicut & illi qui magis laborarunt, & portarunt pondus diei & æstus; per denarium autem diurnum vult beatitudinẽm intelligi; ergo erit æqualis. Resp. per denarium diurnum intelligi beatitudinem objectivam, seu objectum beatitudinis, quod æqualiter ab omnibus videbitur; omnes enim videbunt Deum unum & trinum, infinitatem Dei, & alias ejus perfectiones: non verò intelligitur beatitudo formalis, quæ consistit aliququaliter in visione; unde licet ex parte objecti, omnes habeant æqualem beatitudinem objectivam, quia omnes videbunt Deum, & omnia quæ sunt in Deo; ex parte tamen actionis seu visionis beatificæ inæqualis erit beatitudo formalis: alii enim clariùs, alii minùs clarè Deum videbunt. Deinde, ut ait Aug. Beatitudo erit æqualis in extensione, quia pro omnibus erit æterna; non verò in intensione, erit enim major pro illis qui majora habebunt merita. Tandem, intentio Christi est tantum ostendere, quòd Christiani serò vocati ad eandem admittantur beatitudinem cum Judæis, qui portarunt pondus diei & æstus legis Mosaiçæ: hoc tamen non impedit quin proportio servetur inter omnes, pro meritorum inæqualitate.

Objic. Carentia visionis beatificæ erit æ-

qualis in damnatis : ergo ipsa visio erit æqualis in Beatis. Resp. Negando consequentiam. Et ratio disparitatis est : quòd carentia sit privatio, & visio est quid positivum ; privationes autem sunt indivisibiles, unus enim cæcus non est cæcior altero : positiva verò possunt recipere magis & minus ; unde licet poena damni, seu carentia visionis, sit æqualis ; inæqualis tamen erit visio. Dices : Visio dicitur summum bonum ; quod autem est summum, non potest intendi nec remitti : ergo visio non est inæqualis. Resp. Est summum bonum in suâ specie, conc. intra suam speciem, seu in individuo, nego. Beatitudo, inquam, est summum bonum in sua specie ; quia si comparatur ad alia bona creata, est certè majus ; in individuo tamen, seu intra speciem, non est summum bonum semper ; quia inter individua beata, seu inter homines beatos, unus potest esse beatior altero.

Objic. Davidem dicentem Beatos satiari : *Satiabor cum apparuerit gloria tua* ; sed qui essent minus beati, non satiantur, nam appetent majorem visionem aliorum ; ergo visiones non sunt inæquales. Resp. Beatitudinem satiare appetitum ; unusquisque enim erit suâ sorte contentus, etiam ille qui minorem habebit beatitudinem : nec desiderabit visionem majorem alterius ; cognoscet enim sua merita, ad mensuram quorum visio beatifica concedetur, & sic videns se v. g. habere tantum unum gradum meriti, non appetet nisi unum gradum visionis D. & illum possidens, planè satiabitur, intelligens se non esse me-

raliter capacem majoris beatitudinis. *Exemplificari* potest de duobus vasīs inæqualibus, quorum unum potest continere decem *mensuras* æquæ, & aliud tantum unam: parvum istud vas erit ita plenum & satiatum suâ mensurâ unicâ, sicut aliud erit plenum decem.

INSTABIS. Appetitus omnium hominum sunt ejusdem rationis; ergo sicut illi qui habent majorem gloriam, illam desiderant; sic & illi qui habent tantum minorem, illam majorem desiderabunt. Resp. antecedens esse verum de appetitu innato, qui nihil aliud est, quam quædam propensio naturalis ad excellentius bonum; falsum tamen est de appetitu elicitō, qui est actuale desiderium, seu volitio actualis, quâ voluntas actu aliquid appetit: licet ergo omnes Beati possent appetere appetitu innato majorem beatitudinem, non appetunt tamen actu, seu appetitu elicitō, quia vident se majorem non meruisse. Dices, Si Deus vellent illis majorem concedere gloriam, illam vellent: ergo non sunt perfectè beati. Negatur consequentia, quia hoc non est volitio, sed tantum velleitas, quæ potest subsistere cum perfecta satietate.

### QUESTIO X.

*Vnde procedat illa inæqualitas visionis beatificæ.*

**R**ECENTIORUM plurimi illam refundunt in solius luminis gloriæ inæqualitatem; ita

ut qui majus lumen gloriæ habet, clariùs Deum videat : Scotus verò eam inæqualitatem repetit, tum ex inæqualitate luminis gloriæ, tum ex disparitate intellectus, ita quòd, si Angelus & homo habeant æquale lumen, inæqualiter tamen Deum videbunt ratione intellectus, qui perspicacior est in Angelo.

## CONCLUSIO.

**I**N ÆQUALITAS visionis beatificæ provenit & ex inæqualitate luminis, & ex inæqualitate potentiz. Perfectius enim agens cum æquali instrumento perfectiùs agit : sed intellectus Beatorum sunt agentia principalia respectu visionis beatificæ, & lumen gloriæ est instrumentum elevans potentiam : ergo intellectus perfectior perfectiorem visionem eliciet. Major patet ab exemplo. Dentur duo homines diversa virtute pollentes, duabus securibus æqualiter acutis instructi, qui fortius brachium habebit, fortiùs etiam secabit lignum; ergo inæqualitas actionis ex inæqualitate potentiz repeti potest, & non tantùm ex inæqualitate instrumenti : & sic in proposito, visio inæqualis poterit desumi nedùm ex inæqualitate luminis gloriæ; sed etiam ex inæqualitate intellectus.

**O b j e c.** hoc argumentum esse quidem verum in actionibus naturalibus, non verò in supernaturalibus, qualis est visio beatifica. Si enim hoc esset verum, sequeretur quòd Angelus quilibet Deum videret clariùs Christo, quia intellectus Angeli est nobilior intellectu hominis. Resp. nostram rationem esse veram in omnibus actionibus, siue sint naturales, siue



supernaturales: ordo enim causarum postulat, ut unaquæque agat secundum gradum suæ activitatis, & sic perfectior perfectiùs aget quando æquale dabitur instrumentum. Quando autem infertur: Ergo Christus minùs Deum videbit Angelo; Resp. quòd si reverà Christus haberet æquale lumen cum Angelo, prout minùs Deum videret; quia tamen Christus ratione summæ gratiæ, longè superabat Angelum in merito; sic habuit lumen gloriæ longè majus & intensius Angelo; quod quidem lumen supplevit imperfectionem intellectus humani, qui in Christo erat; & proinde Christus clariùs Deum videt quocumque Angelo. Quòd si quis dicat intellectum Angeli & hominis producere visionem beatificam per solam potentiam obedientialem, quæ æqualis est in omnibus: Resp. hoc est falsum; quia talem visionem eliciunt per potentiam naturalem elevatam lumine gloriæ.

Obj. c. Visio datur ut merces; & sic qui habent majus meritum, habebunt majorem visionem Dei: Ergo visio major non debetur majori & nobiliori intellectui, & proinde inæqualitas D. visionis non pendet ex inæqualitate intellectus. Resp. visionem in se, dari tanquam mercedem; omnes tamen gradus visionis beatificæ non dantur ut merces; sed alii respondent merito, & hi dantur ut merces; alii verò respondent potentiæ naturali, & illi non dantur ut merces. Inæqualitas autem graduum, qui dantur ut merces, repetitur ex inæqualitate meriti: inæquale enim meritum petit inæquale præmium; inæqualitas autem

graduum, qui respondent potentiae naturali, desumitur ex inaequalitate potentiae. Exemplificatur de Angelo & homine. Supponatur v. g. Angelus qui habeat intellectum perfectum ut quatuor, & habeat tantum duos gradus meriti, & totidem luminis gloriae; & ex alia parte ponatur homo habens intellectum perfectum ut duo, & habens duos gradus meriti; adversarii dicent, utrumque videre Deum tantum ut duo, quia, inquiunt, visio datur ut merces, & merces proportionatur merito; unde cum sint tantum duo gradus meriti, erunt tantum duo gradus visionis. Nos verò aliter dicimus, Angelum habere quatuor gradus visionis beatificae; duos respondentes merito, & duos respondentes potentiae naturali Angeli. Quando ergo dicitur, Visio datur ut merces; distinguo: Gradus visionis correspondentes merito, concedo: Gradus visionis respondentes potentiae naturali, nego.

**INSTANS:** Ergo aliquis gradus visionis beatificae datur potentiae naturali, contra Concilium Viennense anathemate percutiens dicentes Deum posse videri naturaliter. Probatur consequ. dictum est enim, quod intellectus Angeli; qui habebit tantum duos gradus meriti & luminis gloriae, habebit tamen tres, aut quatuor gradus visionis beatificae, quia habet intellectum perfectum ut tres, vel ut quatuor: ergo ille tertius, aut quartus gradus dabitur potentiae naturali. Resp. dist. consequentiam: Attribuetur potentiae naturali, elevatae per lumen gloriae, concedo: naturaliter agenti, nego: & hoc ultimum à Concilio negatur, non

verò primum. Sint. v. g. duo homines æquali calamo instructi, quorum unus pingat ut duo; alter ut unum, si neuter habeat calamum, neuter pinget; si tamen quilibet calamo æquali instruat, unus pinget ut unum, alter ut duo; non tamen benè infertur, quòd ille secundus gradus scriptionis attribuat, soli manui, sed manui instructæ calamo. Sic in proposito; sine lumine gloriæ, nec Angelus, nec homo Deum videre possunt; si tamen hoc lumine fulciantur, pro tunc, cæteris paribus, perspicacior intellectus Deum clariùs videbit, & ille gradus visionis, quo intellectus perfectior imperfectiorem superabit, non debetur intellectui naturaliter agenti, sed elevato per lumen gloriæ.

### QUESTIO. XI.

*An viso Deo, omnia quæ sunt in illo, videantur.*

**A**LIA dicuntur esse in Deo tantum obiectivè, ut creaturæ, quæ in essentiâ D. resplendent, tanquam in speculo quod omnia repræsentat. Alia sunt in Deo formaliter, ut personæ, attributa, modique intrinseci. Loquemur postea de visione creaturarum in Deo; hinc agendum est de illis, quæ formaliter dicuntur esse in eo.

### CONCLUSIO.

**V**iso Deo, omnia quæ sunt formaliter in ipso, videntur. Sic Concilium Florent. determinavit in litteris unionis; ubi habetur;

*Anima suis exuta corporibus, purgata, in cœlum mox recipiuntur; & intuentur clarè Deum unum & trinum sicut est; unde quia adjungit Concilium, Deum sicut est, videri; determinat proinde ipsum videri cum modis intrinsicis & attributis; est enim cum his omnibus: ergo hæc omnia videntur simul. Ratio nostra est, quia Deus est summè simplex, & una res simplicissima; ergo quando videtur, totus videtur, & videntem nihil latet eorum quæ sunt in ipso, quandoquidem sunt unum cum ipso.*

---

## QUESTIO XII.

*Verum possit videri essentia Divina sine personis.*

**V**ISA essentiâ D. personæ de facto videntur. Quia intellectus noster est potentia naturalis; quæ agit in quantum potest; & sic quoniam illi offertur in patriâ essentia D. videnda cum personis, idèd utrumque actu simul videt. Sed hæc quæstio est de possibili, an scilicet per absolutam Dei potentiam essentia divina sine personis videri & intelligi valeat.

## CONCLUSIO.

**P**ER potentiam Dei absolutam potest essentia D. videri, absque eo quòd videantur personæ. Primò, quia quando cognitio habet duo objecta, quorum unum est primum, & aliud secundarium, potest terminari absolute ad primum, & non terminari ad secundarium: sed essentia D. ut sic considerata; est ob-

jectum primum visionis beatificæ, & personæ sunt objectum secundarium, ut habetur cap. de intellectu D. ergo potest visio cuiuslibet beati terminari ad essentiam D. & non terminari ad personas. Secundò, quia inter essentiam D. & personas est distinctio sufficiens, ut Pater communicet Filio essentiam, & non communinet suam personam, nempe paternitatem: ergo erit sufficiens distinctio, ut possit essentia videri, non visis personis. Tertio, quia visio & cognitio in nostro proposito sunt unum & idem: sed quando duo distinguuntur formaliter, unum potest intelligi sine alio; v. g. albedo lactis, sine illius dulcedine: ergo quia essentia D. & personæ distinguuntur formaliter, ut dicetur, poterit essentia sine illis concipi & videri.

Obj. c. Si punctum videretur, totum videretur: quia est indivisibile: sed essentia D. est indivisibilis: ergo. Resp. Essentia D. est indivisibilis; in partes, concedo: quia est summè simplex, & nullas partes habet; in plures conceptus, seu in plures formalitates, nego: plura enim sunt in Deo, quæ possunt seorsim concipi, ut ratio Dei; trinitas, iusti, &c. D. Cognitio beatifica est distincta, sed visio essentiae sine personis est confusa; ergo non potest dari. Probat minor. Quod communicatur pluribus, non potest nisi confuse videri, si non cognoscantur illa, quibus communicatur: sed essentia D. communicatur personis: ergo visio essentiae sine personis est confusa. Res. neg. min. & distingo maiorem probationis: Si illud quod communicatur multis, non habeat

existentiam perfectam & completam sine illis, concedo : si habeat , ergo. v. g. quia animal non habet existentiam perfectam à se , sed illam emendicat ab homine , vel à bruto ; ideò non cognoscitur distinctè & perfectè , nisi cognoscantur inferiora : Quia autem Deus ut sic, habet existentiam completam & perfectam, independentem à personis ( Deus enim , ut Deus, est singularis , existens , & hic ) ideò potest distinctè cognosci sine personis ; imò talis cognitio erit intuitiva ; quia terminatur ad rem existentem existentia absolutâ , non verò relativâ , quæ habetur à personis.

O B j e c t. Illud in quo sunt plura , non potest distinctè & perfectè concipi , nec intelligi sine illis ; sed personæ sunt in Deo : ergo. Resp. Si illa quæ sunt in alio , non distinguantur ab illo formaliter , concedo ; si distinguantur , nego : personæ autem , quæ sunt in Deo , distinguuntur formaliter ab illo. Deinde , aliter distinguo majorem. Si illa quæ sunt in alio , dicant aliquam perfectionem , quæ non sit in continente , concedo : si non dicant aliquam perfectionem , nego : personæ autem non dicunt perfectionem , quæ non sit in Deo , ut Deus est ; Deus enim non est magis perfectus cum personis , quàm sine illis. Dices , Si beatus possit videre essentiam sine personis , erit beatus per visionem solius essentiae , quod est falsum ; quia beatitudo perfectè quietat , qui tamen videret solam essentiam , desideraret adhuc videre personas. Resp. Esset reverà beatus , & perfectè quietaretur ; quia Deus ut sic , est summum bonum , & personæ non sunt perfectæ , aut imper-

fectæ; ideo nullus esset beator *videndo Deum* cum personis, quàm sine illis.

---

### QUESTIO XIII.

*An possit videri una Persona sine alia:*

**Q**VONIAM Personæ D. distinguuntur realiter à se invicem, & distinctio est ratio ex quâ concludimus unum sine alio posse videri; ideo præsens quæstio videtur quasi soluta ex præcedenti: Si enim essentia possit videri sine personis, quia ab illis formaliter distinguitur; à fortiori una persona sine alia intelligi potest; quandoquidem distinguuntur realiter Remanet tamen quædam difficultas, quia relativa sunt simul cognitione; unde cognitâ una personâ; ipsius correlativa debent cognosci; cognito v. g. Patre, debet cognosci Filius, & cognitis Patre & Filio producentibus Spiritum S. Spiritus S. debet intelligi; tamen erit affirmativa

#### CONCLUSIO.

**F**ORTIS absolute videri, seu cognosci intuitivè una persona sine alia. Sufficiens enim est distinctio inter personas, ut una possit incarnari sine alia; ergo à fortiori, ut una sine alia videatur; cognosci enim, est quid subtilius, quàm communicari realiter. Si vellet autem Deus talem visionem fieri, concurreret ut Beatus unam personam videret, non concurrente ut videret aliam.

**O B J E C T.** Relativa sunt simul cognitione; ergo necessarium est, ut viso uno, aliud videatur;

sed personæ sunt correlativæ, ut diximus. Resp. Relativa sunt simul cognitione; cognitione saltem abstractivâ, concedo: non potest enim cognosci Pater in divinis, quin cognoscatur habere Filium; cognitione intuitivâ, nego: possum enim cognoscere patrem existentem Parisiis, & non cognoscere intuitivè filium qui Romæ manet.

O B j i c. Non potest una persona se manifestare sine aliâ; quia in divinis actiones ad extra sunt indivisæ, ergo nec una videri sine aliâ. R. manifestationem sumi, vel activè, vel passivè & terminativè; non potest autem manifestatio sumpta activè, fieri ab unâ tantum personâ; imò in hac suppositione, omnes personæ efficerent talem manifestationem; sed manifestatio sumpta passivè, potest ad unam terminari, & non ad aliam.

O B j i c. Una persona non potest beatificare sine aliâ: ergo nec videri sine alia. Probaturs antecedens per rationem superius allatam: Quia scilicet beatificatio est actio ad extra, quæ necessariò competit tribus personis indivisim. Resp. eodem modo ac prius, quòd beatificatio activè sumpta, non possit competere uni personæ seorsim; quia sunt tres personæ quæ beatificant; idest, quæ, concurrunt ad visionem unius personæ, si tamen beatitudo sumatur passivè, una sola persona beatificare potest, saltem cum essentia D. ex quâ constituitur; in quantum scilicet potest terminare visionem alicujus Beati, absque eo quòd talis visio ad aliam personam terminetur Exemplificari potest de Incarnatione. Si Incarnatio sumatur



activè , pro actione scilicet incarnativâ seu univâ humanitatis ad Verbum D. pro tunc tres Personæ incarnant , & Incarnatio activè sumpta omnibus competit : si verò sumatur Incarnatio passivè , seu terminativè , est solum Verbum quod incarnatur. Sicut v. g. si essent tres homines qui induerent vestem unum trium ; induitio activè sumpta tribus competeret , quia tres illi homines induerent : si verò induitio sumatur passivè , illa competit tantum uni , quia unus tantum induitur.

---

#### Q U A S T I O XIV.

*Potest-ne videri essentia sine Attributis ?*

**S**V B hac quæstione possunt istæ comprehendi : An attributa possint sine essentiâ videri , & unum attributum sine alio , & Personæ sine essentiâ , tandemque essentia sine modis intrinsicis. Quia tamen hæc omnia penè innotescunt ex his quæ diximus ; illa simul solvet unio

#### C O N C L U S I O.

**D**E potentiâ Dei absolutâ , potest essentia videri sine attributis , attributa sine essentia , & unum attributum sine alio : non potest tamen videri essentia sine modis intrinsicis , nec personæ sine essentia. Tres primæ partes unicâ ratione jam præallatâ probantur ; quia scilicet est distinctio formalis inter hæc omnia , & realis distinctio sufficit , ut unum sine alio possit videri. Quarta pars patet ex his , quæ dicta sunt agendo de modis intrinsicis ;

tibi ostenditur essentiam non distingui formaliter positivè à modis, nec esse adæquatè sine illis conceptibilem. Quinta tandem clara est; quia constitutum non potest intelligi, nisi constitutivum intelligatur; personæ autem sunt constitutæ ex essentiâ & relatione; ergo sine essentiâ videri non possunt, sicut nec homo v. g. sine animali.

**O b j e c t.** Relatio formaliter distinguitur ab essentiâ D. ergo sine illâ videri potest: ergo & persona; quia relatio est ratio constitutiva personæ. Resp. concedendo quod relatio possit videri sine essentiâ, non potest tamen persona sine essentia videri; quia relatio non est ratio constitutiva adæquata personæ, sed tantum inadæquata; persona enim adæquatè constituitur ex essentiâ & relatione simul. Dices. Qui videret unum attributum sine alio, videret ens infinitum; esset ergo beatus. Negatur; nullus enim beatificari potest, nisi per objectum simpliciter infinitum; licet autem unum attributum sit infinitum in suo genere, v. g. justitia in genere justitiæ, non est tamen in omni genere infinitum; justitia enim non est infinita in genere misericordiæ, nec intellectus in genere voluntatis.

---

### Q U Æ S T I O V L T I M A.

*An Beati videant creaturas in Verbo.*

**H** I c, verbum non sumitur pro secundâ Personâ Trinitatis; sed sumitur pro es-

sentiâ D. & sic videre in Verbo, est videre in essentiâ D. quæ est velut speculum, in quo omnia relucet. Dicitur autem Verbum, quia sicut verbum est expressivum & manifestativum conceptus mentis, sic essentia D. est manifestativa omnium; nedum enim est infinita in essendo, sed & in repræsentando. Quæ-  
rere ergo, an Beati videant Creaturas in Verbo, quæ-  
rere est, an illas videant in essen-  
tiâ D.

## CONCLUSIO.

**B**EATI vident creaturas in Verbo, non ta-  
men omnes. Primum patet. Ad quid enim  
essentia D. illas repræsentaret, nisi aliquibus  
manifestarentur? Secundum etiam evidens est,  
ex Conc. Senonensi. 1. parte, decreto 23. ubi  
habetur, quod *quilibet Beatus videat creaturas  
secundum sui status exigentiam*, id est, quæ  
ipsum concernunt: v. g. si rex fuerit beatus,  
torius regni sui videbit negotia; si Papa, totius  
Ecclesiæ; si Paterfamilias, totius familiæ. Ex  
quo quo potest inferri, quod aliquis inferior  
in beatitudine essentiali, poterit vincere supe-  
riorem in cognitione creaturarum.

**O**BJEC. Qui habet majora merita, debet ha-  
bere majorem visionem; ergo & plures creatu-  
ras intueri. Resp. Debet habere majorem visio-  
nem; essentialem, concedo: accidentalem,  
nego: visio enim creaturarum non facit pro-  
priè hominem beatum; sed sola visio essentiæ.  
Vnde dicendum est, quod licet omnes Beati  
videant omnia mysteria gratiæ, quæ in viâ  
crediderunt (fidei enim debet succedere visio  
tanquam merces labori,) non tamen videbunt

omnes creaturas, neque cogitationes cordium, neque omnia contingētia; sed ea tantum, quæ Deus revelare voluerit; talis enim notitia non est illis necessaria, sed sufficit illis beatitudo essentialis, quæ Deum vident sicuti est.

Objic. Essentia D. est speculum, quod omnes creaturas repræsentat; qui ergo videt essentiam, omnes creaturas intuetur. Resp. esse speculum, non naturale, quod omnia necessario repræsentat: sed liberum, quod repræsentat quando vult, cui vult, & quomodo vult. Nil ergo mirum, si quilibet Beatus videat tantum ea quæ suum statum concernunt; quia vult tantum Deus ea illi manifestare. Quod si Job 14. habeatur, *Sive nobiles fuerint filii ejus, sive ignobiles, non intelliget*; non propterea inferendum est, quod Beati non videant quæ ipsos concernunt; loquitur enim de Patribus veteris Testamenti in limbo, ubi nihil intelligebant, nisi per revelationem; vel de illis qui erant in inferno. Si etiam apud Esaïam habeatur, *Abraham nescivit nos, & Israël ignoravit nos*: hoc est, non amplius curavit nos, propter delicta nostra. Ex his notandum est, quod in veritate hujus propositionis fundetur Ecclesia, quando statuit fusionem orationum ad Sanctos: quia enim quilibet Sanctus videt omnia quæ ipsum concernunt; idē eodem instanti, quo preces fundimus ad aliquem, ipse videt in Verbo nostras orationes; quarum postea effectum impetrat à Deo, si ipsi benè visum fuerit. Patet etiam ex his, quod Christus videat omnes omnino creaturas; quæ enim instaurata sunt in cælo &

in terrâ , propter ipsum instaurata sunt. Pater denique , quod Beati videant creaturas eâdem visione , quâ Deum vident ; eâdem enim visione videtur speculum , & objectum in eo reflectens.

\*\*\*

## DISPUTATIO SEPTIMA.

### *De Incomprehensibilitate Dei.*

**Q**UONIAM diximus Deum esse visibilem , & Beatos mediante lumine gloriæ , ipsum videre perfectè sicuti est ; posset forsitan conjici propterea Deum esse comprehensibilem , quasi comprehensibilitas objecti nihil aliud esset , quàm perfecta visibilitas ejus. Quia tamen in veritate rei hæc duo longè distant inter se ; idèò , postquam statuimus Deum esse perfectè visibilem , quærimus , ultrà , an comprehendere possit.

---

### QUESTIO UNICA

#### *An Deus sit Incomprehensibilis.*

**N**ON loquimur de comprehensione corporali , quâ v. g. vas dicitur comprehendere liquorem ; sed de intellectuali ; & ista est triplex. Prima est , quæ sumitur pro reali adæptione boni desiderati , ut habetur 1. Corinth. Sic currite , ut comprehendatis. Secun-

da accipitur pro perfectione rei notitiâ, ita quod nihil eorum, quæ sunt in objecto, cognoscen-tem lateat. Hac duplici comprehensione, clarum est, quod Beati Deum comprehendant, unde dicuntur Comprehensores. Tertia est ea, quâ objectum in tantum cognoscitur, in quantum est cognoscibile.

## CONCLUSIO.

**D**EUS est incomprehensibilis ab intellectu creato. Ratio in promptu est; quia Deus est infinite cognoscibilis, & creatura quæ finita est, non potest recipere, nec producere cognitionem infinitam: ergo nec Deum comprehendere valet. Justè igitur apud Jerem. vocatur *magnus, & incomprehensibilis, ille cogitatur*. Vnde Concil. Basileense damnavit opinionem Augustini de Româ, asserentis Deum à Beatis posse absolutè comprehendere, & de facto animam Christi ipsum comprehendere. Dicendum ergo, quod licet Beatus posset cognoscere Deum sicuti est, & omnes perfectiones tum absolutas, tum relativas, ad intra & ad extra; tum actuales, tum possibiles; omnes denique relationum terminos; non tamen Deum comprehenderet: quia hæc omnia cognosceret finito modo; & ad comprehensionem requiritur, quod tanta sit cognitio potentiae, quanta est intelligibilitas objecti: unde cum Deus sit infinite cognoscibilis, & omnis creatura sit finite intellectiva, quia modus intelligendi sequitur modum essendi: idè Deus omni creaturæ incomprehensibilis est, & à se solo potest comprehendere.

OBJIC. Beati cognoscunt Deum infinitè.  
Tom. I. F

tum; ergo cognoscunt *ſ*olum infinitè: ergo ipsum comprehendunt. Resp. Cognoscunt reverâ ipsum infinitum, cognoscendo illius naturam non limitari, & quamlibet perfectionem ejus terminari non posse; cognoscunt tamen hæc omnia finito modo; quia ipsi sunt finiti.



## DISPUTATIO ULTIMA.

*De Ineffabilitate Dei.*

**I**N hoc conveniunt Incomprehensibilitas Dei & ipsius Ineffabilitas, quòd Deus dicatur incomprehensibilis, inquantum non potest à nobis cognosci, sicut in se est cognoscibilis: ineffabilis verò dicatur, in quantum non potest nominari aliquo vocabulo, quod Deum representet intellectui creato, sicut est in se representabilis. Propter talem convenientiam, quæstio ineffabilitatis proximè sequitur quæstionem de incomprehensibilitate.



## QUÆSTIO UNICA.

*Vtrum Deus sit Ineffabilis.*

**H**Æc difficultas potest proponi tam de viatoribus, quàm de comprehensoribus; quærendo scilicet, An Deus possit nominari

aliquo vocabulo, quo solato, viatores aut comprehensores possint devenire in claram Dei notitiam; in hoc enim consistit ineffabilitas objecti.

## CONCLUSIO.

**R**ESPECTU viatorum Deus dicitur ineffabilis; respectu beatorum est aliquo modo effabilis; absolute tamen ineffabilis dici debet. Hæc omnia explicatione indigent. Primò, dicitur ineffabilis respectu viatorum; quia nullum datur nomen, quo audito, viatores deveniant in claram & intuitivam Dei notitiam; ipsum enim non cognoscunt intuitivè, & nomina significant tantum, mediante conceptu. Secundò, dicitur effabilis respectu comprehensorum; quia possunt uti aliquo nomine audito, Beati illicò devenient in claram & intuitivam Dei notitiam; quia ipsum cognoscunt clarè & intuitivè. Vnde si v. g. unus Beatus proferret nomen Dei, ut immensi, statim illud nomen repræsenteret Deum clarè & intuitivè alteri Beato; quod non faceret respectu viatorum, quia non habent claram Dei notitiam. Tertio, Deus dicitur absolute ineffabilis, id est comprehensive; in quantum non potest imponi Deo aliquod nomen, quod viatoribus, aut Beatis Deum comprehensive repræsenteret; sicut enim Deus non potest comprehendi ab intellectu creato, sic nec potest insigniri aliquo nomine, quod ipsum comprehensive repræsenteret creaturis.

\*.OBJIC. Potest viator Deum appellare

F ij



omnipotentem, sed audiens nomine *omnipotentis* à Beato, Beatus illico deveniet ad *claram* Dei notitiam; ergo Deus non est *ineffabilis*, respectu viatorum: Audito etiam *eodem* nomine omnipotentis ab ipso Deo, Deus habebit notitiam sui comprehensivam; ergo Deus non est comprehensivè ineffabilis respectu beatorum. Resp. ad primum, quòd licet viatores possint uti aliquo vocabulo, quod Deum *clare* repræsentet Beatis, non minus dicitur ineffabilis viatoribus; quia ipsi viatores prolato tali nomine, non cognoscunt Deum *clare*; sed tantum illi Beati: unde Deus per idem nomen erit ineffabilis Beatis, & manebit ineffabilis viatoribus. Resp. ad secundum, quòd licet Beati possint uti aliquo nomine; quod audiens Deus, deveniet in cognitionem comprehensivam suæ essentiae; tamen illud nomen non significabit comprehensive Deum Beatis. Ratio hujus est, quia voces & nomina significant tantum, mediante conceptu; id est nomina non significant nobis res, nisi antea ipsas concipiamus; unde, quia viatores non cognoscunt Deum intuitivè; ideo Deus est illis ineffabilis intuitivè: Et quia Beati non cognoscunt Deum comprehensive, ideo non possunt uti ullo nomine, quod ipsis Deum comprehensive repræsentet.






## CAPVT III.

*De Prædicatis purè non quidditativis, seu de  
Attributis Essentia D.*

**P**RÆDICATA essentialia, de quibus loquuti fuimus in primâ Disputatione, conveniunt Deo in primo modo dicendi per se, & in primo gradu; ideo dicuntur purè quidditativa. Modi intrinseci, quos in secundâ disputatione explicuimus, Deo attribuuntur in primo modo, sed in secundo gradu; idè dicuntur, non purè quidditativi; quia sunt aliququaliter intra essentiam, quoniam sunt in primo modo, & aliququaliter extra essentiam, quia sunt in secundo gradu. Attributa de quibus in hac disputatione loquuturi sumus, de Deo tantùm prædicantur in secundo modo, sicut proprietates de homine; & idcirco prædicata nuncupantur purè non quidditativa. Quia autem attributa possunt considerari vel in communi, vel in particulari, unum post aliud explicandum est.





## DISPUTATIO PRIMA.

*De Attributis in communi.*

**P**R I U S Q U A M rationes particulares Attributorum examinare possimus, quædam difficultates solvendæ sunt, quæ ad Attributa in communi spectant; quid sint nimirum Attributa in se, & quænam sit distinctio illorum, tum inter se, tum ab essentiâ.

---

 QVÆSTIO PRIMA.

*Quid sint Attributa Divina.*

**L**A T I S S I M E usurpantur Attributa pro omnibus prædicatis, quæ de Deo dicuntur, sive sint metaphorica, ut esse lux, pastor, vinea, &c. sive sint extrinseca, ut esse Creator, Redemptor, Prædestinans, &c. quæ sunt denominationes extrinsecæ. Latè sumuntur pro prædicatis quæ Deo formaliter & intrinsecè conveniunt; & sic modi intrinseci confunduntur cum attributis. Et hæc mens Thomistarum: Scotistæ verò subtilius omnia scrutantes, nomine attributi strictè sumpti intelligunt tantum illam perfectionem, quæ desumitur à creaturâ, & per viam eminentiæ attribuitur Deo.

## CONCLUSIO.

**A**TTIBUTUM est prædicatum formale & intrinsecum, dicens perfectionem simpliciter desumptam à creaturis, & Deo conveniens per modum adjacentis, seu in esse secundo. Dicitur primò, *prædicatum*; & in hoc convenit cum modis intrinsecis, & cum denominationibus extrinsecis & metaphoricis. Dicitur secundò, *formale*; & in hoc differt à prædicatis metaphoricis, quæ conveniunt tantum Deo per analogiam, & non formaliter? Deus enim formaliter non est lux, vinea aut pastor. Dicitur tertio, *intrinsecum*: & sic esse prædestinans, aut creans, non sunt attributa; quia conveniunt Deo tantum extrinsecè. Additur quartò, *dicens perfectionem simpliciter*; unde esse Pater, Filius, aut Spiritus S. non sunt attributa; hæc enim omnia non sunt perfecta, aut imperfecta, sicut videbitur agendo de Trinit. Dicitur quinto, *desumptam à creaturis*; & sic modi intrinseci non sunt attributa; quia in creaturis non reperiuntur; nulla enim creatura est infinita, immensa, aut immutabilis. Subjungitur tandem, *per modum adjacentis & quasi in actu secundo*; quia essentia D. est adæquatè constituta per sua prædicata essentialia, & per modos intrinsecos; & proinde attributa conveniunt illi in actu secundo, seu per modum adjacentis, sicut proprietates conveniunt homini.

OB J I C. Omnipotentia est attributum: sed non convenit creaturæ: ergo falsum est dicere, quòd attributum sit perfectio desumpta à

F iiij

creaturæ, id est reperta in illis. *Resp.* omnipotentia esse nomen nō simplex, sed compositum ex modo intrinseco, & attributo; qui dicit enim omnipotentiam, dicit potentiam infinitam: unde respondendum est, quod omnipotentia conveniat creaturæ, si sumatur præcisè ut potentia; non verò, si sumatur ut potentia infinita; quia pro tunc induit rationem modi intrinseci; at modi soli Deo conveniunt, ut diximus.

---

### QUESTIO II.

*An Attributa D. ab essentiâ, & inter se realiter distinguantur.*

**I**N Concilio Rhemenfi damnatus fuit Gilbertus Porretanus dicens Attributa D. distinguere realiter ab essentiâ D. tanquam rem à re, & eodem modo inter se.

#### CONCLUSIO.

**N**Ec inter se, nec ab essentiâ D. realiter attributa distinguuntur. Sic Aug. lib. 15. de Trinit. cap. 6. *Sua est*, inquit, *sapientia, sua bonitas, &c.* non esset autem sua sapientia, nec sua bonitas, si bonitas & sapientia ab illo realiter distinguerentur. Sic etiam Greg. lib. 10. Moral. cap. 20. *Deus hoc est quod habet, aternitatem quippe habet, sed ipse est aternitas; lucem habet, sed ipse est lux sua.* Ratio conclusionis est, quia Deus est summè simplex & infinitus; quia autem est summè simplex, omnia quæ sunt in Deo, sunt una res

essentialis ; simpliciter enim non patitur distinctionem plurium rerum ; Et quia Deus est infinitus , identificat sibi realiter omnia , quæ sunt in se ipso : ergo attributa sese invicem identificant realiter , quia quodlibet infinitum est ; & identificantur cum essentiâ , quæ est infinita etiam.

Objic. Vasquesium , qui asserit Scotum esse ejusdem sententiæ cum Gilberto : ergo secundum Scotum attributa distinguuntur realiter. Resp. quòd Vasques falsò Scoto impropere-  
ret ; si enim dicat Scotus , quòd alia sit ratio sapientiæ , alia ratio justitiæ ; per talem modum loquendi inducit tantum distinctionem formalem , non realem ; ut faciebat Porretanus , dicens , aliud esse sapientiam , aliud justitiam : & insuper addebat , has propositiones esse falsas in abstracto , *Deus est sapientia , Deus est bonitas , Deitas est sapientia* ; sed volebat esse tantum veras in concreto ; dicendo scilicet , *Deus est sapiens , Deus est bonus* : Scotus verò tales propositiones asserit esse veras , tum in abstracto , tum in concreto.

### QUESTIO III.

*An Attributa distinguantur tantum nominibus ;  
vel ratione.*

OCCHAMUS Nominalium princeps primæ parti affirmativè respondet ; & secundæ subscribunt Thomistæ : unde secundum primum , justitia & misericordia sunt una & ea-

dem perfectio, diversis insignita nominibus; quæ juxta alios, sola ratione distinguitur. Contra utroque sit

### CONCLUSIO.

**S**OLIS nominibus non distinguuntur attributa, nec sola ratione. Ambæ partes probabuntur ex rationibus, quibus sequens Conclusio stabilietur Si enim attributa formaliter & ex naturâ rei distinguatur, ut suadere intendimus, plusquam nominibus, & ratione differunt: hinc ergo tantum solvendæ sunt duæ objectiones, quarum prima affertur à Nominalibus, & secunda à Thomistis.

Objiciunt primi quamplurimos Patres, qui docent perfectiones D. non differre inter se, unam idem esse ac alteram, & in Deo esse solam diversitatem nominum; quod expressè habet Anselm. Monologii cap. 16. *In Deo non sunt plura bona, sed unum pluribus nominibus insignitum.* Resp. quod per tales modos loquendi Patres velint tantum tollere distinctionem realem; unde quando asserunt unam perfectionem esse eandem ac alteram, hoc est, realiter. Quando etiam Anselmus dicit illas perfectiones solis nominibus distingui; non intelligi debet positivè, quasi sit sola nominum distinctio inter attributa; contrarium enim sentit cap. 48. sed negativè; ita quod dicere velit, illa non distingui eâ distinctiōne, quæ in creaturis importatur per talia nomina; quando enim dicitur, quod in homine sit misericordia & justitia, per illas duas vo-

ces intelligitur, quod illæ duæ qualitates distinguantur realiter in homine; quia autem non distinguuntur sic in Deo, ideo Anselmus vult illas distinguere solis nominibus, id est non realiter; licet non velit tollere distinctionem formalem.

Obijciunt Thomistæ Concilia, quæ secundæ parti adversari videntur, præsertim Florentinum, quod sess. 18. determinat *essentiam & personas sola ratione distinguere*. Resp. sicut prius, quod Patres & Concilia velint tantum tollere distinctionem realem à divinis; ita quod illorum sensu, quæcumque non distinguuntur realiter, distinguuntur tantum ratione; unde quia noverunt essentiam non distinguere realiter, à personis, nec attributis; ideo dicere non dubitarunt, eam ab illis solâ ratione distinguere. Quod autem Patres hoc sentiant, patet ex hoc quod distinctionem rationis opponant distinctioni reali, ut videre est sess. 19. hujus Concilii, ubi habetur, *putare non debetis attributa differre, sed tantum intellectu*. Unde liquet, quod per distinctionem rationis intelligant omnem distinctionem, quæ non est realis. In formâ ergo sic respondendum est, tum Nominabilibus, tum Thomistis: Attributa differunt solis nominibus, vel solâ ratione, distinguo; id est, non realiter, concedo: id est non formaliter, nego. Mens enim Patrum non fuit tollere distinctionem formalem, quæ tunc temporis non erat in usu; sed tantum rejicere volebant distinctionem realem, quæ D. simplicitati adversatur.



---

 QUESTIO IV.

*An Attributa D. distinguantur formaliter  
& ex natura rei.*

**I**N mente Scoti datur distinctio media inter distinctionem realem & distinctionem rationis, quæ formalis dicitur & ex natura rei. Distinctio realis est inter res & res; ut inter Petrum & Paulum; inter corpus & animam, &c. Distinctio rationis est ea, quâ unum à se ipso distingui fingitur per solam operationem intellectus; ut quando dicitur, Petrus est Petrus, Petrus fingitur distingui à Petro, in quantum in primâ situatione est subjectum, & in secundâ prædicatum. Distinctio tandem formalis est ea, quæ intercedit non inter res & res, sed inter realitates & realitates, seu inter formalitates, aut conceptus objectivos: sic distinguuntur risibilitas & rationalitas in homine. Et ista distinctio vocatur media; quia est minor distinctione reali, & major distinctione rationis. Vocatur etiam ex natura rei; quia non pendet ab intellectu, sed desumitur à natura objectorum, quæ nemine cogitante, differunt; rationalitas enim in se, non est risibilitas. Potest denique vocari realis minor: quia est inter duas realitates: at realitas, est diminutivum rei; risibilitas enim non est res; sed realitas.

**A**TT RIBUTA D. distinguuntur formaliter, & ex naturâ rei. Sic Patres. Dionys. qui lib. 9. de divin. nomin. dicit; *In Deo esse perfectionum varietatem, altereitatem, multiplicitatem, & unum attributum prestare aliquid, quod non prestat aliud.* Talis autem altereitas, varietas & multiplicitas, non est realis; Deus enim non esset simplex: ergo est formalis. Anselmus etiam cap. 48. Monolog. Damasc. 11. de fide cap. 4. & alii idem sentiunt; imo & Athanas. Serm. de Deiparâ, dicit; *Deum esse incorporeum, increatum, æternum, &c. non quod singula istorum: substantia Dei sint; sed circa substantiam ejus versentur.* Si ergo non sunt substantia Dei, distinguuntur ab illâ, non realiter, quia tolleretur D. simplicitas, nec solâ ratione; aliâs à parte rei essent substantia; ergo formaliter: & sic Patres, admittunt distinctionem formalem inter essentiam D. & attributa, & etiam inter se: quâ enim ratione perfectiones D. ab essentiâ distinguuntur, inter se distingui necesse est. Admittunt, inquam, saltem implicite, & si explicitè illam non admittant; hoc est, quia eorum tempore non erat in usu talis distinctio formalis secundum nomen.

Nostra conclusio tribus præcipuè rationibus probatur. Prima est, quia illa distinguuntur formaliter, de quibus duo contradictoria verificantur; sed de attributis duæ propositiones contradictoriæ verificantur; dicitur enim, Deus intelligit per intellectum, & non intelligit per voluntatem; Deus est bonus per bo-

nitatem, & non per justitiam: ergo intellectus & voluntas, bonitas & justitia, quæ sunt attributa, distinguuntur formaliter & ex naturâ rei: si enim justitia & misericordia essent à parte rei una & eadem perfectio, sequeretur quodd Deus esset justus per misericordiam; quod tamen dicere ridiculum est. Secunda ratio est, quia si intellectus & voluntas non distinguerentur à parte rei, sequeretur Verbum in D. non distingui à Spiritu S. tota enim ratio, quare hæ duæ personæ distinguuntur, est, quia Verbum producitur per intellectum, & Spiritus S. per voluntatem; si ergo à parte rei non distinguerentur intellectus & voluntas, sequeretur quodd si Filius produceretur per intellectum, produceretur per voluntatem; sicque nulla esset distinctio inter Verbum & Spiritum S. proindèque rueret tota fides Catholica de Trinitatis mysterio. Tertia ratio est, quia sapientia ut sic, seu in genere, & bonitas ut sic, distinguuntur ex naturâ rei; ergo etiam in Deo ex natura rei distinguuntur: quia illis perfectionibus, ut sunt in Deo, nihil additur, nisi infinitas, quæ quidem infinitas cum sit modus intrinsecus, non variat rationem formalem rei: si ergo bonitas ut sic, distinguatur à sapientiâ ut sic; bonitas infinita erit distincta à sapientia infinita; non quidem realiter, quia infinitas identificat sibi realiter omne aliud; ergo formaliter, & ex naturâ rei.

**O B J E C T.** Deus est unus; quæ sunt ergo in ipso, non distinguuntur. **Resp.** Est unus, unitate simplicitatis, conc. est enim simplex: unitate formali, nego. Sunt enim sex modi uni-

tatis. In primo, est unitas aggregationis; ut acervus lapidum. In secundo, unitas ordinis; quando plura sunt aggregata, & unum dicit ordinem ad aliud; ista unitas addit supra primam, relationem ordinis: v. g. tres homines, quorum unus est major dignitate, alius minor, alter minimus. In tertio, est unitas per accidens, seu per informationem accidentalem; sic paries & albedo sunt unum, quando albedo informat parietem. In quarto est unitas per se, quando unum informat aliud essentialiter, sic ex corpore & animâ fit unum per se. In quinto, est unitas simplicitatis, quando plura sic uniuntur, ut tamen compositionem non faciant. In sexto tandem, est unitas formalis, quæ est major omnibus præcedentibus. Quo posito, jurè dixi in responsione, quòd Deus sit unus unitate simplicitatis, non verò unitate formali; licet enim D. simplicitas excludat distinctionem realem, non tamen formalem excludit.

O b j e c. Essentia D. includit formaliter attributa; ergo non distinguitur formaliter ab illis. Distinguo antecedens: Includit formaliter attributa; prout *formaliter* opponitur *eminenter*; conc. Deus enim continet attributa secundum rationem formalem eorum. Prout *formaliter* opponitur *realiter*; nego. Licet enim attributa sint unum realiter cum essentiâ & inter se, non minùs tamen formaliter distinguuntur. Dices. Nihil est magis unum essentiâ D. sed quod includit omnia formaliter, est magis unum, quàm illud, quod includit tantùm realiter: ergo essentia D. om-

nia formaliter includit. *Resp. conc. majorem, & minorem fore veram, & daretur aliquod ens, quod posset esse unum formaliter cum alio; sed est impossibile, quod unum includat aliud formaliter; quia eo instanti, quo datur aliud & aliud ens, pro tunc unum non est aliud formaliter; quia non essent amplius duo entia; & sic essentia D. non potest esse unum formaliter cum justitiâ, v. g. sunt enim duæ formalitates, ex quibus non potest tantum fieri una. Dices. Si attributa sint entitates distinctæ inter se, erunt plura infinita; quodlibet enim infinitum est. Resp. Erunt plura infinita, formaliter distincta, concedo: realiter distincta, nego. Deinde, Erunt plura infinita, in suo genere, concedo: misericordia enim infinita est in suo genere: in omni genere, nego: quia misericordia non est infinita in genere justitiæ.*

*O b j e c. Distinctio actualis sumitur ex actuali oppositione, ait Aristoteles; sed attributa non opponuntur, quoniam reperiuntur in eodem ente: ergo nec distinguuntur. Resp. opponi inter se; non quidem contrariè, nec contradictoriè, nec relativè, sed disparatè; in quantum ratio unius, non est ratio alterius; & hæc oppositio sufficit ad distinctionem Dices. Prædicantur attributa de se invicem in abstracto; dicitur enim, justitia est bonitas: ergo non distinguuntur ex naturâ rei. Resp. Prædicantur de se invicem; realiter & identicè, concedo; id est res quæ est bonitas, est res quæ est justitia: prædicantur de se invicem, formaliter, nego, Licet enim justiti-*

tia & bonitas sint unæ res, hoc tamen non impedit quin realitas a formalitas unius distinguatur à formalitate alterius. Dices. Si essentia distinguatur formaliter ab intellectu & voluntate, poterit Deus intelligi sine utroque, quod est ridiculum. Resp. disting. consequentiam. Potevit intelligi sine intellectu, abstractione præcisivâ, conc. concipiendo Deum cum prædicatis essentialibus, & cum modis: abstractione negativâ, nego: non potest enim negari quòd Deus habeat intellectum: sicut v. g. potest concipi homo solùm, ut est animal; non potest tamen negari, quòd sit rationalis.

O b j e c. Essentia D. ut sic, includit omnem perfectionem; vocatur enim omnium perfectionum pelagus: ergo non distinguitur à perfectionibus attributalibus. Resp. Essentia D. ut sic, includit omnem perfectionem; radicaliter, concedo; in quantum scilicet est radix, à qua omnia attributa pullulant: includit formaliter, nego. V. g. in primo instanti, quo intelligitur Deus, ut Deus; essentia D. est quidem radicaliter bona, justa, intelligens. &c quia hæc omnia ab illa eradicantur; non est tamen formaliter bona, aut justa; aliâs hæc prædicata essent prædicata purè quidditativa. Dices. Si essentia distinguitur ab intellectu; ergo est in potentia ad illum. Negatur consequentia; quia licet essentia non contineat intellectum formaliter; semper tamen illum continet realiter, & nullum est instans durationis, in quo sit essentia sine intellectu; & sic, cum nunquam intellectu careat, non

est in potentia ad illum. Dices. Intellectus sic distinctus ab essentia, vel est Deus, vel creatura: si Deus est, non distinguitur ab illo. Resp. quod sit Deus identicè realiter; non formaliter. Dices. Unum attributum est infinitum: ergo aliud includit. Resp. Realiter; conc. formaliter, nego. Dices. Ergo attributa adduntur essentiæ D. & sic faciunt cum eâ compositionem. Resp. negando; nullum enim est instans durationis, in quo essentia sit sine attributis.

Objic. Non datur distinctio formalis, quæ sit media inter realem & rationis: ergo non distinguuntur sic attributa: nam distinctio sequitur ens; sed omne ens vel est reale, vel rationis: ergo omnis distinctio vel est realis, vel rationis. Resp. ad minorem: Omne ens vel est reale, vel rationis; in primâ sui divisione, concedo; in totâ sui divisione, nego. Licet enim primò ens dividatur in ens reale & rationis; postea tamen ens reale subdividitur in ens reale propriè sumptum, quod potest per se stare sepatatum ab alio; & in ens reale impropriè sumptum, seu diminutum; ut sunt realitates, seu formalitates, v. g. rationale & risibile, quæ sunt entia diminuta realia; quia sunt entitates à parte rei existentes, quæ non possunt per se stare, nec separari, & ob hoc dicuntur entia diminuta. Prima entia faciunt distinctionem realem majorem: secunda, distinctionem formalem, seu realem minorem. Dices. Illæ formalitates sunt res, vel nihil: ergo distinctio, quæ est inter illas, est realis, vel rationis. Resp. quod sint res, accipiendo

rem pro eo omni quod est extra operationem intellectus ; non verò sunt res , accipiendo rem pro eo quod potest per se stare separatim ab alio.

ab alio.  
O b j e c. Si attributa D. distinguantur formaliter, differunt plusquam realiter; quæ enim differunt formaliter, differunt quidditative; cum ratio formalis & quidditas rei, sint unum & idem: quæ autem differunt quidditative, differunt essentialiter; quia quidditas & essentia important idem: quæ autem differunt essentialiter, differunt plusquam realiter, ut patet de equo & Petro, qui differunt plusquam realiter, quia differunt essentialiter, ergo si attributa formaliter differunt, differunt plusquam realiter. Resp. ad primum. Quæ differunt formaliter, differunt quidditative & essentialiter, distinguo; sumpta quidditate & essentialitâ, pro formalitate seu realitate, concedo; sumptâ quidditate, pro tota essentia, nego. Licet enim in homine risibilitas & rationalitas differant formaliter, non differunt essentialiter, sicut differunt Petrus & equus.

DISPUTATIO SECUNDA.

*De Attributis in particulari.*

**A**TRIBUTORUM DD. illa sunt transcendentalia, quæ conveniunt Deo, ut Ens est; scilicet veritas, bonitas & unitas; quæ sunt proprietates Entis. Alia sunt veluti categorica,



quæ conveniunt Deo, *est ens intellectuale;*  
& hæc sunt intellectus & voluntas. *De primis*  
*agemus in hoc capite, & de aliis in sequentibus.*

---

### Q U Æ S T I O U N I C A.

*Virum Deus sit verus, bonus, & unus;*

**H**Æc omnia non involvunt tot nec tantas difficultates, quin eâdem conclusione solvi & explicari possint. Primò enim constat, quòd Deus sit verus, ex Joan. 14. *Ego sum via, veritas, & vita;* & ex Conc. Nic. *Deus verus, de Deo vero;* & ex ratione, quia veritas rei consistit in conformitate ejus cum suis principiis; sic aurum dicitur verum, quando habet principia & conditiones, quæ reddunt aurum verum: Deus autem habet hoc, quia est primum ens, independens, summè bonus, immensus, immutabilis, &c. quæ natura Dei exigit; & sic est verus. Est etiam bonus, est enim causa omnis boni; & est summè appetibilis; unde sicut est ens per essentiam, sic est bonus per essentiam. Superest ergo; ut ostendamus ipsum esse unum, contra Manichæos, qui duos esse Deos sibi finxerunt; unum bonum, & alterum malum; unum misericordem & authorem Legis Gratiæ, alium severum & veteris Testamenti institutorem.

### C O N C L U S I O.

**D**Eus est unus. Ex Deuteron, cap. 6. *Audi Israël; Dominus Deus noster, Dominus unus est.* Psal. 85. *Tu es Deus solus.* Esaï. 43.

*Ante me non est formatus Deus, nec post me erit. Sap. 12. Non est alius Deus, quàm tu. Subscribit Concil. Nicen. Credo in unum Deum. Rationes naturales non defunt ad probandam Dei unitatem, quas afferemus in particulari post discursum Lactantii, qui lib. 1. c. 3. ait: Si plures sint dii, singulorum potestas progredi longius non valebit, occurrentibus sibi potestatibus singulorum; necesse est enim, ut suos quisque limites aut transgredi nequeat; aut si transgressus fuerit, suis alterum finibus pellat. Non vident, qui multos Deos esse credunt, fieri posse, ut aliquid diversum velint, ex quo disceptatio inter eos oriatur, sicut Homerus inter se bellantes finxit Deos, quorum alii Troiam capi velent, alii repugnarent.*

Probatur 1. ex infinitate potentiae. Si essent duo Dii habentes potentiam infinitam; uterque mundum creasset; si enim unus produxisset unam partem, & alius aliam, sequeretur quòd nullus eorum haberet potentiam infinitam; quia esset una pars mundi, quæ non dependeret à sua potentia. Si autem uterque creasset mundum; sequeretur, quòd unus & idem effectus penderet à pluribus causis totalibus, & non subordinatis; quod est impossibile; ut probant Philosophi disput. de causis. Et ratio præcipua est; quia si effectus penderet à pluribus causis totalibus, penderet ab una causa totali; quâ sublata, adhuc remaneret in esse, & sic dependeret, & non derederet.

Probatur 2. ex infinitate intellectus D. Si essent duo Dii habentes intellectum infinitum,

ut A, & B, inquit Scotus: unus non posset cognoscere alium perfectissimè. Si enim A, perfectissimè cognosceret B, cognosceret illum per essentiam; quia hic cognoscendi modus est perfectior; unde Deus omnia per essentiam cognoscit: si autem A cognosceret B; per essentiam, vel cognosceret illum per essentiam suam propriam, vel per essentiam B. Non posset autem cognoscere eum per essentiam suam propriam; aliàs B, esset eminenter contentus in essentiâ A, ergo finitus. imperfectio enim est, in alio contineri. Non posset etiam cognoscere B, per essentiam ipsius B, quia pro tunc talis cognitio dependeret ab illo B, & sic non esset perfectissima.

Probatur 3. ex infinitate voluntatis D. Si essent duo dii A, & B; deberet A, infinitè diligere B, quia B, est infinitè diligibilis; sed A, non potest infinitè diligere B, ergo non esset Deus; quia non esset infinitè dilectivus: Probatur minor A, debet plus diligere seipsum, quàm B, quia voluntas benè ordinata debet plus diligere se, quàm aliud, cuius non est pars, nec effectus: si autem A, debet plus diligere se, quàm B, non infinitè diligit B, quia infinita dilectione non potest dari major: ergo A, non infinitè diligit. Quòd tandem voluntas benè ordinata se plus diligit, quàm aliud, fundatur in illo communi axiomate, *Charitas incipit à seipso*; quod tamen non est universaliter verum, aliàs deberemus plus nos amare, quàm Deum: unde meritò adjunxit Scotus, *quàm aliud, cuius non est pars, nec effectus*; ubi ratione primæ particulæ, manus debet plus

diligere corpus totum, quàm se ; quia est pars corporis ; unde in tenebris se periculo exponit, ut totum corpus salvet , & ratione secundæ, creatura , quæ est Dei effectus , debet sibi præferre Deum in amore.

Probatur 4. Si essent plures Dii , possent esse infiniti ; quando enim natura est de se indifferens , ut sit in pluribus multiplicabilis , in infinitum est multiplicabilis , si non limitetur ab alio ; ut patet de naturâ humanâ , quæ posset esse in infinitis hominibus , si non limitaretur à Deo : si ergo natura divina posset communicari pluribus diis , posset communicari infinitis ; quia limitari non potest : si autem communicari posset infinitis , de facto illis communicaretur ; in divinis enim idem est esse ac posse , saltem ad intra : ergo si sint plures dii, sunt dii infiniti numero , quod ridiculum est fingere.

Probatur 5. Si esset alius Deus , esset infinitè bonus , & infinitè amabilis : vel ergo unus amaret alium propter se , vel propter illum : Non autem posset amare propter alium ; quia pro tunc mutuaret suum amorem ab alio , quod imperfectionem redolet : Non etiam posset amare alium Deum propter seipsum ; quia ille Deus amatus , esset infinitè bonus , & infinitè amabilis : ergo deberet amari propter se , & non propter amantem. Maneat ergo , quòd his quinque rationibus possint convinci nedum Catholici , sed & Gentiles , quòd Deus reverà sit unus.

O b j e c. Quomodo ergo tot Gentiles scientifici , sibi immensam Deorum multitudinem

constituerunt? Resp. vel simile esse, quòd sub nomine Deorum venerabantur quosdam homines celeberrimos, utpote Romani, qui inter divos non admittebant, nisi illos percelebres viros, qui per Senatusconsultum divinitate potiri declarabantur. Dices. Quomodo etiam est articulus fidei, credere unum Deum, si Dei unitas possit probari ratione naturali? Resp. cum Scoto, hanc veritatem potius esse quoddam præambulum ad articulos fidei, quàm articulum ipsum. Deinde potest diverso respectu hæc veritas esse fidei & naturalis. Est enim articulus fidei, respectu illorum, qui eam agnoscunt: quia per Scripturam revelata est: & est veritas naturalis, respectu illius, qui eam deducit ex præmissis naturalibus. Imò respectu ejusdem intellectus poterit esse & fidei, & naturalis; intellectus enim uno actu potest credere Deum esse unum, quia revelatum est; & alio actu potest scire evidenter, per rationes, quas attulimus. Dices. Quomodo tandem, Pater est Deus, Filius est Deus, & Spiritus sanctus Deus, nisi sint tres Dii? Hoc dicturi sumus agendo de Trinitate; quia videlicet, est eadem divinitas numero, quæ est in tribus personis; & sic licet tres personæ sint Deus, sunt tantum unus Deus.



## DISPUTATIO TERTIA.

*De Intellectu divino.*

**E**XPLICATIS Attributis transcendentalibus quæ Deo conveniunt, ut Ens est; nunc ad alia progrediendum, quæ ipsi conveniunt, ut est ens intellectuale. Ad explicationem intellectus & voluntatis dico, ubi de scientia & decretis D. nobis tractare incumbit.

## QUÆSTIO PRIMA.

*Utrum in Deo sit Intellectus.*

**P**ER intellectum nihil aliud concipere debemus, quàm potentiam, seu principium, quo substantia intellectualis verum & falsum cognoscere potest, ut uni assentiri valeat, & dissentiri ab alio.

## C O N C L U S I O.

**I**N Deo intellectus reperitur. Nobilissimus enim agendi modus debetur nobilissimæ causæ; sed agere per intellectum, est nobilissimus agendi modus: ergo in Deo reperitur. Vnde Aristoteles asserit contemplationem & operationem intellectus esse Dei maximè propriam. Deinde, quanto substantia est spiritualiior, tanto est ad intelligendum aptior; Deus autem est spiritualis in summo gradu: ergo est

omniñō intelligens. Talem, potest ulterius hæc conclusio probari, tum à priori, tum à posteriori. A priori quidem, quia Deus est ens perfectissimum, & ens perfectissimum debet habere perfectionem intellectus. A posteriori etiam; quia creaturæ sunt intelligentes; ergo & Creator intelligens erit.

Obj. c. Quæ sunt in Deo, nullam habent causam: ergo existentia intellectus in Deo, non potest probari à priori. Resp. non posse probari per causam strictè sumptam, benè autem per latè sumptam, seu per aliquam rationem, quæ naturâ est prior intellectu, scilicet per infinitatem; dicendo, Deus est infinitus: ergo habet omnem perfectionem; ergo intellectum.

## QUESTIO II.

*An sit in Deo Intellectus sub ratione potentia.*

PROBATA existentia intellectus in Deo; potest insuper queri, An sit in eo sub ratione potentia intellectiva, quæ ab ipsâ intellectione distinguatur, vel utrum sit tantum per modum actus. Si primum admittatur, Deus potest vocari intellectivus: si secundum, poterit tantum denominari intelligens.

### CONCLUSIO.

INTELLECTUS est in Deo sub ratione potentia, & principii intellectivi: ita quod verum sit dicere: Est in Deo potentia intellectiva, di-

stineta formaliter ab ipsa intellectione. Quia potest concipi intellectus sine intellectione : in primo enim instanti naturæ concipitur Deus, ut Deus ; in secundo , ut habens intellectum ; & in tertio , ut intelligens : ergo intellectus distinctus est in Deo ab intellectione. Deinde ex omnibus Theologis, Verbum à Patre producit per intellectum, & non per intellectionem ; quia Verbum est actualis intellectio, saltem notionalis : ergo intellectus est potentia distincta ab actu.

O b j . c. Actus primus, seu potentia, dicit imperfectionem : ergo in Deo non est. Resp. non omnem potentiam imperfectionem dicere ; alias, in Deo non esset potentia generandi : sed tantum illa est imperfecta, quæ est destituta suo actu : unde, quia potentia intelligendi est semper in Deo conjuncta actu, & nunquam actuali intellectione caret, ideo non est imperfecta. Dices. Actus primus habet rationem causæ, & actus secundus rationem effectus : sed nec causa, nec effectus in Deo sunt ; ergo nec intellectus, ut actus primus ; nec intellectio, ut actus secundus. Resp. intellectum in Deo non habere rationem veræ causæ, sed tantum virtualis ; in quantum intellectio radicatur & fluit ab intellectu, sicut attributa fluunt ab essentia, non verò producit, ut in nobis ; & hoc est quod dicunt Theologi, intellectionem Dei esse improductam.



## QUESTIO III.

*Utrum Intellectus Dei sit attributum,*

**O**MNIA prædicata quæ Deo conveniunt intrinsecè, vel sunt prædicata essentialia, vel modi intrinseci, vel attributa; cum ergo intellectus de Deo prædicetur intrinsecè; idcirco quæritur, An sit de quidditate, vel modus, vel attributum divinitatis.

## CONCLUSIO.

**I**NTELLECTUS est attributum Dei. Probatur quia non est de essentia, nec modus intrinsecus: ergo superest ut sit attributum. Probatur prima pars. Intellectus non est de essentia D. si formaliter ab illa distinguatur; sed est distinctio formalis inter intellectum & essentiam; distinguitur enim potentia à natura; & essentia sola in Patre, non est principium productivum Filii, sed cum intellectu, & sic intellectus non est de quidditate Dei. Probatur secunda pars; quia modi intrinseci soli Deo conveniunt; intellectus verò in creaturis reperitur.

**O**BJIC. Scotum, qui docet intellectualitatem esse modum intrinsecum Dei. Resp. esse modum intrinsecum latè sumptum; sumendo modum intrinsecum pro prædicato, quod intrinsecè afficit essentiam D. strictè sumptum, nego: intellectus enim reperitur in creaturis, quod repugnat modo intrinsecò.

## QUESTIO IV.

*An Intellectus divinus sit talis, qualis est  
humanus.*

**I**NTELLECTUS in homine duo habet officia; secundum quæ modò vocatur intellectus agens, modò possibilis. Deinde est, productivus; producit enim verbum mentis. Tertio discursivus est quoniam unum ex alio deducit, conclusionem scilicet ex præmissis. Quarto tandem est practicus; quia regulat actiones voluntatis, qui dicitur hoc esse faciendum, vel fugiendum. Vtrum autem hæc omnia reperiantur in intellectu D. quaeritur.

## CONCLUSIO.

**I**NTELLECTUS D nec est agens, aut possibilis, nec productivus, nec discursivus, aut practicus. Ratio primæ partis est, quia idè noster intellectus agens dicitur, in quantum agit super phantasmata corporea, seu species materiales derivatas ab objectis, quas spiritualizat, & de sensibilibus facit intelligibiles, ut postea eas infundat intellectui possibili: & idè intellectus in nobis possibilis, seu patiens dicitur; quia recipit species intelligibiles impressas ab intellectu agente, ex quibus producit verbum mentis: Sed hæc omnia non facit intellectus Dei; quia omnia objecta intelligit per suam propriam essentiam, & non per species ab objectis acceptas; ergo non est

in eo nec intellectus agens, nec possibilis, ut in nobis.

Probatur secunda pars. Quia licet intellectus noster nunquam intelligat objectum, quin producat intellectionem ab intelligente & ab intellectu realiter distinctam, ob quam rationem dicitur productivus; non sic tamen de intellectu D. dicendum est: licet enim cognoscat suam essentiam, & omnia alia; non tamen producit intellectionem; aliàs illa intellectio distingueretur realiter ab intelligente, tanquam productum à producente; & sic in Deo, ut Deus est, & præcisus à personis esset; realis distinctio. Notitia ergo, quam habet Deus, & quâ se cognoscit, est improducta, & radicatur sine productione ab intellectu, sicut intellectus ab essentia: & sic intellectus Dei, ut Deus est, est operativus; licet intellectus Patris sit productivus Verbi D. Et in hoc differunt intellectus productivus & operativus, quòd productivus respiciat terminum productum, seu intellectionem productam; operativus verò respiciat objectum circa quod negotiatur, & quod cognoscit mediante intellectione improductâ.

Probatur tertia pars. Quia ad discursum tria requiruntur. Primò, pluralitas cognitionum, nempe cognitio antecedentis, & consequentis: discursus enim est progressus ab uno ad aliud, id est ab una cognitione ad aliam. Secundò, requiritur quòd posterior cognitio oriatur à priori; cognitio enim conclusionis oritur à cognitione præmissarum. Tertiò, ut prima cognitio sit notior posteriori; est enim

discursus , progressus à notioribus ad ignotiora: sed hæc omnia non sunt in Deo. Primo enim , omnia unico actu intelligit & sic non sunt in illo plures cognitiones. Secundo , in Deo una cognitio non oritur ab aliâ , quoniam est unâ tantum. Tertiò , omnia clarè & distinctè cognoscit , & proinde non transit de notiori ad ignotius. Quòd si Scorus dicat , Deum priùs cognoscere essentiam , quàm proprietates rei : prioritate se tenente ex parte objectorum , concedo : se tenente ex parte actuum ; nego.

Probatur quarta pars. Quia intellectus practicus est ille qui dirigit praxim , seu qui regulat actiones voluntatis quæ possunt benè vel malè fieri ; sed voluntas D. in suis operationibus non est regulabilis : est enim regula omnium ; & actiones ejus non possunt malè fieri : ergo non est practicus. Nec quis dicat intellectum D ostendere voluntati , quæ ex se cæca est , quid faciendum sit , aut quid fugiendum ; per hoc enim tantum concluditur esse ostensivum praxis , non tamen regulativum. Est autem differentia inter ostendere praxim , & regulare praxim. Ostendere praxim , est ostendere quid faciendum , aut fugiendum sit simpliciter : dirigere autem praxim , est nedum ostendere faciendum aut vitandum ; sed insuper persuadere , & rationes allegare , quæ inducant voluntatem ad faciendum bonum , & malum vitandum. Sufficit autem respectu voluntatis D. ostensio boni & mali , & non indiget persuasionem , ut ad bonum se vertat : non potest enim aliter agere : &

sic intellectus D. non est practicus,

Objic. in secundam partem. Si intellectus Dei ut Deus est, non est productivus, & intellectus Patris sit productivus Verbi D. ergo intellectus Dei est simul productivus & non productivus, quod implicat. Resp. nullam esse repugnantiam, quia aliud est, considerare Deum, ut Deum; pro tunc enim illius intellectus est operativus: & aliud est considerare Deum, ut Patrem; tunc enim est productivus Verbi D. quod notitia genita, seu producta appellatur.

---

### Q U Æ S T I O V.

*Quodnam sit objectum primum & secundarium intellectus D.*

U N I C U S est actus intellectus D. qui terminatur tum ad essentiam D. tum ad attributa, tum ad personas, tum ad omnia denique creata. De hoc non dubitatur, sed quærimus, An primario ille actus terminetur ad essentiam D. & postea ad attributa, personas, & creaturas.

### C O N C L U S I O.

O B J E C T U M primum intellectus D. est sola essentia; attributa autem, personæ, & quodcumque ens creatum ad objectum secundarium pertinent.

Probatur prima pars. Quia quod primo, per se, & immediatè movet intellectum ad cognitionem; est objectum primum intel-

lectus; talis autem est essentia D. ergo. Deinde: Sicut res se habet ad esse, ita ad cognosci; sed essentia D. est naturâ prior his omnibus; ergo est prius intelligibilis. Tandem: Essentia D. ut sic, est infinita & in essendo & in representando: ergo nedum repræsentat creaturas, sed & relationes & attributa: ergo est objectum primum intellectus D. objectum, inquam, motivum & terminativum; quia & movet per se intellectum ad sui cognitionem, & terminat eandem cognitionem intellectus.

Probatur secunda pars. Quia attributa, personæ, & creaturæ in essentia D. repræsentantur, sicut facies in speculo: sicut ergo prius debet videri speculum, quam facies in illo relucens; sic prius debet cognosci essentia, quam attributa, personæ, &c. in ipsa repræsentata. Deinde, ut diximus, hæc omnia sunt aliquomodo posteriora ad essentiam D. ergo posterius intelligibilia, & proinde ad objectum secundarium pertinent; non quod sint objectum motivum, sed terminativum; quia non movent per se ad sui cognitionem; sed terminant illam. v. g. quando facies in speculo repræsentatur, speculum est objectum motivum & terminativum visionis; quia oculus movet ad visionem, & visionem terminat; facies autem non movet per se, sed per speculum; terminat tamen visionem. Essentia D. à pari, quæ est veluti speculum omnia repræsentans, erit objectum motivum & terminativum; attributa verò, personæ & creaturæ, quæ in eâ relucunt, erunt objectum terminativum.

**OBJIC.** Quod est de se verum, & infinite verum, potest intellectum D. movere ad sui cognitionem; sed attributa D. talia sunt: ergo sunt objectum primum & motivum intellectus D. Resp. Attributa possent intellectum D. movere per se; si non repræsentarentur ab alio, conc. si de facto ab alio repræsentantur, nego. Si reverâ per impossibile essentia D. non repræsentaret attributa; per se possent movere intellectum D. ad sui cognitionem, & tunc essent objectum primum & motivum: quia tamen essentia D. illa clarè repræsentat, ideo non movent actu per se ad sui cognitionem; illa enim repræsentatio in proprio genere, esset superflua; quoniam cognoscuntur perfectè in essentiâ, nihil autem superfluum admitti debet in Deo.

---

#### QUESTIO ULTIMA.

*An Intellectus D. omnia unico actu intelligat.*

**Q**UAMPLURIMA remaneret dicere de intellectu D. sed quia Capite sequenti, quod erit de Dei scientiâ, quæ est actus intellectus, explicabuntur; ideo hîc nobis querendum superest: An unico, vel multiplici actu, omnia intellectus D. cognoscat.

#### CONCLUSIO.

**O**MNIA Deus unico actu intelligit. Quia intellectus Dei est infinitus: ergo actus, quo intelligit, similiter erit infinitus; ergo per

talem actum intelliguntur omnia : ergo nihil remanet , quod intelligatur per secundum actum : & sic Deus intelligit unico & simplicissimo actu omnia.

O B J E C T. Non potest idem actus vocari sapientia , scientia , & præscientia ; sed hæc omnia dicuntur de Deo : ergo signum est , quod in intellectu D. sint plures actus , quorum unus sit sapientia , alius scientia , alius præscientia. Resp. quod tales denominationes non impediant , quin actus intellectus D. sit unicus secundum substantiam , licet terminativè possit dici multiplex , juxta diversam terminationem ad diversa objecta. Ut terminatur ad essentiam , & ad ea quæ in ipsa sunt formaliter , vocatur sapientia : ut terminatur ad creaturas in essentiâ & per essentiam cognitæ , dicitur scientia ; quia hoc est aliquomodo cognoscere unum per aliud : ut terminatur ad objecta futura , vocatur præscientia : ut respicit ad media quibus creaturæ ad suum finem diriguntur , dicitur providentia : prout dicit cognitionem mediorum supernaturalium , quibus ad beatitudinem pervenitur , prædestinatio nuncupatur ; & reprobatio , prout importat cognitionem demeritorum , & finalis impœnitentiæ : Et sic idem actus intellectus , qui formaliter unicus est terminativè est multiplex.



\*\*\*:\*\*\*:\*\*\*:\*\*\*:\*\*\*:\*\*\*:\*\*\*:\*\*\*

## DISPUTATIO QUARTA.

*De Scientia Dei.*

**Q**VANDOQUIDEM intellectus est potentia D. quâ omnia Deus cognoscit; & Scientia est actus intellectus; explicatis quæ dici solent de intellectu, nunc ad actum ejus progredi, ordo doctrinæ postulat.

## QUÆSTIO PRIMA.

*An sit Scientia in Deo.*

**A**SSEVERARE in Deo intellectum, hoc est astruere scientiam in eo; nefas enim est ponere in ente perfectissimo aliquam potentiam suo actu destitutam; licet tamen antea probaverimus existentiam intellectus D. majoris explicationis causâ existentiam Scientiæ perquirimus.

## CONCLUSIO.

**Q**UIS potest in Deo negare scientiam; cum dicat Apostolus Rom. II. *O altitudo divitiarum scientiæ, & sapientiæ Dei*; Ratio est; quia scientia est perfectio simpliciter, Deo non deneganda. Deinde, Deus est causa universalissima ad quam spectat ordinare quæ sunt in mundo: non potest autem quis disponere res, nisi ipsas cognoscat. Tandem, Nobilius est esse

agens à proposito, quàm agens à natura; id est cognoscere finem propter quem agitur, quàm non cognoscere.

Objic. Si Deus haberet scientiam omnium rerum, mutaretur, quia de novo reciperet cognitionem aliquam, cognoscendo scilicet ea, quæ existunt hodie, & antea non existebant. Resp. non mutari, nec recipere cognitionem novam; quia si res de novo existant, non cognoscit illas per novam cognitionem ab illis desumptam; sed per cognitionem, quam habet ab æterno in essentia sua. Instabis. Si tota ratio cur Deus cognoscat Petrum existere hodie, sit scientia quam habet ab æterno; ergo verum erat dicere heri, Deus cognoscit Petrum existere; quod tamen falsum est, quia supponimus illum existere tantum hodie. Resp. quòd talis scientia æterna, sit tota ratio formalis & intrinseca, cur Deus cognoscat Petrum existere; non est tamen tota ratio extrinseca; sed talis scientia dependet extrinsecè ab existentia Petri, tanquam à conditione sine qua Deus non cognosceret Petrum existentem; unde non potest dici, quod Deus cognoverit heri Petrum existere; quia non existebat.

## QUESTIO II.

*Verum Scientia Dei sit habitualis.*

SCIENTIA habitualis potius dici debet habitus inclinans ad cognoscendum, quàm cognitio. v. g. habitus Logicæ non tam est

confectio syllogismi , quàm habitus in meâ mente existens , quo possum conficere syllogismum , cùm voluero. Scientia , inquam , habitualis non potest dici cognitio ; quia manet in dormiente : unde dicendum cum Logicis duplicem esse scientiam : habitualement unam , quæ est habitus inclinans intellectum ut faciliùs producat actus scientificos : actualem alteram , quæ est ipsa cognitio , qua intellectus actualiter rendit in objectum.

## CONCLUSIO.

**N**ON debet scientia Dei vocari habitualis. Quia scientia habitualis , ut diximus , est habitus inclinans & adjuvans intellectum ad faciliùs intelligendum ; ubi ergo nulla est difficultas ad intelligendum , nullus debet esse habitus ; sed absurdum est dicere , Deum aliquam difficultatem experiri in intelligendo : ergo nec habitus in eo reperitur. Vnde hæc est differentia inter intellectum nostrum , & divinum , quòd intellectus Dei ex se ipso potest cognoscere objectum sibi propositum sine ullo habitu ; intellectus verò noster , qui imperfectus est , præter intellectum & objectum intelligibile requirit habitum , qui faciliat cognitionem , saltim in difficilioribus.

**O**bjic. In Deo reperitur scientia per modum actus primi ; scientia autem in actu primo , est scientia per modum habitus : ergo in Deo est scientia habitualis. Respondeo negando minorem ; scientia enim per modum actus primi , est intellectus cum objecto intelligibili , & hæc est in Deo : scientia verò

habitualis dicit insuper habitum, qui faciliat potentiam, ut possit elicere suum actum: & hæc in Deo non potest esse; quia supponit imperfectionem, nempe difficultatem in intelligendo.

### Q U Æ S T I O I I I.

*Vtrum Scientia Dei distinguatur ab ipsius essentia.*

**H**Æc quæstio non patitur maximam difficultatem; cum jam dixerimus attributa esse unum realiter cum essentia, ab illa tamen formaliter distingui; idem enim dicendum est de scientia, quæ est perfectio attributalis.

#### C O N C L U S I O.

**S**CIENTIA D. distinguitur formaliter ab essentia; non tamen realiter. Primum patet; quia alia est ratio essentia D. alia ratio scientia; essentia enim est veluti fons & origo, unde pullulant omnes perfectiones Dei: & scientia est quædam perfectio, quæ radicatur ab intellectu, sicut intellectus ab essentia. Secundum desumitur ex infinitate D. quæ potestatem habet identificandi omnia essentialia, quæ sunt intra essentiam D. ergo essentia & scientia sunt unum realiter.

**O B J E C T.** Scientia visionis, quâ Deus cognoscit creaturas futuras, potuit non esse in Deo: quia creaturæ futuræ potuerunt non esse futuræ, si scilicet Deus non decrevisset

futuritionem earum ; ergo scientia *saltem* visionis, non est unum realiter cum Deo. Resp. scientiam visionis esse actum intellectus D. quo Deus primario se cognoscit , quatenus tamen ipsemet actus terminatur ad creaturas secundario. In scientia ergo visionis , duo reperiuntur, nempe actus vitalis intellectus D. quo Deus se cognoscit , & deinde terminatio ad creaturas. Disting. ergo antecedens , Scientia visionis potuit non esse in Deo , quantum ad terminationem quam dicit ad creaturas , concedo : quantum ad actum vitalem , nego. Primum est tantum respectus rationis in Deo , secundum verò est quid reale : unde dicendum , quòd scientia visionis non consistat formaliter tantum in illà terminatione ; sed in actu vitali connotante talem terminationem.

---

#### QUESTIO IV.

##### *Quotuplex sit Scientia D.*

SCIENTIA D. potest sumi dupliciter : formaliter nimirum , & terminativè. Formaliter sumpta , nihil aliud est quam essentia D. per modum actus intelligentis se habens ; terminativè verò spectata , est eadem scientia , quatenus diversa objecta respicit , & ad illa terminatur ; sive illa objecta sint essentia D. & omnia quæ sunt in illa ; sive sint creaturæ , quæ sunt aliquomodo extra essentiam D.

## CONCLUSIO.

**S**CIENTIA Dei sumpta formaliter & secundum suam entitatem realem, est una; spectata verò terminativè, est multiplex.

Probatur prima pars. Quia scientia Dei est infinita; ergo per unum actum debet intelligere omnia intelligibilia; si enim Deus per unam scientiam unum objectum intelligeret, & per aliam aliud, quælibet esset finita; cum ergo scientia Dei infinita sit, debet repræsentare intellectui D. omnia intelligibilia: Ergo est tantum una, ratione suæ infinitatis, & ab objecto formali, nempe ab essentia D. quæ est una.

Probatur secunda pars, ex omnibus Theologis dicentibus, scientiam D. dividi in scientiam simplicis intelligentiæ, & in scientiam visionis. Scientia simplicis intelligentiæ est ea, quâ Deus cognoscit res possibiles; scientia autem visionis est ea, quâ cognoscit res futuras. v. g. antequam mundus per determinationem voluntatis D. esset futurus, erat tantum possibilis; & Deus cognoscebat illum scientiâ simplicis intelligentiæ; postquam verò Deus determinavit mundum esse futurum, illum cognovit scientiâ visionis. Scientia simplicis intelligentiæ est necessaria, & antecedens decretum voluntatis D. scientia verò visionis est libera, & sequens decretum D. voluntatis, quæ ita decrevit futuritionem mundi, ut potuerit non discernere.

**O B J E C T.** Ista divisio non includit scientiam approbationis & reprobationis, quæ in Deo sunt: ergo non est legitima. Resp. scientiam

simplicis intelligentiæ, & scientiam visionis postea subdividi in scientiam approbationis & reprobationis; illud enim possibile, quod Deus cognoscit per scientiam simplicis intelligentiæ, vel est bonum; & tunc est scientia simplicis intelligentiæ approbationis; vel est malum; & sic est scientia simplicis intelligentiæ reprobationis. Sic etiam, si objectum futurum, quod Deus novit per scientiam visionis, est bonum; est scientia visionis approbationis; & reprobationis, si est malum. Scientia ergo approbationis aut reprobationis, nil aliud est quàm scientia simplicis intelligentiæ, aut visionis; quatenus habent adjunctam complacentiam, vel displicentiam circa objectum possibile, vel futurum.

Objic. Præallata divisio non includit scientiam conditionatam, quâ Deus cognoscit res, quæ non sunt absolutè futuræ, sed sunt tantum futuræ sub aliqua conditione: ergo non bene traditur. Resp. scientiam conditionatam reduci ad scientiam visionis; res enim futuræ, quæ sunt objectum scientiæ visionis, vel sunt absolutè futuræ, vel sunt futuræ sub conditione: & sic scientia visionis duplex est; una absoluta, quæ terminatur ad futura absoluta, alia conditionata, quæ respicit futura conditionata.

Objic. Omnis scientia Dei est intuitiva, quia terminari debet ad objecta actu existentia: sed scientia simplicis intelligentiæ terminatur ad res purè possibles, quæ nunquam habebunt existentiam, ergo non est intuitiva; nec proinde in Deo. Resp. scientiam Dei, etiam simplicis intelligentiæ, esse intuitivam; quia ad

scientiam intuitivam requiritur tantum, ut terminetur ad objectum præsens in se, vel in alio, in quo continetur eminenter, hoc est, nobiliori modo quam in se ipso; Deus autem cognoscit res possibles, non quidem in proprio genere; sed ut repræsentantur in essentia D. in quâ sunt perfectius, quàm in seipsis.

---

## Q U Æ S T I O V.

*Quid addat scientia Visionis super scientiam simplicis Intelligentiæ.*

SCIENTIA visionis, ut vidimus, est libera, & ita contingens, ut potuerit non esse in Deo, si Deus non voluisset creare mundum: scientia verò simplicis intelligentiæ est necessaria; quia res possibles, ad quas terminatur, sunt necessariò possibles: cum ergo scientia visionis addat aliquid scientiæ simplicis intelligentiæ, quærimus, quid sit illud quod addit.

## C O N C L U S I O.

SCIENTIA visionis quam Deus habet de creaturis futuris, nihil addit supra scientiam simplicis intelligentiæ, & super illam scientiam, quam Deus de se habet, nisi solam terminationem, quæ est respectus rationis. Ratio est, quia scientia quam Deus habet de suâ essentiâ, pro suâ ratione formali dicit tantum actum vitalem intellectus divini, quo suam essentiam cognoscit; sed quia talis actus est infinitus, ideo per illum Deus nedum cognoscit



suam essentiam, sed percipit insuper omnia ob-  
jecta, quæ relucent in ipsâ sua essentiâ, & ad ea  
terminatur eo modo quo repræsentantur in il-  
lâ. Vnde cum res possibiles repræsententur ne-  
cessariò in essentia D. res futuræ tantùm contin-  
genter; ideò scientia Dei, quatenus fertur cir-  
ca essentiam suam, & circa res possibiles, est ne-  
cessaria: prout autem fertur circa res futuras,  
est contingens, quia terminatur ad illas contin-  
genter; ergo scientia visionis addit tantùm  
scientiæ simplicis intelligentiæ, & scientiæ,  
quam Deus habet de se ipso, terminationem  
contingentem.

Hæc omnia possunt illustrari exemplo. Sup-  
ponamus v. g. solem, qui illuminet necessariò  
aliquem hortum: supponamus etiam quòd  
paulò post aliqua arbor plantetur in illo horto,  
quæ potuit non plantari: sol ante plantationem  
istius arboris novæ illuminabat substantiam  
horti, illuminatione necessariâ, quia hoc sup-  
ponimus; postquam autem de novo plantatur  
ista arbor, sol incipit talem arborem illumina-  
re; sed illuminatio solis præcedens non muta-  
tur, imò accipit tantùm novam terminatio-  
nem ad illam arborem de novo insertam, quæ  
incipit illuminari, quæ quidem terminatio est  
contingens, & potuit non esse; si scilicet ta-  
lis arbor non fuisset apposita intra hortum.  
Sic ergo dicendum est cum proportionè de  
Deo & de ejus scientiâ, Deus ab æterno co-  
gnoscit suam essentiam, & omnes res possibi-  
les, quæ sunt in eâ relucentes: postea verò de-  
cernit per suam voluntatem creare mundum;  
eo autem instanti, quo modus est decretus,

incipit repræsentari in essentia D. ut futurus; & Deus pro tunc incipit cognoscere eum, ut futurum; sed ista cognitio quam habet de mundo futuro, est eadem, ac ea quam habebat de suâ essentiâ, cum solâ diversâ terminatione; quatenus eadem scientia, quæ ante decretum D. voluntatis terminabatur ad solam essentiam & ad res possibiles, incipit terminari ad mundum futurum. Sicut in exemplo allato, est eadem illuminatio solis, quæ antea illuminabat hortum, & quæ postea illuminat arborem noviter in illo plantatam; sicut ergo illuminatio, quâ ista arbor illuminatur de novo, addit tantum suprà illuminationem, quâ hortus illuminabatur, terminationem novam; sic scientia visionis, quâ cognoscuntur à Deo res futuræ, addit tantum terminationem novam scientiæ simplicis intelligentiæ, & scientiæ, quam Deus habet de seipso.

O B J E C T. Quotiescumque mutatur objectum nostræ scientiæ, mutatur etiam nostra scientia; & in nobis, ubi est duplex objectum, ibi non tantum est duplex terminatio, sed & duplex scientia: Cum ergo scientia visionis habeat aliud objectum; nempe res futuras; & scientia simplicis intelligentiæ aliud, nempe res possibiles; ideo scientia visionis nedum addit aliam terminationem scientiæ simplicis intelligentiæ, sed superaddit alium actum vitalem, & aliam scientiam. Resp. hoc esse verum in nobis, falsum in Deo. In nobis scientia mutatur mutato objecto, & habemus duplicem scientiam circa duplex ob-

jectum; quia nostra scientia causatur totaliter ab objecto: non sic autem scientia Dei, quæ producitur tantum ab essentiâ D. quæ est primum objectum, & non à creaturis; unde si Deus illas cognoscat, hoc est tantum, quia repræsentantur in essentiâ D. & sic scientia visionis non est alia scientia ab eâ, quâ Deus se cognoscit & res possibiles; sed semper est eadem cum diversâ terminatione.

### QUESTIO VI.

*An Deus cognoscat Seipsum, & quomodo.*

**P**RIMUM videmus, an Deus cognoscat creaturas, tum possibiles, tum futuras; quærendum est, an Seipsum cognoscat, & per quod medium.

#### CONCLUSIO.

**S**EIPSUM Deus cognoscit per suam propriam essentiam. Sc, inquam, cognoscit, quia est summè verus; ergo & summè intelligibilis ex parte objecti; & ex parte potentie est summè cognoscitivus: ergo se cognoscit, imò & comprehendit; quia in tantum se cognoscit, in quantum est cognoscibilis, in quo consistit præcisa ratio comprehensionis. Quod etiam se per suam essentiam cognoscat, patet; quia hic modus cognoscendi Deum, competit Beatis; ergo & Deo; aliàs si se cognosceret per aliud, sua scientia ab aliquo dependeret, & sic non esset ens independens. Absit ergo qui di-

cunt Deum se cognoscere per creaturas ; si enim se perfectissimè novit per se , ad quid se de novo cognosceret per creaturas ? Maximè cùm cognitio causæ per effectum deneganda sit Deo , tanquam imperfecta ; nullus enim effectus adæquat virtutem primæ causæ , & sic non ducit in cognitionem perfectam ejus.

Objic. Si Deus se cognoscit , cognoscit omnes suas perfectiones : ergo & suam scientiam , quod est falsum ; quia si cognosceret suam scientiam , illam cognosceret per aliam ; & hanc secundam per tertiam ; & sic in infinitum. Respond. Deum cognoscere suam scientiam , non tamen per aliam , sed per seipsam reflexam ; cùm enim scientia Dei sit infinita , est simul recta & reflexa ; Recta , respectu aliorum objectorum , & reflexa respectu sui.

### QUESTIO VIII.

*An Deus cognoscat Creaturas possibles.*

CREATURARUM aliæ sunt possibles , quæ nullam habent repugnantiam ad esse ; aliæ actuales , quæ existunt in aliqua temporis differentiâ. De primis hîc agitur.

#### CONCLUSIO.

DEUS cognoscit creaturas possibles. Quia ut aliquid cognoscatur à Deo , requiritur tantùm , quod habeat veritatem actualem , vel possibilem ; sed creaturæ possibles habent veritatem possibilem , quia verum est dicere de illis , quòd non habeant repugnantiam ad existere ; ergo à Deo cognoscuntur. Per hanc co-

gnitionem Deus novit mille mundos, quos potest creare.

OBJ. c. Scientia Dei debet esse perfectissima, ergo intuitiva? sed cognitio rerum possibilium non est intuitiva, quia non terminatur ad res existentes: ergo non est in Deo. Resp. 1. disting. primam consequent. Debet esse intuitiva, quando est de ente actuali, conc. quando est de ente possibili, nego: in hoc enim consistit perfectio scientiæ D. quod repræsentet res sicuti sunt; quando est de ente actuali, debet repræsentare res secundum actualem existentiam, quando verò est de ente possibili, repræsentat res secundum existentiam tantum possibilem. Resp. 2. illam cognitionem Dei rerum possibilium esse intuitivam, quia terminatur ad aliquod medium actualiter existens, nempe ad essentiam D. in quâ res possibles existunt nobiliiori modo, quàm in seipsis.

## QUESTIO VIII.

*An Deus cognoscat Creaturas existentes.*

**N**ON est dubium quin Deus cognoscat creaturas existentes; quia si cognoscat res possibles, in quantum habent veritatem possibilem, à fortiori cognoscit res actuales, quia habent veritatem actualem. Sed potest esse quædam difficultas de modo cognoscendi: Utrum scilicet cognoscat res secundum rationes universales; v. g. omnes homines, quia

quia cognoscit hominem in communi; vel secundum rationes singulares & individuas quorumcumque entium.

## CONCLUSIO.

**D**eus cognoscit creaturas, quæ extiterunt, existunt, vel existent, sigillatim. Cognitio enim Dei est perfectissima: ergo debet tendere nedum in res spectatas in communi, sed etiam in rationes particulares & singulares earum. Deinde, Deus est causa omnium rerum, tum secundum rationes communes, genericas & specificas; tum secundum rationes singulares: ergo illas cognoscit sigillatim. In hoc tamen non vilescit intellectus D. quia propter suam virtutem agendi, non distrahitur à cognitione nobilium, quando ignobilia cognoscit; omnia enim penetrat unico actu.

**O**bj. c. Deum non cognoscere creaturas neque in communi, neque in particulari. Primò, quia intelligens ab objecto perficitur, & Deus non potest perfici à creatura. Secundò, quia intelligens assimilatur objecto, & Deus non potest assimilari creaturis. Resp. primum verum esse, si desumat scientiam ab objecto; Deus autem accipit suam scientiam à suâ propriâ essentiâ, in quâ omnes creaturæ repræsentantur. Resp. secundum esse verum, quando intelligens cognoscit objectum per speciem, seu similitudinem objecti, quæ intelligentem informat, Deus autem indiget speciebus objectorum, ut illa cognoscat; sed omnia per se cognoscit.

gnitionem Deus novit mille mundos, quos potest creare.

OBJECTIONES. Scientia Dei debet esse perfectissima, ergo intuitiva? sed cognitio rerum possibilem non est intuitiva, quia non terminatur ad res existentes: ergo non est in Deo. Resp. 1. disting. primam consequent. Debet esse intuitiva, quando est de ente actuali, conc. quando est de ente possibili, nego: in hoc enim consistit perfectio scientiæ D. quod repræsentet res sicuti sunt; quando est de ente actuali, debet repræsentare res secundum actualem existentiam, quando verò est de ente possibili, repræsentat res secundum existentiam tantum possibilem. Resp. 2. illam cognitionem Dei rerum possibilem esse intuitivam, quia terminatur ad aliquod medium actualiter existens, nempe ad essentiam D. in quâ res possibles existunt nobiliiori modo, quàm in seipsis.

---

### QUESTIO VIII.

*An Deus cognoscat Creaturas existentes.*

**N**ON est dubium quin Deus cognoscat creaturas existentes; quia si cognoscat res posibles, in quantum habent veritatem possibilem, à fortiori cognoscit res actuales, quia habent veritatem actualem. Sed potest esse quædam difficultas de modo cognoscendi: Utrum scilicet cognoscat res secundum rationes universales; v. g. omnes homines, quia

quia cognoscit hominem in communi; vel secundum rationes singulares & individuas quorumcumque entium.

## CONCLUSIO.

**D**eus cognoscit creaturas, quæ extiterunt, existunt, vel existent, sigillatim. Cognitio enim Dei est perfectissima: ergo debet tendere nedum in res spectatas in communi, sed etiam in rationes particulares & singulares earum. Deinde, Deus est causa omnium rerum, tum secundum rationes communes, genericas & specificas; tum secundum rationes singulares: ergo illas cognoscit sigillatim. In hoc tamen non vilescit intellectus D. quia propter suam virtutem agendi, non distrahitur à cognitione nobilium, quando ignobiliora cognoscit; omnia enim penetrat unico actu.

**O**bj. c. Deum non cognoscere creaturas neque in communi, neque in particulari. Primò, quia intelligens ab objecto perficitur, & Deus non potest perfici à creatura. Secundò, quia intelligens assimilatur objecto, & Deus non potest assimilari creaturis. Resp. primum verum esse, si desumat scientiam ab objecto; Deus autem accipit suam scientiam à suâ propriâ essentiâ, in quâ omnes creaturæ repræsentantur. Resp. secundum esse verum, quando intelligens cognoscit objectum per speciem, seu similitudinem objecti, quæ intelligentem informat, Deus autem indiget speciebus objectorum, ut illa cognoscat; sed omnia per se cognoscit.



## QUESTIO IX.

*An Deus cognoscat Creaturas in proprio genere.*

POSSUNT considerari creaturæ, vel ut sunt relucens in essentiâ D. tanquam in speculo; vel ut sunt in seipsis extra essentiâ D. Quando Angeli cognoscunt illas priori modo, cognitio eorum dicitur *matutina*; quando posteriori, *vespertina* nuncupatur. *Prima dicitur matutina*, inquit Alex. Alensis, *quia est in Creatore, qui est principium omnis creatura, sicut manè est principium diei. Secunda vocatur vespertina; quia per eam cognoscitur res in creaturâ, qua de se tendit ad occasum. Querimus ergo hîc, an Deus cognoscat creaturas utroque modo, vel tantum in suâ essentiâ.* \*

## CONCLUSIO.

DEUS creaturas cognoscit in suâ essentiâ, non in proprio genere. Quia essentiâ D. est speculum repræsentans omnia intelligibilia; cum ergo creaturæ sint intelligibiles, Deus suam essentiâ videndo, videt etiam omnes creaturas in eâ relucens. Non verò illas ulterius videt in proprio genere; quia talis cognitio esset superflua, cum prima sit perfectissima, nihil autem superfluum in Deo debet admitti. Deinde, Deus desumeret suam scientiam ab extrinseco, si cognosceret creaturas in

proprio genere. Tandem, hoc est conforme D. Aug. l. 83. qq. q. 46. dicenti; *Deum extra se nihil intueri; sed tantum in se.* Et D. Dion. c. 1. de nomin. D. *Ea qua sunt, Deus nescit, non rerum notitia, sed sui.*

O b j e c. Essentia D. non potest esse speculum; quia speculum emendicat similitudines ab objectis, & repræsentat semper omnia omnibus. Resp. esse speculum non naturale, sed metaphoricum, quod scilicet repræsentat ex se; & insuper liberum & voluntarium; unde repræsentat tantum ea, quæ vult, quando vult, quibus vult, quomodo vult.

## QUÆSTIO X.

*Virum Deus cognoscat Futura Contingentia;*

C O N T I N G E N T I U M alia sunt absoluta, quæ revera evenient, licet potuerint non evenire. Alia sunt conditionata, quæ non evenient; sed evenirent, si aliqua poneretur conditio. Nunc de primis agendum est, postea de aliis.

### C O N C L U S I O.

D E U S cognoscit futura contingentia. Esai. 41. *Annunciate qua ventura sunt, & scimus, quia dii estis;* ergo Deus cognoscit futura contingentia. Quia futura contingentia sunt vera; existent enim; ergo ab intellectu D. cognoscuntur. Quod si Scriptura loquatur dubitativè. Matth. 21. *Verebuntur forte filium meum;* ex hoc non sequitur, quod Deus non cognoscat res futuras determinatè; sed tali

loquendi modus se accommodat nostro sensui, ad exaggerandam scilicet malitiam hominis, quæ tanta est, ut vix aliquid boni de eâ expectari possit.

Objic. 1. Propositiones singulares de futuro contingenti non sunt determinatè veræ, vel falsæ, ex Arist. ergo futurum contingens, cum non sit verum, non est à Deo cognitum. Resp. disting. antecedens. Non sunt determinatè veræ; id est non sunt ita veræ ex suâ naturâ, ut non potuerint esse falsæ; conc. Non sunt determinatè veræ, id est distinctè veræ nego. Quando enim dicitur, Petrus curret, vel non curret: una harum est distinctè vera; non est tamen ita ex suâ naturâ vera, quin ex voluntate Petri potuerit esse falsa; & hæc est mens Aristotelis.

Objic. 2. Ergo Deus ab æterno cognovit Petrum negaturum Christum: ergo non potuit non negare. Probatur consequentia; Quando antecedens est necessarium, consequentia est necessaria; sed in hac argumentatione. (Deus cognovit Petrum negaturum Christum; ergo negabit) antecedens est necessarium, non potuit enim Deus non scire; ergo consequentia est necessaria; & sic Petrus non potuit non negare. Resp. neg. consequentiam. Ad. prob. conc. maj. & dist. minorem. Deus necessariò cognovit Petrum negaturum; in sensu composito, supposito quòd Petrus neget, concedo; in sensu divisio, nego. Quia sicut Petrus potuit non negare, ita Deus potuit non scire; Et quia negavit contingenter, Deus hoc contingenter cognovit,

**O b j e c. 3.** Scientia Dei est necessaria; ergo ea quæ præscit, evenient necessariò: ergo non possunt quin eveniant; ergo non sunt amplius contingentia; & sic non cognoscit contingentia. Resp. esse necessariam formaliter, & contingentem terminativè. Hoc est, si scientia Dei spectetur in se secundùm suam entitatem realem, est necessaria; quia est actus intellectus D. & unum quid realiter cum intellectu & essentiâ D. si autem spectetur secundùm terminationem, quam habet ad creaturas, est quid contingens; quia illa terminatio mensuratur ab objecto: Vnde quando objectum est contingens, illa scientia secundùm terminationem est contingens; quando verò objectum est necessarium, illa scientia est necessaria: respectu ergo contingentium, de quibus est quæstio, scientia Dei est contingens, & futura contingentia, quæ novit per eam, possunt non evenire.

**O b j e c. 4.** Scientia Dei est infallibilis: ergo quæ prævidit, infallibiliter evenient: ergo non possunt non evenire. Resp. concedendo primam consequentiam, & distinguendo aliam: ergo non possunt non evenire; in sensu composito, conc. hoc est, supposito quòd sint ventura, non possunt quin eveniant; aliàs essent ventura, & non ventura: in sensu diviso, nego: hoc est, si spectentur in seipsis, possunt non evenire, quia sunt contingentia; & præscientia Dei non tollit ab illis contingentiam; scientia enim nihil ponit in objecto, imò supponit illud esse talis vel talis naturæ; & sic ex scientia Dei objectum non fit de

contingenti necessarium ; unde Aug. l. 3. de lib. Arb. cap. 3. ait ; *Sicut memoria non cogit facta esse , qua praterierunt ; sit præscentia non cogit facienda , qua sunt futura.*

Obj. c. 5. Non potest concipi quomodo simul compati valeant præscentia D. & contingentia rerum. Resp. hoc posse de facili , si notetur objectum non esse magis necessarium ex suppositione scientiæ D. quam ex suâ natura ; quia ut diximus , scientia non mutat nec variat objectum , imò supponit habere suam naturam , antequam cognoscatur ; & sic objectum est tale post præscentiam , ac ante : sed antequam objectum contingens sciretur à Deo , erat contingens : ergo postea est etiam contingens ; ergo præscentia non tollit contingentiam rerum : Et si præscentia dicatur infallibilis , hoc non impedit quin præscentia & Præscitum poruerint aliter esse ; sed ideo dicitur infallibilis , quia objecta repræscentat sicuti sunt ; objecta quæ sunt futura , repræscentat ut futura ; quæ sunt necessaria , repræscentat ut necessaria , & quæ sunt contingentia , ut contingentia : & in his patet concordia inter præscentiam Dei infallibilem , & contingentiam futurorum ; quia scilicet præscentia nihil ponit in objecto.



## Q U Æ S T I O X I.

*In quo Deus cognoscat Futura Contingentia.*

CUM scientia Dei ab æterno cognoscat quæ eveniunt per tempora, constat omnia contingentia ab æterno illi esse cognita; sed potest oriri difficultas de medio, in quo illa cognoscat. Aliqui putant hoc fieri per idæas D. quæ repræsentant Deo ab æterno omnia, quæ contingunt in tempore; falluntur tamen, quia idæa non est ratio intelligendi, sed faciendi, secundum D. Dion. l. 4. de divin. nom. dicentem: *Idea est exemplar sempiternorum, semper Deo præsens, ad quod aspiciens Deus cuncta quæ sunt, moditur.* Scotus etiam habet, quod idæa sit ratio æterna & immutabilis, secundum quam aliquid est formabile ad extra: cum ergo idæa sit ratio faciendi ea quæ repræsentat; factibilia, antequam voluntas D. determinet aut debeat fieri, vel non idè non est ratio cognoscendi futura, quæ sunt tantum futura per determinationem D. voluntatis. Querendum ergo est aliud medium, in quo cognoscantur.

## C O N C L U S I O.

C O G N O S C I T Deus futura contingentia in determinatione suæ voluntatis, includente determinationem humanæ, tanquam in medio, & in suâ essentiâ, tanquam in objecto repræsentante futurum contingens. v. g.

quando dicitur, *Cras curret Petrus*, vel non curret: antequam. Petrus decernat currere, & Deus statuatur concurrere cum Petro ad currendum; illa propositio non est vera, *Petrus curret*: Quando verò Deus determinavit dare suum concursum Petro, quem videt cursurum, si adjuvetur concursu Dei, hæc propositio incipit esse determinatè vera, *Petrus curret*: & quando incipit esse vera, incipit relucere in essentiâ D. in quâ omnia vera repræsentantur; & sic Deus videt illud contingens in essentiâ suâ, tanquam in objecto; & in determinatione suâ voluntatis cum nostrâ; tanquam in medio, quo est verum.

Obj 1. c. Si cursus Petri est futurus per determinationem voluntatis D. ergo est necessarius, & non pòtest non currere; *voluntati enim Dei quis resistit?* Dist. anteced. Si determinatio D. non includat voluntatem Petri, concedo: si includat, nego Diximus autem includere, & Deum non determinare Petrum cursurum, nisi post prævisionem determinationis Petri. In primo enim instanti Deus videt Petrum indifferentem ad currendum, vel non currendum. In secundo, videt quòd si daret suum concursum Petro, Petrus se liberè determinaret ad currendum: In tertio, suâ providentiâ exigente ut concurrat cum creaturis, quando volunt agere, determinat se concursurum cum Petro: & ex illo instanti, hæc propositio incipit esse vera, *Petrus curret*. Cùm ergo determinatio Petri sit in secundo instanti, & determinatio Dei in tertio tantùm, determinatio Dei involvit

determinationem Petri, & sic non officit illius libertati, sicut nec præscientia; quia aliquo modo supponit cursum Petri, antequam ipsum determinet; sicut scientia supponit obiectum, priusquam illud cognoscat. Dices. Si cognoscat Deus futura in suâ tantum determinatione; ergo non cognoscit peccatum; quia illud non determinat. Resp. Deum determinare materiale peccati, nempe actionem peccatoris, v. g. motum brachii occisoris; & ex determinatione materialis peccati, cognoscit formale peccati, quod consistit in privatione conformitatis cum ratione; licet illud formale non determinet, ut dicetur agendo de voluntate D.

### QUESTIO XI.

*An Deus cognoscat Futura Conditionata.*

**F**UTURA conditionata, quorum futuritio dependet ab aliquâ conditione, sunt in triplici differentia. Prima sequuntur ex suppositione naturali; ut si dies est, sol lucet; & hæc Deus cognoscit. Secunda sunt disparata, & in his conditio non influit in conditionatum; ut si Petrus dormiat Romæ, Paulus vigilat Parisiis; ibi dormitio unius non est causa vigiliæ alterius; & si istæ propositiones spectentur, quatenus una sequitur ex aliâ, sunt potius falsæ, quàm veræ; unde non cognoscuntur à Deo: si vero separatim spectentur, potest utraque esse vera, & à



Deo cognosci. Tertia denique sequuntur ex suppositione morali; ut si Deus det talem gratiam Petro, converteretur. De his est quaestio:

## CONCLUSIO.

**C**OGNOSCIT Deus futura conditionata. Aut enim Christus Matth. 11. quod si Tyri & Sidonii vidissent miracula, qua operata fuerunt in Betsaida, egissent poenitentiam. Primi etiam Reg. cap. 23. praedicat Deus Davidi, quod si maneret in Ceila, Ceilitae iraderent illum Saüli. Cognovit ergo Deus illam poenitentiam Tyrionum; & traditionem Ceilitarum: utraque autem fuit tantum conditionata, neutra enim evenit; ergo cognoscit futura conditionata. Ratio est, quia talis cognitio conditionatorum multum confert ad perfectionem scientiae D. quae non tantum fertur in futura absoluta, sed & in conditionata; confert etiam ad suavitatem providentiae, quod sciat Deus quid agerent homines, si v. g. illis mitteret abundantiam, aut sterilitatem. Nec quis dicat, futura conditionata non esse determinatè vera; ergo non sciri: quia licet non habeant veritatem absolutam, habent tamen conditionatam: unde si possibilia cognoscantur, ut diximus, quia habent non repugnantiam ad esse, à fortiori conditionata cognoscuntur, quia praeter non repugnantiam quam habent, essent actu futura, si talis, vel talis conditio apponeretur.

**OBJEC.** Non videtur ullum medium, in quo talia futura cognoscat Deus: ergo illa non novit. **Resp.** Deum illa cognoscere in

determinatione conditionata suæ voluntatis, includente determinationem conditionatam voluntatis humanæ; sicut enim diximus quodd Deus cognoscat Petrum cras cursurum, quia cognoscit se daturum esse Petro suum concursum, & Petrum esse ipso concursu usurum; sic cognoscit Petrum esse conditionatè cursurum, cognoscendo voluntatem Petri se determinaturam ad currendum, supposita aliquâ conditione; licet ille cursus Petri non sit futurus, quia talis non apponetur conditio.

Objic. Ergo admittitur scientia media inter scientiam simplicis intelligentiæ & visionis, quæ est scientia Molinistarum, tam odiosa omnibus. Resp. nos posse admittere scientiam mediam, conformiter Scripturæ præcitaræ; an autem sit scientia Molinistarum, nec ne, non curamus; non admittimus enim illam scientiam, quâ gratia subjiciatur voluntati humanæ; hoc enim Pelagianum est; sed admittimus illam scientiam, quâ Deus prævidet ea quæ sunt futura sub conditione. Si enim quis dicat, Deum prævidere an Petrus benè utetur gratiâ, si illi eam communicet; & talis bonus usus liberi arbitrii præscitus sit causa quare Deus illi gratiam largiatur, hoc negamus: pro tunc enim esset quædam dispositio ex parte hominis ad receptionem gratiæ; & sic gratia non præveniret meritum, dispositionem & consensum: hoc tamen non impedit quin asseramus Deum scire an Petrus sit consensurus tali gratiæ, vel non, si Deus illam impertiretur; quia pro tunc

Deus largitur illam gratiam, vel non largitur; & talis prævisio non est causa cur Deus largiatur.

---

### QUESTIO XIII.

*An Deus cognoscat non entia, mala,  
& impossibilia.*

PER non entia intelliguntur negationes & privationes. Per mala, intelliguntur tum mala culpæ, ut peccata; tum mala pœnæ, ut pestis, fames, bellum. Per impossibilia, intelligitur hominem esse brutum.

#### CONCLUSIO.

DEUS hæc omnia intelligit. Primò, cognoscit non entia, v. g. hominem esse æcæum, & lac non esse nigrum: imò cognoscit entia rationis, quia cognoscit objecta, ad quæ concurrit, & concurrit cum homine fabricante ens rationis. Quòd si dicat Aristoteles, *non ens, non sciri*: hoc est verum de ente incompleto non vero, quod non cognoscitur per assensum, benè autem per dissensum: licet enim quis non possit assentiri propositioni falsæ, potest tamen illi dissentiri. Secundò, Deus cognoscit tum mala pœnæ, ea enim facit, Amos 3. *Non est malum in civitate, quòd non fecerit Dominus*; & quæ facit, cognoscit: tum mala culpæ, seu peccata; secundum dictum Davidis, *Delicta mea à te non sunt abscondita*: alias si non cognosceret illa, non posset in finali iudicio rationem petere.

de illis. Cognoscit inquam, illa, ut vera quædam privativa, & hoc per veritatem positivam, quâ privant: sicut enim cognoscit tenebras esse in aëre, quia cognoscit lucem non esse in illo; sic cognoscit peccatum, cognoscendo bonitatem non esse in illâ actione, quæ peccatum est. Si dicat Scriptura Deum non cognoscere peccata: hoc est scientiâ approbationis. Tertiò, cognoscit impossibilia; cognoscendo enim essentiam hominis, & essentiam bruti, eodem actu cognoscit hominem non posse esse brutum: non quòd cognoscat illa impossibilia ad modum unius entis; ut homines, qui duo contraria componentes, faciunt chimæram; sed cognoscit impossibilia, ut diversa entia, quæ non possunt componi.

---

### QUESTIO VLTIMA.

*An in Deo sint Virtutes Intellectuales.*

**I**N intellectu nostro possunt reperiri aliqui habitus, qui vocantur virtutes intellectivæ, quique facilitant nostram potentiam in suis operationibus; & illi sunt quinque: scilicet sapientia, scientia, prudentia, ars, & habitus principiorum, de quibus agunt Philosophi. An autem etiam in Deo reperiantur, negabit

#### CONCLUSIO.

**N**ON sunt in Deo habitus intellectuales. Habitus enim redolet imperfectionem in potentiâ, scilicet difficultatem agendi quæ

tollatur per habitus ; sed Deus non experitur ullam difficultatem in intelligendo , intellectus enim Dei est infinitè perfectus : ergo cum solo objecto , nempe essentiâ suâ , omnia intelligit sine habitu. Reperiuntur tamen in Deo aliqui actus terminativè sumpti , correspondentes virtutibus intellectualibus. Quatenus enim intelligit prima principia , dicitur habere intelligentiam , seu habitum principiorum : ut cognoscit conclusiones ex illis deductas per altissima principia , dicitur habere sapientiam : quia est in eo virtualis discursus : ut cognoscit causam & effectum , dicitur habere scientiam : quia cognoscit factibilia , & quomodo sunt facienda , dicitur habere artem : quia tandem cognoscit res in finem dirigendas per media congrua , dicitur habere prudentiam.

Hic posset quæri , An scientia sit causa rerum : sed hoc videbitur in Cap. sequenti , ubi dicemus voluntatem D. esse omnium rerum causam.



## DISPUTATIO ULTIMA.

### *De divina Voluntate.*

**O**MNIS naturæ intellectualis duplex est potentia : intellectus scilicet , & voluntas ; postquam ergo dictum est de primâ , de secundâ agendum venit.

## QUÆSTIO PRIMA.

*An sit in Deo Voluntas per modum  
potentia.*

**N**VLLI dubium est, quin sit in Deo voluntas; est enim perfectio simpliciter; sed an sit in eo per modum actus, vel per modum potentia, controyertitur. Suares vult esse potius actum volendi, quam voluntatem; Scotus verò asserit utrumque.

## CONCLUSIO.

**E**ST in Deo voluntas per modum potentia; seu actus primi. Quòd sit voluntas, patet ex Psalm. 113. *Omnia quaecumque voluit, fecit.* Matth. 6. *Fiat voluntas tua.* Rom. 9. *Voluntati ejus quis resistit?* Ratio est, quia agere per voluntatem, est perfectio simpliciter. Quòd autem in Deo voluntas sit per modum potentia, constat; quia intelligere supponit intellectum constitutum in ratione intellectus; sic velle, seu volitio supponit voluntatem in ratione voluntatis, seu potentia: quæ tamen potentia nunquam destituta est suo actu; & sic non est imperfecta.

**O**BJECT. voluntatem non esse in Deo; quia voluntas fertur in bonum absens; volumus enim quæ non habemus; nullum autem est bonum absens Deo; ergo. Resp. nos non solum amare ea quibus caremus; sed & ea quibus potimur; unde alius est appetitus carentia, qui fertur circa bonum absens; alius complacentia;

circa bonum præsens : primum non habet Deus ; nisi respectu nostri , quibus vult bonum absens , habet tamen secundum.

Objic. non esse in Deo voluntatem per modum potentiaë ; quia illa potentia esset productiva , & receptiva sui actus ; quod dicit imperfectionem : nempe , quòd Deus non habeat actum sibi connaturalem , & indigeat ut illum producat & recipiat. Resp. voluntatem Dei , ut Deo competit , non esse productivam ; quia habet actum improductum & essentialem emanantem à voluntate , sicut attributa fluunt ab essentiâ , quo scilicet actu fertur circa essentiam diligibilem ; & in hoc longè differt ab humanâ , quæ cum non habeat actum improductum & sibi connaturalem , tenetur illum producere , ut amet. Non est etiam voluntas D. receptiva actus , quia voluntas dicitur tantum receptiva actus , quando actus est accidens ; actus autem voluntatis D. est substantia.

---

## QUESTIO II.

*Quid, & quotuplex sit Voluntas D.*

**S**PECTARI potest voluntas D. tripliciter : Primò , ut est essentialis ad intra ; quatenus competit Deo , qui , ut Deus est , amat suam essentiam. Secundò , ut est notionalis ad intra ; quatenus est in Patre & Filio , qui per eam producunt Spiritum S. Tertiò , ut est essentialis ad extra ; in quantum confide-

ratur in Deo, qui vult creaturas. Triplex ergo erit definitio.

## CONCLUSIO PRIMA

**V**OLUNTAS D. ut essentialis ad intra; est potentia vitalis intellectualis, quæ per amorem ferri potest, & fertur actu circa essentiam D. & alia quæ sunt formaliter in illa. Voluntas D. ut est notionalis ad intra; est potentia vitalis intellectualis productiva amoris infiniti, nimirum Spiritus S. Voluntas D. ut est essentialis ad extra; est potentia vitalis intellectualis, liberè & contingenter determinans de creaturis.

## CONCLUSIO SECUNDA.

**V**OLUNTAS D. in se una est; ratione tamen objectorum & circumstantiarum, est multiplex. Quòd sit una in se, patet; quia sicut essentia D. est summè simplex, sic & voluntas, quæ est una & eadem res cum illâ. Quòd sit autem multiplex objectivè & terminativè; constat ex omnibus Theologis, qui dicunt aliam esse voluntatem signi, aliam beneplaciti; de quibus postea dicetur.

## QUESTIO III.

*Quotuplex sit Voluntas beneplaciti.*

**V**OLUNTAS beneplaciti, est actus proprius voluntatis D. quo vult Deus aliquid; v. g. condere mundum, damnare Judam, & salvare Petrum. Voluntas signi non est propriè actus voluntatis; sed est signum.



aliquid posterius voluntate , quo significat Deus se velle aliquid , aut nolle ; ut quando præcipit aliquid , aut consulit , signum est, quòd illud velit. Quotuplex sit prima , videatur

## C O N C L U S I O .

**V**OLUNTAS beneplaciti dividitur in absolutam & conditionatam ; in antecedentem & consequentem ; in efficacem & inefficacem. Licet absoluta , consequens & efficax coincident ; sicut conditionata , antecedens & inefficax ; ne tamen hæ voces lateant aliquem , omnibus explicandæ sunt. Voluntas absoluta est ea quæ semper impletur , quam Augustinus vocat invictam , & de quâ habetur Esther 3. *Non est qui tua voluntati possit resistere.* Conditionata est ea , quæ non semper impletur ; impleretur tamen , si aliqua poneretur conditio ex parte nostri ; sic Deus vult omnes homines salvos facere , supposito quòd ipsi velint. Antecedens est , quâ Deus vult aliquid secundum se , non habitâ ratione circumstantiarum , quæ sequuntur. Sic vult omnes homines salvos fieri secundum se spectatos , non respiciens ad eorum peccata. Consequens est ea , quâ vult aliquid , spectatis omnibus circumstantiis , cujus contrarium tamen vellet , si illæ circumstantiæ non apponerentur : sic vult damnare Judam , spectata illius proditione ; attamen illum salvare vellet , si non fuisset traditor. Inefficax est ea , quâ Deus vult aliquid , quod non eveniet , eveniret tamen , si homines corresponderent D. voluntati. Efficax est quæ semper suum sortitur effectum ,

## QUESTIO IV.

*Quotuplex sit Voluntas signi.*

**Q**VANDO voluntas D. dividitur in voluntatem beneplaciti, & signi, illa divisio est tantum metaphorica; quia voluntas signi non est proprie voluntas; sed tantum signum voluntatis. v. g. quando Deus jubet aliquid; tale imperium non est voluntas formaliter sumpta; sed est signum, quodd Deus velit id quod imperat. Quæritur autem, quotuplex sit illa voluntas signi; vel potius, quot sint signa voluntatis D.

## CONCLUSIO.

**Q**VINTUPLEX est voluntas signi; vel sunt quinque signa voluntatis D. scilicet, præceptum, prohibitio, permissio, consilium, & actio: juxta hunc versum. *Præcipit, ac prohibet, permissit, consulit, implet.* Voluntas enim D. potest considerari, vel in ordine ad bonum, vel in ordine ad malum. Si in ordine ad bonum; vel est præsens, vel est futurum. Per ordinem ad bonum præsens, quod Deus operatur per se, dicitur operatio, seu actio; & quando Deus facit aliquid, signum est quodd illud vellit: Per ordinem ad bonum futurum ab alio operandum; vocatur præceptum, si bonum illud absolute sit necessarium ad salutem; & si sit tantum utile, versatur circa illud consi-

lium : Quando vero Deus præcipit , aut confusit aliquid , signum est quòd illud velit. Si voluntas D. spectetur in ordine ad malum : vel malum illud est præsens , seu factum ; & tunc permittitur : vel est futurum ; & tunc prohibetur à Deo , & sic sunt quinque signa voluntatis beneplaciti.

O B J E C T. Permissio non est signum voluntatis beneplaciti ; aliàs Deus vellet peccata ; quia illa permittit. Præceptum etiam non est signum voluntatis D. præcepit enim Deus Abrahamæ , ut immolaret suum filium ; attamen non voluit , quia impedivit eum. Resp. ad primum , Deum non permittere formaliter peccatum , aliàs reverà illud vellet ; sed permittit consequenter : hoc est , permittit ut utamur libero arbitrio , & nos utendo illo , aliquando abutimur. Permissio ergo non cadit præcisè super peccatum ; imò illud prohibet ; sed cadit supra usum libertatis , ex quo multoties sequitur peccatum. Resp. ad secundum , quòd per præceptum datum Abrahamæ , Deus non præceperit illi ut immolaret Isaac ; sed ut se ostenderet obedientem Deo , quod fecit : & sic præceptum semper significat voluntatem beneplaciti ; licet non significet semper id , quod concipimus per præceptum , & per verba præcepti.



## QUESTIO V.

*Quid addat Volitio contingens supra  
necessariam.*

**S**ICUT omnia intelligit Dens unico actu, sic unâ volitione omnia diligit : diverso tamen modo se amat & creaturas : amore enim contingenti fertur in creaturas futuras, & amore necessario vult seipsum. Quid ergo addat volitio contingens ad necessariam quæritur.

## CONCLUSIO.

**V**OLITIO contingens nihil addit supra necessariam, nisi terminationem liberam, quæ est tantum respectus rationis ; sicut de scientia diximus. Si enim illa volitio, quæ fertur ad creaturas, diceret aliquid reale ; diceret alium actum vitalem præter eum, quo Deus se vult ; & sic essent duæ volitiones in Deo ; quod pugnat contra perfectionem voluntatis D. quæ cum sit infinita, omnia unico actu diligit ; licet ille actus sit diversus, secundum diversitatem objectorum ; ita quod se velit necessario, creaturas vero futuras, contingenter ; quia cum potuerint non esse futuræ, potuerunt non amari ut futuræ. Si autem volitio contingens non addat aliquid reale supra necessariam, superest, ut dicat tantum terminationem contingentem ad illas : ita quod ob infinitatem voluntatis D. sit tantum unus actus vitalis, qui secun-

dum se, & ut terminatur ad Deum, sit necessarius; & ut terminatur ad creaturas futuras, sit contingens.

Obj 1 c. Deus potest non velle creaturas, non potest tamen non velle se: ergo volitio contingens est alia à volitione necessaria. Resp. est alia secundum terminationem, conc. secundum entitatem realem, nego. Non est etiam dicendum quòd volitio creaturarum possit non esse in Deo; quia est eadem ac ea quâ Deus se vult; sed verum est quòd illa terminatio possit abesse.

---

## QUESTIO VI.

*An Deus velit Seipsum, & quomodo.*

**N**ON est magna difficultas in primâ parte quæstionis, sed potest esse major in secundâ; supposito enim quòd Deus se amet, potest ulterius inquiri an se amet naturaliter, vel liberè. Vbi sciendum, quòd agere naturaliter, est agere per impetum naturæ, vel alicujus potentie naturalis quæ sit ex se determinata ad agendum: Sic ignis agit naturaliter, quia ex se determinatur ad calefaciendum; sic etiam intellectus. Agere autem liberè, est modus agendi voluntatis, quæ non determinatur ex se, sed se determinat ad agendum. Triplex est libertas. Contradictionis, quâ voluntas potest diligere vel non diligere: Contrarietatis, quâ potest amare vel odire: & Essentialis, quâ voluntas amat objectum complacenter & delectabiliter;

non potest tamen non amare, nec odisse illud.

## CONCLUSIO PRIMA.

**D**eus vult & amat seipsum. Quia voluntas D. est perfectissima in agendo: quæ habet objectum sibi proportionatum, nempe essentiam D. summè diligibilem: ergo non potest quin illam amet. Deinde, Deus est perfectè beatus, & beatitudo consistit formaliter in amore essentiae D. ergo amat illam. Tandem: Amor seu volitio est perfectio simpliciter: ergo est in Deo. Dices, Ergo amat suam volitionem, quæ est bona; ergo primam per secundam, & secundam per tertiam, & sic in infinitum. Resp. amat suam volitionem, non per aliam; sed per se ipsam reflexam virtualiter, ut diximus de intellectu; ita quod amore recto Deus amet se, & amore reflexo, amet suam volitionem.

## CONCLUSIO SECUNDA.

**D**eus amat seipsum, non naturaliter; sed liberè; necessariò tamen. Dux primæ partes patent ex eo quod modus agendi naturaliter pertineat ad intellectum, & modus agendi liberè spectet ad voluntatem: ergo sicut intellectus intelligit naturaliter, & non liberè: sic etiam voluntas vult liberè, & non naturaliter. Tertia pars constat; quia Deus est necessariò beatus: ergo necessariò se vult & diligit; quoniam beatitudo consistit in amore sui.

**O B J E C T.** Voluntas D. agit determinatè: determinatur enim ad Deum amandum: ergo

amat Deum naturaliter. Dist. Determinatur, id est determinat se per modum inclinationis, conc. determinatur ex naturâ potentia, nego. Dices. Voluntas D. non potest Deum non amare, nec ipsum odisse: ergo non liberè amat. Dist. consequentiam, Non amat, libertate contradictionis aut contrarietatis, conc. libertate essentiali, nego. Instabis. Libertas non stat cum necessitate: ergo non se amat liberè, quoniam se amat necessariò. Dist. ant. Libertas moralis quæ consistit in posse facere, vel non posse; conc. libertas essentialis, nego: dicitur enim communiter, quòd Pater & Filius producant Spiritum sanctum liberè, & necessariò; quia etsi non possunt non producere, tamen producant illum complacenter & delectabiliter; in quo consistit libertas essentialis.

---

### Q U Æ S T I O VII.

*An Deus velit Creaturas possibles, & quomodo.*

**N**EGAT DOCTOR Seraphicus cum Alensi, volens creaturas non diligi, nisi sint futuræ, juxta illud Psal. 113. *Omnia quacunque voluit, fecit*: ex quo contendunt illi Doctores, Deum non velle creaturas possibles, quia illas non fecit; & dicunt ipsum esse omnipotentem, non omnivolentem; in quantum possit producere omnia possibilia, attamen illa non velit, sed tantum futura.

CONCLUSIO.

## CONCLUSIO PRIMA.

**D**Eus vult & amat creaturas possibles. Voluntas enim D. non est minus perfecta, quàm intellectus : sicut ergo intellectus cognoscit res possibles, quia habent veritatem possibilem ; sic etiam amat easdem ; quia possibilem bonitatem habent.

Objic. Suares, non esse parem rationem ; quia intellectio simplicis intelligentiæ, quæ fertur circa possibilia, abstrahit ab existentia rerum ; non autem volitio quæ fertur circa res quæ existunt, vel quæ existent. Resp. quòd sicut intellectio simplicis intelligentiæ terminatur ad res, ut sunt possibles, & cognitio visionis ad res futuras ; sic volitio simplicis complacentiæ fertur ad res possibles, quæ habent aliquam bonitatem, si non positivam, saltem possibilem ; & volitio efficax fertur in res futuras : Supponatur v. g. Angelus possibilis, qui Deum laudare valeat, Deus diligit eum amore complacentiæ : Supponatur verò futurus, & Deum glorificaturus, Deus diligit illum amore efficaci, quia terminatur ad existentiam Angeli, quam Deus verè illi dabit ; unde talis amor dicitur efficax. Quando ergo Psalmista dicit ; *Omnia quaecumque voluit, fecit* : Resp. *Omnia quaecumque voluit, fecit* ; voluntate efficaci, conc. voluntate complacentiæ & simplicis affectûs, nego : & ista volitio abstrahit ab existentia rerum : Vnde dicendum est, quòd Deus sit & omnipotens & omnivoleus,



**D**eus vult & amat creaturas possibles, necessariò. Quia voluntas D. dicitur necessaria, vel contingens, per ordinem ad suum terminum; sed res possibles sunt necessariò possibles, non à voluntate D. sed à seipsis: ergo Deus vult illas necessariò; non tantùm quatenus sunt in Deo, tanquam in causâ; tunc enim non distinguuntur à Deo; sed etiam quatenus habent esse objectivum & repræsentativum in essentiâ D.

**O b j e c t.** Perfectio est in voluntate; quòd possit suspendere actum, in hoc enim est magis libera; ergo hæc debet competere voluntati D. si autem possit suspendere actum, non vult necessariò. **Resp.** quòd illa perfectio habeat admixtam imperfectionem, nempe potentialitatem & privationem actus; & sic talis suspensio non potest competere Deo ratione objecti necessarij, licet possit reperiri in homine.

---

### QUESTIO VIII.

*An Deus velit creaturas futuras, & quomodo.*

**S**I Deus velit creaturas possibles, quia habent bonitatem possibilem; à fortiori vult & amat futuras, ratione bonitatis actualis & positivæ quâ sunt præditæ: Unde non est tanta difficultas de volitione Dei circa creaturas futuras, quanta potest esse de mo-

de quo vult illas; an scilicet velit amore contingenti, vel necessario.

## CONCLUSIO PRIMA.

**D**Eus vult & amat creaturas futuras. Habetur enim ex Sapientia 11. *Deligis Domine omnia opera tua; & nihil horum qua fecisti, odisti.* Ratio est, quia voluntas bene ordinata amat id quod habet rationem boni; sed creaturae habent rationem boni; vidit enim Deus cuncta qua fecerat, & erant vultu bonae, Genesim 1. & ex Philosopho ens & bonum convertuntur: ergo amat creaturas quae sunt entia.

Obijc. Deus est sibi ipsi sufficiens; ergo nihil vult extra se. Resp. Nihil vult extra se ex inopia, quasi illo indigeat, conc. ex libertate quae illum inclinatur ad amandum ea quae bona sunt, nego. Quod si dicatur; Ergo desumit suum amorem a creaturis. Resp. quod desumat suum amorem a creaturis; quantum ad terminationem, concedo: quantum ad entitatem amoris, nego: objectum enim quod movet actum amoris D. est sola bonitas essentiae D. licet bonitas creaturae sit objectum terminativum ejus.

## CONCLUSIO SECUNDA.

**D**Eus qui vult creaturas futuras amore efficaci, libero, contingenti, immutabili tamen. Quod amet illas amore efficaci, patet, quia vult efficaciter illis dare existentiam. Quod amet eas amore libero, nemo dubitat; quia quae sunt a voluntate, liberè fiunt. Amat insuper illas contingenter, ut sunt futurae; quia illa futuritio creaturarum

est contingens; potuit enim illas non producere. Vult tandem easdem immutabiliter; quod enim aliquando voluit Deus, non potest non velle; ut diximus, agendo de immutabilitate voluntatis D. Quòd si Theologi arceant contingentiam à Deo; arceant tantum illam quæ conjungitur cum mutabilitate.

Objic. Qui vult necessariò finem, vult necessariò media; sed Deus se vult necessariò, qui est ultimus finis: ergo vult necessariò creaturas quæ sunt media, Resp. dist. maj. Quando vult finem, ut finem, concedo: quando vult finem, ut bonum, nego: Deus autem non se vult, ut finem, creaturarum præcisè; sed se vult ut summum bonum, quod necessarium est; unde se amat necessariò, & creaturas contingenter.

#### Q U Æ S T I O I X.

*Vtrum voluntas D. sit causa rerum, & sub qua ratione.*

**E**XISTIMANT Durandus & Suares causam rerum non esse neque intellectum, neque voluntatem D. sed esse tertiam potentiam in Deo, quam vocant executivam, distinctam ab intellectu, & voluntate; sicut in nobis reperitur præter intellectum cognoscentem & voluntatem imperantem, tertia potentia exequens jussa voluntatis, quæ residet in lingua, manibus, pedibus, &c. Ijusdem sententiæ videtur D. Thomas, qui vocat

scientiam Dei, causam dirigentem; voluntatem, causam imperantem; & potentiam, causam exequentem.

## C O N C L U S I O.

**N**Ec intellectus, nec tertia potentia executiva, sed voluntas D. sub ratione volitionis, seu actus secundi, est causa rerum. Quòd intellectus non sit causa rerum, patet; quia productio creaturarum ad extra, est contingens & libera, potuit enim talis productio non esse: ergo competit illi potentia, quæ libera est: ergo voluntati, & non intellectui. Deinde, solius voluntatis est decernere & determinare de futuritione rerum; ut patet ex nobis, ubi opera externa pendent à voluntate imperante; hoc autem non pendet ab intellectu: ergo. Constat deinde, quòd non admittatur tertia potentia, quæ sit causa rerum; quia hoc derogaret infinitati voluntatis D. quæ tam efficax est, ut ex se possit omnia facere: & certè si in humanis voluntas Architecti esset tam efficax, ut posset domum ædificare, non requireretur potentia exequens: ergo nec in Deo requiritur, ubi voluntas est infinita; imò hoc derogaret ipsius perfectioni, si requireret aliam potentiam executivam. Quòd tandem sit voluntas quæ sit causa rerum, patet ex dictis: Vnde superest probandum quòd voluntas sit earum causa sub ratione actus secundi, & hoc clarum est; quia voluntas est tantum principium volitionis, sed illa volitio est causa rerum; ad velle enim Dei, ponuntur in esse omnia, quæ existen-

tiam recipiunt. Quòd si Scotus dixerit productionem competere actui primo ; seu intellectui, ut est potentia ; loquitur de productione Verbi D. quod est ab intellectu secundo Patris, & non de creaturis.

O B J E C T. Intellectus D. non est productivus : ergo nec voluntas. Dist. Voluntas non est productiva ut essentialis ad intra ; quia amat volitionem improductam, est tamen productiva ad extra. Dices, ex Patribus scientia est causa rerum : Dist. causa dirigens & remota, conc. causa exequens & proxima, nego. Dices, effectus est ab illa potentia cui assimilatur ; sed creaturæ magis assimilantur intellectui, nam assimilantur idæis quæ sunt in intellectu D. Resp. major. esse falsam in agentibus intellectualibus ; licet enim domus fabricata ab Architecto sit similis intellectui ejus ; non tamen intellectus, seu idæa est causa proxima efficiens, bene autem exemplaris ; sed ipsa domus est à manu Architecti, sicque manet quòd voluntas sit causa rerum, juxta mentem Athan. lib. 4. contrà Arianos dicentis : *Deus solo nutu voluntatis agit* : & Cypriani sic loquentis, *Deus cujus natura bonitas, & voluntas potentia.*



## QUESTIO X.

*Utrum voluntas D. semper impleatur.*

**D**UPLEX est voluntas, ut diximus, nempe antecedens, & consequens. Antecedens, est ea quâ Deus vult aliquid, non habitâ ratione circumstantiarum, quæ possunt impedire executionem talis voluntatis. Consequens est illa quâ Deus vult aliquid, prævisis omnibus circumstantiis. Prima dicitur antecedens, quia antecedit prævisionem illarum circumstantiarum. Secunda consequens, quia illam sequitur. Per primam vult salvare Judam cum omnibus hominibus; per secundam, Judam damnare, ex prævisione scilicet sui peccati.

## CONCLUSIO.

**V**OLUNTAS antecedens non semper impletur; bene autem consequens. Prima pars patet ex hoc quod Deus velit voluntate antecedente salvare omnes homines, qui tamen omnes nos salvantur: vult enim ita eos salvare, ut si reverâ non cooperentur suæ voluntati, eos damnaturus sit. Secunda pars habetur ex Epist. ad Rom. 9. *Voluntati ejus quis resistit?* Ratio est, quia si prævisis omnibus eventibus & circumstantiis rerum Deus velit aliquid, voluntas ejus impleri debet; aut si non impleretur, id esset propter impotentiam voluntatis; vel quia posset impediri ab alio; vel ob ipsius mutabilitatem.

I iiij

tem : quæ omnia non possunt dici de Deo.

Quòd si Patres contra primam partem dicant omnem voluntatem Dei impleri ; loquuntur de voluntate consequenti, & absolutâ, quæ est nobilior antecedenti.

---

### QUESTIO XI.

*An voluntas Dei sit immutabilis.*

**H**ANC quæstionem solvimus, loquendo de immutabilitate D. ubi probavimus Deum esse immutabilem, tum secundum scientiam, tum secundum decreta suæ voluntatis : Quia tamen ordo doctrinæ postulat ut hoc in loco dicamus aliquid de eadem immutabilitate, jam dicta paucis constringemus, addentes solutionem aliquibus objectionibus fieri solitis.

#### CONCLUSIO.

**V**OLUNTAS D. est immutabilis : si enim mutaretur ; vel esset quia Deus determinaret aliquid de novo, vel quia mutaret ea quæ ab æterno decrevit. Primum falsum est ; quia omnia ab æterno novit & voluit, ut probavimus loco citato : Secundum nequit esse : qui enim mutat decretum, non cognovit omnia quæ possunt inducere voluntatem ad non volendum aliquando quod semel voluit : unde in Proverb. dicitur : *Multa cogitationes in corde viri, voluntas autem Dei in æternum manet.*

**OBJEC.** Licet voluntas D. mutaretur in

dēcretis, propterea Deus non mutaretur intrinsecē; quia decretum liberum nihil addit supra volitionem necessariam Dei, quā terminationem: non dicitur autem mutari ob terminationem; aliās cū sit creator, mutaretur: ergo nil vetat quin voluntas mutetur in dēcretis. Resp. Deus non diceretur mutari physicē propter rationem allatam; sed mutaretur moraliter; esset enim levis & inconstans, cū maxima sit levitas mutare voluntatem, nullā adveniente ratione boni aut mali, quæ antea non prævīsa fuerit: & talis mutatio moralis non esset minū repugnans Deo, quā posse mentiri, aut non implere promissa. Adde quōd si admitteretur talis mutatio, contradiceretur Scripturæ dicenti, *Multa cogitationes in corde viri, voluntas autem Dei in æternum manet.*

O B J E C. *Novit Deus mutare sententiam*, inquit S. Ambrosius, *sic tu noveris emendare delictum*; & juxta Arnobium, *Sicut contemnendo Deum fecimus contemnentem, sic pœnitendo faciemus pœnitentem*: ergo voluntas ejus mutatur. Resp. hæc non intelligi propriè; non potest enim advenire ulla mutatio in actū interno voluntatis D. sed intelligi figuratè, secundū nostrum intelligendi modum; ita, quōd Deus ita se gerat, ad si esset pœnitens vel mutasset suam sententiam, quia ab æterno Deus semper amavit hominem pro illo tempore quo est in gratiā; & semper odio habuit pro illo quo est in peccato. Videri possunt aliæ objectiones loco præcitato,



## QUESTIO XII.

*Utrum possit dari causa voluntatis D.*

**L**OQUIMUR de causâ finali, utrum scilicet detur aliqua causa propter quam Deus se velit, & alia à se; ubi sciendum est in volitione posse spectari rem volitam & rationem volendi; sicut in intellectione reperitur res cognita & ratio cognoscendi. Res cognita & volita in divinis est essentia D. & ratio cognoscendi & volendi est veritas & bonitas essentiae. Notandum etiam, quod aliquid est causa volitionis alterius, quando distinctis actibus fertur voluntas in rem volitam & in rationem volendi: est verò tantum ratio volendi, quando voluntas unico actu fertur in utrumque. Sic dicendum est de cognitione: Si v. g. unico actu cognoscam præmissas & conclusionem; præmissæ sunt tantum ratio cognoscendi conclusionem; si verò uno actu cognoscam præmissas, & alio actu conclusionem, cognitio præmissarum est causa cognitionis conclusionis. Sic si unico actu diligam Petrum & virtutem ejus, virtus est ratio volitionis meæ, & non causa; erit verò causa, si uno actu diligatur virtus, & alio Petrus.

## CONCLUSIO.

**V**OLUNTATIS D. non datur causa finalis propria, sed tantum ratio volendi. Proba-

tur primum, quia ad intrā non datur distinctio realis inter volitionem, volitum, & rationem volendi: & licet sit distinctio realis ad extra inter creaturam volitam, & volitionem Dei: non tamen volitio, quā se vult, est causa volitionis quā vult creaturas, nec bonitas essentialis est causa volitionis creaturarum; quia eodem actu vult se, bonitatem suam, & creaturas. Probatur secundum, quia bonitas suæ essentialis, cum non sit causa suæ volitionis, est saltem ratio quare se amat & alia à se; nulla enim datur ratio movens suæ volitionis ab intrinseco; sicut nec creaturæ possunt esse objectum motivum sui intellectus, ut diximus.

Objic. Deus vult bona particularia propter bonum generale universi, & incarnationem propter salutem hominum; ergo ratio volendi petitur ab extrinseco. Resp. Deum velle quidem unum esse propter aliud; non verò vult unum propter aliud; quia non vult distinctis actibus. Deinde nihil verat Deum habere ab extrinseco rationem volendi terminativam, non motivam; quia est sola bonitas D. quæ movet voluntatem ad volendum omnia.

### QUESTIO XIII.

*Utrum Voluntas D. imponat necessitatem rebus.*

**A**LIA sunt agentia naturalia quæ agunt naturaliter & necessario, ut ignis: Alia  
I vj

sunt contingentia, quæ modò producunt suos effectus, modò non; ut arbores, quæ vel fructificant, vel sunt steriles: Alia tandem sunt libera, ut creaturæ intellectuales, quæ agentes per voluntatem, possunt operari vel non. Deus imponit primis necessitatem agendi; dedit enim illis modum essendi & modum operandi quem habent; cùm operantur ergo necessariò, ipsis imposuit agendi necessitatem. Quoad agentia contingentia, Deus dedit illis modum agendi contingentem; ita enim disponit aëris temperiem, ut aliquando arbores fructum producant, vel non. Sed quæritur de agentibus intellectualibus liberis; utrùm voluntas D. imponat illis necessitatem.

CONCLUSIO.

**V**OLUNTAS D. non imponit necessitatem voluntati creatæ: quia voluntas D. concurrit tantùm cum humanâ, vel concursu generali ad actiones naturalis ordinis, vel concursu speciali gratiæ ad actiones supernaturales; sed neuter concursus necessitat voluntatem: ergo, &c. Ratio primi est, quia concursus generalis suavis est, non prædeterminans tempore aut causalitate; ergo non necessitat voluntatem. Ratio secundi petitur ex eo quòd gratia non exigat consensum necessariò; sed illum alliciat ita suaviter, ut non lædat voluntatem; imò ipsa voluntas potest semper assentiri vel dissentiri gratiæ; juxta Conc. Trid. sess. 6. cap. 5.

**CONFIRMATUR.** Quia voluntas D. non prius determinat voluntatem nostram ad consentiendum gratiæ, quàm voluntas nostra

prævideatur se determinatura ad illum consensum ; imò prius Deus scit nostram voluntatem se determinaturam ad aliquid faciendum , quàm ipsam determinet voluntas D. ex D. Anselm. in opusc. de concord. præsci-  
*tia cum libero arbitrio cap. 6. dicente, Præscita non eveniunt ea necessitate qua rem precedat ; sed qua sequatur :* ergo quando voluntas nostra vult aliquid , liberè vult : Si Deus enim determinaret futuritionem rerum , antequam voluntas humana seipsam determinaret ad illas res , determinaret antecedenter peccata & virtutes sine consensu nostro ; ergo esset author peccati ; & virtutes non essent meritoria , quia non essent liberæ.

OBJ 1. c. Quod Deus determinavit ab æterno , infallibiliter eveniet ; ergo necessariò eveniet , ergo determinatio , seu voluntas D. imponit necessitatem rebus. Resp. infallibiliter eveniet infallibilitate desumptâ ex infallibili determinatione creaturarum , concedo : desumptâ ex solâ determinatione D. voluntatis , nego : ergo necessariò eveniet ; nego consequentiam : quia taliter eveniet , qualiter creatura se determinatura est ad hoc ; sed sese determinabit liberè & contingenter ; ergo eveniet semper contingenter & liberè , sicque voluntas Dei non imponit necessitatem agentibus liberis.

## hii. QUESTIO XIV.

*Verum possit libertas humana conciliari cum  
immutabilitate Dei.*

CERTUM est voluntatem D. esse immutabilem, certum est etiam hominem liberum esse : certum est ergo, quod Deus ab æterno decreverit pœnitentiam Petri infallibiliter ; & certum est, quod illa pœnitentia sit libera in Petro : quomodo hæc possint simul stare, quasi negare videtur humana ratio ; sed aliter loquitur fides, unde assignatur

## CONCLUSIO.

LIBERTAS nostra conciliatur cum immutabilitate D. Quia decreta Dei non sunt absoluta, nec antecedunt determinationem nostræ voluntatis ; sed sunt conditionata, & eam consequuntur ; quoniam ergo decretum D. involvit nostrum & illud præsupponit ; tale est decretum Dei, quale est nostrum ; sed nostrum est liberum, liberè enim homo se determinat ad agendum ; ergo decretum Dei liberum est, & non imponit necessitatem nostræ voluntati. Verum est quidem, quod si Deus antecederet ad voluntatem Petri diceret, Volo quod Petrus neget Christum ; pro tunc decretum Dei imposeret necessitatem Petro ; sed quia Deus prævidit prius Petrum se determinaturum ad negandum Christum, quàm Deus determinaverit se

cum illo concurratur; idè talis negatio non obstante tali decreto, manet libera; quia Petrus se determinavit liberè, & sic libertas Petri compatitur cum decreto Dei & immutabilitate ejus.

Quomodo autem determinatio nostræ voluntatis includatur in divinâ: Hoc fit per scientiam quam Deus habet de futuris sub conditione, per quam cognoscit omnes inclinationes voluntatis, & quid factura esset si tali gratiâ vocaretur, & si in tali vel tali occasione existeret; videndo autem quid esset factura voluntas, si concurreret cum illâ, tunc decernit Deus concurrere cum eâ ad actiones naturales; vel supernaturales; concursu scilicet generali, vel speciali gratiæ, & sic tale decretum Dei involvit nostrum saltem prævisum. V. g. Deus videt primò voluntatem Petri indifferentem ad negandum, vel non negandum Christum. Secundò videt quid faceret Petrus, si decerneret concurrere cum illo, quando interrogabitur ab ancillâ inter milites. Tertiò cum ob suavitatem providentiæ teneatur concurrere cum creaturâ, quotiescumque videt illam velle in actum prorumpere, decernit concurrere cum Petro ad talem negationem. Quartò tandem Petrus se determinat ad negandum. Ex quo patet, quod decretum Dei includat determinationem nostram, quæ est in 2. instanti, & determinatio Dei est in 3. & sic decretum D. est aliquomodo posterius nostro, ordine causalitatis; & hoc ita fit, quia Deus voluit non cogere voluntatem nostram; idè illam non determinat, imò est potius voluntas nostra

quæ determinat divinam.

Obj. c. Si voluntas nostra libera maneat, non obstante decreto Dei, potest Petrus non negare Christum; ergo decretum Dei erit mutabile; ergo non conciliantur libertas nostra & immutabilitas D. Resp. dist. sequelam antecedentis, potest Petrus non negare Christum; in sensu diviso, concedo: in sensu composito, nego: hoc est, si consideretur voluntas Petri absolutè & in se; potest negare & non negare: si verò spectetur in quantum se determinabit ad negandum, non potest non negare: quia tunc negatio supponitur futura; & quod est futurum, infallibiliter eveniet, aliàs non esset futurum.

### QUESTIO ULTIMA.

*An Deus velit malum.*

**D**UPLEX est malum, nempe naturale, & morale. Malum naturale est corruptio rei, vel saltem ejus defectus, ut carere pede, digito, &c. & hoc malum est malum naturale absolutum: aliud autem est respectivum, quod est disconveniens alteri, licet sit bonum in se; sic aqua est malum ignis, sic etiam serpentes sunt quædam mala respectu hominum. Malum morale sumitur strictè, vel latè. Strictè pro carentiâ rectitudinis quæ deberet esse in actibus nostris; deberent enim omnes actus humani esse con-

formes rationi, & legi D. & quando deviant ab illa, dicuntur mali. Latè malum moris sumitur pro pœnâ quam infligit Deus homini propter sua peccata. Istud vocatur malum pœnæ, & illud malum culpæ. Nulla est difficultas de malo naturali quin Deus illud velit, si ve sit, absolutum, si ve respectivum. Nemo etiam de malo pœnæ dubitat; *Non est enim malum in civitate, quod non fecerit Dominus*, ut clamat Amos Propheta. Adde quòd, pestis, fames, morbi, mors, & ipse infernus agnoscunt Deum ut suum authorem; quippe qui hæc omnia fecit ob punitionem peccatorum; sed quæritur utrum Deus velit malum culpæ, seu peccatum.

## CONCLUSIO.

**D**eus non vult propriè malum culpæ; si vellet enim peccatum, esset author peccati, quod est contrarium prorsus Scripturæ; habetur enim Psal. 5. *Non habitabit juxta te malignus; neque Deus volens iniquitatem tuas.* Psal. etiam 44. *Dilexisti justitiam & odisti iniquitatem.* Abac. 1. *Mundi sunt oculi tui, ne videant malum, & ad iniquitatem respicere non poteris.* Adde quòd Deus punit peccatum: ergo signum est quòd illud non velit.

Objic. Deus permittit peccatum; ergo vult illud; permissio enim est signum voluntatis Dei, ut diximus: Resp. permittit, non formaliter; sed consequenter, ut utamur libero arbitrio, ex quo peccatum sequitur. Dices Deum indurare & obcecare corda. Rom. 5 & Esai. 19. Ergo vult peccata quæ sequuntur ad talem indurationem, Resp. cum Aug. indu-




*rare, non positivè ; sed negativè non infundendo malitiam , sed subtrahendo gratiam , efficacem, non communem*

O s j i c. Deus præcepit mala , jubendo Abrahæ ut immolaret filium ; contra præceptum , *non occides* : Hebræis , ut spoliarent Ægyptios , contra præceptum *non furaberis* : & Osee , ut haberet filios fornicationis ex meretrice. Resp. in his Deum dispensasse , & posita dispensatione , hæc omnia non fuisse amplius peccata , sed bona , quia erant conformia præcepto D. Quoad spoliationem Ægyptiorum , non fuit injusta ; quia propter obsequium quod illis præstiterant Judæi , potuerunt isti auferre illorum bona, invito dominis , & hoc justè , quia advenit autoritas supremi Domini , qui hoc jussit.

O s j i c. Deus concurrit ad peccatum ; ergo vult illud : Resp. Deum concurrere ad peccatum , materialiter ; hoc est , concurrere ad materiale peccati , seu ad actionem peccaminosam ; non concurrit tamen ad illam , ut est peccaminosa , & sic non concurrit ad formale peccati ; unde eadem actio est mala respectu hominis , quia prohibetur illi ; & bona respectu Dei , qui tenetur concurrere ad quamcumque actionem , sive sit mala , sive bona ; & sic Deus , sequendo regulam suæ voluntatis , benè agit ; homo verò faciens id quod à Deo prohibetur , perversè agit : unde occisio v. g. quæ est à Deo & ab homine , est bona & mala ; bona respectu causæ universalis , quæ tenetur concurrere cum causâ particulari ;

mala , respectu causæ singularis , cui homicidium prohibetur.

Objic. Genes. 45. dixit Joseph fratribus suis , *Non vestro consilio , sed Dei voluntate huc missus sum* : ergo voluntas D. decrevit venditionem Joseph , quæ fuit mala : Act. etiam. 4. *Pilatus & Herodes fecerunt adversus Iesum , quæ decrevit Deus* : ergo Deus voluit actionem Pilati , quæ fuit pessima. Resp. hæc omnia intelligi permissivè , non formaliter ; ita quòd Joseph venditus fuerit consilio Dei permittente solum , & non impediante : Pilatus etiam & Herodes fecerunt quæ decrevit Deus permittere. Deinde hæc mala possunt intelligi , vel sub ratione actionis , quatenus Pilatus , Herodes & fratres Joseph agebant ; & tunc permittebat Deus tantum illas actiones ; quia erant malæ : vel possunt spectari ut erant passionibus in Joseph & in Christo ; & illas decreverat Deus ; quia bonum erat , quòd uterque molestaretur. Si dicat Deus , se fecisse *impium addiæ malum* ; hoc est decrevisse punire impium. Si dicat de Pharaone , *excitavi te , ut faceres mala* ; hoc est , permisi te excitari à dæmone.



## APPENDIX

### *De Affectibus voluntatis D.*

**E**XAMINATIS accuratè majoribus difficultatibus quæ super voluntatem D. oriri

solent; superest ut brevi stylo, & per quæstionculas dicamus de affectibus ejusdem.

**QUÆRITUR** primò, utrum in Deo sit amor. Resp. affirmativè, Joan. 3. *Sic Deus dilexit mundum.* Ratio est; quia amare est velle bonum alicui; Deus autem, vult creaturis tum bonum naturale, nempe existentiam, tum morale, gratiam scilicet & gloriam: ergo, &c. Amor quem habet ad creaturas, vel est amor benevolentiae, quo fertur circa rationales, quas amat propter seipsas, & non propter alia; quòd si ab illis redametur, est amor amicitiae: vel est concupiscentiae, & isto amore fertur in irracionales quas amat propter rationales. Porro amor Dei est æqualis respectu actus, quia est indivisibilis; est autem inæqualis ex parte affectus; quia vult majus bonum ipsi quàm alteri.

**QUÆRES** an in Deo sit qdium. Resp. esse in Deo odium abominationis, quo abominatur peccatum, tanquam suæ bonitati contrarium, & salutis nostræ. Est etiam odium inimicitiae, quo ex displicentiâ personæ peccantis, vult illi malum inferre. Nec quis dicat, voluntatem non posse ferri in malum; hoc est enim, in malum diligendum; non detestandum: vel hoc est. verum de malo culpæ, non de malo poenæ. Dices, velle alicui malum, est contra charitatem. Hoc verum est, quando ratio volendi est injusta; quando autem Deus vult malum poenæ, est justâ, quia hoc sua exigit justitia.

**QUÆRES**, utrum in Deo sint gaudium & tristitia. Resp. esse gaudium seu delectatio-

hem : gaudium enim est affectus voluntatis circa bonum præsens : omnia autem bona sunt præsentia Deo ; imò ipse est summum bonum : ergo est in illo gaudium ; aliàs non esset perfectè beatus ; quia gaudium est proprietas resultans ex beatitudine. Resp. tristitiam non esse propriè in Deo , quia est affectus circa malum proprium præsens. Quòd si tristemur de malo proximi ; hoc est , quia apprehendimus illud tanquam proprium ; Deo autem nullum est malum proprium præsens , nec apprehendit nostrum ut suum ; ergo non est in illo tristitia propria. Potest tamen dici , quòd habeat quandam displicentiam mali quod committimus.

QUÆRES , utrum sint in Deo desiderium & fuga. Resp. neutrum esse in Deo ; quia desiderium tendit ad bonum futurum , quod desideratur ; & fuga respicit malum proprium quod fugimus : respectu autem Dei omne bonum est præsens , & nullum malum potest illi accidere ; & sic non est in illo desiderium aut fuga respectu sui , licet respectu nostri possit dici cum Chrysost. quòd nobis gloriam desideret , & damnationem detestetur.

QUÆRES , utrum in Deo sint spes & desperatio. Resp. non esse spem ; quia tendit circa ignota , vel circa bonum futurum , vel circa bonum cujus assecutio speratur ab alio ; hæc omnia autem non sunt in Deo , ergo nec spes respectu sui : potest tamen sperare nostram salutem. Resp. non esse desperationem ; quia fertur circa bonum absens,

quod obtinere non possumus ; vel circa malum quod repellere non valemus : Tamen respectu nostri , dici potest quòd Deus desperet de nostra salute ; sed hoc dicitur secundum nostrum intelligendi modum.

**QUÆRES** , utrum sint in Deo timor , audacia , & ira. Resp. non esse in Deo timorem ; quia est circa malum proprium futurum ; & si timeamus de malo proximi , hoc est , quia illud ut proprium apprehendimus. Non est etiam audacia ; quia fertur circa ardua , & nil est difficile Deo. Non est tandem ira , si sumatur juxta Arist. pro appetitu doloris vicissim inferendi adversario ; licet enim inferat dolorem peccatori , non potest tamen ab illo accipere : Si sumatur pro appetitu vindictæ , est aliquo modo ira in Deo.

**QUÆRES** , utrum in Deo sit justitia. Resp. 1. quòd justitia sit virtus inclinans voluntatem ad reddendum unicuique quod suum est. Alia est generalis , quæ versatur circa bonum commune , & est justitia boni civis : alia est specialis , quæ occupatur circa bonum particulare , & est justitia boni viri. Iustitia subdividitur in justitiam ad alterum simpliciter , quæ tendit in personam à se distinctam , ut quando judices puniunt reos : & in justitiam quasi ad alterum , quæ respicit seipsum , ut quando se castigat peccator propter sua crimina.

Resp. 2. ulterius dividi justitiam in commutativam & distributivam. Prior consistit in pactis , emptionibus , venditionibus , locationibus , permutationibus , &c. & in hac at-

tenditur æqualitas inter res & res , quæ vocatur proportio arithmetica , ut tantum reddatur quantum acceptum est. Secunda consistit in dispensatione præmiorum , & vocatur remunerativa ; vel pœnarum , & est punitiva , in hac autem servatur proportio geometrica , quæ respicit personas , & tantum dat de præmio vel de punitioe , quantum fuerit meritum , vel demeritum.

Resp. 3. si justitia sumatur pro rectitudine voluntatis exequentis quod sibi bonum videtur , justitia est in Deo : habet enim voluntatem summè rectam , & quæ est prima regula rectitudinis ; unde ait Anselmus : *justum est quod vis , non justum quod non vis*. Si sumatur justitia pro rectitudine voluntatis exequentis quod præcipitur per legem , non est justitia in Deo ; quia nulla est lex , quam Deus teneatur observare. Non est ergo justitia generalis in Deo , quâ teneatur reddere Communitati aliquid quod illi debeatur ex necessitate legis , sed tantum quod vult illi dare.

Resp. 4 non est in Deo justitia ad alterum , quia est reddere alteri jus suum ; sed nullus habet jus in Deum ; jus enim in uno , supponit debitum in altero : unde dicit Anselmus , *justus es Domine , non quia reddis , debitum ; sed quia facis quod te decet*. Quod si Paulus vocat coronam gloriæ , coronam justitiæ ; vocat illam sic , quia debebatur ex fidelitate , Deus enim promisit gloriam laborantibus. Quod si dicatur , remunerationem deberi virtuti : hoc est , ex honestate & decentiâ , non ex jure stricto.

Resp. 5. quòd sit in Deo justitia ad seipsum, quasi ad alterum; quia voluntas D. inclinatur ad volendum alteri illud omne quòd decet suam bonitatem, vel suam justitiam; ut quando Deus parcat peccatoribus, & reprobos punit, in hoc est justus; non quòd illorum meritis aliquid debeat, sed quia hoc debet suæ bonitati aut justitiæ. Hæc autem justitia dicitur ad seipsum, quia respicit perfectiones suas; & dicitur ad alterum, quia propter illas punit malos, vel ignoscit illis.

Rep. 6. non esse in Deo justitiam commutativam strictè sumptam; ad illam enim requiritur æqualitas inter datum & acceptum; Deus autem nihil accipit à creaturâ; etiamsi in honorem illius dicantur fieri actiones creaturæ; unde dicitur Job. 22. *Quid prodest Deo, si justus fueris, aut quid ei confert, si immaculata fuerit vita tua?* Deus ergo nil debet creaturæ quidquid faciat ipsa; omnes enim actiones nostræ debentur Deo, titulo gratitudinis; quia scilicet Deus nos creavit, & conservat quotidie: unde si gloria dicatur nobis deberi, hoc non est ex justitiâ propriâ, sed ex fidelitate, in quantum illam Deus promisit operibus nostris.

Resp. 7. non esse in Deo justitiam distributivam; qui habet enim illam, tenetur reddere præmium æquale æquali merito; & non præferre unum alteri; in hoc enim consistit personarum acceptio, qui est defectus contrà justitiam: at Deus potest dare, si velit, majorem gloriam minori merito; commu-  
niter

niter etiam dat majores gratias uni, quàm alteri; unde habetur Math. 20. *Volo dare huic novissimo sicut & tibi, non facio tibi injuriam, tolle quod tuum est; ergo non est justitia distributiva in Deo.*


QUÆRES, utrùm sit in Deo misericordia. Resp. si misericordia sumatur pro compassione, seu pro motu appetitus sensitivi inclinante ad sublevationem miseriæ alterius, non est in Deo; in eo enim non est appetitus sensitivus; & hoc est quod dicunt, materiale misericordiz non esse in Deo. Si sumatur verò pro sublevatione miseriæ alienæ, quæ sit, vel præservando, vel liberando; in Deo reperitur: Ps. enim 144. habetur, *Miserationes eius super omnia opera eius*; unde Ecclesia canit, *Deus cui proprium est misereri*. Illa autem misericordia patet manifestè in operibus ejus; unde dicunt Patres, quòd Deus remuneret supra condignum, cum ejus præmium superet merita nostra, juxta D. Paulum, *Non sunt condigna passiones huius temporis ad futuram gloriam*. Dicunt etiam, quòd puniat citra condignum, & minùs quàm nostra peccata exigant. Tandem asserunt Deum justificare contra condignum; quia dum peccavit homo, indignus est veniæ quam Deus illi tribuit, impertiendo gratias quibus adjutus veniam meretur.

QUÆRES, quomodo possit Deus præmiare supra condignum, & non ire contra justitiam? quomodo etiam dicatur misericordiam Dei videri in omnibus: attamen Jacobus cap. 2. dicat quòd *iudicium fiet sine misericordiâ es, qui non fecerit misericordiam*. Dico ad primum,





In presenti agere tantum intendimus de Providentia, Prædestinatione, & Reprobatione, quamlibet aliarum ad suum proprium locum remittentes.



## DISPVATIO PRIMA.

### De Providentiâ Divinâ.

**C**REATURÆ prius debent considerari in ordine ad finem naturalem, quam in ordine ad supernaturalem; unde prius nobis est agendum de Providentia, quæ finem naturalem respicit; quàm de Prædestinatione, quæ ad finem supernaturalem ordinat.

QUÆSTIO PRIMA.

*An sit in Deo Providentia.*

**N**ON defuerunt qui de providentia D. male sentirent; præter enim illos, qui Deum negando, negabant. Providentiam, fuerunt & alii, qui omnia necessariò evenire putantes, Providentiam ut superfluum rejiciebant; alii verò ipsam quidem asseverabant, non tamen extendi ad sublunaria volebant.

### CONCLUSIO.

**E**ST in Deo Providentia rerum omnium.  
Sap. 6. *Cura est illi aqualiter de omnibus:*  
cap. 8. *Attingit à fine usque ad finem fortiter, &*  
*disponit omnia suaviter.* Ratio est, quia si no

K ij

esset in Deo providentia rerum omnium, non esset in Deo summa Sapientia, summa Bonitas, nec summa potentia: Si enim non gubernaret omnia; vel esset, quia nesciret modum ordinandi creaturas in suos fines, & sic non esset sapientia infinita in eo: vel quia cognoscendo res omnes, & quæ illis sunt necessaria, earum curam habere non vellet; & sic non esset in eo summa bonitas: vel tandem quia, suppositâ scientiâ & bonitate, non posset rebus ipsis necessaria impendere, nec eas ad suos perducere fines, & sic non esset in eo summa potentia: ergo, cum Deus sit infinitè sapiens, bonus & potens, debet habere providentiam rerum omnium etiam minutissimarum; est enim eadem ratio pro minutissimis, ac pro nobilissimis partibus universi: unde dicit Damasc. *Non decet alium esse factorem, & alium provisorem.*

Objic. Vilesceret intellectus D. si ad vilissima attenderet. Negatur. Providentia D. enim non est ut nostra, quæ cum in dispositione minutissimorum occupatur, à majorum curâ distrahitur, ob finitatem scilicet quæ est in intellectu & in voluntate nostrâ: cum autem Deus, ob infinitatem utriusque, omnia unico actu intelligat ac velit, non distrahitur ab uno per aliud; & sic non vilescit. Dices, Nonne justorum adversitas, & perditorum prosperitas providentiæ D. derogare videntur? Non sanè; hæc omnia enim fiunt propter rationes occultas, quæ tamen sunt justissimæ, inquiunt Patres.

Objic. 2. ex Hieronymo qui cap. 1. in Abacuc dicit, *Indignum Deo videtur, ut sciat*

*per singula momenta quot nascentur pulices, quot-  
ve moriantur.* Resp. quòd sicut non fuit indi-  
gnum illos creare, sic nec est indignum il-  
los administrare: sed per hoc vult dicere Hie-  
ron. quòd Deus non sciat hoc successivè, quasi  
singulis momentis scire incipiat, quot nascan-  
tur pulices; vel intelligendus est comparativè,  
quòd non habeat tantam curam de pulicibus,  
ac de creaturâ intellectuâli. Si quis dicat; De-  
beret ergo Deus impedire peccata: Negatur,  
imò suavitas providentiæ exigit ut relinquat  
agentia libera agere liberè.

---

## Q U Æ S T I O II.

*An Providentia sit actus intellectus,  
aut voluntatis.*

**A**B existentia Providentiæ procedendum est  
ad ejus definitionem: unde, dico, quod  
sit actus Dei ad extrâ, quo mundum gubernat,  
cunctasque ejus partes per media convenientia  
in suos fines dirigit. Tres potissimum actus  
reperiuntur in illâ; scilicet conservatio, con-  
cursus generalis, & directio uniuscujusque rei  
in suum finem. Creatio autem non est actus  
Providentiæ, quia præsupponitur ad illam; res  
enim priùs debet existere quàm dirigatur ad  
finem: quoad consilia verò, admonitiones, ex-  
hortationes, præcepta, prohibitiones, præ-  
mia, & punitiones, hæc omnia spectant ad  
providentiam specialem, nempe ad prædesti-  
nationem. Superest videndum, an sit actus

intellectus, vel voluntatis. Thomistæ attribuunt illam intellectui, dicentes, esse iudicium intellectus dictans voluntati, quid debeat agere, ut creaturæ dirigantur in fines suos: Scotistæ illam ad voluntatem referunt; ita quòd providentia sit actus voluntatis, quo Deus velit dirigere creaturas per talia media; non negant tamen iudicium intellectus præsupponi ad providentiam; quia nihil volitum, nisi præcognitum.

## CONCLUSIO.

**P**ROVIDENTIA est actus voluntatis D. formaliter, antecedenter tamen & præsuppositivè est actus intellectus. Pars prima patet ex differentia, quæ est inter prævidere, & providere; prævidere enim est, cognoscere quibus mediis res fines suos attingere possint; providere verò est, procurare media quibus finis obtineatur: hoc autem pertinet ad voluntatem, sicut illud ad intellectum. Deinde Providentia est efficax rerum ordinatio in suos fines; sed ordinare pertinet ad voluntatem: ergo Providentia est actus voluntatis formaliter: Antecedenter tamen est actus intellectus; quia antequam concipiamus Deum dirigere res in suos fines per talia media, debet cognoscere illas res, illatum fines, & illa media; & sic præsupponitur actus intellectus.

**O B J E C T.** Providentia est pars prudentiæ, & prudentia spectat ad intellectum. **Dist.** Est pars prudentiæ; si sumatur antecedenter, concedo: si sumatur formaliter, nego. Dicitur, inquam, pars prudentiæ, quia actus intellectus, qui est prudentia, antecedit, & conce-

mitatur providentiam; non tamen quòd sit prudentia formaliter. Si dicatur, prædestinatio est actus intellectus: ergo & providentia, cujus est pars. Resp. prædestinatio est actus intellectus; si sumatur antecedenter pro prævisione mediorum ad gloriam conducentium, conc. si sumatur pro ordinatione illorum mediorum, vel pro decreto quo Deus statuit ab æterno dare gloriam, nego.

---

### Q U A S T I O I I I.

*Vtrum Providentia semper assequatur suum finem in creaturis.*

**D** VOS effectus potest habere providentia. D. unum primum, qui est applicatio mediorum: alium secundum, qui est assecutio finis per talia media. v. g. Deus ab æterno decrevit conducere Petrum ad gloriam per tales gratias; talis collatio gratiæ est primis effectus; consecutio verò gloriæ, quam obtinet Petrus, benè utendo illis gratiis, est effectus secundus remotus.

#### C O N C L U S I O.

**P** R O V I D E N T I A semper assequitur finem suum proximum; non semper remotum. Ratio primi est; quia Deus in tempore confert infallibiliter media, quæ decrevit ab æterno conferre; aliàs esset mutabilis: ergo nunquam caret Providentia suo effectu primario. Cæterum tamen sæpius secundario; quia licet voluntate, efficaci Deus velit nobis dare media ad salu-

tem, & det reverâ, velitque nostram salutem efficaciter; quia tamen resistimus gratiæ, idè non semper Providentia habet effectum secundarium.

Objic. Ergo Deus fallitur in suâ Providentiâ, si non habeat suum effectum: Negatur; non fallitur enim in primario effectû, quia illum semper habet; nec in secundo, quia non vult salutem hominum nisi dependenter à voluntate humana: Vnde, quia ab æterno cognovit quòd voluntas resisteret gratiæ, idè non decepta fuit Providentia.

---

#### Q U Æ S T I O I V.

*An res casuales & fortuita cadant sub objecto Divina Providentia.*

**P**OST QUAM vidimus an sit, & quid sit Providentia; cujusnam potentix sit actus, & an semper habeat suum finem; quæstiones cæteræ erunt de objecto ipsius.

#### C O N C L U S I O.

**E**A, quæ eveniunt casu & fortuitò respectu nostri, cadunt sub objecto providentiæ D. respectu cujus nihil est casuale & fortuitum. Illud enim dicitur fortuitum respectu nostri, quòd evenit præter intentionem agentis; nihil autem evenit in rerum natura præter intentionem Dei: Omnia enim cognoscit; imò est ipse, qui ducit aliquando hominem ut fodiat in loco, ubi est thesaurus, qui dicitur fortuitus respectu nostri, non Dei: est etiam ipse,

qui causas contrarias applicat, quibus aliquando quædam impediuntur; unde contingit nasci monstra: ergo respectu Dei nihil fortuitum.

**O B J E C T.** Peccatum advenit præter intentionem Dei, aliàs Deus ipsum intenderet & vellet: ergo aliquid evenit præter Dei intentionem, quòd est contrà id quod diximus. Resp. peccatum nec esse casuale, nec fortuitum, respectu Dei, nec etiam evenire præter intentionem ejus; nam ibi nomine intentionis, intelligitur prævisio: quoniam ergo Deus prævidit peccatum, idè non est præter intentionem Dei; licet sit præter ejus decretum, quia Deus non decernit peccatum, nisi consequenter ad decretum hominum.

---

### Q U A S T I O V.

*Verùm peccato subsint Divina providentia;*

**S**I Deus de mundo & de aliis rebus quæ sunt in eo, provideret, (inquiunt aliqui) profecto impediret tot scelera quæ insolenter perpetrantur ab hominibus; & sic dicunt providentiam ad peccatum non se extendere: Nos autem qui eam universalem sustinemus, respondebimus aliter.

#### C O N C L U S I O.

**P**ECCATA subsunt providentiæ D. Deus enim prohibet ea, ipsas punitionem infligit, & cum facta sunt ipso permittente, ea ordinat ad bonum finem; & sic permissio peccati non destruit, imò astruit providentiam



D. idè enim permittit peccata, ut det occasionem hominibus superandi tentationes cum gratia, & proinde merendi. Secundò, ut non insolescant illi, qui putant se stare. Tertiò, ut misericordia divina pateat in remissione peccatorum; vel iustitia in punitione.

OBJIC. Si peccata subessent providentiæ D. Deus illa vellet, quod est absurdum. Resp. aliquid subesse dupliciter D. providentiæ, vel tanquam effectum, vel tanquam materiam. Effectus providentiæ D. sunt fines à Deo intenti, vel sunt media, quæ præparata ad finem obtinendum: Materia verò est id, ex quo facto per permissionem D. Deus elicit aliquod bonum; quo posito. Resp. Si peccata subessent providentiæ, Deus illa vellet. Dist. si subessent ut effectus, conc si subessent ut materia nego. Peccata ergo subsunt providentiæ non tanquam effectus, quia non sunt à Deo positivè intenti, sed tanquam materia; quia posito quòd fiant per libertatem hominis, Deus permittit illa, ut inde eveniant bona.

---

### QUESTIO ULTIMA.

*An actiones libera subsint Providentiæ D.*

**V**IDETUR quòd actiones liberæ non possint cadere sub objecto providentiæ; quia actiones bonæ non essent meritoriae, nec malæ demeritoriae, nam si caderent sub providentiâ, ab eâ determinarentur, & sic non essent liberæ, nec malæ; quia non possent vitari. Sed hæc

difficultas solvitur ex his quæ diximus, immutabilitatem voluntatis D. non imponere necessitatem humanæ voluntati.

## CONCLUSIO.

**A**CTIONES liberæ sunt sub objecto providentiæ D. vel tanquàm materia, vel tanquàm effectus: si enim sunt bonæ, sunt volente Deo, & sic sunt effectus providentiæ; si malæ, sunt Deo permittente, & sic sunt materia ejus. Vnde August. in cap. 2. 1. Timoth. dicit: *Nulla creatura est, sive qua manet in charitate, dans gloriam Deo, sine qua in veritate non stetit, quærens gloriam suam, quæ, velit, nolit, non serviat D. providentiæ*: sive ergo malè vivamus, sive benè, utrumque respicit Deus per providentiā; illud, ut deputet ad pœnas, istud, ut ordinet ad præmia.

Objic. Providentiā extenditur tantum ad ea, ad quæ se extendit creatio; quia providentiā, est directio creaturarum ad finem; sed creatio non se extendit ad peccata: ergo peccata non subsunt providentiæ D. Resp. negando majorem; quia creatio, cum sit actio productiva, se extendit tantum ad res positivas; providentiā verò, cum sit actio ordinativa, non respicit tantum quod fieri potest; sed etiam fertur circa defectus, quos permittit, vel prohibet, vel punit, vel ordinat ad aliud,



\*\*\*:\*\*\*:\*\*\*:\*\*\*:\*\*\*:\*\*\*:\*\*\*:\*\*\*:\*\*\*:\*\*\*

## DISPUTATIO SECUNDA.

*De prædestinatione.*

**P**ROVIDENTIA distinguitur per res ad quas tendit. Si respiciat res naturalis ordinis, dicitur Providentia simpliciter; si vero respiciat res supernaturales, ut salutem hominum ac Angelorum, tunc est Providentia specialis, seu Prædestinatio. Quia ergo prædestinatio est pars providentiæ; ideo jure prædestinationem providentiæ subjungimus.

---

## QVÆSTIO PRIMA.

*Quid sit prædestinatio secundum nomen f*

**I**N quacumque re distinguendum est, quid sit secundum nomen, & quid sit secundum rem. Petere, quid sit res secundum nomen, est petere etymologiam nominis; petere, quid sit secundum rem, est petere definitionem, seu explicationem naturæ ejus.

## CONCLUSIO.

**P**RÆDESTINATIO secundum etymologiam, ortum habet ex particulâ, præ, & verbo, destino: verbum autem, destinare est idem ac statuere; ita quod prædestinatio sit statutum, vel decretum conferendi gloriam. Quoad particulam, prædicat antecess-

sionem æternitatis ad tempus; itaut prædestinatio nihil aliud sit, quam æterna destinatio, quæ tempus omne antecedit; & prædestinati illi dicuntur, qui ante mundi constitutionem à Deo electi sunt, & destinati ad gratiam & gloriam.

O B J E C T. Si particula, præ, diceret antecessionem æternitatis ad tempus, aliquid esset futurum respectu Dei. Resp. quod in rigore sermonis non sit *ante*, nec *post* in Deo; nec consequenter prædestinatio rigorosè sumpta, quia reverà esset quid futurum in Deo; sed illud, præ debet accipi secundum nostrum intelligendi modum; concipimus enim prædestinationem tanquam quid præteritum, respectu cujus datur aliquid futurum; tamen à parte rei nec est in Deo præteritum, nec respectu ejus est aliquid futurum.

## Q U A S T I O II.

*Quid sit Prædestinatio secundum rem?*

P R A E D E S T I N A T I O sumitur à Patribus vel late, pro æterna electione, sive ad vitam, sive ad mortem: Sic Augustinus, Prosper, Fulgentius, & Concil. Valentinum quod dicit. *Confitemur prædestinationem iustorum ad vitam, & impiorum ad mortem*; & sic reprobi possunt dici prædestinati. Vel strictè, pro æterna destinatione ad gloriam duntaxat; sic communiter usurpatur.

## CONCLUSIO.

**P**RÆDESTINATIO est electio creaturæ rationalis ad gloriam principaliter, & ad alia in ordine ad gloriam. Dicitur primò, electio; quia ut dicemus, est actus voluntatis: Dicitur secundò, creaturæ; & sic personæ D. non rectè dicuntur prædestinatae quia gloria competit illis necessariò; & qui prædestinantur, pendent ex liberâ Dei voluntate: Dicitur tertio, intellectualis; & sic res non intellectuales, quæ carent potentiis quibus assequantur beatitudinem, intellectu scilicet & voluntate, non possunt prædestinari. Additur quartò, ad gloriam principaliter; quia id quod intenditur principaliter à Deo prædestinante, est gloria concedenda creaturis. Tandem subjungitur, & ad alia in ordine ad gloriam; id est ad bonam indolem v. g. ad instructionem, & ad gratias, quæ omnia sunt media ad gloriam consequendam.

---

## QUESTIO III.

*An Prædestinatio sit actus voluntatis.*

**P**ER hoc quod diximus providentiam esse actum voluntatis, sequitur quòd prædestinatio quæ est pars providentiæ, sit etiam actus voluntatis; ordo tamen postulat ut præcisè hic de prædestinatione loquamur.

## CONCLUSIO.

**P**RÆDESTINATIO est actus voluntatis. Sic Paulus Ephes. 1. *Prædestinati sumus secundum consilium voluntatis sue*. Ratio hujus est eadem ac ratio providentiæ : sicut enim providere est decernere media ad finem naturalem conducentia ; sic etiam prædestinare est præparare media supernaturalia , quæ ad gloriam conducunt. Prædestinatio ergo est actus voluntatis , liber & contingens , quoniam D. O. fuit liberum prædestinare & non prædestinare ; & illud præ alio eligere : unde Augustinus libro de prædest. Sanct. c. 15. vocat prædestinationem ; opus maximum gratiæ & libertatis. Quod si definiatur prædestinatio per præscientiam ; hoc debet intelligi antecedenter & præsuppositivè , non formaliter , ut diximus de providentiâ.

## QUESTIO IV.

*An Prædestinatio sit æterna ?*

**S**I prædestinatio sit æterna , volunt inferre adversarii , quod posita prædestinatione , non simus amplius liberi : si enim ab æterno Deus prædestinavit Petrum , quidquid faciat Petrus , prædestinabitur. Hæc argumentatio esset legitima , si Deus prædestinaret antecedenter ad meritum nostrorum prævisionem ; sed quia prædestinat tantum includendo decretum nostrum de bonis operibus , consequenter prædestinatio Dei non imponit necessitatem

rebus ; unde diximus agendo de voluntate Dei quòd immutabilitas voluntatis D. optimè cum libertate nostrâ conciliatur.

## CONCLUSIO.

**P**RÆDESTINATIO, seu electio ad gloriam, est æterna. Matth. 25. *Venite benedicti patris mei, possidete regnum vobis paratum, à constitutione mundi.* Ad Ephes. 1. *Elegit nos in ipso, ante mundi constitutionem.* Ratio est ; quia prædestinatio est actus immanens voluntatis D. omnes autem actus immanentes sunt ab æterno ; ut cognitio, quam Deus habet de creaturis, & decreta divina, quale est prædestinatio. Quia ergo prædestinatio est æterna, idè non transit in præteritum ; licet enim dicatur : ab æterno Deus prædestinavit Petrum, verum est adhuc dicere, Deus actualiter & nunc prædestinat Petrum.

O B J E C. ex ad Rom. 8. *Quos prædestinavit, hos & vocavit ; & quos vocavit, hos & iustificavit ; quos tandem iustificavit, hos & glorificavit ;* sed Deus vocat, justificat, & glorificat in tempore ; ergo prædestinat etiam in tempore. Negatur consequentia : vocatio enim, iustificatio, & glorificatio sunt actus transeuntes ; & sic sunt in tempore : prædestinatio verò est actus immanens, & sic est æternus ; voluit enim Deus ab æterno, quod vult in tempore ; ut diximus cap. de immutabilitate D.

## QUÆSTIO V.

*Quinam fuit error Pelagii circa Prædestinationem!*

**M**AXIME controversum est, an prædestinatio fiat ante prævisionem meritorum, vel post: quia autem ratione hujus quæst. plures ortæ sunt hæreses, illas recensere justum est, incipiendo scilicet à Pelagianis.

## CONCLUSIO.

**P**ELAGIUS assererat prædestinationem fieri ex prævisis meritis solius liberi arbitrii sine gratia; ita quòd mens ipsius fuerit, quòd Deus creaverit hominem liberum ad bonè vel malè operandum ex suâ naturâ; & quod postea prædestinaverit ad gloriam, quos prævidit bonè operaturos per liberum arbitrium: eos verò reprobaverit, quos prævidit malè operaturos: Vnde Pelagius dicebat, hominem nullam aliam gratiam exigere, quàm creationem & prædicationem Evangelii; ita ut modo existeret, & audiret Evangelium; posset exequi, si vellet, quæcumque sunt ad salutem necessaria. Hæc hæresis facilè refellitur ex Script. statuente salutem nostram in Deum omninò refulgentem: in eâ enim habetur, *Cui vult miseretur; & quem vult, indurat*: Et alibi: *Non est currentis, neque volentis, sed Dei miserationis* Et rursus, *sine me nihil potestis facere*. Ratio hujus rei est, quia sicut non possumus producere ullas actiones naturalis ordinis sine generali concurre-



fu Dei , secundum Paulum , *Operatur omnia in omnibus* ; sic etiam nullas possumus elicere actiones supernaturales , quæ tendant ad gloriam , sine concursu speciali gratiæ.

---

## QUESTIO VI.

*Quinam fuit error Semipelagianorum.*

**D**A M N A T O Pelagio in Conciliis Carthag. Milevit. & Arauf. aliquot post annis , in Urbe Massiliensi & aliis Galliæ partibus , in Gratiâ insurrexerunt Presbyteri Massilienses , quorum dux erat Cassianus : Ii autem fatebantur contra Pelagium & Cœlestium , non sufficere beneficium creationis & prædicationis ad beatitudinem obtinendam ; sed adhuc necessariam esse gratiam , & internas inspirationes ; & in hoc non errabant : sed eorum hæresis erat , quodd dicerent , salutis initia esse à nobis ; itaut sine gratiâ per solas naturæ vires possemus ita incipere , & conari benè agere , ut gratiam iustificantem mereremur : sub hoc fundamento malè de prædestinatione sentiebant , & eorum opinionem referet

### CONCLUSIO.

**S**EMIPELAGIANI volebant Deum prædestinare ex prævisione meritorum cum gratiâ , quæ gratia dabatur conatibus naturæ. Hæc opinio erronea est ; quia supponit merita initium habere à solâ voluntate , quod est contra Script. habetur enim 2. ad Corinth. 3. *Non sumus sufficientes ex nobis cogitare aliquid , tan-*

*quam ex nobis. 1. etiam 4. Quid habes, quod, non accepisti? Ergo non habemus ex nobis salutis nostræ initium. Unde Concilium Arausicum 2. Can. 6. habet, Si quis sine gratiâ Dei credentibus, volentibus, desiderantibus, & pulsantibus, dixerit misericordiam conferri; non autem faterur, divinitus fieri, ut accedamus, anathema sit; ex hoc ergo Concilio initium meriti non est à nobis, ac proinde malè Semipelagiani sentiunt prædestinationem fieri ex præviis meritis, quorum initium sit à nobis, & consummatio à gratiâ.*

---

## Q U Æ S T I O VII.

*Quinam fuit error Calvini.*

**P**OSTQUAM diximus de Pelagio nimis insolenti fautore liberi arbitrii, & gratiæ hoste infensissimo, qui natus est in Angliâ eodem die ac anno, quo Augustinus natus est in Africâ, qui ipsi Pelagio adversatus est; postquam etiam refutavimus Semipelagianos, damnatos specialiter per Cœlestinum Papam; nunc ad Calvinum transeundum est, qui pessimè etiam sensit de prædestinatione.

### C O N C L U S I O.

**C**ALVINUS totam prædestinationis causam refundit in absolutum Dei decretum; asserens Deum, ratione summi dominii, ante prævisionem cujuscunque peccati & boni operis aliquos destinasse ad gloriam, alios verò ad poenam æternam. Quoad 1. partem non est

hæreticus ; multi enim sentiunt quòd Deus, sine prævisione meritorum , voluerit dare aliquibus gloriam. Quoad secundam , damnatur à Scriptura Ezechielis 18. *Numquid voluntatis mea est mors impii ?* Ipse autem refutabitur à nobis agendo de reprobatione. In præsentì tantùm dicam , Calvinum asserere quòd Deus ita se gerat circa prædestinatos. Primò , largitur illis fidem justificantem , quam amittere non possunt , 3. Instit. cap. 24. Secundò , dat illis gratiam actualem , quæ libertatem arbitrii tollit , lib. 2. Instit. cap. 3. Tertio , peccata prædestinatorum quantumvis gravia eis non imputat , 3. Instit. cap. 4. Neque sanat per justitiam inhærentem quam negat dari , sed ea tegit per justitiam , quam vocat imputativam , quæ est in Christo solo , & imputatur prædestinatis : Et sic , secundùm illum , prædestinati sunt in cœlo cum omni- bus suis peccatis. Quoad reprobos ; dicit Deum ita se gerere. Primò negat illis fidem & omnem gratiam , lib. 3. Instit. cap. 11. Secundò , impellit & necessitat ad peccandum , 1. Instit. 18. Tertio , quando illos vocat , eos decipit & illudit , & in æterna supplicia illufos præcipitat , 1. Instit. 18. ubi ait , *homo iusto Dei impulsus agit quod sibi non lacer.*

Quo ad Origenem lib. 1. *περί ἀρχῶν*, cap. 8. dicit , prædestinationem fieri ex prævisis meritis animarum , quæ secundùm ipsum creatæ fuerunt ante corpora ; & reprobationem ex prævisis demeritis earundem. Iste error fuit damnatus in Conc. Lateranensi. Sess. 8.

Tandem , quoad opiniones Catholicorum,

duæ sunt, quarum neutra est contra fidem. Alii sentiunt prædestinationem fieri ante prævisionem meritorum: alii ex prævisione meritorum, non solius liberi arbitrii, ut voluit Pelagius; sed liberi arbitrii cum gratiâ. Omnes tamen in hoc conveniunt, quod reprobatio fiat semper non ex absoluto Dei decreto, ut voluit Calvinus, sed ex prævisione peccati, vel originalis, vel actualis, vel utriusque. Quænam sit mens nostra de prædestinatione, mox dicetur.

---

### QUESTIO VIII.

*An Prædestinatio fiat ex prævisis meritis.*

**P**RÆDESTINATIO, quæ est actus voluntatis D. potest sumi vel formaliter, ut est actus vitalis ipsiusmet voluntatis, & pro tunc nullam agnoscit causam sui; vel terminativè, prout terminatur ad Petrum prædestinatum, porius quàm ad Judam: Et quærimus, utrùm prævisio meritorum Petri sit causa talis terminationis: vel utrum Deus sine prævisione meritorum, absolute decreverit suam voluntatem prædestinantem terminari ad Petrum. Doctor subtilis ultimum sustinet, liberum tamen relinquit contrarium sentire in primum sent. d. 14. q. unicâ, §. 1. istorum, in fine, ubi dicit; *Ne scrutando de profundo eatur in profundum, secundum dictum magistri, eligatur quæ melior censebitur, dummodò servetur libertas nostra sine aliquâ iniustitiâ.* Quoniam ergo opinio de prædestinatione ex prævisis meritis non tollit li-

bertatem, nec ulli facit injustitiam, imò potius excitat ad benè agendum, idèd à nobis tenetur

## CONCLUSIO.

**P**RÆDESTINATIO fit ex prævisis meritis gratiæ. Probatur ex autoritate Scripturæ, Patrum testimonio, & multis rationibus.

Probatur 1. Autoritate S. Script. Matth. 25. *Venite benedicti patris mei, possidete regnum vobis paratum à constitutione mundi; esurivi enim, & dedistis mihi manducare.* Quibus verbis insinuat, regnum cœlorum ab æterno paratum esse ob prævisa merita, ut patet ex particula causali, *enim*, quæ denotat hoc opus misericordiæ esse causam, cur Deus regnum cœlorum paraverit justis. Deinde reprobis ibidem dicit, *Ite maledicti, &c. Esurivi enim, &c.* Ita ergo ratiocinandum est de prædestinatis, ac de reprobis, quoniam de utrisque eodem modo loquitur Christus: sed reprobi reprobantur ob demerita: ergo justi prædestinantur ob merita. Esaiæ etiam 64. habetur, *oculus non vidit, quæ præparavit Deus diligentibus se*; ubi per ultima verba, causam præparationis indicat; ita quòd dilectio sit causa, quare Deus gloriam præparaverit. Ad has & similes autoritates respondent communiter adversarii; Deum in tempore dare gloriam meritis, antecederet tamen decrevisse dare eam sine illis ab æterno: & hoc est, quod dicunt; prædestinationem fieri ex meritis, secundum executionem; non secundum intentionem. Sed hæc responsio gratis fingitur; res enim ita eveniunt in tempore sicut Deus decrevit eas ab æterno; si ergo dat glo-

riam meritis in tempore, ab æterno illam præparavit meritis, aliàs mutaretur.

Probatur 2. ex Patribus, Chrysost. qui Hom. 8. in Matth. explicans illud, *Venite benedicti*, ait, *Antequam nati essetis, quia præsciebam vos tales esse futuros, hac vobis à me parati sunt.* Ambrosio 5. de fide cap. 3. ubi habet, *Non ante prædestinavit Deus, quàm præsciret; sed quorum præscivit merita, horum & prædestinavit premia.* Hieronym. Ep. ad Hedibiam, quæst. 20. *Vasa misericordiae quæ præparavit in gloriam; non irrationaliter servat, sed causis præcedentibus.* Prospero, lib. de Vocat. gentium c. 35. *frustrà dicitur, ratio operandi non est in electis; quoniam ad hoc operantur, ut elegantur: Ex quo intelligit, opera conferre ad divinam electionem.* Augustino l. 1. quæstionum ad Simpl. quæst. 2. *Si non esset, inquit, electio, non essent electi, electio autem non præcedit iustificationem, sed electionem iustificatio; nemo enim eligitur, nisi iam distans ab eo qui rejicitur: Cùm autem dicat, quòd iustificatio præcedat electionem; hoc est dicere, electionem fieri propter iustificationem prævisam: Cùm etiam ait, nemo eligitur, nisi iam distet ab eo qui rejicitur; hoc est asserere, quòd ille qui eligitur, eligatur propter prævisa merita, quia non distat ab eo qui rejicitur, nisi quia Deus prævidet merita in electo, & demerita in rejecto. Nec respondeant adversarii, Augustinum retractasse hanc sententiam, quam junior scripserat; lib. enim de Prædest. Sanctorum cap. 4. disputans adversus Semipelagianos, eos remittit ad hanc quæstionem; quod signum est, Augustinum, doctrinam in*

câ traditam non revocasse.

Probatur 3. prinâ ratione. Si Deus prædestinaret ante merita, reprobareret etiam ante demerita, quod injustum est. Respondent adversarii, Deum reprobare ante demerita negativè, non verò positivè: hoc est, Deus cum prædestinat electos ante prævisa merita, non prædestinat reprobos; & sic aiunt, Deum reprobare negativè ante prævisa demerita, idest, non prædestinare: nolunt tamen quòd Deus reprobet positivè, nec eos condemnet ad poenas æternas, nisi post prævisa demerita. Sed contra eos dico; si prædestinaret ante prævisa merita, reprobareret etiam positivè ante prævisa demerita; quod patet hoc exemplo. Electio salvandorum se habet sicut electio lapidum ex quibus domus construitur; sed architectus qui ex pluribus lapidibus aliquos tantùm accipit sufficientes suo ædificio, & ipsos signat; hoc faciendo, alios positivè rejicit; quia non possunt inservire domui fabricandæ, si architectus illos non seligat: A pari, Deus volens certum numerum hominum salvare; si aliquos tantùm accipiat, quos signet caractere prædestinationis; alios certè, quasi positivè rejicit; quia scilicet non possunt salvari, nisi sint electi; & sic non eligi, est reprobari positivè.

Probatur 2. Ratione. Electio ante prævisa merita non videtur satis conveniens bonitati & justitiæ divinæ: si enim Deus per bonitatem desideret salutem omnium, cur ante prævisionem tam paucos eligit & cæteros omnes ita negligit, ut nullus ex illis salvetur; nonne magis commendatur bonitas D. dicendo; Deum, voluntate

luntate antecedente , velle æqualiter salutem omnium ; consequenter tamen eos tantum prædestinare , quos videt gratiæ suæ consensuros ; quàm si dicatur Deum voluntate absoluta , sine consideratione meritorum paucos tantum elegisse ad gloriam , circa alios autem se habuisse negativè ? Talis etiam electio ante merita , justitiæ D. non videtur consona ; dicere enim possunt reprobi ; nil mirum esse , si prædestinati bona opera fecerint , & in gratia perseveraverint , quia ad hoc erant destinati ; nil mirum etiam , si ipsi reprobi in gratia non continuaverint , quia exclusi fuerant à tali decreto.

Probatur 3. ratione. Electio ante prævisa merita videtur tollere omnem sollicitudinem de salute : vel enim sum de numero electorum , vel non : Si sum , impossibile est me damnari , nam decretum divinum est efficax & absolutum , cujus effectum nemo impedire potest ; si enim spectata ratione libertatis meæ , possum à gratia excidere ; tamen vi illius efficacis decreti , non possum : supposita ergo illa electione , quæ non pendet ex bonis operibus meis , sed ex sola Dei voluntate , non est quod metuam damnationem , & sim sollicitus de perseverantia ; quia cùm decrevit Deus efficaciter illam mihi impendere , impossibile est ut non impleat decreta sua. Iam verò , si non sum de numero prædestinatorum , frustrà Dei præcepta observo ; quia cærus sum , hoc non mihi profuturum ad salutem : & sic tolleretur omnis cura de salute , contra D. Petrum 2. 1. dicentem ; *Satagite ut per bona opera cer-*



*nam vestram vocationem faciatis.*

Probatur 4. ratione ex S. Script. Gloria æterna dicitur præmium, merces, bravium, & corona justitiæ; nullus autem vult efficaciter dare hæc omnia, nisi præsupposito merito: ergo nec Deus vult efficaciter gloriam dare antecedenter ad prævisionem meritorum. Melius ergo est, si dicamus Deum antecedenter velle dare omnibus gloriam ratione suæ bonitatis infinitæ; in secundo autem instanti Deum velle ut homines mereantur illam per bona opera ex gratiâ facta: in tertio prævidisse eos qui benè vel malè operaturi sunt: in quarto tandem decrevisse voluntate consequenti dare gloriam justis, tanquam mercedem; & poenam injustis, tanquam punitionem.

Probatur 5. Ratione. Si Deus prædestinaret ante prævisa merita unum, & non alium; esset acceptor personarum, quod est contra justitiam. Nec respondeant adversarii negando consequentiam; dicentes, quod est tantum acceptio personarum, cum quis tenetur reddere aliquid duobus, & reddit tantum uni & non alteri, in proposito autem est Deum, nulli debere gloriam, immò omnes homines damnationem mereri; unde si aliquos liberet, hoc est suæ bonitatis; si alios non liberet, hoc est suæ justitiæ: hæc enim responsio esset valida, si Christus non esset mortuus pro omnibus; quia autem per mortem omnes redemit, & reparavit lapsum nostræ naturæ, ideo tenetur ex justitia omnibus & singulis subvenire: & sic, si ante prævisa merita aliquos prædestinaret, & non alios; esset acceptor personarum.

Objic. Si prædestinati eligerentur ex prævisis meritis, possent gloriari de suâ prædestinatione, contra D. Paulum, 1. ad Corinth. 4. *Quid habes quod non accepisti? Si autem accepisti, quid gloriaris?* Resp. eos non debere gloriari; quia hoc non habent ex naturæ viribus, sed cum gratiâ Dei; quoniam ergo gratia est principium meriti; debemus prædestinationem in gratiam refundere, non in nos: Vnde ait Augustinus; quodd, *quando Deus coronat merita nostra, coronat dona sua.* Dices ex Joan. 15. *Ego elegi vos, ut eatis, & fructum afferatis:* ergo electio est causa bonorum operum; non è contrà. Resp. ibi Christum loqui de electione ad Apostolatatum, vel ad gratiam, vel ad Religionem Christianam; quæ electiones factæ sunt antecederet ad merita; & sic solvendi sunt contextus similes. Dices ex Luc. 12. *Nolite timere pusillus grex, quia complacuit Patri vestro dare vobis regnum.* Resp. complacuit dare regnum; consequenter ad prævisa merita, conc. antecederet ad ea, nego. Dices. Actuum 13. legitur, *Crediderunt quotquot præordinati erant in vitam æternam:* ubi præordinatio seu Prædestinatio est causa fidei & bonorum operum. Resp. hoc ita intelligi, crediderunt in tempore illi qui præordinati erant in vitam æternam per prævisionem fidei temporaneæ.

Objic. 2. Apostolum ad Rom. 9. *Cum nondum nati essent, aut aliquid boni vel mali egissent, Jacob dilexit, & Esau odio habuit.* Resp. primò, Apostolum dicere, quidem, quodd Deus dilexerit Jacob, antequam quicquam

boni fecisset ; non tamen dicit , ipsum dilexisse antequam prævídisset Iacob bene acturum. Resp. 2. hoc intelligi de electione ad gratiam quæ revera fit sine prævísione meritorum ; non verò de electione ad gloriam , quæ fit consequenter ad prævísá merita. Quòd autem non loquatur de Prædestinatione ad gloriam , patet ; quia sequeretur quòd etiam destinasset Esaü ad poenam , ante prævísá demerita ; eodem enim modo de utroque loquitur , dicens : *Antequam quicquam boni vel mali fecissent , Iacob dilexi , & Esaü odio habui* : nullus autem præter Calvinum dicit reprobationem fieri nisi ex prævísis demeritis. Cum ergo dicit Apostolus , quòd Deus dilexerit Iacob & Esaü odio habuerit , intelligendus est de dilectione quæ tendit ad gratiam , non ad gloriam ; non quòd Deus voluerit gratiam dare Iacob & negare illam Esaü , nulli enim Deus denegat gratias ; sed per hoc verbum , *odio habere* , intelligitur minus diligere : Est ergo sensus , antequam quicquam boni vel mali fecissent , Iacob dilexi , Esaü autem odio habui ; id est , Iacob magis dilexi , conferendo illi majores gratias , & Esaü odio habui , id est , minùs dilexi , conferendo illi minores. Porro , quòd per *odio habere* , intelligatur minus diligere , habetur ex S. Script. dicente quòd is qui non habuerit odio patrem & matrem , non possit esse Christi discipulus : Ubi non jubet Christus quod habeamus odium pro patre , imò jubet , ut parentes colamus ; sed præcipit ut minùs eos diligamus , quàm Deum

Ob j c. 3. ad Ephes. 1. *Prædestinavit nos se-*



*cundum beneplacitum voluntatis suae*; ergo merita non sunt causa Prædestinationis, sed sola voluntas. Resp. primò, Prædestinavit nos, ad gratiam, conc. ad gloriam, nego. Resp. 2. Prædestinavit nos secundum beneplacitum voluntatis, includens prævisionem meritorum, conc. excludens, nego. Dices, 2. ad Timoth. 1. *Vocavit vos vocatione sua sancta, non secundum opera, sed secundum propositum suum* Resp. ut prius, ad gratiam, conc. ad gloriam, nego. Dices, ex eodem, *non ex operibus iustitia qua fecimus, salvos nos fecit.* Resp. distinguendo: non ex operibus iustitiæ legalis, conc. iustitiæ sanctificantis, id est, ex operibus ex gratia factis, nego. Dices, ad Rom. 9. *Non est currentis, neque volentis; sed Dei misericordis* Resp. hoc intelligi de gratiâ, non de gloriâ; id est, si Deus det nobis gratiam, non ideo dat, quia currimus, aut volumus; sed quia miseretur nostri: Hoc tamen non impedit, quin habeamus gloriam, quia currimus & volumus; non quidem sine gratiâ, sed cum gratiâ. Dices, ad Rom. 6. *Vita æterna, est gratia Dei.* Ergo gratis datur: ergo non ex meritis. Resp. quod dicitur *gratia*; quia acquiritur per merita gratiæ. Dices, ad Rom. 8. *Quos prædestinavit, sunt conformes imaginis Filii sui*; sed Christus, ut homo, est prædestinatus sine prævisis meritis: ergo & nos ipsi. Resp. esse conformitatem inter nos & Christum, in objecto Prædestinationis; non in modo ejus: quia sicut Christus est prædestinatus ad gloriam animæ & corporis, sic & homines; ipse tamen est prædestinatus antecedenter ad merita præyisa, nos verò consequenter.

Objic. 4. Si electio ad gloriam facta esset ex prævisis meritis, arcanum Prædestinationis non esset inscrutabile; contra Paulum exclamantem: *O altitudo divitiarum!* &c. Nam si quæreretur, quare hic est prædestinatus & non ille; illicò responderi posset; quia hic cooperando gratiæ, meruit Prædestinationem; hic verò respuendo gratiam, meruit reprobari. Resp. in nostrâ sententiâ hoc mysterium non esse minùs inscrutabile; nam hoc potiùs adversariis opponi potest, ut benè notat D. Bonav. dist. 41. quæst. 2. Si, inquit, non esset alia ratio, quare istum Deus elegit, & non illum, nisi quia ita Deo placet; certè jam non occulta dicerentur divina judicia, sed manifesta; cum quilibet hanc rationem capiat; nec dicerentur mirabilia, sed potius voluntaria. Arcanum ergo Prædestinationis in gratiâ vocationis situm est; licet enim omnes vocentur ad gloriam, majora tamen auxilia nonnulli accipiunt, quàm alii: & Deus interdum vocat alios vocatione tam congruâ, quòd respondeant; ut quando vocavit Paulum, Magdalenam, Latronem, &c. alios vocat vocatione tantùm communi, cui possunt quidem respondere, non tamen respondent: Cur autem illos tali modo vocet, & istos tali; super hoc jure exclamat Apostolus, *O altitudo divitiarum!* Loquitur ergo hîc Paulus de vocatione ad gratiam, non ad gloriam; sicut cum dicit ad Rom. 9. *Nonne habet figulus potestatem ex eâdem massâ, facere vasa in honorem, & vasa in contumeliam? Per vasa in honorem parata, loquitur de illis, qui vocantur vocatione speciali, quam novit congruere, ut*



vocatus eam non spernat : per vasa contumeliæ , intelliguntur illi qui communi vocatione vocantur , cum quâ tamen ad gloriam pervenire possent , si vellent ; sed quia nolunt , fiunt vasa contumeliæ , seu reprobi.

O B J E C. 5 ex D. Aug. qui multis in locis asserere videtur , electionem esse ex mera Dei voluntate ; tractatu enim 26. in Joannem , ait : *Cur illum vocat , alium non ; noli querere , nisi vis errare.* Epistolâ etiam 105. *Cur illum potius , quàm istum liberet ; scrutetur qui potest tam magnum profundum ; sed caveat precipitium.* Resp. hæc omnia intelligi de electione ad gratiam , non ad gloriam. Cùm autem August. lib. de Corrept. & gratiâ ait : *Quicumque ex originali damnatione divina gratia discreti sunt , procuratur eis audiendum Evangelium ; & cum audiunt , credunt ; & in fide perseverant , & sic agunt correpti , ut emendentur :* Per hoc Augustinus non intendit probare Prædestinationem esse causam meritorum ; sed intelligendus est de effectu temporaneo , respectu prævisionis æternæ ; ita ut sit sensus , quicumque ex originali damnatione per prævisionem meritorum discreti sunt , procuratur eis in tempore audiendum Evangelium ; & cætera merita , quæ prævisa fuerunt ab æterno. Quando idem Augustinus ibidem ait : *Qui electi sunt , electi sunt per electionem gratia non præcedentium suorum meritorum :* dicendum est quodd Augustinus voluit Prædestinationem non fieri ex prævisis meritis solius liberi arbitrii , benè autem ex prævisis meritis gratiæ : Augustinus enim agebat contra Pelagianos volentes Prædestinationem fieri ex

meritis solius arbitrii ; quod non vult Augustinus, nec nos : Unde immeritò adversarii allegant plura testimonia Augustini ; sufficit enim illis respondere , quòd Augustinus agnoscit duplicem Prædestinationem ; unam ad gratiam, quæ nunquam fit ex meritis ; alteram ad gloriam quæ non fit ex meritis solius liberi arbitrii, benè autem ex meritis gratiæ.

Objic. 6. rationem Scoti : Omnis ordinate volens, prius vult finem, quam media ad finem ; sed gloria est finis Prædestinatorum, & merita sunt media : ergo Deus prius vult gloriam, quam merita ; & sic non prædestinat ad gloriam ex prævisione meritorum. Resp. 1. Deum velle prius gloriam, quam gratiam & merita ; voluntate antecedenti, conc. Deus enim considerando homines ut homines, vult illis dare gloriam, & deinde dat illis media quibus gloriam consequantur scilicet gratiam. Voluntate consequenti, nego : vult enim per hanc voluntatem dare gloriam tantum illis, qui habebunt merita. Dices, qui vult efficaciter media, vult efficaciter finem ; sed Deus vult efficaciter gratiam : ergo vult efficaciter gloriam ante merita. Resp. ad minorem, Deus vult efficaciter gratiam, quia revera eam dat in tempore, non tamen vult efficaciter merita, sed tantum dependenter à voluntate humana, quæ potest cooperari gratiæ, vel non cooperari ; quod si cooperatura sit, & Deus hoc prævideat, tunc decernit gloriam efficaciter ; & hoc est dicere semper, merita esse causam prædestinationis. Resp. 2. ordinate volens prius vult finem, quam media ; si finis consideretur



in ratione finis , conc. Pro tunc enim , qui vult finem efficaciter , vult media efficaciter , & ipsum finem vult ante media Si vero consideretur in ratione præmii , nego : Nam pro tunc ordinate volens , non vult efficaciter dare præmium alicui , si non prævideat antea meritum : gloria autem vocatur merces , corona , & retributio : nil mirum ergo est , si Deus prævideat prius & velit merita , quàm gloriam. Resp. 3. qui ordinare vult prius finem , quam media ; si finis comparandus sit à seipso , conc. v.g. prius homo vult ire Parisios , quàm emere equum ad iter perficiendum : si finis sit comparandus ab alio , maxime ab agente libero qui potest velle consequi finem , vel non consequi , nego. Tunc enim non potest quis velle absolute finem agenti libero , nisi videat illud se determinare ad consecutionem finis ; prædestinati autem sunt agentia libera ; ergo prius Deus debet prævidere cooperationem illorum , quam destinare illos efficaciter ad gloriam.

Objic. 7. Opinio hæc coïcindit cùm errore Pelagianorum. Resp. longe abesse : illi quippe excludebant gratiam , & Prædestinationem volebant fieri ex prævisione meritorum solius arbitrii ; nos verò gratiam admittimus ; & volumus Prædestinationem fieri ex prævisis meritis gratiæ , seu libertatis adjunctæ gratia. Dices , ergo saltem Prædestinatio pendet à lib. arbitrio , cui pertinet cooperari gratiæ , vel non cooperari ; ut patet hoc exemplo. Sint v. g. duo homines , Deus voluntate antecedenti vult utriusque salutem ; deinde vult utrique dare gratiam ; & denique , quia prævidet unum



cooperari gratiæ per liberum arbitrium, ipsum efficaciter destinat ad gloriam; & sic liberum arbitrium est causa, cur ille prædestinetur, iste non. Resp. Prædestinationem non pendere à solo libero arbitrio; quando ergo dicunt, dependet à cooperatione nostrâ, Dist. à cooperatione nostrâ, cum gratiâ, conc. sine gratiâ, nego. Non possumus enim cooperari gratiæ vocanti, nisi Deus conatus nostros adjuvet per aliam gratiam, quæ dicitur cooperans; & hoc est quod ait Paulus, Deum in nobis operari velle & perficere.

**O b j e c. 8.** Discretio Prædestinatorum à reprobis, vel incipit à gratia præveniente, vel à consensu quo cooperamur illi; sed non incipit à consensu, quia homo esset causa Prædestinationis suæ, est enim causa sui consensus: ergo incipit à gratia præveniente, quam Deus dat ante consensum nostrum, & proinde Prædestinatio fit ante prævisionem consensus, & meritorum. Resp. discretionem electorum à reprobis non incipere à gratia præveniente simpliciter, nec à consensu, ut est à sola voluntate; sed incipit à gratia præveniente, quatenus habet consensum voluntatis per gratiam cooperantem. Non ergo dicant adversarii, quod plus demus voluntati, quam gratiæ; hoc enim falsum est: quia licet voluntas possit consentire, vel dissentire gratiæ, ut habet Concilium Tridentinum; licet etiam possimus non prædestinari, si voluntas non consentiat; plus tamen damus gratiæ, quam libertati; quia gratia præveniens requiritur, ut excitet voluntatem ad benè operandum; deinde voluntas vult

sequi ductum gratiæ ; quod tamen non potest, nisi adveniat de novo gratia adjuvans , seu cooperans ; & sic damus duobus officia gratiæ , & damus tantum voluntati , ut suum consensum non recuset.

O B J E C. 9. Deus dat media efficacia prædestinatis , ut ad finem ultimum perveniant , quæ non dat reprobis : ergo signum est , Deum habere voluntatem efficacem dandi gloriam illis , non istis etiam antecederet ad eorum merita. Resp. media quæ Deus dat ad salutem, posse dupliciter spectari : Primò , in se , & ex parte dantis : Secundò , ex parte accipientis , & cooperationis nostræ. Si spectentur ex parte Dei , & ante cooperationem nostram , omnia sunt efficacia in actu primo ; quia ex se habent sufficientem vim consequendi suum effectum , & revera consequerentur , si homo non se opponeret efficacitati illorum : Imò læpe majora dantur reprobis , quàm prædestinatis ; & proinde magis efficacia in actu primo. Si vero considerentur ex parte nostri , nulla sunt efficacia ut exeunt à Deo , sed illa fiunt efficacia ex cooperatione nostra , vel inefficacia ex negatione consensus. Ad argumentum ergo , negatur quod Deus det efficacia media Prædestinatis , & non reprobis ; quia omnia sunt efficacia respectu Dei , id est, possunt habere effectum. Deinde , etiamsi daret efficaciora Prædestinatis , quæ negaret reprobis , ex hoc non posset inferri quod Deus haberet tantum inclinationem salvandi Prædestinatos , quia si reprobi uterentur illis gratiis quas habent , possent salvari , & revera salvarentur.

**O B J E C. 10.** Dum meremur gloriam, vel hoc fit per unum actum meritorium præcisè sumptum, vel quia talis actus meretur perseverantiam in merito usque ad finem vitæ: Primum fieri non potest; aliàs qui haberet unum actum meritorium, esset electus ad gloriam, & non posset eâ privari; multi tamen multa bona opera fecerunt, qui in fine damnati sunt: Non potest etiam secundum fieri, quia nullus actus meritorius potest mereri perseverantiam; non cadit enim sub merito, sed est donum Dei. Resp. electionem ad gloriam non esse præcisè factam propter unum aut alterum opus meritorium; sed propter merita perdurantia usque in finem vitæ; ita quod perseverantia sit conditio, sine qua non eligeremur ad gloriam. Quando autem dicitur, hominem non posse illam mereri; hoc verum est unico actu & permanenter; non potest enim homo producere unum actum ita intensè bonum, ut per se condigne mereatur perseverantiam per totam vitam: possumus tamen illam mereri successive & seorsim, merendo scilicet auxilia necessaria ad vincendas tentationes, & perseverandum usque in finem. V. g. cum Dei auxilio possum mereri; ut perseverem hodie sine peccato; cras etiam, & sic deinceps: unde quando dicitur, quòd perseverantia sit donum Dei; hoc est, quia sine gratia, quæ est donum Dei, non possumus perseverare absque peccato.

## Q U Æ S T I O IX.

*Vtrum infantes post baptismum decedentes ex  
prævisione meritorum prædestinentur.*

**I**N opinione quæ sustinet Prædestinationem fieri ante prævisa merita, non potest esse difficultas de infantibus; quia & isti sicut adulti dicuntur prædestinari ante prævisa merita: In nostrâ verò dicimus prædestinationem infantium fieri ante prævisa merita.

## C O N C L U S I O.

**I**N F A N T E S sunt ab æterno prædestinati sine ullâ prævisione operum & meritorum priorum, sed Christi: Non habent enim merita in tempore: ergo non sunt prædestinati ex prævisione meritorum priorum. Quòd autem nulla habuerint merita, constat, quia ad meritum requiritur deliberata intentio finis, electio mediorum, & actualis voluntas, quæ omnia non fuerunt in illis: Prædestinantur autem ex meritis Christi, qui voluit baptismum instituere, & salubriter applicari in remedium peccati, tum pro infantulis, tum pro adultis.

O B J E C T. Licet infantes non habuerint bona opera in tempore, potuerunt tamen prædestinari ex prævisione operum quæ edidissent si vixissent. Resp. Deum non considerare opera hypotheticè futura; alias pueri non haberent æqualem gloriam: habuissent enim opera in æ-

qualia, si vixissent. Deinde, si Deus attenderet illa opera quæ fecissent; sequeretur, quod multi debuissent reprobari, quia reverà multi malè vixissent.

O *n* j i c. Licet pueri non fuerint prædestinati ex prævisione meritorum suorum, potuerunt tamen prædestinari ex prævisione meritorum parentum. R<sup>esp</sup>. hoc esse probabile; potuit enim fieri, quod Deus ab æterno videns parentes eorum fore sanctissimos & ardentè pro illis oraturos, vel eleemosynas plures facturos, propter hoc decreverit, ut infantes ad gratiam baptismi perveniant, qui aliter non pervenis-  
sent: Sed hoc non est contra nos; licet enim negemus tales infantes prædestinari ex prævisis meritis propriis; hoc tamen non impedit quin prædestinentur ex prævisis meritis Christi, vel parentum.

---

#### Q U A S T I O X.

*Utrum Christus nobis meruerit primam gratiam?*

Q U I tenent Prædestinationem fieri ante prævisa merita & ante prævisionem peccati originalis, habent asserere quod Christus non meruerit Prædestinationem neque Angelis, neque hominibus; sed tantum executionem Prædestinationis: Debent enim dicere quod Deus sic ordinaverit: Primò, prædestinavit aliquos ad gloriam absolutè: Secundò, decrevit quod illi Prædestinati acquirerent gloriam per merita

gratiæ, & hoc spectat ad executionem Prædestinationis : Tertio, quod Christus per mortem suam illis meruerit gratias, quibus de facto benè agerent. Ex quo patet quod Christus non sit causa meritoria Prædestinationis secundum intentionem, benè autem secundum executionem : Nos autem qui Prædestinationem ponimus ex prævisione meritorum factam, aliter respondemus.

## CONCLUSIO.

**C**HRISTUS nobis meruit primam gratiam & sequentes, imò jure dicitur causa meritoria prædestinationis nostræ. Hoc patet ad Eph. 1. *Qui benedixit nos benedictione spirituali in cœlestibus in Christo, sicut elegit nos in ipso, ante mundi constitutionem* : Et rursus, *Qui prædestinavit nos in adoptionem filiorum per Jesum Christum*. 2. ad Timoth. 1. *Gratia qua data est nobis in Christo Iesu*. Porro hoc determinarunt Concilia Milevitanum, Arausicanum, & Tridentinum, quæ docent omnia bona gratiæ ab initio justificationis utque ad consummationem, dari nobis per Jesum Christum ; & ideo vocant gratiam, Christi gratiam, seu gratiam Dei per Christum, ita quod sit Deus, qui nobis infundit gratiam ; sed Christus illam nobis meretur. In hac ergo opinione dicere debemus, quod Deus ita se gerat respectu prædestinatorum. Primo, prædestinavit Christum ad summam gratiam & gloriam, & hoc ante electionem Angelorum & hominum ; ita ut verum sit quod dixit Paulus multis in locis, in Christo condita esse omnia, sive quæ in cœlis sunt, sive

quæ in terris : Secundò , Deus , intuitu Christi voluntate antecedente voluit omnibus dare gloriam. Tertiò , videns lapsum hominis , ordinavit incarnationem Verbi fieri in carne passibili , ut per passionem Christus mereretur auxilia gratiæ , quibus homines lapsi possent à peccato resurgere ; aliis quidem eximia , aliis tantùm communia , sed omnibus sufficientia. Quartò tandem , voluntate absolutâ decrevit dare illis gloriam , qui consensuri sunt gratiæ , & perseveraturi in eâ : Ex quo videmus , quòd Christus meruit nobis tum primam , tum secundas gratias , tumque omnem prædestinationem.

Objic. Nullus potest mereri primam gratiam ; quia est principium meriti ; & principium meriti non cadit sub merito. Resp. nullus potest mereri primam gratiam ; sibi , conc. alteri , nego : homo enim qui est in peccato , non potest mereri primam gratiam quâ resurgat à peccato ; Deus enim operatur illam in nobis sine nobis , id est sine consensu nostro : hoc tamen non impedit quin possit justus obtinere à Deo , ut conferat gratiam peccatori , quâ à peccato resurgat ; unde negare non debemus , quin Christus nobis meruerit primam gratiam.



## QUÆSTIO XI.

*Utrum purus homo possit mereri alteri  
Prædestinationem?*

**Q**UI sentiunt eam fieri ante prævisa merita, negativè respondent; quia prædestinationis secundum ipsos est à solâ voluntate Dei: ergo nullus quantumvis justus, potest alteri eam mereri, sed solùm executionem ipsius. Nos autem aliter respondere habemus, si priùs dixerimus, prædestinationem posse sumi dupliciter. Primò, inchoativè pro primâ gratiâ quæ est initium prædestinationis: Secundò, consummativè; tum pro primâ gratia, tum pro omnibus aliis gratiis quas continet prædestinatio. Hoc posito, erit

## CONCLUSIO.

**P**URUS homo potest alteri prædestinationem mereri inchoativè, non tamen consummativè acceptam. Probatur prima pars; quia justus potest alteri mereri primam gratiam, quæ est initium prædestinationis; mediante enim primâ gratiâ quilibet homo potest benè operari & proinde prædestinari; potest, inquam, illam mereri justus, ut patet ex Aug. lib. de dono persever. cap. 22. dicente, *Si qui nondum sunt vocati, pro eis, ut vocentur, oremus; fortasse enim ita prædestinati sunt, ut nostris orationibus concedantur.* Si docetur communiter vocationem Pauli fuisse effectum orationis Stephani, ut habetur ex eodem August.



Sermone 1. de S. Paulo, ubi ait ; *Quòd si Stephanus non orasset, Ecclesia Paulum non habuisset.* Probatur secunda pars ; licet enim justus possit mereri alicui primam gratiam , scilicet vocationem ; tamen non meretur illi augmentum gratiæ , nec alias gratias quas toto, vitæ progressu obtinet à Deo ; imò adultus debet ex se cooperari primæ gratiæ , & sic ex se meretur alias gratias.

**O b j e c t.** Ergo tantum teneremur illi homini justo , qui nobis impetraret prædestinationem , quantum tenemur Christo , qui nobis illam meruit. **Resp.** negando ; quia Christus nobis meruit totam prædestinationem , & homo tantum primam gratiam , licet aliquando potuerit mereri augmentum gratiæ & secundas gratias ; deinde Christus nobis meruit prædestinationem *de condigno* , ratione scilicet dignitatis suæ , cui Deus nihil poterat denegare ; unde ait Paulus , quòd sit *ex auditus pro sua reverentiâ* : Homo verò potest tantum mereri alteri *de congruo*. Tandem Christus nobis per se meruit prædestinationem ; justus verò nobis illam meretur per Christum ; non meretur enim nobis aliquid , nisi mediante gratiâ ; & gratia non illi datur , nisi per Christum.

## Q U Æ S T I O XII.

*Utrum numerus Prædestinatorum sit certus respectu Dei ?*

**C E R T I T U D O** Prædestinationis sumitur vel ex parte Dei ; vel ex parte nostri : quæ-

retur inferiùs , an sit certus respectu nostri ; hîc autem quærimus , an sit certus respectu Dei ; id est , an Deus cognoscat numerum prædestinatorum , tum materialiter , seu quot sint prædestinati ; tum formaliter , siue quinam sint prædestinati.

## . C O N C L U S I O

**D**Eus habet certam & infaillibilem notitiam de numero prædestinatorum , tum materialiter , tum formaliter sumptò. Ratio primæ partis est , quia spectat ad perfectionem scientiæ Dei , ut clarè & distinctè non modò res præteritas & præsentés , sed etiam futuras penetret : ergo exigitur ut omnes prædestinatos cognoscat. Hoc concordat sacræ Scripturæ , Joannis 10. *Cognosco oves meas , & cognoscunt me mea*, 1. ad Timoth. 2. *Novit Deus qui sunt eius*. Ratio secundæ partis est eadem , ac primæ : quia si infinitas scientiæ postulat , ut omnia futura cognoscat Deus ; debet nedum cognoscere numerum prædestinatorum materialiter sumptum ; sed etiam formaliter personas eorum qui prædestinantur : Et insuper cognoscit gradum gloriæ ad quem prædestinantur ; cùm enim præsupponamus prædestinationem fieri ex prævisis meritis , prædestinatio ad talem gloriam fit ex prævisione talium meritorum ; Deus autem cognoscit quanta merita habiturus sit homo , & proinde cognoscit gradum gloriæ ejus.

## QUÆSTIO XIII.

*Utrum numerus Prædestinatorum possit nobis  
esse certus?*

**L**ICET Calvinus asserat nullum hominem posse cognoscere numerum prædestinatorum; tamen pertinaciter asseverat, quemlibet fidelem debere certò scire se esse prædestinatum: Nos autem dicimus, numerum prædestinatorum non posse cognosci ab homine, nec etiam nullum hominem posse certò scire, sine revelatione speciali, se esse de numero prædestinatorum.

## CONCLUSIO.

**N**UMERUS prædestinatorum soli Deo est cognitus, nec ullus potest scire se esse prædestinatum. Primum evidens est ex S. Script, Ps. 30. *Abscondes eos in abscondito faciei tuæ*, ad Rom. 11. *Quis novit sensum Domini?* Ecclesia etiam oratione secretâ quadragesimæ ait: *Deus, cui soli cognitus est numerus electorum, &c.* Ratio hujus est, quia prædestinatio pendet à determinatione divinæ voluntatis, quæ non potest nobis innotescere, nisi per revelationem. Hæc autem ratio probat secundam partem; pendet enim à voluntate divinâ, quòd sumus prædestinati; & sic non possumus hoc cognoscere: Vnde S. Script. monet nos, ut cum timore & tremore salutem nostram operemur. Ratio hujus veritatis confirmativa, est hæc; nemo potest certò scire se esse in gratiâ

pro tempore presenti , ut patet Eccl 9. *Nemo scit, an odio vel amore dignus sit* ; ergo multo minùs scire potest se perseveraturum in gratiâ pro tempore futuro.

Objic. Paulum ad Rom. 8. dicentem ; *Certus sum, quia neque mors, neque vita, neque principatus poterit nos separare à charitate Dei* ; ergo sciebat Paulus suam prædestinationem. Resp. fuisse certum de suâ prædestinatione, per revelationem quam habuit, cùm in cœlum empyreum elevatus est : Alii tamen respondent, quòd in versione Græcâ, pro verbo Latino, certus sum, scribatur verbum Græcum, *πίστις* quod est, confido ; sic vertit Hieronymus.

---

#### QUESTIO XIV.

*Virum numerus Prædestinatorum sit ita certus, ut nullus eorum possit reprobari.*

CONSTAT ex penultimâ quæstione, Deum certò scire numerum prædestinatorum. Si quæratur autem, unde proveniat illa certitudo, aliter habemus respondere, quàm illi, qui ponunt prædestinationem ante prævisa merita ; illi enim dicunt, ideò Deum certò scire quot sunt prædestinati, quia Deus suum decretum agnoscit ; quo scilicet statuit tot prædestinare ante prævisa merita : Nos autem dicimus, illam certitudinem oriri ex præscientiâ & prævisione meritorum uniuscujusque, ac decreto immutabili quo Deus decrevit, consequenter ad

prævisionem illam, dare gloriam & mensuram gloriæ. Hîc autem quæritur, an talis prædestinatorum numerus à Deo cognitus, sit ita certus, ut nullus ab eo excidere possit, nullus verò præter talem numerum, ad illum intrare valeat.

## CONCLUSIO.

**N**UMERUS prædestinatorum est ita certus, ut nullus ab eo excidere possit; & nullus præter illum admitti: hoc est autem quod communiter dicitur; nullum prædestinatorum posse damnari, nec ullum reproborum posse salvari. Probatur prima pars ex S. Script. Joan. 6. *Omne quod dat mihi Pater, ad me veniet: Et rursus, Hæc est voluntas Patris, ut omne quod dedit mihi, non perdam ex eo.* Et c. 10. *Oves mea vocem meam audiunt, & sequuntur me; & non peribunt in æternum, & non rapiet eas quisquam de manu meâ.* Secunda pars est ex 1. Joan. c. 2. *Prodierunt, inquit, quia non erant ex nobis; nam si fuissent ex nobis, utique permaſſissent.*

**P**ROBATUR ratione utraque pars. Ad perfectionem scientiæ Dei pertinet, res omnes futuras distinctè cognoscere; novit igitur perfectissimè, qui sint perseveraturi in gratiâ, qui lapsuri, qui morituri sint cum gratiâ perseverantiz, quia etiam in finali impœnitentiâ sunt discessuri; unde illos eligit ad gloriam, istos damnat ad pœnam: Cùm igitur nullus eorum, qui in peccato moriuntur, possit salutem consequi; nullus etiam eorum, qui in gratiâ obeunt, possit à gloriâ deficere; hinc fit, ut dicamus numerum prædestinatorum ita esse certum, ut intraneus non possit exire, nec extraneus ingredi. Hoc confirmat Augustinus, qui libro de

corrupt. & gratiâ dicit : *Prædestinatorum ita certus est numerus, ut non addatureis quisquam, nec minuatur.*

O B J E C. 1. Si numerus prædestinatorum ita certus est : ergo electi non poterunt gratiam amittere per ullum instans ; aliàs possent mori in illo instanti , & sic reprobari. Respondet Calvinus , reverà prædestinatum nunquam amittere gratiam ; unde ait , quod si peccet prædestinatus , non imputantur ei peccata. Nos verò contrarium sentimus ; Petrus enim in nocte cœnæ , cùm accepit Eucharistiam , erat tunc mundus ab omni peccato mortali , sicut asseruit Christus Joan. 13. atqui idem Petrus paulò post peccavit , & sic prædestinati possunt excidere à gratiâ , temporaliter quidem , non autem finaliter : quia licet peccent , sunt tamen acturi pœnitentiam ; Deus enim dabit illis gratias , non tales quin possint illis dissenrire ; sed ita congruas & ita accommodatas loco , tempori , & personæ , ut voluntas illis infallibiliter consentiat.

O B J E C. 2. Si possit prædestinatus peccare , fieri potest ut peccet mortaliter , moxque repentino casu , & ex improvise intereat , vel occidatur ab aliquo ; & sic tunc damnabitur : ergo incertus erit numerus prædestinatorum. Respondeo , prædestinatum posse concipi , vel in sensu diviso ; quatenus scilicet est homo indifferens vel ad gloriam , vel ad pœnam ; aut in sensu composito , in quantum est prædestinatus , & subjacet decreto divinæ prædestinationis. Si primo modo consideretur ; potest peccare , mori in peccato , & consequenter damnari :

Si verò consideretur secundo modo ; potest quidem peccare , sed non potest mori in peccato ; quia Deus prævidit ipsum resurrecturum à peccato , & moriturum in gratia ; talis tamen præscientia non imponit necessitatem prædestinato , ut resurgat ; quia ut diximus aliàs , præscientia Dei involvit nostræ voluntatis determinationem ; ita quòd non idèd prædestinatus resurget à peccato , quia hoc previdit Deus : sed idèd Deus prævidit , quia liberè prædestinatus se determinabit ad pœnitentiam.

Objic. 3. ex Apocal. 3. *Tene quod habes , ut nemo accipiat coronam tuam ;* & similes passus , qui insinuare videntur , gloriam esse incertam : ergo prædestinatus potest damnari. Respondeo , Deum non statuisse salvare electos absque ullis conditionibus ; sed mediantibus meritis , & prævisâ eorum cooperatione ad gratiam : Vnde ex præcitatis non debet concludi quòd gloria sit incerta ; sed quòd debeamus cōoperari gratiæ ; quoniam cooperatio est fundamentum nostræ prædestinationis. Hoc est etiam quod intendit Paulus 2. ad Philipp. dicens , *Cùm timore operamini vestram salutem ;* quia timor ille prævisus est causa prædestinationis. Dices hoc est tollere benè agendi sollicitudinem. Negatur ; quia bonæ actiones prævisæ , sunt causa prædestinationis ; & sic , ut habeamus executionem ejus ; debemus benè operari.



## QUESTIO XV.

*Quinam sint effectus Prædestinationis.*

**C**REATIO & conservatio non possunt esse effectus prædestinationis ; secundum enim Aug. prædestinatio est præparatio mediorum ad vitam æternam ; hoc autem supponit hominem esse creatum & conservatum , & sic non sunt effectus ejus : ipsos autem in communi exponet.

## CONCLUSIO.

**V**OCATIO , justificatio , & glorificatio sunt effectus prædestinationis. Ad Rom. 8. *Quos prædestinavi , hos & vocavi ; & quos vocavi , hos & iustificavi ; quos autem iustificavi , illos & glorificavi* : Deus ergo vocat , justificat , & glorificat electos in tempore ; quia illos prædestinavit ab æterno : ergo hæc omnia sunt effectus prædestinationis ; quoniam pendunt ab illo decreto prædestinationis , quo Deus statuit æternaliter illis dare gloriam.

**O**BJEC. Gloria est finis prædestinationis : ergo glorificatio non est effectus illius. Resp. quòd glorificatio possit sumi vel pro possessione gloriæ , vel pro collatione gloriæ. Possessio autem gloriæ est quidem finis prædestinationis , quoniam idèò Deus hominem elegit , ut gloriam possideat : quia autem electus non potest gloriam possidere , nisi Deus eam illi communicet ; idèò glorificatio , ut est collatio gloriæ , est effectus prædestinationis.



Ob j i c. Præter hos tres effectus, sunt adhuc alii; nempe bona indoles, bonum exemplum, morbi, miseriæ, permissio peccati, &c. quia hæc omnia possunt excitare ad benè vivendum. Resp. hæc omnia reduci ad gratiam vocationis, sunt enim vocationes externæ: deinde, hæc omnia non sunt infallibiles effectus prædestinationis; multi enim illa habent, qui non sunt electi. Instabis: Sic etiam vocatio & justificatio non censerì debent effectus prædestinationis, quia multi vocantur & justificantur, qui tamen non prædestinantur. R. reverâ non esse effectus prædestinationis, nisi respectu illorum qui prædestinantur; respectu verò aliorum qui non prædestinantur, vocatio & justificatio sunt tantum effectus voluntatis quam habet Deus de salute omnium: Sic etiam bona indoles, exempla, miracula, &c. sunt effectus prædestinationis respectu prædestinatorum; & tunc spectant ad gratiam externam vocationis; non sunt verò effectus, respectu aliorum.

---

### QUÆSTIO ULTIMA.

*Quid sit dicendum de libro vitæ?*

QUIA multoties in negotio prædestinationis mentio fit de libro vitæ; cum sæpius dicatur, prædestinatorum nomina esse conscripta in libro vitæ; idèò aperiendum superest, quid intelligatur per librum vitæ, sumptum secundum acceptionem quâ uti solent Theologi.

## CONCLUSIO.

**L**IBER vitæ est certa & immutabilis notitia quam Deus habet de salute & gloriâ electorum; & sic illi dicuntur esse in libro vitæ, qui à Deo cognoscuntur, ut prædestinati. Illa autem notitia dicitur liber, metaforicè, per similitudinem ad librum creatum: sicut enim qui apud homines in milites aut consiliarios eliguntur, solent describi in aliquo libro, unde Senatores apud Romanos vocabantur Patres conscripti; sic illi qui ad gloriam destinantur, dicuntur conscribi in libro vitæ, idest, in intellectu D. sicut ea quæ memoriâ retinemus, dicuntur conscripta in mente. De libro vitæ loquitur multoties Script. Daniel 12. *Salvabitur omnis, qui inventus fuerit in libro.* Ad Philip. 4. *Quorum nomina scripta sunt in libro vi. æ.* Porro ex hoc libro nullus expungitur, postquam in eo scriptus est, sed omnes salvi fiunt; aliàs scientia Dei esset fallibilis: unde est differentia inter librum præsentis justitiæ, & librum finalis; à primo enim multi delentur, dum peccant; & à secundo, nulli. Tandem, qui non scribuntur in hoc libro, peribunt Apoc. 2. *Qui non est inventus scriptus in libro vite, missus est in stagnum ignis.*

**O**BJIC. Moyfes Exod. 12. petiit deleri de hoc libro; *Vel dimitte populo, vel dele nomen meum de libro tuo.* Resp. cum Aug. hoc dixisse Moysem, non quòd se expungi veller, aut crederet id posse fieri; sed ex quadam fiducia, quâ credebat quod Deus parceret populo; & sic proposuit illi aliquid impossibile. Vel dicendum cum Hieronymo, quòd hoc intelliga-

## Q U Æ T I O U N I C A.

*Quid sit Reprobatio, quæ eius causa,  
& qui effectus.*

S I C U T prædestinatio est pars subjectiva prævidentiæ, sic & reprobatio: sicut etiam prædestinatio, & providentia pertinent antecedenter ad intellectum, & formaliter ad voluntatem; sic etiam reprobatio est antecedenter actus intellectus, & formaliter actus voluntatis.

## C O N C L U S I O P R I M A.

R E P R O B A T I O est decretum efficax voluntatis D. de poenâ æternâ creaturæ intellectuali infligendâ, propter peccatum finale. Dicitur primò, *decretum*; quia est actus voluntatis: sicut enim eligere ad gloriam, est actus voluntatis; sic etiam excludere à gloriâ, est actus illius. Dicitur . . *efficax*; quia reprobatio pertinet ad voluntatem consequentem: sicut enim voluntate antecedenti Deus vult omnes salvos facere, quia considerat illos ut homines; sic voluntate consequenti vult aliquos reprobare, quia illos cognoscit ut in peccato morituros. Dicitur tertio, *de poenâ æternâ creaturæ intellectuali infligendâ*; quia sicut gloria est ultimus effectus prædestinationis, sic poena æterna est ultimus reprobationis. Additur quartò, *propter peccatum finale*; quia, ut mox dicemus, peccatum est causa reprobationis. Porro, nîl impedit, quin hoc decretum possit

dici præreprobatio, sicut aliud vocatur prædestinatio, quoniam utrumque est æternum & immanens; attamen is modus loquendi non est in usu.

### CONCLUSIO SECUNDA.

**N**ON fit reprobatio nisi ex prævisione peccati finalis: sicut enim prædestinatio fit ex prævisis meritis; sic & reprobatio ex demeritorum prævisione. Hoc probatur ex Scripturâ dicente, Deum nolle mortem peccatoris; Deum velle omnes salvos fieri, &c. quæ omnia non essent in Deo, si ante prævisionem peccati, aliquos destinaret ad mortem. His concordat Aug. dicens, *Deus bonus est, Deus justus est; quia bonus, potest sine meritis liberare; quia justus, non potest sine demeritis perdere.* Dissentit verò Calvinus, affirmans voluntatem Dei esse solam causam reprobationis; qui quidem Deus, ut justè puniat reprobos, illos impellit in peccatum. Maneat ergo nobis, quòd prævisio peccati est causa reprobationis; sive fit solùm originale, ut in parvulis sine baptismo morientibus; sive fit solùm actuale, ut in adultis, qui post remissum originale, alia committunt in quibus moriuntur; sive tandem sit originale & actuale, ut in infidelibus, qui præter peccatum originale quod habent, commiserunt multa actualia.

Objic. Rom. 9. *Deus Esaiâ odio habuit, inrequam quicquam mali fecisset.* Resp. hoc jam solutum esse; quòd scilicet odio habere, sumatur pro minùs diligere. Quod si figulus possit facere vasa in contumeliam; hoc est, consequen-

ter ad prævisionem demeritorum, non verò antecedenter ad illam.

## CONCLUSIO TERTIA.

**E**FFECTUS reprobationis sunt tres potissimum in adultis. Primus est privatio gratiæ, non quidem sufficientis, quia omnibus datur; sed gratiæ finalis & efficacis, quam statuit Deus non dare reprobis; quia prævidit ipsos malè usuros sufficienti: Secundus est poena damni pro omnibus: Et tertius est poena sensus pro solis adultis.

Hic quæri posset, an Deus det omnibus gratias sufficientes; an fuerint aliqua auxilia pro infantibus, ipsis sufficientia ad salutem; an infideles, obcæcati & indurati gratiam sufficientem habeant: Sed quia de his omnibus ex professo agemus in tractatu de Gratiâ, videantur in suo loco.




## TRACTATUS

## DE DEO TRINO.



**T**HEOLOGO, Deum undequaque considerare volenti, incumbit; ut postquam Deum unum in essentiâ contemplatus est; ipsummet trinum in personis illicò cognoscere studeat. Præcedenti ergo Tractatui, in quo unitatem essentiæ divinæ explicare conati sumus, præsentem adjungere ordo doctrinæ postulat, qui est de personarum divinarum

Trinitate ; qui quidem Tractatus pluribus capitulis coalescer , quorum primum erit de cognoscibilitate hujusce mysterii.



## CAPVT PRIMVM.

*De cognoscibilitate mysterii Trinitatis.*

**I**N tanti hujus mysterii doctrinâ quatuor præsupponenda sunt , quorum tamen primum jam probatum est in Tractatu præcedenti ; & alia probabuntur in sequentibus. Primò , Deum esse unum , contra Manichæos , Gnosticos & Gentiles : Secundò , tres esse in Deo personas distinctas realiter , Patrem , Filium , & Spiritum S. contra Sabellianos : Tertiò , illas tres personas , esse Deum , contra Arianos negantes divinitatem Filii , & Macedonianos impugnantes divinitatem Spiritus S. Quartò tandem , tres illas personas esse tantum unum Deum , contra Tritheitas dicentes tres personas essentialiter distingui , & sic esse tres Deos.

---

 QUÆSTIO PRIMA.

*Vtrum , Deum esse Trinum , sit propositio per se nota.*

**B**REVITAS cui studemus , prohibet ne jam dicta & explicata repetamus. Cùm ergo in quæstione 4. 1. cap. præcedentis Tractatus,

multa dixerimus scitu necessaria de propositione per se notâ & de ejus conditionibus ; ideo tantum hîc assignabitur negativa

## CONCLUSIO.

**H**Æc propositio , Deus est Trinus , seu, Trinitas est in Deo , non est per se nota. Probatur , quia illud est per se notum , cujus cognitio est ex solâ terminorum apprehensione , & cujus prædicatum convenit per se immediatè subjecto ; sed esse Trinum non convenit immediatè Deo ; imò convenit illi per aliquam rationem à priori , scilicet per fœcunditatem naturæ divinæ , de cujus sinu personalitates pullulant ; ideo enim Pater generat Verbum , quia habet intellectum fœcundum ; & ideo Pater & Filius producant Spiritum S. quia habent voluntatem fœcundam : ergo , Deum esse Trinum , non est propositio per se nota. Ut autem hi termini , intellectus fœcundus , & voluntas fœcunda , innotescant , sciendum est , quodd intellectus fœcundus , est intellectus cum essentiâ D. intelligibili , prout nondum habet terminum productionis ; & per voluntatem fœcundam , intelligitur voluntas cum essentiâ D. infinitè amabili , prout etiam intelligitur nondum habere terminum productionis : in solo ergo Patre est intellectus fœcundus , & in solis Patre & Filio voluntas fœcunda : Quia , quando intellectus est in Filio & Spiritu S. non est ampliùs fœcundus ; unde Filius non potest producere alium Filium , nec Spiritus sanctus. Voluntas autem ut est in Patre & Filio , est adhuc fœcunda , quia nondum habet terminum productum ; ut est autem in Spiritu sancto , non

est ampliùs fecunda, quia jam exhausta est per productionem Spiritus sancti, unde Spiritus sanctus aliū Spiritum sanctum producere non potest.

Objic. Trinitas personarum est de quidditate Dei, ergo per se notum est, Deum esse trinum. Probatur antecedens; Subsistentia personalis est ratio formalis personæ; persona enim definitur, intellectualis naturæ incommunicabilis subsistentia; sed subsistentia personalis est de quidditate Dei: ergo, cum non sit major ratio, cur una persona sit de quidditate Dei, quàm aliæ; consequenter tres personæ erunt de quidditate Dei. Probatur minor: Subsistentia personalis est ultimum complementum naturæ intellectualis, & ejus terminus in genere substantiæ, & ejus summa perfectio, ac perfectissima existentia; sed existentia perfectissima est de quidditate Dei: ergo subsistentia personalis est de quidditate Dei.

Resp. negando primum antecedens; nam subsistentia personalis non est de quidditate Dei. Ad id quo probant illud; dicentes, quod sit ultimum complementum naturæ Dei, & summa perfectio ejus, ac perfecta existentia, negatur: illud enim tantum est summa rei perfectio, quod ejus quidditatem ultimò constituit; non verò quod ultimò terminat: subsistentia autem absoluta ultimò constituit naturam divinam; unde diximus, quod reverà sit de essentiâ Dei: subsistentia verò personalis non ultimò constituit; quia Deus, ut Deus est, est adæquatè constitutus sine personis; sed ultimò terminat seu reddit Deum incommunicabilem, unde etiam in nobis,



existentia creata est quidem ultimus terminus rei ; sed non est summa ejus perfectio ; imò differentia rei est summa perfectio naturæ. In hoc tamen differunt existentia creata , & ratio personæ in Deo ; quod existentia creata sit quædam perfectio sine quâ natura creata non esset ita perfecta , uti est cum illâ ; personalitas verò non est perfectio , quæ Deum perfectiorem reddat ; imo sine personis Deus est ita perfectus , ac cum illis ; quia personæ non important perfectionem , ut patebit.

Obj. c. 2. Si Trinitas personarum sit de conceptu formali Dei , hæc propositio erit per se nota , Deus est Trinus ; sed Trinitas est de conceptu formali deitatis ; quod probatur : quando aliqua de se invicem prædicantur in abstracto , unum est de conceptu formali alterius ; sed nedum dicitur in concreto , Deus est Trinus ; sed in abstracto , Deitas est Trinitas ; ergo unum est de conceptu formali alterius.

Resp. reverâ Trinitatē & Deitatem prædicari de se invicem in abstracto : Quando autem dicunt ; quæ prædicantur de se invicem in abstracto , unum est de essentiâ alterius ; distinguo : si prædicentur formaliter , conc. id est , si formalitas unius sit formalitas alterius ; si prædicentur tantum identicè , nego. Sed quando dicitur ; Deitas est Trinitas , hæc propositio non est vera formaliter ; quia alia est formalitas Dei , ut est Deus ; alia formalitas Dei , ut est Trinus ; prædicantur tamen de se invicem identicè ; quia Deitas , ratione infinitatis , sibi identificat Trinitatem personarum : unde licet prædicentur identicè de se invicem , unum non

est de conceptu formali alterius.

Objic. 3. Si Trinitas potest probari à priori de Deo, hoc fit per Deitatem, quæ est ratio existentiae Trinitatis, idest, cur Deus sit Trinus; sed hoc falsum est, quia sequeretur quod ubicumque esset Deitas, ibi esset principium Trinitatis; Deitas autem est in Filio, & in Spiritu sancto, & sic Filius haberet principium Trinitatis, & consequenter sui ipsius & Patris, & Spiritus sancti, quod absurdum est.

Resp. Deitatem ut sic, non esse principium Trinitatis; aliàs ubi esset Deitas, ibi esset principium trium personarum; sed Deitas, ut est naturâ prior paternitate, est radix paternitatis; quia Deitas determinatur immediatè ad primam personam; ut est autem in Patre, est radix filiationis; & ut est in Patre & Filio, est radix Spiritus sancti. Deitas ergo in Filio non est radix Patris, nec sui ipsius; quia quando Filius habet Deitatem, jam existit Pater, & ipsemet Filius productus est: Nec ut est in Spiritu sancto, potest esse principium ipsius, quia jam ipse est spiratus: unde licet Verbum aut Spiritus sanctus habeant Deitatem & intellectum ac voluntatem: tamen Verbum non potest generare, quia intellectus quem habet, est exhaustus; sicut nec Spiritus sanctus spirare, quia voluntas ejus exhausta est, & utraque potentia habet terminum adæquatum.



## QUESTIO II.

*An possit cognosci à priori Trinitatem esse.*

CERTUM est intellectum creatum ex viribus naturæ inclinari ad quamcumque intellectionem, & consequenter ad cognitionem mysterii Trinitatis; omnis enim potentia perfectibilis, inclinatur naturaliter in suum perfectivum; quælibet autem cognitio perficit intellectum; ergo non est mirum si naturaliter inclinetur intellectus ad cognitionem Trinitatis. An autem talis cognitio possit naturaliter attingi, & an aliquis intellectus creatus possit cognoscere naturaliter à priori, Trinitatem personarum stare posse cum unitate essentiae, hoc negabit.

## CONCLUSIO

NULLUS intellectus creatus in quocumque statu existat, secusâ revelatione, potest cognoscere hoc mysterium à priori. Conclusio hæc est de fide. Isaia 15. *Generationem ejus quis enarrabit?* Matth. 11. *Nemo novit Filium nisi Pater; neque Patrem quis novit, nisi Filius, & cui volueris Filius revelare.* Sic docent Patres. Hilarius 1. de Trinit. *Non putet homo suâ intelligentiâ consequi Sacramentum generationis.* Ambrosius 1. de Fide, cap. 7. *Mens silet, vox deficit, &c.* Et Augustinus 1. de Trinit. cap. 2. loquens de hoc mysterio, ait: *Humana mentis acies invalida in tam excellenti luce non figitur.*

*nisi per iustitiam fidei nutrita vegetetur.*

RATIO conclusionis est, quia proprietas maximè peculiaris subjecto non potest cognosci de eo à priori, nisi cognoscatur distinctè quidditas subjecti; quoniam quidditas subjecti est ratio, cur illi conveniat talis proprietas: ergo non potest cognosci Trinitas personarum, quæ est proprietas maximè peculiaris Dei (nulum enim ens, à Deo, est trinum in personis & unum in essentiâ) quin cognoscatur distinctè quidditas Dei. Hoc autem non potest fieri virtute naturali; sed tantum per revelationem, aut lumen gloriæ; & sic non potest cognosci Trinitatis mysterium ab intellectu creato, naturaliter.

OBJICIES Ratio à priori cur Deus sit Trinus; est, quia habet intellectum & voluntatem, quæ sunt principia productiva personarum divinarum; sed potest quis cognoscere naturaliter, Deum habere intellectum & voluntatem, quæ possint producere; ergo potest cognosci naturaliter à priori mysterium Trinitatis. Probatur minor; Potest probari, quod Deus existat. 1. Potest probari quod Deus sit naturæ intellectualis; & proinde habeat intellectum & voluntatem. Potest probari 3. quod intellectus Dei sit productivus Verbi mentalis, & quod voluntas sit productiva Amoris divini; nos enim producimus per intellectum, verbum mentis, & per voluntatem, amorem. 4. Potest probari quod illud Verbum mentis sit substantiale, quia in Deo non potest esse accidens; & proinde, quod Amor productus à voluntate sit etiam substan-

tialis, non accidentalis. 5. Potest probari, quòd illud Verbum, & ille Amor distinguantur realiter à personâ producente; quia est distinctio realis inter producentis & productum. 6. Tandem potest probari quòd illud Verbum sit unum in essentia cum producente, sicut & Amor; quia quod est infinitum non communicatur cum sui divisione: ergo ex his omnibus, quæ possunt naturaliter probari; patet quòd à priori possit cognosci esse in Deitate unum Deum, & tres personas, quarum una est improducta, & est Pater; aliæ verò duæ productæ; una per intellectum, nempe Verbum; alia per voluntatem, nempe Spiritus Sanctus; & sic probatur naturaliter mysterium Trinitatis à priori.

R<sup>ESP.</sup> Posse quidem probari 1. quòd Deus existat; potest etiam probari 2. quòd Deus habeat intellectum & voluntatem; ut diximus enim; nobilissimus agendi modus deberur nobilissimo enti, qualis est Deus; sed tertium non potest cognosci naturaliter, scilicet, quòd intellectus Dei sit productivus & voluntas ejus productiva. Si enim intellectus noster est productivus, hoc redolet quamdam imperfectionem; idè enim producimus notitiam objecti, seu verbum mentis; quia noster intellectus non habet notitiam improductam, mediante quâ, omnia objecta intelligat; unde defectu talis cognitionis improductæ, debet continuò producere verba mentis; Deus autem habet cognitionem improductam, quâ se & omne verum cognoscit: unde diximus aliàs, quòd intellectus Dei sit operativus, non verò productivus: Non

possumus ergo cognoscere naturaliter quoddam Pater habeat intellectum productivum notitiæ genitæ; quoniam habet notitiam improductam; imò hoc videtur arguere imperfectionem: & sic recurrendum est ad fidem, quæ nos docet, Deum, ut Deus est, habere intellectum operativum, & cognitionem improductam, & ut est Pater, habere intellectum productivum & notitiam productam, nempe Verbum mentis. Deinde supposito hoc, Philosophus Paganus in multis hæreret anceps; putaret enim aliquod accidens esse in Deo, & sic Verbum non esse personam, sicut nec Amorem esse substantialem; insuper non posset clarè & distinctè scire, quomodo Filius productus non possit producere alium filium; quoniam habet intellectum, & essentiam cognoscibilem: dubitaret etiam de Spiritu sancto, quia enim est præditus intellectu & voluntate, videretur posse producere alium Filium per intellectum, & alium Spiritum sanctum per voluntatem.

### QUÆSTIO III.

*An possit cognosci naturaliter mysterium  
Trinitatis à posteriori.*

**Q**UIA multi ex antiquis Philosophis & Sapientibus, omni revelatione & lumine supernaturali carentes, distinctionem personarum in Deo agnoverunt; ut Plato, Trismegistus, Zoroastes, Plotinus, & alii; ex hoc credunt aliqui, quod cognoverint naturaliter,

saltem à posteriori, existentiam hujus mysterii. Sed falso nituntur fundamento, ut aiunt Cyrillus Alexandrinus, Justinus, Augustinus, & alii: Illi enim Gentiles non habuerunt talem notitiam ex rebus creatis, sed ex revelatione supernaturali, vel sibi immediatè factâ, ut de Sibyllis sensit Augustinus 18. de Civit. Dei, quæ, ut ait Hieronymus lib. 1. contra Jovinianum, propter Virginitatem, quam exactè servaverunt, habuerunt donum prophetiæ, per revelationem ipsis factam de mysteriis religionis Christianæ: vel factâ Adamo, & ad ipsos per traditionem deductâ, ut indicat Eugubinus in lib. de perenni Philosophia. Nam certò tenendum est, Adam in sua productione, mysterii Trinitatis cognitione repletum fuisse, quæ ab ipso ad posteros transmissa, ad Noë usque pervenit; à Noë ad Abraham & cæteros sapientes Chaldaeos, quorum princeps fuit Zoroastes; à Chaldaeis autem transit sapientia illa ad Ægyptios; ab Ægyptiis ad Græcos; à Græcis ad Latinos; sed semper magis impura, & pluribus implicata erroribus; ita quòd plurimi Gentiles vix hujus mysterii notitiam attigerint. Tandem potest dici, quòd illi Gentiles habuerint talem notitiam ex lectione Prophetarum; non tamen inferri debet quòd illam acceperint à creaturis, ut probabitur.

## CONCLUSIO.

**I**NTELLECTUS creatus non potest naturaliter cognoscere mysterium Trinitatis à posteriori. Ratio convincens & unica, hæc est: Illud non potest sciri de causâ per effectum, quo circumscripto, remanet in causâ quicquid est

necessarium ad causandum ; sed circumscripta per impossibile Trinitate personarum , haberetur adhuc quidquid est necessarium in Deo ad causandam creaturam : ergo ex cognitione creaturæ non potest cognosci , quòd Deus sit Trinus ; nec quòd causa prima sit trina in personis. Major patet , quia licet creaturæ nos ducant in cognitionem causæ primæ , & probent existentiam Dei ; non tamen probant quòd Deus sit Trinus. Minor evidens est , quia Deus producit creaturas per suam voluntatem , quæ est attributum essentialè : ergo si per impossibile Deus esset tantum unus in persona , posset producere creaturas ; & sic ex cognitione creaturarum , non possumus venire in cognitionem Trinitatis.

O B J E C T. Cognita imagine , cognoscitur naturaliter imaginatum à posteriori ; sed cognoscimus animam naturaliter , quæ est imago Trinitatis : ergo à posteriori naturaliter possumus cognoscere Trinitatem , cujus anima est imago. Resp. cognita imagine , naturaliter cognoscitur imaginatum à posteriori ; dist. si imago cognoscatur sub ratione imaginis , concedo ; si imago cognoscatur secundum suam rationem absolutam , nego : non possumus autem cognoscere animam nostram sub ratione imaginis Trinitatis divinæ , nisi cognoscamus ipsam Trinitatem ; & sic licet cognoscamus animam secundum suum esse absolutum , id est , inquantum est anima , per talem tamen cognitionem non possumus cognoscere Trinitatem , nisi antea nobis revelatum fuerit , quòd anima sit imago Trinitatis : sicut , v. g.




videndo picturam, quæ est imago regis, non possum per talem visionem deduci in cognitionem regis; nisi quis mihi dicat, talem picturam repræsentare regem.

INSTABIS. Ex responsione patet quod possumus naturaliter quidem cognoscere animam, quæ est imago Trinitatis, sed non possumus cognoscere relationem imaginis, quæ est in anima nostra ad Trinitatem. Contra, Relatio illa imaginis est quid creatum; ens autem creatum est objectum intellectus naturaliter agentis: ergo possumus cognoscere talem relationem imaginis naturaliter. Resp. Ens creatum est objectum naturale intellectus, distinguo; si ens creatum non dicat relationem ad ens increatum, concedo; si autem respiciat ens increatum, nego; quia relatio non potest cognosci, nisi cognoscatur terminus ipsius; & sic licet illa relatio animæ ad Trinitatem, sit creata, tamen non potest naturaliter cognosci, quia habet pro termino Deum Trinum, qui naturaliter cognosci non potest.

Objic. 2. Licet intellectus creatus non eliciat visionem Trinitatis naturaliter, quia requirit lumen gloriæ; tamen naturaliter reflectere potest super suum actum, & cognoscere se videre Trinitatem: ergo saltem actu reflexo cognoscet naturaliter hoc mysterium. Resp. cum Scoto, talem actum reflexum, esse ab eodem lumine gloriæ, à quo est actus rectus; non solet enim elici actus reflexus à minoribus potentiis, quam actus rectus; & sic, si indigeat lumine gloriæ ad actum quo tendit rectè ad Trinitatem; indiget eodem lumine gloriæ, ut sciat se

cognoscere hoc mysterium. Nec dicas, quòd unus Beatus videre possit naturaliter actum beatificum alterius: ergo & objectum circa quod ille actus versatur, & proinde quòd possit videre naturaliter Trinitatem: falsum enim hoc est, quia actus beatificus unius Beati est supernaturalis: ergo ut alius videat talem actum, indiget auxilio supernaturali. Si dicat Scotus, Angelos habere species naturales hujus mysterii; non proinde potest concludi, quòd tale mysterium possit cognosci naturaliter à posteriori; tales enim species sunt tantum improprie naturales; quia scilicet, sunt illis infusæ à creatione: quia tamen non sunt debitæ illis, sed pendent à sola Dei voluntate; idè non sunt proprie naturales.



## CAPUT. II.

*De Personis generatim sumptis.*

**A**LIAS disputarunt acriter sancti Patres super horum nominum significatione; scilicet, natura, substantia, suppositum, hypostasis, & persona; tamen ex usu Ecclesiæ, in hac materia pro eodem sonant natura, substantia, & essentia; sicut è contra idem significant suppositum, hypostasis & persona. Priora nomina significant aliquid completum, perfectum & singulare, communicabile tamen: sic divinitas, ut præcisa à personis, est natura, essentia, & substantia perfecta, completa, & singularis,

seu hæc ; potest tamen ulteriùs communicari personis. Posteriora nomina significant aliquid completum , perfectum , & singulare ; sed præterea incommunicabile. In hoc enim , persona à naturâ distinguitur , saltem in creatis ; quòd natura sit communicabilis *ut quo* , & *ut quod* ; persona verò sit incommunicabilis utroque modo. Communicari *ut quod* , est communicari ut superius suis inferioribus ; sic natura humana est communicabilis , *ut quod* , Petro & Paulo , &c. Petrus enim est homo , Paulus est homo , &c. Communicari *ut quo* , est communicari ut natura singularis supposito ; vel ut forma subjecto à quâ denominatur ; sic v. g. natura , quæ est in Petro singularis , est illi communicabilis *ut quo* ; quia revera communicatur supposito Petri : hæc etiam albedo , quæ est in pariete , est communicabilis *ut quo* ; quia communicatur ut forma subjecto. Persona autem. ( idem dic de supposito & hypostasi ) est incommunicabilis dupliciter ; scilicet *ut quod* , & *ut quo* ; est inquam incommunicabilis *ut quod* ; quia cum non sit natura communis , non potest communicari pluribus inferioribus ; est etiam incommunicabilis *ut quo* ; quia non potest communicari alteri tanquam forma subjecto , vel tanquam natura supposito. Sic Petrus v. g. est incommunicabilis *ut quo* , & *ut quod*. Hæc scitu digna sunt , ad capienda ea quæ dicturi sumus de personis divinis : illis ergo positis , quærimus

---

 QUÆSTIO PRIMA.

*An plures sint in Divinitate persona,*

**M**ULTÆ hæreses ortæ fuerunt circa hoc mysterium, quæ videbuntur in sequentibus. Sabellius voluit esse tantum unam in Trinitate personam, quæ habebat diversa nomina, secundum diversa officia quæ operabatur; ita ut diceretur Pater, in quantum dedit esse mundo per creationem: diceretur Filius, prout est incarnatus: & Spiritus sanctus, prout descendit super Apostolos: Et sic secundum hunc Hæresiarcham, personæ divinæ distinguebantur tantum nominibus & officiis, non verò realiter. Ob hoc plurimi, qui in illo erant errore, dicebantur Patripassiani: dicebant enim, Patrem divinum passum esse; quoniam erat eadem persona ac Filius. In hoc errore fuerunt etiam Priscillianistæ & Jacobitæ, qui ad pulparem suæ hæresis professionem, solebant signum crucis uno digito exarare; ut digiti unitas personarum unitatem indicaret. Contra hos omnes erit

CONCLUSIO.

**P**LURES sunt in Divinitate personæ. Hæc conclusio habetur ex S. Script. Genes. 1. *Faciamus hominem ad imaginem & similitudinem nostram*: Theodoretus, Basilus & August. dicunt esse sermonem trium divinarum personarum inter se mutuò loquentium. Deuter. 6. *Audi Israël, Deus, Deus noster, Deus*

*eius unus est. Psalm. 67 Benedicat nos Deus, Deus noster, benedicat nos Deus. Isaia. 6. Sanctus, Sanctus, Sanctus Dominus exercituum. In his locis ponitur ter Deus, terque Sanctus, ad denotandam personarum Trinitatem. Ex novo etiam testamento habetur Joan. 1. Filius qui est in sinu Patris. Et Matth. ultimo. Baptisantes eos in nomine Patris, & Filii & Spiritus Sancti.*

OBJ. c. Non est numerus in divinis: ergo nec pluralitas personarum; quia pluralitas non potest esse sine numero; per pluralitatem enim tot vel tot unitates numerantur. Resp. in divinis non esse numerum, dicentem diversitatem essentialem unitatem, conc. quia revera tres personæ habent eandem essentialiam numero: dicentem solam distinctionem realem personarum, nego.

## QUESTIO VI.

*Utrum sint tres Personæ in divinis,*

IN præcedenti quæstione diximus plures esse personas in divinis: hinc quærimus, quot sint; an scilicet sint pauciores vel plures, quam tres; posset enim dici, quodd, quia Pater producit Filium per intellectum, sic etiam Filius posset producere alium Filium; quoniam intellectum habet æquè ac Pater, & sic de Spiritu Sancto.

### CONCLUSIO.

SUNT tres personæ, nec plures, nec pauciores. Probatur, Est una persona improducta,

& duæ tantum productæ : ergo sunt tres personæ. Probatur prima pars : Quælibet natura ex se petit esse & determinari immediatè ad aliquam personam , quæ quidem persona est improducta ; si enim produceretur ab aliâ , illa alia vel est producta , vel improducta : si est producta , admitteretur processus in infinitum : ergo debet esse aliqua improducta , & hæc est persona Patris ; qui conformiter Athanasio , à nullo est factus , nec creatus , nec genitus. Probatur secunda pars , quod sint tantum duæ personæ productæ ; tot enim sunt personæ productæ , quot sunt principia productiva ; sed sunt tantum duo principia productiva , & non plura , nempe intellectus & voluntas : ergo sunt tantum duæ personæ productæ ; & sic sunt tantum tres personæ , quarum una est improducta , & duæ productæ.

O B j e c t. Potentia finita durans per tempus infinitum , potest producere infinitos effectus , ut patet de sole , qui si duraret in infinitum ; posset producere infinitos effectus ; & sic à fortiori infinita potentia infinito tempore durans , infinitos effectus producere poterit ; sed Pater est infinitus in potentiâ productivâ , nempe in intellectu : ergo poterit producere infinitas intellectiones & infinitos Filios ; sicut per voluntatem , infinitos Spiritus sanctos ; & sic erunt plures personæ. Resp. infinita potentia potest producere infinitos effectus , distinguo : si primus , quem producit , non sit adæquatus potentia productivæ , conc. id est , si non sit tantus , quantus produci potest. Si sit adæquatus , nego. Nîl mirum ergo , si sol infinitè durans,

durans , possit infinitos effectus producere ; quia nullus eorum est adæquatus potentiaæ solis : Respectu autem Patris æterni non sic se res habet ; quia quando per intellectum producit Verbum suum , tale Verbum est adæquatum intellectui Patris , & sic illo producto , Pater aliud producere non potest. Deinde , dico quòd potentia finita plures effectus possit habere , distinguo ; si productio unius transeat in præteritum , conc. ipso enim producto , alium successive producere potest si effectus productus non transeat in præteritum , nego ; quia cùm potentia sit formaliter occupata in productione hujus effectus , certè alium producere non poterit : In divinis autem , generatio Filii non transit in præteritum , quia est æterna : unde Pater semper producit suum Filium , & verum est dicere quòd ipsum actu generet ; & proinde cùm Pater maneat semper suum Verbum producens , & illius intellectus semper in eo producendo sit occupatus , aliud generare non poterit.

Objic. 2. Tot sunt relationes producentium , quot sunt productorum ; ergo tot sunt personæ producentes , quot sunt productæ ; sed sunt duæ personæ productæ : ergo & duæ producentes ; & consequenter erunt quatuor personæ. Antecedens clarum est , quia pro relationibus producentium , sunt generatio activa & spiratio activa , & pro relationibus productorum , sunt filiatio , seu generatio passiva & spiratio passiva. Consequens constat ; quia relationes constituunt personas ; & sic erunt quatuor personæ , quandoquidem sunt quatuor re-

lationes. Resp. concedendo totum argumentum, præter ultimam sequelam; licet enim sint duæ relationes producentium, & duæ productorum; licet etiam sint duæ personæ producentes, & duæ productæ; non sunt tamen quatuor personæ; quia una earum est simul producens & producta nempe Filius. Ad hoc autem quod dicitur, relationes constituunt personas, Resp. dist. quando non adveniunt supposito jam constituto per priorem relationem, conc. quando adveniunt supposito constituto, nego: in Patre autem & Filio advenit relatio spirationis activæ, quando jam constituuntur in esse personali, Pater scilicet per generationem activam, & Filius per filiationem, seu per generationem passivam, & sic illæ relationes non constituunt.

Obj. 3. Nulla persona divina potest esse producta: ergo malè dicitur, quòd sint tres personæ, quarum una sit improducta, & aliæ productæ. Probatur ant. quia nullum productum est ex se necessarium; sed personæ D. sunt necessariae: ergo non sunt productæ. Probatur maj. Ex Scoto; nihil est necessarium à se, & necessarium ab alio; sed personæ, quia sunt Deus, sunt necessariae à se: ergo non sunt necessariae ab alio; & sic non producuntur: quod si producuntur, contingenter producuntur, quod repugnat personæ, quæ Deus est. Resp. negando antecedens: ad probationem, neg. majorem. Ad Scotum, dico, nihil esse necessarium à se, & necessarium ab alio; eodem modo, conc. diverso modo, nego: personæ autem sunt necessariae à se, & necessariae ab alio diversimodè; sunt necessariae à se, formaliter, quia sunt



Deus ; sunt autem necessariae ab alio , originativè ; quia scilicet , Filius , v. g. necessariò originatur à Patre , & Spiritus sanctus à Patre & Filio. Si quis dicat , quod est possibile , non est necessarium ; sed quod est productum , fuit possibile , aliàs impossibile fuisset productum : ergo personæ non sunt necessariae : Resp. personas esse necessarias. Quando autem dicitur quòd sint possibles ad produci ; Resp. sunt possibles , possibilitate logicâ , id est , non repugnat quòd producantur ; non verò possibilitate physicâ , ac si potuissent non esse.

---

### QUESTIO III.

*Vtrum tres persona D. realiter distinguantur.*

SABELLIUS hoc negat , dicens personas solis nominibus distingui : asserit fides , dicens , *Aliam esse personam Patris , aliam Filii , aliam Spiritus sancti* Sed antequam concludamus , tradenda est definitio personæ , quæ sic habetur à Boetio : *Rationalis natura individua substantia*. Sed quia hæc definitio convenit etiam animæ rationali quæ est individua substantia naturæ rationalis , non tamen personæ , idcò istam accipimus. Persona , est naturæ intellectualis incommunicabilis existentia. Dicitur i. *intellectualis natura* ; unde persona distinguitur à supposito ; suppositum enim competit omni naturæ substantiali , sive rationali , sive irrationali , sive animatæ , sive inanimatæ ; persona

autem competit tantum naturæ intellectuali ; ut sunt Deus , Angelus & homo. Dicitur 2. *incommunicabilis existens* ; & sic, ea quæ existunt communicabiliter , non sunt personæ ; unde Deus , ut Deus est , non est persona , quia licet sit individua substantia , quoniam est hic & singularissimus ; tamen est communicabilis Patri , Filio & Spiritui sancto : sic etiam anima non est persona , quia est communicabilis , tanquam forma subjecto , persona autem nulli communicari potest , neque *ut quod* , neque *ut quo*

## CONCLUSIO

**T**RES personæ D. distinguuntur realiter. Sic sacra Scriptura , ubi dicitur , *Verbum erat apud Deum*. Joan. 1. Patrem esse in Filio , Ioan. 14. primæ etiam Ioan. 5. *Tres sunt qui testimonium dant in celo Pater, Verbum & Spiritus S.* hæc omnia realem distinctionem inferunt ; propriè enim aliquid non est in seipso. Deinde inter produciens & productum est distinctio realis , saltem personalis ; sed Pater producit Filium , ad Hebr. 5. *Filius meus es tu, ego hodie genui te* Spiritus sanctus etiam mittitur à Patre & Filio , Ioan. 15. *Cum venerit Paracletus, quem ego mittam vobis à Patre* ; sed non mittitur persona , nisi ab illis à quibus procedit : ergo Spiritus S. mittitur ab utroque , & sic ab utroque distinguitur ; & proinde sunt tres personæ realiter distinctæ ; unde Athanasius , *alia est persona Patris, alia Filii, alia Spiritus S.* Ubi licet dicatur alia persona Patris ; non tamen debet dici , aliud persona Patris ; *alius enim & alia* dicunt tantum distinctionem

in personâ ; *aliud* verò involvit distinctionem in essentiâ ; & sic nil vetat, si dicamus ; alius Pater, alius Filius, alius Spiritus sanctus ; non aliud.

O B J E C. Illa particula, *alius*, significat alium Deum ; sed non potest dici, quòd Pater sit alius Deus à Filio ; essent enim tres Dii : ergo non potest dici, alius Pater, alius Filius, alius Spiritus S. Probatur major ; nam hæc propositio verâ est, Deus genuit Deum ; ergo vel se genuit Deum, vel alium Deum ; sed non se genuit Deum ; ergo alium Deum, & sic illa particula, *alius*, significat alietatem deitatis. Resp. neg. maj. primi argumenti & confirmationem ejus ; non enim verum est dicere, quòd Deus genuit se Deum, nec alium Deum ; pro tunc enim multiplicaretur deitas ; sed verum est quòd Deus gignit alium, qui est Deus ; id est, aliam personam, quæ divina est : Vel potest sic distingui illa propositio : genuit se Deum, vel alium, alietate cadente supra personam, concedo : alietate cadente supra essentiam, nego : Et sic multiplicitas cadit supra personas, non supra deitatem ; Dices, Si sint tres personæ realiter distinctæ ; erunt quatuor entia necessaria, infinita & independentia ; quia essentia divina est ens necessarium, & tres personæ sunt necessariæ. Resp. non esse quatuor, sed tantum tria ad summum ; quoniam illa tria entia personalia non distinguuntur realiter ab essentiâ, imò identificantur cum illâ ; & sic non debent dici quatuor ; quia quaternitas, aut trinitas dicit distinctionem realem.

## QUESTIO IV.

*Verum Verbum sit Deus.*

**P**OSTQUAM egimus de pluralitate personarum, & de earum reali distinctione, nunc ad ipsarum divinitatem transeundum est, quaerendo, an quaelibet persona Deus sit. Quoad divinitatem Patris, nullus est qui illam negaverit, post expressos Scripturae contextus, Joan. 1. *Verbum erat apud Deum.* scilicet Patrem, & Joan. 17. *Ut cognoscant te verum Deum, & quem misisti Iesum Christum.* Sed divinitatem Filii negarunt Ariani; & divinitatem Spiritus S. Macedoniani.

## CONCLUSIO.

**F**ILIUS, qui & Verbum dicitur, & qui nostram assumpsit naturam, verè est Deus. Probatum contra Arianos; quia Christus in utroque testamento dicitur Deus, Isaia 35. *Deus ipse veniet, & salvabit nos.* Ad Rom. 9. *Ex quibus Christus est secundum carnem qui est benedictus Deus in saecula.* Hoc confirmant Patres, dum vocant eum Patri consubstantialem, & ipsum dicunt esse ejusdem substantiae cum Patre, & non tantum similem, ut volebat Arius. Quod autem Filius sit Patri consubstantialis, patet ex Joann. 11. *Ego & Pater unum sumus.* Sic etiam Conc. Nicenum, *consubstantialem Patri.* Tandem, Verbum est Filius Dei naturalis, Joan. 1. *Unigenitus qui est in sinu Patris, ipse enarravit.* Si autem est Filius Dei natura-

lis, debet esse Deus: generatio enim fit in identitatem naturæ.

**O B J E C T.** Ariani illud Ioan. 34. *Pater maior me est.* Resp. secundum humanitatem, conc. secundum divinitatem, nego. Dices: Major est ille qui mittit, quam qui mittitur; sed Pater misit Filium suum in mundum, Ioan. 5. ergo, &c. Resp. quando quis mittit alium per imperium, conc. quando quis mittit volentem, nego. Dices, Ioan. 5. *Non potest Filius à se facere quidquam, nisi quod viderit Patrem facientem.* Resp. id est, Non potest Filius à se solo operari; sed unà cum Patre: nam in utroque est una natura & potentia una; unde dicitur, quòd opera Trinitatis ad extra sunt indivisa. Dices, Ioan. 7. *Mea doctrina, non est mea, sed ejus qui misit me.* Resp. id est, Mea doctrina non est humana, sed divina. Dices, Lucæ 18. *Quid me dicitis bonum? nemo bonus, nisi solus Deus:* ex quo patet quòd Christus noluerit vocari Deus. Resp. hoc intelligi in contrario sensu; per hoc enim volèbat Christus probare, se esse Deum; quasi sit sensus; solus Deus est bonus; si ergo non vultis me esse Deum, nolite me vocare bonum; nemo enim bonus, nisi solus Deus. Dices, ad Rom. 9. *Fecit Dominus Verbum abbreviatum super terram;* si ergo Christus est abbreviatus, est minor Patre. Resp. Christum dici Verbum abbreviatum, ratione legis quam instituere voluit; lex enim nova instituta à Christo, fuit veluti abbreviatio veteris legis.

**O B J E C T.** 2. Patrem & Filium non esse consubstantiales; in Conc. enim Antiocheno con-

demnatus est. Paulus Samosatenus : eo quòd amitteret hanc vocem *ὁ μὴ ὁστος* : ergo Filius non est Deus , sicut Pater. Resp. idèd damnatum fuisse Paulum Samosatenum ; quia admittebat per hanc vocem , personas esse unum in substantiâ communi specificâ ; sicut Porphyrius admittit omnes homines esse unum in naturâ humanâ , quod est falsum : Pater enim , Filius , & Spiritus sanctus non habet tantùm eandem specie substantiam , sed eandem numero ; quia eadem numero natura , essentia , & substantia est in tribus personis ; unde dicuntur esse unum in essentiâ.

Dices : Scriptura loquens Patri , ait : *Hac est vita æterna , ut cognoscant te solum Deum verum* : Ergo solus Pater est Deus , non verò Filius. Resp. quòd per particulam illam , *solus* , Scriptura excludat falsos Deos ; non verò Filium , aut Spiritum sanctum.

Objic. 3. Ubi esse , & duratio sunt unum & idem , si aliquid est principium esse alterius , est etiam principium durationis ejus ; sed Pater est principium Filii : ergo est principium durationis Filii : Sed si Filius habet principium durationis , non est æternus ; ergo non est Deus. Resp. Patrem esse principium durationis filii ; dist. principium originativum , conc. quia Filius originatur à Patre : principium inchoativum , nego : quia Filius nunquam inchoavit esse , est enim æternus. Non dicendum tamen est , quòd Pater sit principium durationis Filii ; quia principium durationis sumitur pro inchoatione ; sed dicitur , quòd Pater sit principium originativum æternitatis Filii ; quoniam enim Pater communicat Filio essen-

tiam D. consequenter communicat illi omnes perfectiones D. & proinde æternitatem.

Objic. 4. Ex Ioan. 1. *Verbum erat apud Deum*, ergo, si erat apud Deum, non erat ipse Deus. Resp. per Deum, intelligi Patrem, qui verè est Deus. Deinde additur, & *Deus erat Verbum*. Instant Ariani ex eodem cap. *Vidimus gloriam ejus, gloriam quasi unigeniti*: ergo est quasi unigenitus, non propriè genitus à Patre: ergo non est in identitatem naturæ cum ipso, & sic non est Deus, ut Pater. Resp. hanc particulam, *quasi*, non esse semper similitudinis; sed esse aliquando veritatis & identitatis; sic Luc. 21. sudor Christi dictus est quasi gutta sanguinis, qui tamen fuit verus sanguis. Quodd si Verbum D. dicatur in Script. creatum & factum: hoc est impropriè; in quantum est productum & genitum, sicut parentes dicuntur procreare filios.

Objic. 5. Quod generatur, admittit mutationem & successionem, transit enim à non esse ad esse; sed mutatio & successio non possunt competere Deo: ergo Verbum quod generatur, non est Deus. Resp. antecedens esse verum in creatis, ubi genitum accipit esse post non esse; non verò in divinis, ubi generans, genitum, & generatio sunt simul & semper; nullum enim est instans, ubi Pater sit, quin generet Filium, & quo Filius non sit genitus; & sic Verbum non accipit esse post non esse. Dices, sicut se habet corruptum ad non esse, sic genitum ad esse; sed quod corrumpitur, desinit esse: ergo quod generatur, incipit esse: ergo admittit successionem, & mutationem. Resp. compara-

N

tionem valere tantum in generationibus physicis, in quibus subjectum prius subjacet privationi, quam formæ; non autem in hac metaphysicâ generatione, in quâ idem est generari & esse genitum; & in quâ Verbum D. nunquam fuit privatum existentia.

**INSTABIS:** Pater potuit non generare Filium: ergo generatio Filii est mutabilis, & sic Filius potuit non esse: ergo non est Deus; quia Deus est ens necessarium, quod non potuit non esse. Probat. ant. Pater non genuit Filium coactè, ergo liberè; ergo potuit non generare. Resp. neg. ant. ad probationem dico. genuit Filium liberè; libertate opposita coactioni, conc. quia non genuit coactè, sibi enim complacuit in tali generatione: libertate oppositâ necessitati, nego; genuit enim Filium necessariò & naturaliter, ita ut impossibile ei fuerit non gignere.

**OBJIC. 6.** Si Pater genuit Filium; aut genuit existentem, aut genuit non existentem; si genuit existentem, genuit id quod antea existerat, quod est absurdum dicere; si genuit non existentem, fuit aliquod instans, in quo Filius non erat, & consequenter non est æternus, nec proinde Deus. Resp. genuisse Filium existentem, non ita tamen ut Filius præfuerit ante generationem; sed ita ut Filius simul fuerit cum generatione: cum ergo illa generatio fuerit æterna, quoniam Pater generat naturaliter, independenter, & immutabiliter Filium; proinde Filius est æternus: quia enim Pater generat naturaliter, idèò quando principium generandi fuit perfectum in Patre & non impedi-



tum, tunc debuit esse generatio : quia secundò generat independenter, impediri non potuit generatio ejus : & quia generat immutabiliter, terminus genitus non habet esse, post non esse : & sic remanet quòd generatio Filii sit æterna.

Objic. ultimò : Vel generatio Filii est completa hodie, vel non ; si est completa : ergo Filius non ampliùs generatur : ergo desit ejus generatio : ergo non est divina ; quidquid enim divinum est, sicut initio caret, sic & fine : si autem non est completa ; ergo est imperfecta : ergo Filius, qui per eam producitur, est imperfectus : ergo non est Deus. Resp. generationem filii esse completam ; non quòd cessaverit esse, aut aliquando cessatura sit ; sed quia semper completa perseverat, estque singulis momentis, quia æterna est ; & quod est æternum, nunquam cessat : unde singulis momentis Pater perfectè generat Filium, secundùm quod habetur Psal. 2. *Ego hodie genui te* ; sic & Ecclesia canit in responsorio lect. 9. Dominicæ 4. adventus ; *Cujus generatio non habet finem*. Hoc determinatum est in Conc. Lateran. cap. 1. in Confessione Fidei, ubi definitur, Patrem ab initio semper sine ullo fine esse generantem, & Filium nascentem, & Spiritum S. procedentem. Ratio hujus est, quia Verbi generatio mensuratur æternitate, quæ est nunc stans & permanens hodie sicut heri : quòd si loquantur de generatione Verbi, tanquam de præteritâ ; hoc est, quia præteritum tempus clariùs exponit completam generationem.

## QUESTIO V.

*Utrum Spiritus sanctus sit Deus?*

**R**EFUTAVIMUS in præcedenti quæstione Arianos negantes divinitatem Filii, nunc ad confutationem Macedonii Archiepiscopi Constantinopolitani transeundum est, qui divinitatem Spiritus S. in dubium revocabat, tenens Spiritum S. esse creaturam factam per Verbum: & sui erroris occasionem desumebat ex Ioan. 1. *Omnia per ipsum facta sunt*; ergo & Spiritus S. inquiebat: & propter hoc, nolebat ipsum esse Deum; contrarium tamen asseret

## CONCLUSIO.

**S**PIRITUS S. est verè Deus. Hæc conclusio nedum est contra Macedonium, sed & contra Arium; qui negans divinitatem Filii, consequenter negabat divinitatem Spiritus S. quem vocabat creaturam creaturæ, productam à Filio, qui erat creatura. Ratio primæ est, quia Spiritus S. procedit à Patre. Ioan. 15. *Mittam vobis Spiritum veritatis, qui à Patre procedit*: si ergo procedit à Patre, est ejusdem naturæ ac Pater; unde quia Pater est Deus, Spiritus S. erit etiam Deus. Ratio 2. desumitur ex Act. 5. ubi beatus Petrus increpat Ananiam, ejusque uxorem Saphiram, quod mentiti essent adversus Spiritum S. & addit, *non esse mentitos hominibus, sed Deo*. Tertiò Sacramenta conferuntur tantum in nomine Dei; quia solus Deus est author & lar-

gitor gratiæ; confertur autem baptifmus in nomine Spiritus S. ficut præcipitur à Christo; *Ite, prædicate, &c. baptizantes eos in nomine Patris, & Filii, & Spiritus S.* Quarto, proprietates Dei attribuuntur Spiritui S. ut immenfitas, *Spiritus Domini replevit orbem terrarum*: Et ſcientia, *nemo novit quæ ſunt Dei niſi Spiritus Dei*. His omnibus adduntur Concilia: Conſtantinopolitanum primum, quod celebratum fuit contra Macedonium, pro hac ſuſtinentâ veritate, Nicæn. &c.

OBJICIENS I. Macedonius id quod habetur Ioan. 1. *Omnia per ipſum facta ſunt, & ſine ipſo factum eſt nihil*; ſed Spiritus S. eſt aliquid & non nihil: ergo per Verbum factus eſt, & ſic non eſt Deus; quæcumque enim facta ſunt, aut creata, habent eſſe poſt non eſſe; & ſic non ſunt æterna. Reſp. cum D. Nazianz. orat. 37. non omnia ſimpliciter fuiſſe facta per Verbum; ſed ea ſolum, quæ ſimpliciter facta ſunt; hoc enim apparet ex eodem textu, ubi non tantum habetur, *ſine ipſo factum eſt nihil*, ſed additur, *quod factum eſt*; ita ut integra periodus ſic debeat pronunciari; *Omnia per ipſum facta ſunt, & ſine ipſo factum eſt nihil, quod factum eſt*. Quia ergo Spiritus S. non eſt factus, proinde non eſt factus per Verbum: unde Chryſoſt. Hom. 4. in illud caput, aſſerit Hæreticos eſſe, qui punctum admittunt poſt vocabulum, *nihil*; quod tamen intelligi debet, ſi fiat hæretico animo, & ex mente Macedonii.

OBJIC. 2. ad Rom. 8. *Spiritus S. poſtulat pro nobis gemitibus inenarrabilibus*, qui autem

orat Deum, est inferior Deo : ergo Spiritus S. non est Deus. Resp. Spiritum S. postulare pro nobis, efficienter & causaliter ; conc. quia per gratiam suam facit ut petamus ; formaliter & immediatè, nego ; quia non est ipse qui orat. Sic Amos 4. habetur, quòd Deus *sit formans montes & creans spiritum*, intelligitur de ventis, non de personâ Spiritus S. Dices, ex Matth. 11. *Nemo novit Patrem, nisi Filius* : ergo Spiritus sanctus non cognoscit illum : ergo non est Deus. Resp. neg. conseq. quia in eâdem Scripturâ habetur, *Nemo cognoscit secreta Dei, nisi spiritus Dei*, qui textus non impedit deitatem Filii, nec ergo prior Spiritus S. istæ autem particulæ excludunt creaturas.

Objic. 3. Joan. 16. *Non loquetur Paracletus à seipso ; sed quacumque audieris, loquetur* : ergo ab alio dirigitur : ergo non est Deus. Resp. non loqui à seipso, quia verè ab alio accipit suam essentiam, suam naturam, & suam scientiam, scilicet à Patre & Filio : hoc tamen non impedit ejus divinitatem, sicut nec divinitas Filii impeditur, licet dicat, *Verba quæ loquor vobis, à me ipso non loquor*. Si dicat Nazianz. orat. 37. *Sapientes sui temporis non convenire de divinitate Spiritus S. per sapientes, non intelligi Doctores Catholicos ; sed vel Philosophos Paganos, vel Hæreticos hac in parte dissentientes ab Ecclesiâ, quos vocat sapientes per ironiam, quia jactabant se esse sapientes, cum reverà tales non essent*. Si etiam objiciatur Basil. lib. 3. contra Eunomium dicens, *Spiritum S. esse dignitate secundum à Filio* : intelligendus est de ordine originis, secundum quem Pater est prior

Filio, quia Filius est ab illo, non è contrà; & Pater & Filius sunt priores Spiritu S. quia est ab illis, non versa vice; non verò intelligitur de dignitate perfectionis, quasi sit aliqua perfectio in Filio, quæ non sit in Spiritu sancto.

## QUESTIO VI.

*Verum tres personæ sint unus Deus.*

CONSTAT ex antedictis tres personas esse realiter distinctas; liquet etiam quamlibet esse Deum: an autem tres illæ personæ sint tres Dii, vel unus Deus, hoc est, quod quaerimus. Hæc quaestio ita difficilis videtur vanis prophanorum ingeniis; ut qui Deum unum agnoscebant, unicam tantum agnoscerent personam; & qui tres personas distinctas realiter fatebantur, tres etiam Deos auderent profiteri.

### CONCLUSIO.

PATER, FILIUS, ET SPIRITUS S. sunt tantum unus Deus: contra Tritheitas asserentes, tres personas esse tres spiritus æternos, essentiali numero differentes. Hæc conclusio determinatur in Conciliis Nicæno, Constantinopolitano, Florentino, & aliis. Confirmatur ex D. Athan. *Non tres dii, sed unus est Deus*; & D. Bern. de Consider. cap. 8. *Dicamus tres, inquit, non ad præjudicium unitatis dicamus unum, non ad confusionem Trinitatis.* Idem habetur Deuter. 6. *Audi Israël, Dominus Deus tuus unus est.*

RATIO non deest ad probandam hanc veri-

tatem ; quia natura Dei communicabilis est sine sui divisione ; & sic , quando Pater per generationem communicat suam naturam Filio , & Pater & Filius Spiritui S. communicant eandem numero naturam ; ad differentiam generationis humanæ , ubi Pater communicat eandem speciem naturam Filio , non tamen eandem numero ; quia natura humana est finita , quæ communicatur cum sui divisione.

• **O B J E C. I.** Verus & unus Deus est Pater Christi ; sed tres personæ non sunt Pater Christi : ergo non sunt unus Deus. Resp. neg. conclusionem ; quia variatur suppositio terminorum , in majori enim sumitur Deus pro persona Patris , quæ revera est Pater Christi , in conclusione verò sumitur pro essentia , seu pro Deo in se considerato ; & sic conclusio nulla est. Dices , Nullus Deus est tres personæ ; Pater enim non est tres personæ , nec Filius , nec Spiritus S. ergo Deus non est tres personæ : ergo non est una deitas in tribus personis. Resp. concedendo antecedens : negando consequentiam ; fit enim adhuc variatio terminorum ; quia in antecedenti nomen Dei accipitur personaliter , ut patet ex illo signo adjuncto , *nullus* ; in consequentiâ verò sumitur essentialiter ; & sic variatur suppositio terminorum : Non dicimus enim , quòd aliquis Deus , id est aliqua persona , sit tres personæ ; sed dicimus , quòd Deus in se spectatus sit tres personæ ; & sic non valet illa argumentatio ; sicut nec ista : nullus homo est species , ergo homo non est species ; antecedens enim sumitur in particulari , & consequentiâ in communi ,

Objic. 2. Quæ sunt eadem uni tertio, sunt eadem inter se: ergo si personæ sunt unum in essentiâ, & non distinguuntur realiter ab ea, erunt etiam unum inter se: Sed personæ distinguuntur realiter inter se: ergo non sunt unum in essentiâ; & sic non erit unus Deus, qui communicetur tribus personis. Resp. personas esse easdem inter se, illâ identitate, qua sunt eadem in essentiâ D. Sicut ergo sunt unum essentialiter in essentiâ, sic etiam sunt unum essentialiter inter se: illa autem identitas essentialis non impedit, quin distinguantur realiter personaliter. Dices, Personæ sunt unum realiter in essentiâ: non ergo sunt unum inter se realiter. Resp. neg. conseq. ad id autem quod dicitur; *quacumque sunt eadem uni tertio, sunt eadem inter se*; hoc verum est, quando illud tertium non est infinitum: in proposito autem, essentia D. quæ est tertium illud, est infinita; & sic indentificat sibi realiter personas: personæ verò, quæ non sunt infinitæ, non sese invicem indentificant; & sic licet tres personæ distinguantur realiter inter se, sunt tamen unum in essentiâ D. quæ est infinita.

Objic. 3. Si tres personæ haberent eandem numero essentiam, posset dici quod Deus esset genitus simul & ingenitus; quod est contradictorium. Resp. hoc posse dici; quia Pater, qui est Deus, est ingenitus; & Filius, qui est etiam Deus, est genitus: non tamen est contradictio; quia subjectum, nempe Deus non sumitur eodem modo; accipitur enim modò pro persona Patris, modò pro persona Filii, Dices, sequeretur etiam, quod

posset dici, Pater est hic Deus, Filius est hic Deus; ergo Pater est Filius. Resp. neg. consequentiam; est enim, inquit Scotus, fallacia figuræ dictionis; quia mutatur quale quid, seu commune, in hoc aliquod, idest, singulare seu personale: in præmissis enim, hic Deus, sumitur in communi, pro Deo in se considerato; & in consequentiâ, Pater & Filius sumuntur personaliter.

---

### QUESTIO VII.

*Vtrum in Deo sint tres existentia relativæ.*

**E**XISTENTIA est actualitas entis; quæ unumquodque ens dicitur actu esse quando de facto existit in rerum naturâ: quæritur autem in hac quæstione, an quælibet persona D. habeat existentiam sibi propriam quâ actu existat; quæ existentia, si dentur, debent vocari relativæ, in quantum conveniunt personis constitutis per relationes.

#### CONCLUSIO.

**S**UNT tres existentia relativæ, quarum quælibet convenit cuilibet personæ. Ratio hujus est; quia quælibet persona, ut distincta ab essentiâ D. existit actu; sed non potest existere nisi per existentiam relativam; quia alia est existentia qua Deus existit, & aliæ sunt existentia quibus personæ existunt: ergo erunt tres existentia relativæ realiter distinctæ. Præterea, relatio in creatis habet propriam existentiam distinctam formaliter ab



existentia subjecti : ergo à fortiori in divinis  
quælibet relatio habet existentiam distinctam  
ab existentia essentia; & hoc est, quod dicit  
Aug. 7. de Trinit. cap. 4. *Aliud est, esse Deum;  
aliud, esse Patrem.*

Ob j i'c. 1. Patres dicentes, esse tantum  
unum esse in Deo; & sic non esse tria, nec  
proinde tres existentias. Resp. Patres intelli-  
gi de esse primario & fundamentalì, nimirum  
de esse essentia; quoniam enim est tantum una  
essentia, sic est tantum unum esse fundamen-  
tale, quod est radix omnium quæ sunt in Deo:  
non est ergo dicendum quod sint plura esse  
simpliciter in Deo, sed addendum semper, plu-  
ra esse relativa & personalia; ne sit periculum  
erroris, & ne ex hoc conjiciatur, esse plures in  
Deo essentias.

Objic. 2. Si sint tres existentia; in Deo; erunt  
tres durationes; duratio enim nihil aliud est  
quam permanentia, seu continuatio existentia;  
sed si sint tres durationes, erunt tres æternita-  
tes; duratio enim interminabilis est æternitas;  
& si sint tres æternitates, erunt tres æterni,  
contra Athan. dicentem; *Æternus Pater, æter-  
nus Filius, æternus Spiritus S. &c. non tamen  
tres æterni.* Resp. non esse tres durationes, nec  
tres æternitates; quia licet quælibet persona  
duret, seu permaneat in existentia, durant ta-  
men personæ per æternitatem, quæ est absoluta  
& eadem; & consequenter non multiplicatur:  
& sic non sunt dicendi, tres æterni; licet pos-  
sint dici tres personæ æternæ; sicut Pater, Fi-  
lius, & Spiritus S. non dicuntur tres Dii, licet  
possint dici tres personæ divinae,

**OBJ 1 c. 3.** Si essent tres existentiae relativae distinctae ab existentia essentiae, hoc esset quia existentiae relativae sunt incommunibabiles, & existentia essentiae est absoluta & communicabilis: sed haec ratio non est sufficiens; diversi enim modi existendi non constituunt diversas existentias, ut patet ex natura humana in Verbo, quae non habet aliam existentiam, quam haberet in proprio supposito: ergo diversi modi existendi non faciunt diversas existentias. *Resp.* non facere diversas existentias, quando modi illi diversi reperiuntur in unica entitate, ut patet in natura humana, quae habuit eandem existentiam in Verbo, quam habuisset in proprio supposito: Quando autem reperiuntur diversae entitates, existentiae earum sunt diversae, ut in proposito; ubi alia est entitas essentiae, alia entitas personarum; quoniam personae important diversam formalitatem à formalitate essentiae; & sic diversae erunt existentiae personarum & essentiae.

**OBJ 1 c. 4.** Si sint in Deo tres existentiae, erunt in eo tres essentiae; quia existentia nihil est aliud quam essentia actualis. *Resp.* non esse tres essentias sumptas in rigore; quia per essentiam intelligimus primum principium absolutum à quo fluunt omnia quae sunt in divinis; possunt tamen dici tres quidditates relativae; alia enim est quidditas seu ratio formalis paternitatis, alia filiationis, alia spirationis passivae; Cum ergo dicitur, existentia est essentia actualis; idest, est entitas actualis; sive sit essentia proprie dicta, sive non. Dices, si essent tres existentiae relativae, essent qua-

tuor ; quia est adhuc una absoluta. Resp. neg. consequentiam ; quia illæ tres existentiaæ relativæ identificantur realiter cum existentia absoluta ; & sic non faciunt quaternitatem : quoniam ad numerum non sufficit formalis , sed requiritur realis distinctio.

---

### QUESTIO VIII.

*Utrum in Deo sint tres subsistentiaæ relative.*

**E**XISTENTIA, ut diximus, est actualitas entis quâ ens actu existit ; subsistentia autem est veluti modus existentiaæ, cujus beneficio aliquid existit per se : hic modus convenit subsistentiis, quæ definiuntur entia per se subsistentia. Existentia ergo est veluti quid commune ad subsistentiam & inhærentiam ; quidquid enim actu est ; vel existit per se, idest, independenter à subjecto, & tunc dicitur habere subsistentiam, quæ est modus existendi substantiaæ ; vel existit in alio, & tunc habet inhærentiam, quæ est modus existendi accidentium. Porro subsistentia, seu existentia per se, sumitur duobus modis. Primò, ut opponitur inhærenti, & hoc modo omnis substantia per se subsistit ; sive sit incompleta, ut anima ; sive sit completa, ut homo : sive sit suppositata, ut Petrus ; sive sit non suppositata, ut humanitas Christi, quæ non habuit proprium suppositum. Secundò sumitur, prout dicit existentiam perfectissimam & independentem ab alio, tanquam à sustentante ;

quomodo solum convenit vel supposito substantiali, vel alicui naturæ quæ perfectissimè existit, antequam sit in supposito, & sic est sola naturæ divina, quæ antequam intelligatur esse in personis divinis, perfectissimè existit, & independentem ab illis. Natura autem humana in Christo non habuit hanc subsistentiam; quia dependet à supposito Verbi, tanquam à sustentante; est enim Verbum quod eam sustentat. Tandem, subsistentia sicut & existentia, est duplex: una absoluta & communicabilis, quæ v. g. natura D. ut præcisa à personis perfectissimè existit, & subsistit: alia incommunicabilis, quæ convenit personis, quoniam incommunicabiliter existunt, & subsistunt.

## CONCLUSIO.

**S**UNT tres subsistentiæ in Deo, anathematizat enim Concilium Constantinop. 2. eos, qui non consentient unam essentiam Patris, Filii, & Spiritus S. esse adorandam in tribus subsistentiis; unde etiam Concil. Constantinop. 3. determinat, quodd Deitas in tribus subsistentiis, & tres subsistentiæ in Deitate cognoscuntur. Ratio hujus est; quia subsistentia relativa, hypostasis, & persona, unum & idem sunt; sed sunt tres personæ in Deo: ergo & tres subsistentiæ. Deinde, humanitas Christi assumpta est à subsistentiâ Verbi, quæ terminavit humanam naturam; sed subsistentia Patris non eam terminavit, benè autem subsistentia Filii: ergo alia est subsistentia Patris, alia Filii, &c.

**O**BJEC. Si sint tres subsistentiæ relativæ; quælibet persona habebit duas subsistentias,

nempe relativam & absolutam; absolutam, ratione naturæ divinæ; & relativam ratione personæ. Resp. utrumque esse verum; Pater enim v. g. habet subsistentiam absolutam, inquantum Deus est; & subsistentiam relativam, inquantum Pater: Non repugnat autem esse duas subsistentias in eadem re diversimodè consideratâ, maximè quando subsistentiæ sunt diversæ rationis, ut in proposito.

O B j 1 c. 2. Ergo eadem persona habet duas terminaciones, sicut duas subsistentias. Resp. esse quidem duas terminaciones, sed diversi generis; quælibet enim persona per subsistentiam absolutam terminat essentiam D. secundum suum esse absolutum & communicabile; & per subsistentiam relativam terminat eandem essentiam D. secundum suum esse incommunicabile, personale & relativum.

O B j 1 c. 3. Subsistere dicit perfectionem; sed relatio non est perfecta: ergo non subsistit. Dist. ant. subsistere absolutum & communicabile, conc. relativum, nego. Dices, supposita per essentiam habent esse: ergo & subsistentiam. Distinguo, habent esse absolutum, conc. incommunicabile & relativum, nego. Dices, natura divina subsistit subsistentiâ absolutâ: ergo non indiget relativis: ergo non dantur. Resp. non indiget relativis, ut ab illis perficiatur, concedo: propter exigentiam naturæ, nego: quælibet enim natura exigit suppositari, & existere in personâ; & sic exigit subsistentiam personalem, licet ab illâ non perficiatur.

## Q U Æ S T I O I X.

*An sint in Deo una existentia absoluta, & una subsistentia absoluta.*

**D**I X I M U S, quamlibet personam in se formaliter consideratam esse ens actu, est enim aliquid & non nihil; & sic quælibet persona habet existentiam relativam: quælibet etiam persona est substantialis: ergo per se subsistit; proindeque sunt etiam tres subsistentiæ relativæ in divinis: An autem præter illas existentias & subsistentias relativas detur existentia absoluta, & subsistentia absoluta, quæritur.

## C O N C L U S I O.

**D**A N T U R existentia & subsistentia absoluta in Deo: Deus enim, ut Deus, perfectissimè existit & subsistit; nam in primo instanti quo intelligitur essentia divina, illa est ens per se, & de se actu existens singulariter, priusquam sit in suppositis divinis: Quod non convenit naturæ creatæ; quia nulla natura creata habet esse complerum priusquam in supposito existat: ergo in illo instanti natura divina præintellecta personis existit existentia absoluta: In illo etiam priori signo subsistit, quia existit per se, quod est subsistere; & sic est in Deo subsistentia absoluta. Illa autem existentia & subsistentia absoluta conveniunt tribus personis; quoniam essentia existens & subsistens illis convenit.

O B J E C T.

**Objic. 1.** Deus non est Trinus per se, sed per relationes; ergo non existit per se, sed per relationes. **Resp.** negando consequentiam: quia Deus, ut Deus, & sine relationibus, non habet unde sit Trinus; sed habet unde existat; quia ut sic, est ens actualissimum: Licet ergo non sit Trinus nisi per personas, tamen existit per se, sine personis. Dices, Subsistentia idem est ac hypostasis; sed non datur hypostasis absoluta; est enim idem ac persona: ergo non datur subsistentia absoluta. **Resp.** subsistentiam incommunicabilem idem esse, ac hypostasim & personam; subsistentia autem communicabilis longè differt à persona & hypostasi.

**Objic. 2.** Deus existit in suppositis: ergo existit per existentias suppositorum: ergo nulla illi convenit præcisè existentia absoluta. **Resp.** negando consequentiam: quoniam enim entitas essentiæ non est entitas personarum; essentia proinde non existet per existentiam suppositorum, sed per propriam existentiam, licet existentia essentiæ sit in suppositis. Dices, Ergo sunt quatuor existentes in Deo, si sunt quatuor existentia. **Resp.** non esse quatuor existentias, nec quatuor existentes; quia tres existentia relativæ identificantur realiter cum existentia absolutâ; & tres existentes relativè, scilicet tres personæ identificantur realiter cum existenti absolutè, nempe cum Deo; Numerus autem non coalescit, nisi ex distinctis realiter; & sic non erunt quatuor existentia, nec quatuor existentes.

**Objic. 3.** Si præter existentias & subsisten-

tias relativas esset aliquod existens & subsistens absolutum, ut Deus in se consideratus; tali existenti & subsistenti absoluto possent competere actiones: quod est falsum; quia actiones sunt suppositorum: ergo non datur existens absolutum, nec existentia absoluta. Resp. actiones in Deo esse vel essentielles, vel notionales; essentielles competunt Deo, tum *ad intra*, tum *ad extra*: notionales verò non competunt nisi personis, ut v. g. generare & spirare. Dixi, quòd actiones essentielles competunt Deo, ut Deus est; in illo enim instanti quo præsupponitur ad personas, Deus intelligit se, & amat se; & hæ sunt actiones, quas aliquando vocavimus operativas; actiones etiam *ad extra* possunt convenire Deo, ut Deus est; si enim Deus per impossibile esset sine personis, non minùs produceret creaturas; quia productio creaturarum fit per volitionem essentialem quæ est in Deo, ut Deus est. Quod si actiones dicantur esse suppositorum, hoc est, suppositorum, vel singularium se habentium ut supposita; unde licet Deus, ut Deus est, non sit suppositum; tamen quia est ex se singularissimus sine personis, idèd actiones possunt illi convenire.

Objc. 4. actiones notionales per quas producantur personæ, præsupponi actionibus *ad extra*; & proinde Deum præcisum à personis non posse agere *ad extra*. Resp. actiones notionales præsupponuntur quidem ratione suæ necessitatis, & quasi per accidens, in quantum producit necessariò *ad intra*, & liberè *ad extra*; unde non potest producere *ad extra*, quin ante



# DE DEO TRINO. 315

produxerit *ad intra* : absolutè tamen non præsupponuntur ; si enim per impossibile nulla esset productio *ad intra* , non minus Deus *ad extra* produceret. Quòd si creaturæ attribuantur tribus personis , hoc est , quasi per accidens ; in quantum creaturæ producuntur per volitionem essentialem , quæ est in tribus personis.

## QUESTIO X.

*Verùm in Deo sint tres substantia.*

POTEST dici , quòd in Deo ens & omnis transcendentia relativè sumpta multiplicentur ; & absolutè considerata , maneant unum ; & sic sunt plura entia in Deo , plures res , plura aliqua , plura una , vera & bona relativa ; & est unum ens , una res , unum aliquid , unum , verum & bonum absolutum : relatio enim quælibet , ut distincta ab essentiâ , est ens , res , &c. & sic cum sint plures relationes in Deo , sunt plura entia relativè sumpta : Cavete tamen , ne dicatis , in Deo esse plura entia sine adjecto , plures res , &c. sed semper addite , relativa. Possunt etiam dici in divinis res hypostasies , & reverà debent dici ; sicut tres substantiæ & existentia relative : ne tamen dicatis tres esse essentias , aut naturas , aut divinitates relativas : An autem sint tres substantia , cum explicatione respondebitur.

## CONCLUSIO.

SI substantia sumatur pro essentiâ , seu naturâ rei , sicut Aristoteles usurpavit , di-

cendo; univoca esse ea quorum substantia est eadem, id est, natura, vel essentia, pro tunc non debent dici tres substantiæ. Si secundò sumatur, prout venit nomen substantiæ à substando accidentibus: nec sunt tres, nec una. Si tertio sumatur pro eo quod per se subsistit; pro tunc possunt dici tres substantiæ. Ratio primi est, quia est tantum in Deo una natura: ergo tantum una substantia sumendo substantiam pro essentiâ. Ratio secundi est, quia Deus non substat accidentibus: ergo nulla est in eo substantia talis. Sic debet intelligi Aug. dicens 7. de Trinit. cap. 5. Deum abusive dici substantiam. Ratio tertii est; quia tres personæ sunt tria entia realiter distincta; non sunt autem tria accidentia: ergo sunt tres substantiæ; quandoquidem sunt tria entia, quorum quodlibet per se subsistit & habet propriam subsistentiam relativam, ut diximus in conclusione præcedenti: Unde Boëtius definit personam, naturæ intellectualis individuum substantiam: quoniam ergo sunt tres personæ; sunt etiam tres substantiæ: Hoc sensu dicit Aug. 7. de Trinit. cap. 6. admitti posse tres substantias; & Hilarius lib. de Synodis, affirmat se interfuisse cuidam Synodo, ubi expressè admissum est, tres esse substantias. Non dicatis tamen esse tres substantias simpliciter; sed semper addite, tres esse substantias relativas.



## QUESTIO VI.

*Quanam sint entia, quæ in Deo multiplicentur;  
vel non.*

**P**RÆDICATORUM quæ sunt in divinis; alia sunt absoluta & infinita formaliter; ut essentia, modi intrinseci, & attributa; alia non sunt infinita formaliter, sed tantum identicè; ratione subjecti in quo sunt; ut relationes divinæ, quæ præcisè consideratæ ut sic, nec sunt finitæ, nec infinitæ formaliter; licet sint infinitæ, in quantum sunt in Deo.

## CONCLUSIO.

**P**RÆDICATA absoluta & infinita formaliter non multiplicantur: sed tantum prædicata relativa. Ratio primæ partis est, quia ens infinitum se communicat sine sui multiplicatione: & sic licet divinitas, infinitas, & immensitas communicentur Patri, Filio, & Spiritui S. non tamen multiplicantur, unde non debent dici tres Dii, nec tres infiniti, nec tres æterni, nec tres immensi; sed unus Deus, unus immensus, & æternus. Ratio secundæ est, quia prædicata relativa non sunt formaliter infinita: ergo quando communicantur, multiplicantur, communicantur enim cum sui divisione: & sic possunt dici tres personæ, tres relationes, tres subsistentiæ, &c.

O b j e c. tres personæ sunt æternæ: ergo sunt in illis tres æternitates: ergo æternitas, quæ est prædicatum absolutum & infinitum,

O iij

multiplicatur. Resp. quòd tres personæ sint æternæ ; sed per eandem æternitatem quæ est una numero in illis : & sic non multiplicatur æternitas ; sicut licet tres personæ sint divinæ , tamen non multiplicatur divinitas , imò eadem numero & indivisa remanet. Porro , licet dicantur tres personæ æternæ , adjectivè ; tamen non debent dici tres æterni substantivè , sed unus æternus ; sicut nec tres immensi , quod patebit ex duabus sequentibus regulis.

Prima. Ad multiplicationem nominum substantivorum , requiritur multiplicatio formarum ; quandoquidem ergo divinitas , immensitas , & æternitas non multiplicantur in personis ; imò est eadem divinitas , immentitas , & æternitas ; quæ est in Patre , Filio , & Spiritu S. non debent dici substantivè tres Dii , tres æterni , nec tres immensi. Secunda. Ad multiplicationem nominum adjectivorum , non requiritur multiplicatio formarum ; sed sufficit multiplicatio suppositorum : idèd tres personæ possunt dici adjectivè , divinæ ; quia licet non multiplicetur in illis divinitas ; tamen multiplicantur supposita , in quibus est ipsa divinitas ; ex quibus patet , quod jure dicat Athanasius ; *Æternus Pater , æternus Filius , æternus Spiritus S. non tamen tres æterni ; sed unus æternus.*



✠ ✠

## CAPUT III.

*De Productionibus Divinis;*

**Q**UANDOQUIDEM diximus, in divinis esse tres personas, quarum una est improducta, nempe Pater; & alia producta, nempe Verbum, & Spiritus S. ideo capiti de Personis divinis in genere merito addimus caput de productionibus divinis in communi.

---

 QUESTIO PRIMA.
*An sit Productio in Divinis.*

**H**Æc nomina, Productio, Processio, Origo, & Emanatio, pro eodem sumuntur; una enim & eadem actio, quatenus est actus principii producentis, dicitur productio: quatenus verò est veluti via ad terminum, dicitur processio, origo, & emanatio; ita ut productio sit actio quæ produciens producit terminum; processio verò est veluti exitus ejusdem termini à suo principio. Processio duplex est: Transiens scilicet, quæ terminus exit extra principium, vel causam, ut calefactio, quæ est processio caloris transeuntis ab igne in lignum, & Immanens, cujus terminus manet intra suum principium; sic productio verbi mentalis est processio immanens, quia verbum

mentale productum residet in intellectu producente. Productio immanens duplex est; physica, & metaphysica. Physica est quâ unum ab alio procedit per mutationem dependentiam, & diversitatem naturæ; sic nostrum verbum mentale exit ab intellectu per productionem physicam, quoniam procedit cum mutatione, quia transit à non esse ad esse: Cum dependentiâ, quia potuit produci, & non produci: Tandem procedit cum diversitate naturæ, quia intellectus est substantia, & verbum mentale, accidens. Productio metaphysica, est productio termini, vel emanatio unius ab altero, seclusâ omni mutatione, dependentiâ, & diversitate naturæ, remanentibus tantum his duobus respectibus, à quo alius, & qui ab alio; intellectus enim produceus habet hunc respectum, à quo alius; Verbum enim est ab illo: Verbum autem habet hunc respectum, qui ab alio; quia est ab intellectu producente.

## CONCLUSIO.

**D**ATUR vera productio, seu processio in divinis; immanens, & metaphysica. Probatur prima pars: Ioan 8. Filius dicit, *Ego ex Deo processi*: & cap. 14. de Spiritu S. dicitur; *qui à Patre procedit*. Hoc confirmant auctoritates Patrum & Concilii Nicæni & D. Athanasii. Hæc conclusio naturali ratione probari non potest; aliàs mysterium Trinitatis esset naturaliter cognoscibile, quod est falsum; tamen Scotus, suppositâ fide, eam suadet hoc discursu: Quando aliquid secundum se est principium productivum, in quocumque illud est, ibi est principium productivum.

sed intellectus habens objectum actu intelligibile sibi præsens, ex se est principium productivum notitiæ genitæ: ergo in quocumque reperitur intellectus habens objectum actu intelligibile sibi præsens, in eo erit principium productivum notitiæ genitæ: Sed in Deo est intellectus habens objectum actu intelligibile sibi præsens, scilicet essentiam D. ergo intellectus in Deo erit principium productivum notitiæ genitæ: Et non qualiscumque, sed sibi adæquatæ; quia omne principium productivum, quando est infinitum, potest producere terminum sibi adæquatum; at nulla notitia adæquatur memoriæ fœcundæ personæ divinæ producentis, nisi sit notitia infinita: ergo memoria fœcunda personæ producentis erit productiva notitiæ genitæ infinitæ: ergo erit productiva personæ subsistentis, quia nullum infinitum potest existere in alio: ergo denique erit productiva personæ divinæ; quia omne quod est infinitum, est divinum: Et sic concluditur, dari in divinis processionem per intellectum sic potest dici de voluntate, quæ habens essentiam sibi præsentem actu & summè diligibilem, potest producere circa illam amorem infinitum subsistentem.

Probat 2. & 3. pars; quòd productio in divinis sit immanens & metaphysica. Primò est immanens; quia processionem divinæ sunt actus intellectus & voluntatis, quæ sunt potentie immanentes, quarum actu remanent intra potentiam. Secundò probatur quòd sit metaphysica: Primò enim est sine mutatione, quia Verbum non transit à non esse ad esse,

imò est ab æterno, & ante luciferum genitum; Secundo, sine dependentiâ procedit, quia Pater, non potuit ipsum non producere, unde Pater non est dicendus factor, seu causa Verbi; sed tantum principium. Tertiò procedit sine diversitate naturæ; dicit enim Filius, *Pater & ego unum sumus.*

Objic. Si ex discursu Scoti patet intellectum esse productivum notitiæ genitæ: ergo, quoniam intellectus est in Filio, proinde Filius habet principium productivum, & sic potest producere. Resp. hoc debere intelligi cum limitatione; quòd ubicumque sit intellectus, ibi sit principium notitiæ genitæ, ubi intellectus jam non habet terminum adæquatum; quando autem intellectus est in Filio, jam habet terminum adæquatum, nempe ipsum Filium; & sic Filius non debet dici habere principium productivum notitiæ genitæ.

Objic. 2. Intellectus ut est in Deo, quatenus Deus, jam habet suum terminum adæquatum, nempe notitiam essentialem: ergo cum est in Patre, non potest habere terminum; & sic in Patre non erit productio. Resp. intellectus ut in Deo est, habet terminum adæquatum; ut operativus, conc. ut productivus, nego: licet ergo Deus, ut Deus, habeat notitiam essentialem, quæ illi repræsentat omne intelligibile; tamen potest adhuc habere terminum notionalem sui intellectus, nempe Verbum, quod est notitia genita. Dices, Intellectus producit, ut perficiatur: ergo intellectus divinus non producit. Antecedens est verum, quando intellectus producit ex inopiâ; intel-



lectus autem Patris producit ex fœcunditate.

Objic. Si daretur productio in divinis, darentur produciens & productum; si autem darentur produciens & productum, produciens esset causa, & productum effectus; sed effectus dicit dependentiam: ergo non debet dari productio in divinis. Resp. dari in divinis produciens & productum, non verò causam & effectum; Pater enim est principium Filii, non causa. Instabis, Causa est quæ dat esse alteri; sed principium dat esse alteri; principiatio scilicet: ergo principium est causa. Resp. principium & causam dare esse alteri, sed diversimodè; causa enim dat esse alteri distincto in natura; principium verò dat tantum esse alteri, sive illud cui dat esse, sit aliud in natura, sive non; in divinis autem Filius non est aliud in natura à Patre; ergo est principium, non causa; causam enim definit Aristoteles: *id ad quod sequitur aliud*: Ubi per *aliud*, denotatur distinctio in natura. Dices, Productio est actio; sed actio est causalitas causæ efficientis: ergo, si in divinis sit actio & productio, erit etiam causalitas, & sic Pater erit causa. Resp. actionem physicam esse causalitatem causæ efficientis; actio autem metaphysica non est causalitas causæ efficientis: in proposito autem, productio est actio, sed metaphysica tantum, non physica, ut diximus.

Objic. in secundam partem: Persona producta non remanet in producente; quia distinguitur realiter ab illa: ergo productio per quam producitur, non est immanens. Resp. negando antecedens; licet enim productum

distinguatur realiter à producente; tamen unum est in alio per circumincessionem, & ratione naturæ divinæ quæ est eadem numero in producente ac in producto, quod non impedit distinctionem realem: distinctio enim realis facit ut una persona non sit alia: non tamen impedit, quin una sit in alia.

---

## QUESTIO II.

### *Quot sint Productiones in Divinis.*

POSTQUAM resolvimus, productionem esse in divinis; nunc ad numerum productionum transeundum est: hîc quærimus ergo quot sint productiones in Deo. Hæc quæstio vel intelligitur de productionibus ejusdem generis, an scilicet sint plures generationes aut plures spirationes: vel de productionibus diversæ rationis; utrum scilicet, sint plures productiones in Deo, quarum una sit generatio, alia spiratio. Si dicimus generationem & spirationem esse diversæ rationis, non dicimus tamen esse diversæ rationis genericæ, vel specificæ; quia nefas est astruere genus aut speciem in divinis; sed dicuntur diversæ rationis formalis; generatio enim & spiratio differunt plusquam individualiter, & plusquam duæ generationes: ergo differunt formaliter; quia alia est ratio formalis generationis, alia spirationis.

## CONCLUSIO PRIMA.

**S**UNT duæ productiones in divinis ; per primam quarum producitur Verbum , & per secundam Spiritus S. De priori loquitur Joannes cap. 8. *Ego ex Deo processi* ; de posteriori Symbolum Nicænum dicens de Spiritu S. *Qui à Patre Filioque procedit*. Ratio conclusionis est ; quia tot sunt in divinis productiones, quot sunt principia productiva ; sed sunt duo, intellectus scilicet & voluntas ; ergo & duæ productiones diversæ rationis ; quia intellectus producit naturaliter , & voluntas liberè. Neque ista duo principia possunt reduci ad aliquod tertium ; quia non potest reperiri aliquod principium, quod sit productivum per modum naturæ , & per modum libertatis , aliàs oppositi modi producendi convenirent uni & eidem principio.

**O B J E C T.** Quod est primum principium, non potest ab alio procedere ; sed Filius & Spiritus S. sunt primum principium, quia sunt Deus : ergo non possunt ab alio procedere. **Resp.** quod est primum principium tum ad intra, tum ad extra, non potest ab alio produci ; quod verò est primum principium tantum ad extra ; & non ad intra, produci potest : Sed Verbum & Spiritus S. sunt primum principium ad extra tantum, & non ad intra : ergo possunt ab alio procedere. Dices , Una productio sufficit ad producendum omne producibile in divinis, aliàs esset imperfecta & finita : ergo non sunt duæ. **Resp.** unam non sufficere, quia repugnat quòd intellectus producat Spiritum S. non tamen propterea est imperfectus, quia pro-

ducit quidquid producere potest in suo genere?

**O B J E C T.** Unius naturæ est tantum unus modus producendi; sed in Deo est tantum una natura: ergo & unus modus producendi. **Resp.** majorem intelligi de creatis; ubi productio, seu generatio fit per naturam, & sic est tantum unus modus producendi; non verò de increatis, ubi productiones fiunt per potentias intellectuales: cum ergo sint duæ potentiz intellectuales in divinis, erunt quoque duo modi producendi. Dices, Est tantum unus terminus in divinis: ergo est una productio. Antecedens probatur; quia terminus formalis productionis divinæ, est essentia divina. **Resp.** duplicem esse terminum in divinis, scilicet, communicatum, & productum: essentia est quidem formalis terminus communicatus, quia per generationem communicatur Filio, & per spirationem Spiritus S. sed sunt duo termini producti, nempe Filius; & Spiritus S.

#### CONCLUSIO SECUNDA.

**S**UNT tantum in Deo duæ productiones; si enim essent plures quam duæ; vel essent diversæ rationis, vel ejusdem. Si essent diversæ rationis præter generationem & spirationem, daretur alia productio, quod non est possibile; sunt enim tantum duæ potentiz productivæ, nempe intellectus qui generat, & voluntas quæ spirat: ergo præter generationem & spirationem non potest dari alia productio diversæ rationis. Si essent verò plures productiones, quam duæ, ejusdem rationis; essent plures generationes & plures spirationes, quod est falsum: nam ibi non potest re-

periri duplex generatio, ubi prima habet terminum adæquatum & exhaustientem potentiam generativam; sed prima generatio, quâ Pater generat Filium, est adæquata ipsi Patri, & Filius productus exhaurit totam potentiam generandi Patris; quia Filius est infinitus: ergo præter primam, secunda dari non potest. Præterea, Pater manet in continuo producere, & permanentèr producit Filium. Sic dicendum est de spiratione, quæ necessariò est unica in Patre & Filio; quia terminus productus per spirationem, nempe Spiritus S. exhaurit totam potentiam spirativam quæ est in Patre & Filio, & sic præter Spiritum S. non potest spirari alia persona. Et hoc est, quod dicit Augustinus loquens de Filio; *Immoderata esset generatio, si Filius genitus nepotem gigneret Patri; quia ipse nepos imperfectus diceretur, nisi suo avo pronepotem gigneret.*

Objic. I. Natura in quantum natura, est principium productivum: ergo sunt tria principia productiva in divinis; scilicet natura, intellectus & voluntas: ergo sunt tres productiones diversæ rationis. Resp. naturam seorsim sumptam non esse principium productionis ad intra; sed cum intellectu & voluntate; ita quod Pater per intellectum cognoscens essentiam, producit Filium; & sic essentia est principium productivum, sed inadæquatum; concurret enim ad productionem Verbi, tanquam objectum. Dices: Potentia & bonitas sunt principia productiva. Ad extra, conc. ad intra, nego. Dices, idem principium potest habere plures terminos diversæ ra-

tionis : ergo malè ex dualitate principiorum concludimus dualitatem productionum. Probatur antecedens ; quia intellectus divinus habet pro terminis notitiam essentialem , quæ convenit illi ut Deus est ; & notitiam genitam quæ illi convenit , ut est Pater ; illi autem termini sunt diversæ rationis. Resp. idem principium potest habere plures terminos : quorum unus sit productus , alius improductus , conc. plures terminos productos , nego : Notitia autem essentialis est quidem terminus intellectus divini , sed improductus & fundatus in simplici radicatione ; notitia autem genita est terminus productus. Dices , Intellectus noster potest habere plures terminos productos , v. g. plura verba mentis : ergo & divinus , cujus intellectus non est minùs fœcundus. Resp. negando paritatem ; terminus enim nostri intellectus non est adæquatus potentiz ; & sic , uno producto , potest alium actum producere : non sic de Deo , qui unico actu omnia intelligit & unico actu omnia amat ; & sic unius potentiz est tantum unus terminus.

O B J E C. 2. Filius & Spiritus S. æquè possunt generare , ac Pater ; & spirare ; quia habent principium formale productivum , scilicet intellectum & voluntatem : & sic erunt plures generationes & spirationes. Resp. negando antecedens ; quia habent principia productiva exhausta , quæ jam habent suum terminum productum ; intellectus enim fœcundus est in solo Patre , & voluntas fœcunda in solis Patre & Filio ; intellectus autem est exhaustus in Filio ; quia habet terminum adæquatum , sicut,

Voluntas in Spiritu S. Dices, licet anima Christi habeat visionem Dei sibi adæquatam, habet tamen adhuc visionem creaturarum: licet etiam Deus habeat, visionem essentiae sibi adæquatam, non minùs habet visionem creaturarum extra se: ergo adæquatio termini non impedit quin potentia alium terminum producat. Resp. intellectum divinum habere unam visionem adæquatam, quæ est tum essentiae, tum creaturarum in essentia cognitarum, & sic non habet duas visiones. Ad animam Christi, dico, quòd visio ejus sit adæquata in genere visionis beatificæ, non verò in genere visionis simpliciter, nisi videat essentiam divinam & creaturas eadem visione.

OBJ. c. 5. Si terminus generationis sit adæquatus; maximè quia Verbum est infinitum, quod falsum est; quia personæ nec sunt finitæ, nec infinitæ: ergo, producto Verbo, potest Pater aliud Verbum producere. Resp. personas divinas nec esse formaliter finitas, aut infinitas, perfectas aut imperfectas: sed esse & infinitas & perfectas à natura in quâ sunt: unde quandoquidem natura divina in qua sunt, est infinita; proinde personæ sunt infinitæ identicè. Quòd relationes ex se non sint perfectæ, aut imperfectæ, patet; quia similitudo v. g. non est perfecta aut imperfecta, nisi ratione fundamenti; ita quòd, si similitudo sit in virtute, illa est perfecta; si sit in vitio, est imperfecta. Dices, paternitas est ab essentia: ergo sunt tres processiones. Resp. est ab essentia, per radicationem, sicut intellectus à Deo, conc. per veram productionem, nego; alias

esset distinctio realis inter essentiam & paternitatem ; produciens enim & productum distinguuntur realiter.

---

### Q U Æ S T I O   I I I .

*A quo sint Processiones divinae.*

**D**U R A N D U S affirmavit, licet immeritò, productiones divinas, nempe generationem & spirationem, esse immediatè ab essentiâ D. ita quòd ipsa sit principium immediatum earum; adeò ut, præcisè formaliter intellectu & voluntate, & remanente solâ essentiâ D. debeamus intelligere essentiam adhuc esse principium immediatum Verbi D. & Spiritus S. unde secundùm ipsum dicendum esset, Verbum non produci per intellectum, nec Spiritum S. per voluntatem, sed utrumque esse præcisè per essentiam D.

### C O N C L U S I O .

**P**R O C E S S I O N E S divinarum sunt actus intellectus & voluntatis. Hæc conclusio est communis apud omnes, & probatur ex Scripturâ in qua Filius appellatur Verbum & Spiritus S. amor & donum : sed Verbum est immediatè productum per intellectum, & amor seu donum per voluntatem : ergo processiones eorum sunt actus intellectus & voluntatis. Deinde si generatio Filii & spiratio Spiritus sancti essent ab essentia D. immediatè, nulla esset distinctio inter generationem & spirationem ; quoniam utraque esset per naturam, ut natura



est ; & sic nulla esset ratio , cur productio Filii esset generatio , & productio Spiritus S. spiratio ; imò nulla daretur causa , quare Filius vocaretur Filius ; & Spiritus S. vocaretur Spiritus S. essent enim ab eodem principio , nempe à naturâ D.

Objic. Generatio Filii dicitur ab Augustino opus naturæ : ergo producitur per naturam. Probaturs antecedens exemplo animalis , quod immediatè producitur à naturâ. Resp. appellari opus naturæ : non quòd ipsa natura sit principium immediatum ejus , sed quia principium , à quo formaliter procedit , est potentia naturalis ; cùm in hoc distinguantur intellectus & voluntas , quòd intellectus sit potentia naturalis , & voluntas potentia libera. Dicitur etiam potest quòd generatio Filii sit opus naturæ , radicaliter ; quia intellectus à quo producitur immediatè , radicatur à naturâ ; non verò formaliter. Ad id quod dicitur de animali ; respondendum , quòd animal non producitur immediatè à naturâ ; sed à potentiâ generandi , quæ cùm nulla sit in Deo , præter intellectum ; proinde generatio Filii attribuitur intellectui formaliter. Dices : Verbum , non producitur per intellectionem ; quia intellectio est actus essentialis , & Verbum quid notionale : ergo non producitur per intellectum. Resp. non produci per intellectionem , propter rationem allatam ; sed per dictionem , quæ est actus notionalis intellectus , ut patebit in sequentibus.

## Q U Æ S T I O IV.

*Quomodo voluntas sit principium commu-  
nicandi naturam.*

**N**ON dubium est quin intellectus sit prin-  
cipium, quo Pater communicat Filio  
suam naturam; est enim intellectus producere  
terminum sibi assimilatum in naturâ: Sed quia  
voluntas non est facultas naturalis, imò libera,  
quæ pro munere suo non habet, ut assimilet sibi  
terminum in natura, potest esse difficultas de  
voluntate D. quomodo sit principium, quo  
Pater & Filius communicent suam naturam  
Spiritu Sancto.

## C O N C L U S I O

**V**OLUNTAS, ut voluntas, non est prin-  
cipium communicandi naturam, nec assimi-  
landi sibi terminum productum, quia hoc per-  
tinet ad intellectum; sed voluntas est prin-  
cipium communicandi naturam, in quantum est  
infinita formaliter, & objectum est infinitum,  
quia enim voluntas est infinita, & objectum  
est infinitum; ideo simul constituunt prin-  
cipium productivum amoris infiniti formaliter:  
si enim unum eorum tantum esset infinitum &  
aliud finitum; amor qui ex illis oriretur, esset  
finitus, quia effectus sequitur debiliorem par-  
tem causæ: ergo amor ille notionalis productus,  
est formaliter infinitus, & quidquid est infini-  
tum, est Deus ipse: Ergo quidquid produci-  
tur per voluntatem infinitam & objectum infi-

nitum, est Deus: & proinde voluntas, ratione infinitatis suæ, est principium communicandi naturam in divinis. Non sic de intellectu D. dicendum est; quia nedum ratione infinitatis suæ communicat naturam, sed etiam ratione proprii modi producendi: Verbum enim mentis est simile intellectui, quod sic fit: quia intellectus possibilis non producit verbum mentis, seu speciem expressam, nisi mediante specie impressa, qua informatur; species ergo expressa est similis intellectui informato specie impressa; & sic intellectus, ut intellectus præcisâ ratione suæ infinitatis, producit terminum in identitatem naturæ; ubi voluntas habet tantum hoc, ratione suæ infinitatis, & ut divina est. Quod confirmatur, quia quidquid producit in Deo, est Deus ipse; sed voluntas in divinis producit actum notionalem: ergo ille actus est Deus, & sic similis producenti in identitatem naturæ.

#### Q U Æ S T I O V.

*An solus intellectus, & voluntas sint principium quo productionum divinarum.*

CUM dixerimus in præcedentibus, productiones divinas esse actus intellectus & voluntatis; consequens est, intellectum & voluntatem esse principia, quibus fiunt tales productiones: Hic autem querimus, an solus intellectus sit principium quo generationis Verbi; & sola voluntas principium quo spiratio-

nis Spiritus S. maximè quia essentia D. concurrat ad tales productiones.

#### CONCLUSIO.

**I**NTELLECTUS in se solo consideratus non est principium adæquatum *quo*, generationis Verbi; sed intellectus cum essentiâ: sic nec voluntas ut sic, est principium adæquatum Spiritus S. sed cum essentiâ D. Intellectus ergo & essentia tanquam duo principia partialia, constituunt unum principium immediatum totale *quo*, processionis Filii; sic voluntas & essentia constituunt unum principium totale *quo*, Spiritus S. quoniam enim Verbum est notitia genita, debet illa notitia produci ex potentiâ & objecto. Requiritur ergo intellectus, tanquam potentia; & essentia, tanquam objectum, ut ex illis principiiis inadæquatis, fiat unum adæquatum. Eodem modo de Spiritu S. dicendum est, Spiritus S. enim est amor productus; ad productionem autem amoris, requiritur potentia amativa, scilicet, voluntas; & objectum amabile, scilicet essentia.

**O B J E C T.** Si essentia D. esset principium *quo* Filii, & Spiritus S. Filius & Spiritus S. distinguerentur realiter ab essentiâ; quia est distinctio realis inter principium & principiatum. Resp. duplex esse principium; principium *quo*, & principium *quod*: Principium *quod*, est persona producens; principium *quo*, est id quo principium *quod* producit; & sic principium *quod* Filii, est Pater; & principium *quo*, est intellectus & essentia D. quo posito, dico; quòd licet essentia sit principium *quo* Filii, tamen non distinguitur realiter ab eo: quando ergo

dicatur , principium & principiatum distinguuntur realiter : distinguo ; principium *quod*, conc. principium *quo*, nego.

---

## QUESTIO VI.

*Quanam actiones sint Processiones personarum  
divinarum.*

**D**UAS actiones habet intellectus divinus, scilicet, intellectionem & dictionem; & totidem habet voluntas, scilicet, amorem & spirationem. Primus actus intellectus divini est operativus, & convenit Deo ut sic; Deus enim ut Deus, & inquantum abstrahit à personis, est intelligens & volens; & sic habet intellectionem & volitionem essentialem. Secundus actus est productivus, & convenit Patri, ut Pater est, qui, dicendo, producit suum filium. Illi duo actus non distinguuntur realiter; est enim tantum in Deo unicus actus intellectus; sed formaliter: idem enim actus non est simul operativus, & productivus, aliàs esset productivus termini & non productivus. Actus productivus necessario supponit operativum; quò fit ut Pater prius sit intelligens, quàm dicens; quia omnis perfectio essentialis non habens respectum ad creaturas, est prior notionali. Sic dicendum est de duplici actu voluntatis; primus enim, qui dicitur volitio, est amor operativus, qui convenit Deo, ut Deus est; & sic est essentialis; secundus verò, qui est spiratio, est actus pro-

ductivus & notionalis, qui convenit Patri & Filio, ut Pater & Filius sunt. Intellectio & dictio se habent ut includens & inclusum; nam dictio includit intellectionem, & addit super eam relationem producti; ita quod intellectio respiciat objectum cognitum, & dictio terminum productum: Non sic in nobis res se habet; intellectio enim & dictio nostra non se habent ut duo actus subordinati, sed se habent ut actio, & terminus actionis; dictio enim nostra est actio nostri intellectus productiva intellectionis, seu verbi mentalis, tanquam proprii termini.

Hic notandum est ad intellectionem eorum quæ dicturi sumus in conclusione de Verbo increato: quod, secundum Scotum, verbum creatum est actus intelligentiæ productus à memoriâ perfectâ, non habens esse sine actuali intellectione, repræsentans Verbum divinum. Dicitur 1. *Actus intelligentiæ*, id est, intellectus actu intelligentis. Dicitur 2. *Productus à memoriâ perfectâ*, seu fœcundâ, id est ab intellectu ut informato specie intelligibili. Dicitur 3. *Non habens esse sine actuali intellectione*; quia dum transit actus intellectus, transit & ipsum verbum: Unde, quia cognitio nostra non est sempiterna, verbum proinde nostrum non est sempiternum. Dicitur ultimò, *Repræsentans Verbum divinum*; sicut enim memoria nostra, id est, intellectus noster fœcundus, repræsentat Patrem, & Amor noster repræsentat Spiritum sanctum, sic verbum nostrum repræsentat divinum. Porro, addi potest, quod verbum sit simile ex naturâ rei & ex vi productionis

ductionis suæ, producenti; quia quando intellectus producit verbum, est informatus specie intelligibili impressâ, & mediante eâ, producit speciem intelligibilem expressam, quæ est omninò similis speciei intelligibili impressæ; & sic species illa expressa, quæ est verbum mentis, producitur similis intellectui, ut informato specie impressâ.

## CONCLUSIO PRIMA.

**V**ERUM D. non producitur per intellectum actuale; nec per consequens Spiritus S. per volitionem: quia intellectio & volitio sunt actus essentialis & communes tribus personis; actiones autem notionales non sunt communes. Probatur, Si intellectio & volitio non essent actus essentialis ad intra, Pater non esset beatus antequam filium generaret, nec filio communicaret perfectam beatitudinem; quod utrumque falsum est: quia sicut Pater est prior Filio origine, sic debet prius habere omnem perfectionem absolutam; quia esse Patris in illo priori instanti, est esse divinum; ergo secum æffert omnem perfectionem, saltem absolutam; & proinde beatitudinem: Sed si volitio esset actus quo Pater producit Spiritum S. sequeretur quod generans Filium non esset beatus; quia fit tantum beatus per actum voluntatis, & actus voluntatis est tantum in secundo instanti quo producit Spiritum S. ergo in primo, quo producit Filium, non esset beatus: Sequeretur etiam, quod non communicaret perfectam beatitudinem Filio; quia illi tantum communicat id quod habet, quando illum generat; sed ipsum

generando , non haberet perfectam beatitudinem , ut diximus ; ergo illi non communicaretur : Melius ergo est , si dicamus , quod in primo instanti Deus concipiatur ut Deus ; & ut intelligens , & volens , proindeque perfectè beatus ; quandoquidem beatitudo consistit in actu essentiali cognitionis & amoris divini : postea hîc Deus determinatur cum omnibus suis essentialibus ad Patrem ; & sic Pater est perfectè beatus in illo instanti , antequam generet ; proindeque quando generat Filium , communicat illi perfectam beatitudinem , & omnem perfectionem essentialem.

## CONCLUSIO SECUNDA.

**V**ERBUM D. producitur per dictionem , distinctam formaliter ab intellectione . Probatus prima pars : quia cum sint tantum duo actus intellectus , nempe , intelligere , & dicere ; Verbum D. producitur per primum , vel per secundum ; sed non per primum , scilicet , per intelligere , ut diximus in antecedenti conclusione : ergo superest , ut producat per dictionem . Secunda pars evidens est , quod scilicet dictio distinguatur formaliter ab intellectione ; quia , quod est prius , distinguitur formaliter à posteriori , & vice versâ ; sed intellectio est prior dictione , & dictio posterior intellectione : ergo distinguuntur formaliter . Minor patet : quia intellectio est essentialis , quæ præsupponitur ad omne notionale : ergo est prior dictione . Deinde , intellectio est actus tantum operativus , non productivus ; & dictio est actus productivus , non operativus : ergo distinguuntur formaliter .



Objic. 1. non posse concipi, quomodo intellectio distinguatur à dictione, quoniam non potest fieri, ut Deus intelligat, absque eo quòd producat intellectionem; ut sit communiter in nobis. Resp. quòd licet non possimus intelligere absque productione intellectionis, quæ est ultima perfectio nostri intellectus; intellectus tamen divinus ex se, & à se, & sine ullâ productione habet illam intellectionem improductam & radicatam ab essentiâ D. quia habet omnem perfectionem, tum sub ratione actus primi, tum sub ratione actus secundi: idèò, cùm habeat intellectionem ex se, non debet illam producere; neque debemus eam concipere, tanquam terminum productum; sed tanquam actum improductum, naturaliter fluentem ab actu primo, nempe ab intellectu.

Objic. 2. Dictio est actio transiens ex Scotto: sed Filius producitur per actionem immanentem: ergo non per dictionem. Resp. est actio transiens; in terminum productum, conc. quia per dictionem Verbum D. producitur: in subjectam materiam, nego: ut v. g. ignis, cujus terminus, nempe calor, transit in subjectam materiam, v. g. in manum, lignum, &c. Dices, Dictio nostra est productiva verbi, & intellectionis: ergo & etiam in Deo. Resp. quòd in Deo sit quidem productiva Verbi, non intellectionis; quia, quando intelligitur esse dictio in Deo, jam præest intellectio, tanquam aliquid essenziale: dictio ergo non potest intellectionem producere; quandoquidem dictio est posterior intellectione, & posterius, non potest producere prius. Quòd si Anselmus  
R ij

Monologii 34. afferat, idem esse in Deo, intelligere & dicere: Resp. Anselmum & quosdam alios non ita exactè distinxisse hæc verba, sicut Aug. non mirum ergo, si confuderit terminos, quos Aug. distinxit, & sicut nos in præsentī distinguimus. Dices, Unius potentix est tantum unus actus: ergo intelligere & dicere sunt tantum unus actus intellectus. Resp. esse tantum unum actum realem, esse tamen duos actus formales; intelligere enim & dicere non sunt actus distincti realiter, sed tantum formaliter. Porro, ex his quæ diximus de intellectu & dictione respectu Verbi, intelliguntur ea, quæ dici debent de volitione, & spiratione Spiritus S. Asseveramus ergo, quod voluntatis divinæ sint duo actus; unus essentialis improductus, qui præsupponitur ad omnia notionalia, nempe volitio; & alius notionalis & productus, nempe spiratio: per primum non producit Spiritus S. quia per essentialia personæ non producuntur; sed per secundum, nempe per spirationem. Rationes, objectiones, solutiones sunt eadem pro hac parte, ac illæ, quas proposuimus pro productione Verbi.



## QUESTIO VIII.

*Quanam sit distinctio inter productionem Filii  
& Spiritus sancti.*

TANTA est hujus quæstionis difficultas, ut Augustinus loquens de eâ Maximino Arianorum Episcopo, videatur insinuare, discrimen utriusque esse inexplicabile: *De Patre, inquit, est Filius; de Patre est Spiritus S. sed ille est genitus, iste procedens: idè ille est Filius Patris, de quo est genitus, iste autem est Spiritus utriusque; quoniam de utroque procedit: quid autem inter nasci & procedere intersit, explicare quis potest? Distinguere inter illam generationem & processionem non valeo, non sufficio: veruntamen, quamvis hoc verum sit de evidenti hujus mysterii explicatione; hoc non impedit quin assignari possit aliquod discrimen utriusque, quod sit veluti manu ductio ad concipiendam probabilitatem hujus mysterii; quæ distinctio ut videatur,*

NOTANDUM est i. generationem latè sumptam sumi pro actione quâ agens quovis modo sibi assimilât productum. Alia est æquivoca, alia univoca; prima est, quando assimilatio est tantum secundum genus, vel secundum aliquem gradum transcendentelem: sic Deus dicitur Pater & genitor omnium creaturarum, quia creaturæ assimilantur illi in ratione entis. Secunda est, quando assimilatio sit secundum speciem infimam, sic homo ge-

nerans assimilât sibi hominem genitum. Generatio propriè dicta definitur, origo viventis à vivente principio, in similitudinem naturæ. Dicitur 1. origo, non actio, quia actio dicit mutationem; origo verò, ut sumitur hîc, dicit tantum communicationem naturæ. Dicitur 2. viventis; ut excludatur productio rerum inanimatarum. Dicitur 3. à vivente principio; ut rejiciatur productio non viventium à viventibus, ut ranarum à sole. Subintelligitur 4. activo; & sic productio Evæ ex Adamo non est generatio Adami; quia Adamus se habuit tantum passivè. Additur ultimò, in similitudinem naturæ specificæ; tum quia generatio saltem corruptibilium instituta est ad conservationem speciei; tum quia cum generans non possit generare ad similitudinem naturæ individualis; consequenter debet generare ad similitudinem naturæ specificæ; per similitudinem autem intelligimus identitatem, quia generatio ad identitatem naturæ tendit. Quod si daretur aliqua natura, quæ esset ita perfecta, ut posset generare sine sui divisione (uti est natura D.) pro tunc generaret non tantum in identitatem naturæ specificæ; sed in identitatem naturæ numericæ. Ad integritatem illius definitionis aliqui addunt; præsertim Scotistæ, ex vi productionis suæ; ita quod generatio sit origo viventis à vivente principio activo, in identitatem naturæ, ex vi processionis suæ; quod ut intelligatur.

NOTANDUM 2. produci similis ex vi processionis, est quando processio per se, formaliter, & non per aliam rationem extrinsecam,

tendit in illam similitudinem; vel est quando processio fit per potentiam, quæ ex sua ratione formali nata est sibi assimilare terminum; produci autem similis non ex vi processionis, est quando potentia producit quidem terminum sibi similem, sed non ex suâ ratione formali, sed per aliam rationem adjunctam & extrinsecam: sic Æthiops ex vi processionis suæ, habet quòd sit animal, non tamen quòd sit niger, licet ista consequantur mutuò; quia generatio ejus per se tendit in primam similitudinem, & ex accidenti tantum in secundam: sic quando voluntas producit, non intendit producere aliud veluti seipsam, sed intent tantum producere affectum, quo alteri uniatur; voluntas tamen divina, quia divina est, habet ut producat terminum qui sit Deus; sed hoc non habet ut voluntas, sed ut voluntas divina, & sic scilicet terminus voluntatis divinæ sit similis sibi; non tamen est similis ex vi processionis suæ. Non sic de intellectu, qui in Deo non tantum producit terminum sibi similem, quia divinus est; sed etiam quia est intellectus, cujus proprietas est sibi assimilare terminum; ut diximus enim, intellectus informatus specie impressâ producit speciem expressam omninò similem intellectui informato specie impressâ; quòd si non producat speciem expressam omninò similem intellectui, quoniam intellectus est substantia, & species expressa, accidens; hoc est, quia species intelligibilis impressa, quâ informatur, est accidens; & sic debet tantum producere accidens; effectus enim sequitur debiliorem

partem, intellectus autem divinus producit Verbum sibi simile substantialiter; quia omnia quæ concurrunt ad productionem ejus, sunt substantialia, nempe intellectus qui producit, & essentia quæ tenet vices speciei impressæ.

## CONCLUSIO.

**I**N hoc discrepant processio Filii, & Spiritus S. quòd illa sit generatio, non ista; & idèd, illa est generatio, non ista; quia per primam producitur terminus similis ex vi processionis suæ, non verò per secundam. Probatur quòd processio Filii sit generatio. Psalm. 2. *Filius meus es tu, ego hodie genui te.* Esai. 53. *Generationem ejus quis enarrabit?* Patet etiam, quòd productio Spiritus S. non sit generatio, ex Divo Athanasio qui de ipso loquens, dixit, *quod non sit factus, nec creatus, nec genitus.* Deinde Christus in Symbolo dicitur unigenitus: *Et in Iesum Christum Filium ejus unigenitum.* Et Joan. 3. *Sit Deus dilexit mundum, ut Filium suum unigenitum daret.* Si ergo Christus, qui est Filius Dei, sit unigenitus; proinde Spiritus S. non est genitus. Ratio utriusque partis est; quia generatio est productio per modum naturæ; sed Filius producitur per modum naturæ, quia producitur per intellectum, qui est potentia naturalis: ergo ipsius processio est generatio: Spiritus S. autem producitur per voluntatem, quæ ex suâ ratione habet quòd producat libere, si non libertate contrarietatis, aut contradictionis, saltem essentiali, quæ consistit in hoc, quòd principium producens sese eligibiliter & delectabiliter determinet ad actum.

CONFIRMATUR quòd processio Filii sit generatio, non Spiritus S. quia illa producit terminum sibi similem ex vi processionis suæ, non ista; actus enim intellectus habet rationem imaginis & similitudinis repræsentantis suum objectum, quod est ejus principium; actus autem voluntatis non habet rationem imaginis & similitudinis: ergo productio quæ fit per intellectum, idè dicitur generatio; quia ex vi processionis suæ producit terminum sibi similem; non verò processio Spiritus Sancti.

Obj. c. Spiritus S. est æquè similis Patri in divinitate, ac Filius: ergo processio Spiritus S. est æquè generatio, ac processio Filii. Probat. antecedens: quia Spiritus S. est Deus sicut Patet: ergo est similis producenti. Probat. consequentia: quia ratio cur Filius est genitus, est quia producit in similitudinem naturæ: ergo Spiritus S. est etiam genitus; quia est productus similis Patri in naturâ D. Resp. distinguendo antecedens; Spiritus S. est æquè similis Patri, ac Filius; ratione infinitatis voluntatis divinæ, conc. ex vi processionis suæ, nego. Constat quidem quòd Spiritus S. sit similis Patri in divinitate; sed non est similis ex vi processionis suæ: quia procedit per voluntatem, quæ ut voluntas est, non est nata producere terminum sibi similem; sed hoc habet à suâ divinitate & infinitate: quoniam enim voluntas D. quæ producit Spiritum S. est infinita; non potest quin producat terminum infinitum: ergo non potest quin producat terminum, qui sit Deus; sed quia hoc

non facit ut voluntas est, ideò non producit terminum sibi similem ex vi processionis suæ. Non sic de intellectu; quia nedum ut divinus & infinitus est, sed ut intellectus, natus est producere terminum similem objecto, & sibi-  
met, inquantum informatur specie impressâ; ut diximus: licet autem intellectus divinus non informetur specie impressâ; tamen veluti informatur objecto, seu essentiâ D. quæ tenet locum speciei impressæ, & sic producit terminum qui ex vi processionis est similis in naturâ, producenti.

OBJIC. 2. in hoc quòd diximus, Filium esse unigenitum. Ad Rom. 8. Paulus vocat Filium Dei, primogenitum: ergo non est unigenitus, Resp. dici primogenitum, negativè, inquantum negatur quòd habuerit filios præcedentes; sive sequentes habuerit, sive non: non verò dicitur primogenitus positivè, primogenitus enim positivè negat anteriores, & posteriores affirmat. Deinde, potest dici quòd habuerit fratres posteriores, sed per adoptionem.





QVÆSTIO PRIMA.

**R**ELATIONES D. versantur circa certas tantum personas, vel circa omnes; si versantur circa omnes, dicuntur relationes communes; ut sunt identitas, similitudo, & æqualitas: si versentur circa certas, vocantur relationes propriæ, seu originis; ut paternitas, filiatio, spiratio activa, & passiva: vocantur istæ, relationes propriæ; quia conveniunt tantum aliquibus personis: & dicuntur originis, quia involvunt originationem unius personæ ab aliâ. Hic de relationibus propriis agimus, de communibus acturi postea.

**H**Æ quatuor relationes originis, Paternitas, Filiatio, Spiratio activa, & passiva, sunt reales. Probatur 1. quia Pater & Filius realiter distinguuntur per paternitatem & filiationem; & similiter spirator & Spiritus S. realiter distinguuntur per spirationem activam, & passivam: ergo Paternitas, Filiatio, Spiratio activa & passiva sunt relationes reales; non fit enim distinctio realis per entia rationis. Probatur 2. Ellæ rationes sunt reales, cujus extrema sunt

P vj

damenta, & rationes fundandi sunt realia; sed extrema harum relationum, nempe personæ, sunt realia, & realiter distincta; fundamenta etiam sunt realia, potentia scilicet generativa & spiratiua; & tandem rationes fundandi, nimirum generatio & spiratio, sunt reales: ergo illæ relationes sunt reales.

Objic. Relationes reales supponunt extrema realiter distincta; paternitas autem & filiatio non supponunt extrema realiter distincta, imò distinguunt personas: ergo non sunt reales. Resp. majorem esse veram de creatis relationibus, non de divinis; relationes enim creatæ supponunt extrema realiter distincta; quia sunt accidentia, quæ supponunt subjecta quibus inhæreant; relationes autem divinæ non sunt accidentia, sed substantiæ; unde non supponunt subjecta quibus inhæreant, imò faciunt illa distinguui realiter inter se. Quodd si Patres dicant, relationem Spiritus S. ad Patrem & Filium non esse reciprocā, sed realem in Spiritu S. & rationis tantum in Patre & Filio: Resp. hoc verum esse, si Spiritus S. referatur ad Patrem & Filium, ut Pater & Filius sunt: quia Spiritus S. non refertur ad eos ut sic; est tamen reciproca & realis, si Spiritus sanctus referatur ad Patrem & Filium, ut sunt unus Spirator.



## Q U Æ S T I O II.

*Quomodo relationes divina distinguantur  
ab essentiâ.*

S U P E R hanc quæstionem multi multa sentiunt ; aliqui enim volunt solâ ratione distinguere , non à parte rei , nec etiam virtualiter , ut Gregorius & Vasquez ; alii tantum virtualiter , ut plerique Thomistæ ; alii realiter actualiter ; alii tandem formaliter actualiter ; & hæc est mens Doctoris nostri , sicut diximus , agendo de attributis. Hanc distinctionem formalem actualem sic explicamus ; dicentes , Deum esse quidem rem unam simplicissimam in quâ omnes perfectiones unitissimè continentur ; in ipsâ tamen re , esse varias rationes formales independentes ab intellectu , secundum quas res illa singularissimè una , modo est & dicitur essentia , modo bonitas ; nunc paternitas , nunc filiatio. &c.

## C O N C L U S I O .

R E L A T I O N E S non distinguuntur realiter ab essentiâ , benè autem formaliter. Primum est de fide , in Conc. Lateran. sub. Innocentio III. cap. *damnamus* , dicente , unam & eandem rem , esse Patrem , Filium , & Spiritum sanctum. Secundum probatur ex August. 7. de Trinit. cap. 7. *Non eo Verbum ; quo sapientia ; Verbum enim notionaliter , sapientia essentialiter dicitur : & cap. 5. Non eo Verbum , quo Deus ; nec eo Deus , quo Pater ; ex quo constat , pa-*

ternitatem distingui, formaliter & ex naturâ rei, à deitate. Ratio est, quia essentia D. in Patre est entitas ex naturâ rei communicabilis, secluso opere intellectus, & paternitas in eodem est entitas per se incommunicabilis: ergo formaliter distinguuntur & à parte rei. Deinde, paternitas formaliter constituit Patrem & distinguit eum à Filio; sed si paternitas esset formaliter essentia; essentia formaliter constitueret Patrem, & ipsum formaliter à Filio distingueret, quod est absurdum.

O B j c. Si esset distinctio formalis inter essentiam & relationes; Deus non esset unus, nec simplex, nec infinitus. Resp. negando hæc omnia. Primò, distinctio formalis non tollit unitatem; quæ auferri non potest, nisi per multiplicationem rerum, non formalitatum; quia multiplicitas formalitatum non sufficit ad numerum. Secundò, distinctio formalis non tollit simplicitatem; nam S. Augustin. 11. de Trinit. cap. 10. habet, *Deus est simplex, quia non sic aliquid habet, quod possit amittere; vel quia non est aliud habens & aliud quod habetur, sicut vas & liquor*: non ergo est minùs simplex per positionem formaliter distinctorum; quia rationes formales distinctæ coalescunt in unum, non per unionem & compositionem oppositam simplicitati; sed per solam identitatem; cum unum non sit actus & aliud potentia. Tertiò, talis distinctio formalis non tollit infinitatem; quia licet infinitas sit ratio identificandi, & licet infinitum identificent sibi alia; hoc verum est realiter, non formaliter; quia infinitum non confundit, nec destruit rationes formales re-

rum. Videantur quæ diximus agendo de distinctione attributorum ab essentiâ, & inter se.

---

### QUESTIO III.

*Quomodo Relationes originis distinguantur inter se.*

**N**EMINEM latet; quin sint quatuor relationes originis in Deo; nimirum Paternitas, Filiatio, Spiratio activa, & passiva. Quod tres primæ in Deo sint, patet, quia sunt constitutivæ trium personarum; paternitas; Patris; filiatio, Filii; spiratio passiva, Spiritus sancti. Quod etiam sit spiratio activa, non dubitatur; quoniam est spiratio passiva in Spiritu sancto, cui debet respondere activa in Patre & Filio; non est tamen quaternitas in divinis, licet sint quatuor relationes originis; quia quaternitas dicit pluralitatem quatuor realiter distinctorum; sicut trinitas dicit pluralitatem trium realiter distinctorum: quando autem dicimus, esse quatuor relationes in divinis; non asserimus propterea esse omnes realiter distinctas; quia spiratio activa non distinguitur, nisi formaliter à Patre & Filio. Harum relationum originis aliæ sunt oppositæ; ut paternitas & filiatio, spiratio activa & passiva: aliæ sunt disparatæ; ut paternitas & spiratio activa, filiatio & spiratio activa: primæ sunt impossibiles in eodem supposito, non verò secundæ.

**R**ELATIONES originis oppositæ distinguuntur realiter; ut paternitas & filiatio, spiratio activa & passiva. Primò, quia personæ distinguuntur realiter; non distinguuntur autem nisi per tales relationes: ergo & illæ relationes distinguuntur realiter inter se: Secundò, quia illæ relationes opponuntur inter se: ergo cum sint reales, opponuntur realiter, sed oppositio realis supponit distinctionem realem: ergo distinguuntur realiter. Tertiò, quia ad distinctionem realem tres conditiones requiruntur, quarum quælibet sufficit; scilicet quòd unum possit esse sine alio; vel quòd unum sit principians, & aliud principiatum, vel tandem quòd sint in diversis suppositis; sed relationes illæ sunt in diversis suppositis, v. g. paternitas in Patre, filiatio in Filio, spiratio activa in utroque, & spiratio passiva in Spiritu sancto; ergo relationes illæ distinguuntur realiter.

**OBJIC. I.** In divinis non est distinctio realis nisi secundum originem, id est, nisi sit inter ea quorum unum originatur ab alio; sed una relatio non originatur ab aliâ; v. g. filiatio non originatur à paternitate: ergo non est distinctio realis inter eas. Resp. ad minorem, quod una relatio originatur ab aliâ, non quidem in abstracto, benè autem in concreto; sic v. g. filiatio non originatur à paternitate, sed originatur à Patre, quia Pater dat esse Filio, & sic originatur filiationem.

**OBJIC.** Quæcumque sunt eadem uni tertiò, sunt eadem inter se; sed relationes originis sunt idem realiter cum essentia D. quia verum

est dicere , paternitas est essentia & filiatio essentia : ergo sunt idem realiter inter se. Resp. hoc axioma esse verum , quando tertium non est infinitum ; & falsum , quando est infinitum : in præsentem autem illud tertium , nempe essentia D. est infinitum : ergo nil mirum , si relationes in essentia sint unum realiter ; inter se tamen realiter distinguuntur ; quia relationes spectatæ sine essentia non sunt amplius infinitæ , & sic non habent unde identificentur.

## CONCLUSIO SECUNDA.

**G**ENERATIO & spiratio activa , item filiatio & spiratio activa distinguuntur tantum formaliter in concreto , realiter autem in abstracto ; & sic verum est dicere in concreto , Pater est spirator , Filius est spirator , falsum autem dicere in abstracto , spiratio activa est paternitas , vel filiatio. Probatum ; Tota ratio , cur aliqua in Deo identificentur , est infinitas ; sed generatio & spiratio activa , sicut & filiatio in abstracto , nullam habent infinitatem : ergo non habent unde realiter identificentur in abstracto : in concreto autem connotant essentiam D. formaliter infinitam , quælibet enim persona constituitur ex essentia & relatione , ergo ratione essentia connotatæ quæ formaliter est infinita , relationes prædictæ identificantur in concreto.



## QUESTIO IV.

*An Relationes originis dicant perfectionem simpliciter.*

**I**D est , an relationes secundum se , seu secundum propriam entitatem relativam spectatæ , & prout præscindunt ab essentia , sint infinitæ & perfectæ : Quod enim sint identicè infinitæ & perfectæ ratione essentiæ Dei , cui identificantur , clarum est. Ut autem quæstio facilius intelligatur ; sciendum , quod infinitum duplex sit , intensivum & extensivum. Extensivum est id , quod ad plura in infinitum extenditur , ut multitudo infinita , si daretur. Intensivum est illud ; cui nihil perfectionis deest eo modo quo potest haberi in aliquo ente , id est , vel formaliter , vel realiter , vel identicè , vel eminenter , ut diximus cap. de infinitate ; & hoc modo infinitas describitur , omnis entitatis & perfectionis simplicissima possessio. Præterea sciendum est quod bonitas & perfectio duplex sit ; una entitativa , quæ convenit enti ut ens est , quodlibet enim ens est bonum & perfectum in suo genere : alia est gradualis quæ convenit tali enti ut tale ens est ; sic v. g. homo habens virtutem , dicitur bonus & perfectus. Hic non loquimur de primâ bonitate & perfectione ; quoniam enim relationes divinæ sunt entia , proinde sunt bonæ & perfectæ entitativè ; sed de secundâ , utrum habeant aliquam bonitatem & perfectionem ,



præter perfectionem entis, quæ sit illis propria.

## CONCLUSIO

**R**ELATIONES originis formaliter sumptæ non sunt perfectæ, nec imperfectæ; nec finitæ, aut infinitæ. Hæc conclusio est communis Divo Thomæ, & Scoto contra Vasquesium & alios, dicentes, relationes divinas de formali dicere perfectionem simpliciter, & quidem infinitam; itaut paternitas sit infinitè perfecta in ratione paternitatis, & filiatio in ratione filiationis. Probatur prima pars conclusionis: Si relatio divina præcisè sumpta diceret perfectionem, vel esset finita, vel infinita; non finita, quia nihil finitum potest esse in Deo; non etiam infinita, quia sequeretur plus perfectionis esse in unaquaque persona, quàm in essentia; quia persona ultra infinitam perfectionem essentia, haberet adhuc infinitam perfectionem relationis, & sic Pater, ut Pater, esset perfectior, quàm ut Deus. Deinde, sequeretur plus esse perfectionis in omnibus personis simul sumptis, quàm in unaquaque seorsim sumptâ, contra August. 6. de Trinit. dicentem; *Tantus est solus Pater, vel solus Filius, vel solus Spiritus S. quantus est Pater, Filius; & Spiritus S. simul.*

Probatur secunda pars, Non possunt esse plura infinita realiter distincta; sed relationes originis sunt realiter distinctæ; ergo non possunt esse formaliter infinitæ. Probatur major; Infinitum sibi indentificat realiter aliud; sed una relatio non sibi indentificat perfectionem alterius relationis, quia distinguuntur realiter

inter se : ergo neutra est infinita , nec perfecta ; Deinde , si essent plura infinita realiter distincta , ex illis consurgeret majus bonum , quam esset quodcumque eorum seorsim : ergo neutrum eorum esset infinitum ; quia infinito non potest dari majus : ergo non sunt plura infinita realiter distincta .

**CONFIRMATUR.** Relationes ex se non habent perfectionem aut imperfectionem , sed utrumque sumunt à fundamento : quod si sit perfectum , relatio suadata in eo , erit perfecta ; si imperfectum , imperfecta ; similitudo v. g. non est perfecta aut imperfecta formaliter ; imò si similitudo fundetur in vitio , erit imperfecta ; si in virtute , erit perfecta : Si etiam fundamentum sit infinitum , relatio erit infinita ; si sit finitum , erit finita : unde si id quod generatur , est bonum , generatio est bona ; si malum , est mala ; si est infinitum , ut in divinis , relatio erit infinita ; si finitum , ut in humanis , erit finita . Relationes ergo desumunt suam perfectionem aut imperfectionem à fundamento in quo sunt , sicut & suam finitatem aut infinitatem : ergo si relationes divinæ sint perfectæ aut infinitæ ; hoc non habent ex se , sed ratione naturæ in quâ sunt .

**Objic.** Relatio ut sic , dicit perfectionem : ergo & relatio divina ; quidquid enim dicitur de superiori , dicitur & de inferiori . **Resp.** distinguendo antecedens , relatio dicit perfectionem ; entitativam , concedo quia ens est : gradualem , nego . Hanc enim perfectionem non importat nisi ratione subjecti quod connotat . Dices , Objectum voluntatis est bonum , sed Deus vult

relationes : ergo sunt bonæ. Resp. Deus illas vult non ratione sui ; sed ratione essentiæ cum quâ sunt unum realiter : quod si illas velit præcisè ; hoc est ut bonas bonitate entitativâ , non graduâli. Dices , Relationes originis adorantur cultu Latriæ : ergo sunt infinitæ in perfectione. Antecedens patet ex præfatione Dominicæ Trinitatis , quæ sic habet ; *in personis proprietas, in essentiâ unitas, & in maiestate aloreitur equalitas*. Resp. Relationes divinas esse adorandas , non formaliter : sed quatenus identificantur cum essentiâ D. cum eâ enim sunt infinitæ.

Obj. c. Ens reale dividitur adæquatè in finitum & infinitum ; sed relationes Dei sunt entia realiâ : ergo sunt finitæ vel infinitæ. Respondet Scotus , ens reale dividi in infinitum & infinitum ; si sit ens quantum , concedit : si sit ens non quantum , negat : relationes autem sunt entia non quanta : ergo nec sunt finitæ aut infinitæ. Scotus autem sic dividit ens reale in primâ sui divisione ; vel est quantum quantitate molis aut perfectionis , vel non quantum ; ens autem quantum subdividitur in quantum finitum , vel quantum infinitum ; finitas enim & infinitas sunt proprietates quantitatis : Unde quia relationes non sunt quantæ quantitate molis aut perfectionis , ut diximus ; quoniam non sunt perfectæ , ut sic : ergo non sunt finitæ nec infinitæ. Deinde potest responderi ; Omne ens reale vel est finitum vel infinitum ; ratione sui vel ratione fundamenti , concedo : ratione sui semper , nego : Relationes autem D. sunt infinitæ ratione fundamenti ; licet non sint ratione sui.

**Objic.** Relationes originis non sunt comprehensibiles ab intellectu creato, juxta, illud *Esaiz.* *Generationem ejus quis enarrabit?* Ergo sunt infinitæ. **Resp.** esse incomprehensibiles, ratione essentia cum quâ identificantur. **Dices,** Origo divina, quæ est relatio, est adæquata principio & termino infinito; ergo est formaliter infinita; v. g. filiatio, quæ est origo Filii à Patre, est adæquata potentia generativæ Patris; quoniam producto Filio, alium producere non potest. Est etiam adæquata termino producto, nempe Filio; quia qualis est terminus; talis est via ad terminum. **Resp.** est adæquata principio & termino infinito, quia revera ipsa origo est infinita; sed dicendum est quòd sit infinita identicè tantum, non formaliter; talis enim origo fit in naturâ infinita: ergo ipsa infinita est, non quidem formaliter; sed identicè, ratione naturæ in quâ existit.

**Objic.** ultimò; Attributa divina sunt formaliter infinita: ergo & relationes. Probatur consequentia, Tota ratio quare attributa sunt formaliter infinita, est quia sunt unum cum essentia Dei; sed relationes sunt etiam unum cum essentia D. ergo si illa sint infinita formaliter, relationes erunt etiam formaliter infinitæ. **Resp.** negando consequentiam. Ad probationem dico, quòd licet tùm attributa, tùm relationes sint unum cum essentia D. non propterea relationes erunt formaliter infinitæ, sicut attributa; quia attributa habent capacitatem recipiendi infinitatem formalem; & relationes habent tantum capacitatem recipiendi perfectio-

nem & infinitatem identicam; licet enim essentia in se formaliter infinita, sit radix & origo qua cætera quæ ab ipsa profluunt, sunt infinita; hoc tamen fit diversimodè, juxta diversitatem capacitatis eorum: Unde, quia attributa sunt capacia infinitatis formalis, illam habent ab essentiâ, quia verò relationes sunt tantum capaces infinitatis identicæ, idèò erunt tantum infinitæ identicè. Quòd si quæras, cur attributa sint capacia infinitatis formalis, non verò relationes: Resp. quia illa sunt communicabilia, & communia tribus personis, & non distincta realiter, idèò ex illorum infinitate non sequuntur omnia absurda, quæ vidimus sequi in probatione conclusionis ex infinitate formali relationum, quæ sunt incommunicabiles & realiter distinctæ; propter hoc non possunt habere infinitatem formalem.

---

#### QUESTIO V.

*Utrum persona divina constituentur per relationes.*

MULTÆ sunt sententiæ Theologorum; quarum prima fuit Præpositivi dicentis non esse quærendum per quid constituentur personæ, & distinguantur, quoniam constituentur & distinguuntur seipsis; cum sint primò diversæ, & in nullo convenient; Secunda est Linconienſis, qui asserit personas D. constirui per proprietates absolutas. Tertia est

**Objic.** Relationes originis non sunt comprehensibiles ab intellectu creato, juxta, illud *Esaia.* *Generationem ejus quis enarrabit?* Ergo sunt infinitæ. **Resp.** esse incomprehensibiles; ratione essentia cum quâ identificantur. **Dices,** Origo divina, quæ est relatio, est adæquata principio & termino infinito; ergo est formaliter infinita; v. g. filiatio, quæ est origo Filii à Patre, est adæquata potentia generativæ Patris; quoniam producto Filio, alium producere non potest. Est etiam adæquata termino producto, nempe Filio; quia qualis est terminus; talis est via ad terminum. **Resp.** est adæquata principio & termino infinito, quia revera ipsa origo est infinita; sed dicendum est quòd sit infinita identicè tantum, non formaliter; talis enim origo fit in naturâ infinita: ergo ipsa infinita est, non quidem formaliter; sed identicè, ratione naturæ in quâ existit.

**Objic.** ultimd; **Attributa** divina sunt formaliter infinita: ergo & relationes. Probatur consequentia, Tota ratio quare attributa sunt formaliter infinita, est quia sunt unum cum essentia Dei; sed relationes sunt etiam unum cum essentia D. ergo si illa sint infinita formaliter, relationes erunt etiam formaliter infinitæ. **Resp.** negando consequentiam. Ad probationem dico, quòd licet tùm attributa, tùm relationes sint unum cum essentia D. non propterea relationes erunt formaliter infinitæ, sicut attributa; quia attributa habent capacitatem recipiendi infinitatem formalem; & relationes habent tantum capacitatem recipiendi perfectio-

nem & infinitatem identicam; licet enim essentia in se formaliter infinita, sit radix & origo qua cætera quæ ab ipsa profluunt, sunt infinita; hoc tamen fit diversimodè, juxta diversitatem capacitatis eorum: Unde, quia attributa sunt capacia infinitatis formalis, illam habent ab essentiâ, quia verò relationes sunt tantum capaces infinitatis identicæ, idèò erunt tantum infinitæ identicè. Quòd si quæras, cur attributa sint capacia infinitatis formalis, non verò relationes: Resp. quia illa sunt communicabilia, & communia tribus personis, & non distincta realiter, idèò ex illorum infinitate non sequuntur omnia absurda, quæ vidimus sequi in probatione conclusionis ex infinitate formalis relationum, quæ sunt incommunicabiles & realiter distinctæ; propter hoc non possunt habere infinitatem formalem.

---

### QUESTIO V.

*Verum persona divina constituentur per relationes.*

MULTÆ sunt sententiæ Theologorum; quarum prima fuit Præpositivi dicentis non esse quærendum per quid constituentur personæ, & distinguantur, quoniam constituentur & distinguuntur seipsis; cum sint primò diversæ, & in nullo convenient. Secunda est Linconienſis, qui asserit personas D. constirui per proprietates absolutas. Tertia est

D. Thomæ , dicentis ipsas constitui per relationes ; non quatenus relationes sunt , sed quatenus sunt formæ hypostaticæ , seu caracteristicæ ; vult enim quòd relatio duo dicat ; scilicet , esse per se & in se , & esse ad aliud ; per primum dicit personas constitui , non per secundum. Præpositivus de facili refutatur ; quia personæ D. non sunt primò diversæ ; in aliquo enim conveniunt , & in alio distinguuntur , conveniunt in essetiâ , & differunt in ratione personæ : quoniam ergo non distinguuntur se totis , nec constituuntur , non incassum quærimus , per quid constituentur , aut distinguantur. Quoad Linconiensẽ , etiam refutandus est ; quia ratio cujuslibet personæ D. est relativa ; Pater enim , Filius , & Spiritus S. sunt quid relativum : ergo non possunt constitui in esse personali per proprietates absolutas. Hac ratione non sequimur opinionem D. Thomæ , quia vult , quòd formæ hypostaticæ sint ad se , & per se : ergo sunt absolutæ , & sic non possunt constituere Patrem , Filium , & Spiritum S. Pater enim non est ad se , sed ad Filium ; Filius etiam est ad Patrem , & Spiritus S. ad utrumque ; quænam autem sit nostra opinio , asseret

CONCLUSIO.

**PERSONA D.** qualibet constituitur ex D. essentiâ & proprietate personali , quæ est relativa ; & hoc est dicere , personas constitui adæquatè per relationes. Quòd quælibet persona constituatur ex D. essentiâ & proprietate personali , patet , quia ea est conditio cujuscumque constituti , ut habeat unum constitutum



tivum proprium & formale , quo ultimò constituitur in suo esse proprio : sic v. g. homo constituitur in esse communi per animal , in quo convenit cum bruto : constituitur autem in esse proprio , per rationale , tanquam per constitutivum peculiare , per quod distinguitur à bruto , & proprie fit homo : sic à pari , in proposito , quælibet persona habet essentiam D. tanquam constitutivum commune , per quod constituitur in esse Dei : & habet insuper relationem personalem , per quam constituitur in esse talis personæ , & distinguitur ab aliâ : sic v. g. prima persona distinguitur à secundâ per paternitatem , secunda per filiationem , tertia per spirationem passivam.

PROBATUR secunda pars , quòd proprietates personales constitutivæ cujuslibet personæ sit relativa , non absoluta. Primò , quia Scriptura semper exprimit personas nominibus relativis. Matth. ultimo , *Baptizantes eos in nomine Patris, & Filii, & Spiritus sancti* : teste autem Dionysio , lib. I. de DD. nominibus , *non est audiendum aliquid dicere de supersubstantiali & occultâ divinitate , præter ea , quæ sacris eloquiis sunt expressa*. Secundò , quia Concilium Tolet. habet in confessione fidei , *hoc solo persona numerum insinuans , quod ad invicem sint* : Per quod patet , illas tantùm distingui & constitui per solam relationem. Tertiò , quia Patres subscribunt huic sententiæ. Boëtius , *Substantia continet unitatem , sed relatio multiplicat Trinitatem*. Divus Augustinus , *Persona nullo modo ad se dicuntur* , & sic non constituuntur in esse personæ per

abstracto deberet sibi identificare realiter filiationem ; infinitum enim identificat sibi realiter aliud , & sic paternitas & filiation non remanerent distinctæ realiter , nec Pater & Filius : ergo proprietas personalis non est formaliter infinita. Tandem , idem est principium constitutivum , ac distinctivum , ut patet de homine , qui per rationale distinguitur à bruto , & per idem rationale constituitur in esse hominis ; sed proprietates relativæ distinguunt adæquatè personas : distinguitur enim Filius à spiritu S. per filiationem : ergo personæ constituuntur in esse personali per relationes.

OBJEC. 1. Patres asserentes innascibilitatem distinguere Patrem à Filio : ergo & constituere ; quia , ut antea dixi , idem est principium constitutivum , ac distinctivum ; sed innascibilitas est proprietas absoluta : ergo personæ constituuntur per absolutas proprietates. Resp. non satis constare an innascibilitas sit proprietas absoluta , vel relativa ; sed dico , innascibilitatem non esse proprietatem constitutivam , nec distinctivam ; quia constitutivum debet esse positivum , sicut res constituta est positiva. Quod si Patres dicant , innascibilitatem distinguere ; hoc verum est , secundariò , non primariò : quia positiva semper præcedunt negativa , & sic paternitas , cùm sit quid positivum , priùs distinguit Patrem à Filio , quàm innascibilitas.

OBJEC. 2. Omnis relatio supponit absolutum , quod per illam referatur ; ut patet de similitudine , quæ præsupponit duos parietes albos , antequam sint similes ; paternitas etiam

**Objic. 4.** Ex Scoto, omnis relatio terminatur ad absolutum; sed paternitas terminatur ad Filium, & filiatio ad Patrem & spiratio passiva ad Patrem & Filium, sicut spiratio activa ad Spiritum sanctum; ergo tres personæ sunt quid absolutum: ergo constituuntur proprietatibus absolutis. **Resp.** Scotum loqui de relationibus creatis; quando enim dicit, nullum relativum refertur primò ad correlativum, postea se interpretatur, dicens hoc intelligi de relationibus definibilibus, quales non sunt divinæ: Quod si intelligatur etiam de relationibus divinis; ita quòd dicat, relationes divinas terminari ad absolutum; dico hoc verum esse de termino formali, & inadæquato, & secundario; scilicet, essentiâ D: non de termino adæquato & primario qui est persona; itaut relationes divinæ terminentur ad absolutum; tanquam ad rationem fundamentalem terminandi; licet non tanquam ad terminum primarium: v. g. paternitas divina habet duos terminos; unum primarium qui est Filius, & hic est relativus; alium secundarium, nempe essentiâ Filii, quæ est absoluta.

**Objic. 5.** Persona originans est prior originatâ; sed relativum non est prius suo correlativo; ergo personæ divinæ, quarum una est originans & alia originata, non sunt relativæ. **Resp.** originans est prior originato; origine, concedo: tempore, aut naturâ, nego: Ad minorem, relativum non est prius correlativo; naturâ aut tempore, conc. & hoc est, quod dicit Philosophus, relativâ sunt simul naturâ; origine, nego,

Quij

agere incommunicabile ; quoniam illud constituit. Resp. 2. quòd persona constituatur quidem in ratione talis personæ per relationem, v. g. Pater per paternitatem, Filius per filiationem, & Spiritus S. per spirationem passivam, tamen esse alias rationes in personis, quæ constituent eas, ut personas distinctas : Unde potest dici v. g. quòd Pater constituatur in esse primæ personæ per primam incommunicabilem subsistentiam, ad quam natura D. determinatur per se, & immediatè ; sicut natura humana per se determinata fuit ad personam Adami ; quia autem illa prima persona in secundo instanti generat Filium, tunc constituitur in esse Patris & hoc per paternitatem. Quando ergo dicitur, generatio præsupponit esse, potest sic responderi ; præsupponit esse personæ, conc. quia aliquo instanti, saltem naturæ, Pater est persona, antequam generet : præsupponit talem personam, id est Patrem, nego ; quia Pater non est Pater, nisi per generationem. Instabis, Ergo malè dicimus, quòd relationes constituent personas. Resp. negando ; quia constituunt personas in esse ultimo, formali, & adæquato talis personæ ; licet non constituent in esse personæ simpliciter ; Pater enim non est persona per paternitatem, sed per incommunicabilem existentiam ; est tamen talis persona, seu Pater, per paternitatem. Dices, Si persona est relativa, ejus productio non est generatio ; quia generatio est ad substantiam, non ad relationem. Resp. generationem non minùs esse ad substantiam ; quia terminus adæquatus generatio-

Q. iij

nis est suppositum divinum, quod est substantiale; relatio verò est tantum terminus inadæquatus.

---

### QUESTIO VI.

*Utrum persona Divina distinguantur per relationes.*

**C**AJETANUS dicit, non esse eodem modo loquendum de constitutione & distinctione personarum; nam vult, quòd licet paternitas constituat Patrem & distinguat illum à Filio, non tamen distinguat à Spiritu S. Scotus autem tenet quòd idem sit principium constitutivum & distinctivum.

#### CONCLUSIO.

**S**ICUT personæ D. constituuntur per relationes sub ratione relationum; ita per easdem primò distinguuntur: eo enim modo, quo ens constituitur, etiam proportionatè distinguitur à quocumque alio, quod non est ipsum: ergo sicut relatio divina personas constituit, ita & easdem distinguit. Antecedens probatur, nam eodem modo quo ens constituitur ens, constituitur unum; quia unitas est proprietas entis: ergo eodem modo constituitur distinctum à quocumque alio; illud enim est unum, quod est indistinctum in se; & distinctum ab alio, ergo eadem ratio quæ constituit ens, illud certè distinguit. Exemplificatur de homine, qui sicut constituitur per rationale in esse suo rationali; ita per illud distinguitur à quocum-

que quod non est rationale. Nec dicas, hominem distinguere quidem à bruto per rationale; sed distinguere à lapide per hoc quod homo sit animatus, & lapis inanimatus: hoc enim est falsum; quia si distinguantur homo & lapis per talem rationem; tunc non distinguitur homo, ut homo; sed homo, ut animal: & sic remanet semper, quod homo, ut homo, distinguatur per rationale: Unde superest quod dicamus; idem esse principium constitutivum, & primò distinctivum. Dixi, primò distinctivum; quia homo distinguitur etiam ab equo, quod equus sit hinnibilis, & homo risibilis, hæ tamen rationes non distinguunt primariò, quia primariò non constituunt.

O B J E C. Pater constituitur per paternitatem, & per eam à Filio distinguitur; sed per spirationem activam distinguitur à Spiritu sancto: ergo non est idem principium constitutionis & distinctionis. Resp. paternitatem non solum distinguere Patrem à Filio, & filiationem non distinguere tantum Filium à Patre, sed etiam distinguere à Spiritu S. ita ut si per impossibile uterque non spiraret, non minus ab illo distinguerentur; quia Pater esset Pater; & Filius esset Filius; & neuter esset Spiritus sanctus, & sic dicendum est, quod spiratio activa secundariò tantum distinguat Patrem & Filium à Spiritu S. & primariò paternitas & filiatio distinguant.



---

 QUESTIO VII.

*An sola illa tres relationes constituent  
personas.*

**Q**UONIAM, præter relationes enumeratas, alia prædicata conveniunt personis D. (Patri enim convenit nedum esse Pater, sed esse ingenuus, Filio convenit esse Verbum, & imago; Patri & Filio convenit esse spirator, & inspiratus; denique Spiritui S. convenit esse amor, donum, ingenuus, ingenuitor & inspirator: ) Querimus nunc, an hæc omnia constituent personas, nec-ne?

## CONCLUSIO.

**S**OLÆ tres relationes prædictæ, paternitas, filio & spiratio passiva, constituent & distinguunt personas adæquatè. Probatur, quia nulla proprietatum supernumeratarum pertinet ad constitutionem personarum: ergo solæ illæ tres constituunt. Probatur ant. omnes relationes præallatæ vel sunt negativæ, ut ingenuus, inspiratus, & inspirator; vel positivæ; ut esse spirator, Verbum, imago, amor & donum: Sed negativæ, cum non sint ens, sed negationis tantum entis, non possunt constituere aliquid positivum, ut sunt personæ: Aliæ verò relationes positivæ non constituunt etiam personas; quia supponunt eas jam constitutas; nomen enim Verbi & imaginis advenit Filio jam constituto per filiationem, sicut nomen amoris &

doni advevit Spiritui S. jam constituto per spirationem passivam.

O B J E C. 1. Nil vetat dicere quòd spiratio activa constituat Patrem & Filium in ratione spiratoris : ergo saltem spiratio activa constituit. Resp. aliud esse constituere personam in ratione spiratoris , aliud constituere in ratione personæ : spiratio activa constituit quidem in ratione spiratoris Patrem & Filium , sed non constituit in ratione personæ ; quia paternitas & filiatio sunt priores spiratione activâ , & sic in illo priori signo Pater & Filius constituuntur antequam spirent : Unde spiratio activa non potest illos constituere in esse personæ. Deinde , formale constitutivum personæ debet esse incommunicabile pluribus personis ; aliàs , quomodo posset reddere personam incommunicabilem ? sed spiratio activa est communis Patri & Filio : ergo non constituit Patrem nec Filium.

O B J E C. 2. Abstractis relationibus originis, nempe paternitate, filiatione, & spiratione, remanent adhuc personæ : ergo illæ relationes non constituunt. Resp. quòd duplex est abstractio ; negativa & præcisiva ; prima est ea quâ unum de alio negatur : secunda est illa quâ unum concipitur , non concepto altero ; quo posito, Resp. abstractis relationibus remanent personæ ; abstractione præcisivâ , concedo : possunt enim adhuc concipi personæ , sed conceptu inadæquato & imperfecto, sub ratione incommunicabiliter existentium ; v. g. præcisâ paternitate , prima persona remanet incommunicabiliter existens ; abstractione negativâ , nego.

Q vj



qui enim negaret paternitatem de primâ persona, filiationem de secundâ, & spirationem de tertiâ, negaret consequenter personas, quæ non possunt esse plures; nisi per has relationes.

---

### QUESTIO VIII.

*An præter relationes originis alia reperiantur in divinis.*

**N**OTANDUM quando Aristor. 5. Metaph. dicit, fundamentum remotum identitatis, esse substantiam; æqualitatis esse quantitatem, & similitudinis qualitatem; ibi substantia, quantitas, & qualitas non sunt accipiendæ strictè, sed latè; ita quòd nomine substantiæ, intelligatur non tantum substantia categorica, sed natura & quidditas uniuscujusque rei, tum categoricæ, tum transcendentalis; similiter nomine quantitatis, non semper intelligitur quantitas molis, sed etiam aliquando virtutis; sicut nomine qualitatis, intelligitur id omne quod habet quasi qualitatis rationem, sicut habent in Deo attributa. Fundamentum itaque remotum identitatis divinæ est essentia Dei; proximum verò est unitas numerica ejusdem essentia. Fundamentum remotum æqualitatis divinæ est triplex; scilicet magnitudo; quæ respondet quantitati continuæ & permanenti, quam Deus habet per immensitatem; aliud est æternitas, quæ respondet quantitati continuæ successivæ: tertium tandem est potestas, quæ est fundamentum

æqualitatis respectu rerum ad extra. Hæc tria refert Aug. 1. de fide ad Petrum, ubi dicit: *Tres personas esse æquales in magnitudine, æternitate & potentia*. Fundamentum verò proximum ejusdem æqualitatis, est unitas numerica magnitudinis, æternitatis, & potestatis. Porro, quoad fundamentum remotum similitudinis; quia duplex est similitudo, una essentialis, alia veluti accidentalis; sic fundamentum remotum illius duplex est; essentia divina concepta veluti forma quidditativa personarum, est fundamentum remotum similitudinis essentialis; attributa verò, ut bonitas, sapientia, &c. quæ ad modum qualitatum videntur circumstare essentiam D. sunt fundamentum similitudinis quasi accidentalis; unitas verò essentiæ est fundamentum proximum similitudinis essentialis, & unitas numerica attributorum est fundamentum proximum similitudinis quasi accidentalis.

## CONCLUSIO.

**P**RÆTER relationes originis quæ sunt propriæ, dantur aliæ communes; scilicet identitatis æqualitatis, & similitudinis. Relationes originis vocantur propriæ; quia singulæ conveniunt singulis personis, vel saltem duabus, ut spiratio activa: istæ dicuntur communes; quia conveniunt tribus personis: Pater enim est similis Filio, Filius Patri, & Spiritus S. utrique. Probatur conclusio; primò est identitas inter personas D. in illis enim est eadem essentia. Secundò est æqualitas; ad Philipp. 2. *Non rapinam arbitratus est, esse se æqualem Deo*, idest, ait Aug. *non tyrannicè, nec*

*perrapinam usurpavit. Filius aequalitatem Dei & sed fuit illi connaturalis. Unde habet Athan. In hac Trinitate nihil prius, aut posterius; sed tres personae coeternae sunt & coaequales. Tertiò, patet quòd sit inter illas similitudo, quia conveniunt in essentiâ, tanquam in formâ quæ facit similitudinem essentialem; & in attributis, tanquam in formis quasi accidentalibus, quæ faciunt similitudinem quasi accidentalem.*

OBJEC. præsertim contra æqualitatem, ex Aug. 5. de Trinit. cap. 1. *Deus est magnus sine quantitate*: ergo inter personas D. non est æqualitas, quia æqualitas est plurium una quantitas; id est, relatio inter duo extrema quorum quantitas est eadem: ergo si in divinis non est quantitas, ut vult August. non est æqualitas. Resp. Deum non esse magnum quantitate accidentariâ, & quæ ab ejus essentiâ realiter distinguatur: bene autem quantitate essentiali & identificatâ cum ipso Deo. Vel distinguo: Deus est magnus sine quantitate; molis, conc. virtutis, nego: quæ consistit, ut diximus, in magnitudine, æternitate & potestate: Unde Aug. lib. de fide ad Petrum cap. 1. de personis loquens, ait; *Nemo alium aut præcedit æternitate, aut excedit magnitudine, aut superat potestate.*

OBJEC. Solus Pater habet potentiam generandi: ergo Filius & Spiritus S. non sunt illi æquales, & sic in divinis non est æqualitas. Resp. quòd duplex sit potentia generandi; remota, & proxima; potentia remota nihil aliud est, quàm intellectus cum essentiâ D. sive intellectus possit producere, sive non, & hæc

est in Filio & Spiritu S. potentia proxima est intellectus cum essentia D. quatenus ille intellectus potest producere Verbum, & hæc est in solo Patre; non verò in Filio, aut Spiritu S. hoc posito, distinguo antecedens; potentia generandi est in solo Patre; potentia proxima, conc. & privatio hujus potentia non tollit æqualitatem inter personas divinas; quia potentia proxima generandi est notionalis, & nullum notionale est perfectum aut imperfectum, ut diximus de personis: ergo licet Filius aut Spiritus S. non habeant talem potentiam generandi, non minùs sunt æquales Patri in perfectione; quandoquidem talis potentia non dicit perfectionem: Potentia remota est in solo Patre, nego; Filius enim & Spiritus S. habent intellectum sicut & Pater; habent etiam essentiam D. intelligibilem. Quòd si non possint generare, hoc non procedit ex defectu potentia, seu intellectus; imò hoc procedit ex eo quòd intellectus in utroque habeat jam productum terminum sibi adæquatum; & sic producto tali termino, intellectus non potest amplius producere; Unde in Filio & Spiritu S. intellectus est tantum operativus, non productivus.



---

 QUESTIO IX.

*Quot sint Relationes communes inter personas divinas.*

**Q**UIA istæ Relationes communes multiplicantur ad multiplicationem terminorum; idè; quia plures sunt termini identitatis, æqualitatis, & similitudinis; identitas est multiplex, sicut æqualitas, & similitudo. Quæ autem sit numerus harum relationum videndum est.

## CONCLUSIO

**S**UNT octodecim relationes communes quæ intercedunt inter personas divinas: sunt enim sex relationes identitatis, sex æqualitatis, & sex similitudinis. Cujus ratio est; quia, ad multiplicationem terminorum multiplicantur relationes: unde sunt in Patre duæ identitates; quia Pater est idem Filio; & idem Spiritui S. sunt etiam duæ æqualitates; quia Pater est æqualis Filio & Spiritui S. Sunt denique duæ similitudines in eodem: quia Pater est similis Filio, & similis Spiritui S. ergo in Patre sunt sex relationes communes. De Filio sic est dicendum; quia est idem, æqualis, & similis Patri; & idem, æqualis, & similis Spiritui S. ergo habet etiam sex relationes. Tandem Spiritus S. totidem habet; quoniam est idem, æqualis, & similis tum Patri, tum Filio. Ex his ergo patet quòd quælibet persona habet sex relationes; duas identitatis, duas æqualitatis,

& tot similitudinis ; & sic intercedunt octodecim relationes communes inter personas divinas.

---

### QUÆSTIO ULTIMA.

*An Relationes communes sint reales in Deo.*

**D**I VUS Thomas negat , affirmat Scotus. Ratio primi est ; quia , inquit , ad relationem realem debet multiplicari fundamentum in extremis : ut v. g. sit similitudo inter duos parietes , debeant esse duæ albedines ; una in uno pariete , alia in alio ; & ideò , quia in divinis essentia una numero est fundamentum harum relationum : ideò , cùm non multiplicetur , affirmat relationem identitatis non esse realem ; sicut nec alias , sed tantùm rationis ; quia idem , inquit , referretur ad seipsum : Scotus verò , qui talem multiplicationem fundamenti non requirit , tuc-  
tur illas esse reales.

### CONCLUSIO.

**P**RÆDICTÆ relationes sunt reales. Ita Scotus. Probatur , quia ad relationem realem tria tantùm requiruntur : Primò , fundamentum reale , & terminus realis : Secundò , extrema realiter distincta : Tertiò , quòd ex natura fundamenti & terminorum sequatur relatio absque operatione intellectus ; sed hæc omnia sunt in relationibus communibus : ergo sunt reales. Probatur minor , fundamentum enim est reale , scilicet essentia

& attributa ; terminus etiam est realis nimirum personæ ; deinde , extrema realiter distinguuntur , nempe personæ ; & denique illæ relationes pullulant ex naturâ rei ; nam positâ generatione activa in Patre , & passiva in Filio , resultant illicò relationes paternitatis & filiationis : ergo illæ relationes sunt reales.

Probatur 2. Si quid impedit quominus illæ relationes sint reales , est unitas fundamenti , ut vult D. Thomas ; sed unitas fundamenti non impedit realitatem talium relationum : ergo , licet fundamentum sit unum , relationes illæ sunt reales. Probatur minor triplici ratione. Primò , quia fundamenta ipsa non referuntur , sed extrema ; duæ albedines enim non sunt sibi similes , sed duo parietes , ratione albedinis : ergo frustra D. Thomas dicit quòd unum refertur ad seipsum ; quia non est fundamentum quòd refertur , licet sit ratio referendi ; benè autem extrema referuntur , quæ sunt realiter distincta. Secundò , quia , quo fundamentum majorem habet unitatem , eò perfectior est relatio ( est enim major identitas , ubi natura est una specie , quam ubi est una genere ) ergo erit major identitas , ubi est una numero , ut in divinis , quàm ubi est una specie : ergo unitas fundamenti non tollit realitatem relationis , imò potiùs illam reddit perfectiorem. Tertiò , quia si multiplicatio fundamenti necessaria esset in extremis ad relationem realem , relationes originis in Deo non essent reales ; quia ipsarum fundamentum est intellectus & voluntas , quæ non multiplicantur in personis divinis.

Probatur 3. Fundamentum identitatis, similitudinis, & æqualitatis non est fundamentum quatenus multiplicatur: ergo quando non multiplicatur, est æque fundamentum relationum realium. Consequentia patet, & antecedens probatur, quia prædictæ relationes fundantur in unitate fundamenti; æqualitas enim est quorum quantitas est una, & sic de aliis; sed non habet unitatem quatenus multiplicatur; quia unum & multa sunt opposita: ergo fundamentum non est fundamentum, quatenus multiplicatur; ergo licet essentia, magnitudo, & attributa non multiplicentur in divinis, non minùs tamen relationes identitatis, æqualitatis & similitudinis erunt reales: si enim v. g. Deus eandem numero albedinem posuisset in duobus parietibus, illi parietes essent sibi similes & illa similitudo esset realis; licet in tali suppositione non multiplicaretur fundamentum.

Objic. 1. Si non multiplicaretur fundamentum in extremis, sequeretur quòd idem referretur ad seipsum; fundamentum enim est ratio referendi. Resp. negando sequelam: quoniam enim fundamentum est ratio referendi, non verò id quòd refertur; licet fundamentum sit unum in extremis, tamen unum non refertur ad seipsum, quandoquidem sunt extrema quæ ad invicem referuntur, & quæ sunt realiter distincta; sicut diximus de parietibus qui haberent eandem numero albedinem; in tali suppositione unum non refertur ad seipsum; imò ea quæ referrentur, nempe illi duo parietes, essent distincta realiter: & proinde relatio, quæ esset



inter hæc extrema , remaneret semper realis , licet fundamentum non multiplicaretur. Dices: Fundamenta non tantum sunt ratio referendi , sed aliquando ipsamet referuntur ; ut patet quia nedum duo parietes albi sunt similes , sed etiam duæ albedines sunt similes : ergo si fundamentum non sit multiplex , relatio non erit realis ; quia pro tunc unum & idem referretur ad seipsum. Resp. quod reverà fundamenta aliquando referuntur , ut in exemplo allato , & tunc debent multiplicari ; aliquando verò non referuntur , sed sunt tantum ratio referendi ; & tunc non debet multiplicari fundamentum : in proposito autem non dicimus quod fundamenta referantur ; non asserimus enim , quod essentia Patris sit similis , aut eadem , aut æqualis essentia Filii ; tunc enim unum referretur ad seipsum ; sed dicimus , quod Pater , qui est unum extremum , sit similis Filio ; qui est aliud ; licet fundamentum illius similitudinis sit unum numero in his extremis. Nec quis dicat extrema relationum debere opponi , & non opposi nisi per multiplicationem fundamenti , falsum enim est : quia personæ reverà opponuntur relativè , licet non multiplicetur fundamentum.

O b j e c. omnes Theologos dicentes , esse tantum quatuor relationes reales in divinis ; quæ sunt paternitas , filiatio , spiratio activa & passiva : ergo identitas , æqualitas & similitudo , secundum illos , non sunt reales. Resp. Theologos admittere tantum quatuor relationes reales , loquendo de relationibus propriis , & originis : sunt tamen plures , complectendo tam relationes communes , quam proprias. Dices ,

Si istæ relationes communes sint reales, constituunt & distinguunt personas, sicut relationes originis, quodd est contra omnes. Resp. quodd non constituent nec distinguant personas; quia præsupponunt eas esse jam constitutas per relationes originis: Dices, Si æqualitas esset relatio realis, esset consequenter relatio realis inter attributa; quia sunt æqualia, quoniam sunt infinita. Resp. neg. consequentiam; quia attributa D. non distinguuntur realiter; & ad relationem realem requiritur, quodd extrema realiter distinguantur. Dices: Ex Scoto, æqualitas est perfectio simpliciter; sed relatio realis non est perfectio simpliciter: ergo æqualitas non est relatio realis. Resp. æqualitatem esse perfectionem simpliciter, si sumatur fundamentaliter, pro essentiâ, magnitudine, & attributis: si sumatur verodd formaliter, identitas, æqualitas, & similitudo, non sunt perfectiones simpliciter; relatio enim formaliter sumpta, non est perfecta aut imperfecta.





## CONCLUSIO.

**N**OMEN Patris notionaliter sumptum convenit primæ personæ, & illi soli. Conclusio hæc est de fide; Et ratio ejus est, quia prima persona generat & producit in identitatem naturæ ex vi processioneis; sola etiam taliter producit: ergo nomen Patris convenit primæ personæ, & ipsi soli: Unde quamvis Filius producat cum Patre Spiritum S. quia tamen non producit generando, sed spirando; ideo non debet dici Pater. Ubi sciendum est, quodd licet nomen Patris possit sumi essentialiter & notionaliter; tamen primariò & præcipuè habet significationem personalem, & sic licet possit dici de Filio, quodd essentialiter sit Pater respectu creaturarum; non tamen debet dici Pater sine addito, sed Pater creaturarum; quia analogum semper sumitur pro digniori analogato; & paternitas quæ est ad intra, est nobilior paternitate quæ est ad extra, quoniam paternitas essentialiter sumpta respicit solas creaturas; & sumpta notionaliter respicit personam productam, videlicet Filium, qui infinitè est præstantior quacumque creaturâ.

**O**BJIC. Paternitas in se, ut est communis paternitati essentiali & personali, est univoca: ergo falsò dicta est analogica. Resp. esse potius æquivocam, quam univocam; quia personalis est relatio realis & physica; essentialis verò est logica & rationalis: nihil enim ponit reale in Deo, ut diximus quæst. 2. de immutabilitate; constat autem ens reale &

ens rationis non habere inter se communicationem nisi æquivocam.

---

## QUESTIO II.

*Utrum nomen principii conveniat  
prima persona.*

**D**E nomine principii dicendum est sicut de nomine Patris ; quodd scilicet possit accipi essentialiter & notionaliter. Nomen principii essentialiter sumpti dicit respectum ad creaturas , & proinde convenit tribus personis indivisibiliter ; ipsæ enim omnia creata produxerunt : Unde possunt dici principium creaturarum , quoniam opera *ad extra* sunt indivisa. Nomen principii notionaliter sumpti , convenit Deo *ad intra* , non ut Deus est , sed ut persona est. Hic quærimus , an nomen principii sic accepti conveniat soli Patri , vel etiam possit attribui Filio , qui quidem Filius est principium Spiritus sancti.

### CONCLUSIO

**N**OMEN principii convenit primæ personæ ; non tamen est ita illi proprium , quin possit attribui Filio , licet principalius Patri competat. Hæc conclusio habet tres partes , quarum probatur prima : Per principium intelligendum est id à quo est aliud , vel aliud ; sed. Filius vel Spiritus S. sunt à Patre : ergo Pater est principium Filii , & Spiritus S. Deinde : Quidquid producit aliud , vel est principium ejus , vel causa ; sed Pater pro-

producit Filium, & non est causa : ergo est principium. Probatur secunda pars eadem ratione ; quia scilicet, tum Pater, tum Filius producant Spiritum S. ergo vocabulum principii est commune Patri & Filio. Probatur tertia pars, quia solus Pater est principium sine principio ; solus Pater est producens, & omnino improductus ; solus tandem Pater est principium totius divinitatis, ut cum vocant Aug. 4. de Trinit. cap. 2. Athanas. D. Dionys. Concilia Tolet. in confessione fidei, & Florent. in litteris unionis, sess. ultimâ : sed Filius est principium ex principio ; Filius non est improductus ; filius tandem non est fons & origo totius divinitatis, licet sit origo divinitatis communicatæ Spiritui S. ergo nomen principii principalius Patri convenit.

OBJEC. in id quod diximus ; Patrem esse principium divinitatis. Si Pater esset principium divinitatis, divinitas à Patre realiter distingueretur, & præterea esset producta ; sed hoc falsum est, quia divinitas est idem realiter cum Patre, & ipsa nec generat, nec generatur : ergo Pater non est fons divinitatis. Resp. 1. Patrem non esse principium divinitatis productæ ; ipsa enim nec producit, nec producitur ; nec generat, nec generatur : est tamen principium divinitatis communicatæ ; nam Pater, mediante generatione, communicat Filio divinitatem ; & Pater & Filius Spiritui S. Resp. 2. quod quando dicitur ; Pater est principium divinitatis, ibi divinitas sumitur non in abstracto, sed in concreto ; non pro Deo in se, sed pro personis quæ Deus sunt

ita quodd sit hic sensus ; Pater est principium personarum , quæ sunt divinæ , vel habent divinitatem.

---

### QUÆSTIO III.

*Utrum nomen causa conveniat primæ personæ.*

**Q**UIA Pater dat esse Filio , ex hoc volunt aliqui inferre quodd Pater sit causa Filii , & Filius effectus Patris : nos autem dicimus quidem , Patrem producere Filium , & ob hoc esse ipsius principium ; causam verodd esse negabit

#### CONCLUSIO.

**L**ICET Pater cum Filio & Spiritu S. possit dici causa creaturarum , tamen respectu Filii non potest dici causa ; benè autem principium : Ratio est quia principium est nomen generalius & latius patens ; quod denorat illud omne , à quo aliquid producitur , quocumque modo producat ; nomen verodd causæ juxta communem loquendi usum includit semper aliquam realem distinctionem naturæ , saltem numericam ; quod clarum est ex Arist. dicente , causam esse id quod influit esse in aliud : Per nomen autem substantivum , *aliud* , importatur diversitas naturæ ; sed non est distinctio essentialis inter Patrem producentem , & Filium productum : ergo nomen causæ non debet attribui Patri. Deinde , si Pater esset causa ; esset causa efficiens Filii , & Filius esset effectus Patris ; sed quod efficitur , transit à

non esse , ad esse ; quod non potest dici de Filio , qui est æternus : ergo Pater non est causa ejus.

**O B J E C T.** Patres dicentes, Patrem esse causam Filii. Sic Hilar. 4. de Trinit. dicit, *Idem est causa cur sit Deus, & cur sit sapiens* ; & lib. 9. *Filius ex Patre causam sumit* ; Sic Hieron. in cap. 3. Ephes. ait, *Deus est causa sua substantia*. Sic etiam Aug. l. 83. qq. quæst. 16. *Deus æternus est causa æterna sapientia*. Resp. ibi nomen causæ sumi latè pro principio , seu pro ratione cur aliquid est tale , non verò sumitur causa propriè pro eo quod influit esse in aliud essentialiter distinctum ; sic enim Pater non est causa , nec Filius effectus , secundum Athanas. *Non factus , nec creatus , sed genitus*.

**Q U A E R E S**, an Pater possit dici author Filii. Resp. affirmativè cum August. Hilario & aliis, qui tamen explicant hunc loquendi modum , dicentes , præsertim Augustinus ; si idèd Patrem dicis authorem Filii ; quia Filius genitus est à Patre , & Pater genuit Filium ; & quia iste ab illo est , & non ille de isto ; fateor , & concedo : Si autem per nomen authoris minorem vis facere Filium , Patremque majorem, nec Filium ejusdem substantiæ cujus Pater , detestabor & respuam. Nil vetat ergo dicere in eo sensu ; Patrem authorem Filii : An autem Filius possit dici author Spiritus S. negat D. Thomas , dicens , nomen authoris non convenire nisi illi qui habet rationem primi principii , quod non convenit Filio : Melius tamen Hilarius vocat Filium authorem Spiritus S. atque Spiritum S. produci à Patre & Filio



authoribus, sumendo hanc vocem adiectivè, non substantivè; quia vis spirativa est una & eadem numero in Patre & Filio: Unde quia forma spirandi non multiplicatur, nomen substantivum authoris non debet multiplicari. Nec quis dicat authorem debere esse superiorem altero; sufficit enim quòd sit principium ejus.

---

#### QUESTIO I V.

*Vtrum ingenitum competat Patri.*

**N**OMEN hoc, ingenitum, multifariè sumitur. Primò, pro hoc quod non est creatum, quomodo illud usurpabant Ariani, dicentes, solum Patrem esse ingenitum, ut inde Filium genitum seu creatum facerent; & sic non est proprietas primæ personæ, sed cuilibet convenit. Secundò, ingenitum sumitur pro eo quod non est propriè genitum: & sic Spiritus S. potest dici ingenitus, quia reverà non est genitus; & in tali usurpatione, ingenitus idem est, ac infilius, si sic dari liceat. Tertiò, sumitur pro eo quod per nullam productionem habet esse; & hoc modo sumptum, soli Patri convenit.

#### CONCLUSIO.

**I**NGENITUM sumptum tertio modo, pro eo quod nullo modo est productum, convenit Patri tanquam ejus proprietas. Sic August. 15. de Trinit. cap. 26. dicens, *Solus Pater non est ab alio; ideo solus dicitur ingenitus.*

Est etiam omnium doctorum, solum Patrem ingentum, & innascibilem nuncupantium, contra Sabellianos Patrem asserentes natum fuisse de Maria Virgine. Ratio patet; quia Filius est productus per generationem, & Spiritus S. per spirationem: ergo solus Pater est improductus, & sic ingentus. Quod si Doctores rejiciant nomen ingenti à persona Patris, ut Athanas. qui Epist. de Decret. Nicenæ Synodi sub finem, scribit: hæreticos accepisse illud vocabulum à Paganis, ut suas fraudes facilius occultarent: sicut etiam Basil. qui lib. 1. contra Eunomium, dicit; in vocabulo ingenti latere aliquam blasphemiam: ut etiam D. Ambros. de Sacramento Incarnationis: Respondendum est, præfatos Doctores non rejicere simpliciter hoc vocabulum; non possunt enim negare Patrem esse improductum; sed negabant applicationem hæreticorum, qui sophisticè utebantur hoc vocabulo, ut colligerent Deum Patrem differre essentialiter à Filio: sic enim concludebant; si solus Pater est ingentus, idest increatus; ergo Filius & Spiritus S. sunt creati: ergo non sunt ejusdem substantiæ ac Pater; quia eadem substantia non potest esse creata & increata; & proinde non volebant Filium & Spiritum sanctum esse Deum: talis autem applicatio vocabuli, ingenti, est hæretica; & in hoc sensu nomen hoc increpabant Patres citati, propter abusum hæreticorum; sicut aliàs Patres rejiciebant nomen hypostasis, dicentes quod non bonæ suspicionis esset, licet communiter omnes eo utantur, asserendo tres esse

hypostasi in divinis. Ratio autem quare rejiciebant illud, erat; quia nomen, hypostasis, apud Græcos significat substantiam, & personam. Unde Ariani volebant inferre, quod essent tres substantiæ in divinis, quia sunt tres hypostases; & consequenter inferebant, Filium non esse consubstantialem Patri: in his ergo locis Patres non rejiciunt nomina; sed tantum malam applicationem eorum.

**O b j e c. 1.** Augustinum s. de Trinit. cap. 6. dicentem; ingentum esse idem, ac non genitum; & non genitum idem esse, ac non Filium; sed Spiritus S. est non Filius: ergo est ingentus, & sic nomen ingenti soli Patri non convenit. Resp. August. ibi sumere ingentum secundo modo, & sic reverà convenit Spiritui sancto, nos autem loquimur de ingento spectato tertio, modo inquantum idem est, ac improductum; & tunc soli Patri convenit.

**O b j e c. 2.** Essentia D. est ingenta tertio modo; quia non est producta: ergo ingentum non convenit soli Patri. Resp. 1. quod licet non sit producta, est tamen communicata; quod de Patre dici non potest qui non communicatur, & sic essentia non est propriè ingenta; sumimus enim ingentum, pro eo quod non est genitum, nec communicatum, nec productum. Resp. 2. essentiam esse ingentam negativè; quia generari ipsi non potest convenire; non verò est privativè ingenta, ut Pater, cui potest convenire generari. Dices, Prima persona non est apta ad generari: ergo ingentum convenit illi tantum negativè, sicut essentia. Resp. 3. non est apta, ut prima persona;

conc. ut persona simpliciter, nego. Deinde, licet essentia D. esset ingenita, non minùs tamen Pater diceretur solus ingenuus; quando enim vocamus eum ingenuum seu improductum, loquimur de Patre per comparisonem ad alias personas, quæ non sunt ingenuæ; non verò per comparisonem ad essentiam D.

OBJEC. 3. contra id quod diximus ingenuum esse proprietatem Patris; Proprietas dicitur dignitatem; sed esse ingenuum non est dignitas, aliàs Filius & Spiritus S. carerent dignitate. Resp. cum Scoto majorem esse veram de proprietate absolutâ seu attributali; quoad proprietatem relativam; satis est, inquit, quòd non dicat indignitatem. Dices, Ingenuum non est proprietas personalis, quia non est relativa, relatio enim positiva est. Resp. ingenuum esse proprietatem negativam relativam, ut vult Aug. 3. de Trinit. cap. 7. sicut enim genitus non ad seipsum dicitur, sed quòd ex genitore sit; ita cum dicitur, ingenuus, non ad seipsum; sed quòd ex genitore non sit; & sic esse ingenuum, est proprietas relativa negativa.



---

 QUESTIO V.

*Vtrum ingenitum sit proprietas constitutiva Patris.*

**E**X his quæ diximus, videtur soluta ista quæstio: quando enim asseruimus personas D. constitui per relationes originis; ex hoc patet, quòd ingenitum non sit proprietas constitutiva Patris; quoniam paternitas ipsum constituit: Majoris tamen explicationis causâ, hanc de novo proponimus quæstiunculam, ad quam negativè respondebit.

• CONCLUSIO.

**L**ICET Ingenitum sit proprietas Patris, non tamen est constitutiva; quia Ingenitum formaliter importat negationem, quæ non potest constituere rem positivam: tale enim debet esse principium constitutivum, qualis est res constituta; sed res constituta, nempe Pater, est positiva: ergo constitutivum ejus non potest esse negativum. Deinde, tres personæ non se haberent uniformiter in ratione personalitatis; aliæ enim constituerentur per proprietates positivas, ut Filius per filiationem, & Spiritus S. per spirationem passivam, & Pater per proprietatem negativam constitueretur.

## QUESTIO VI.

*An Pater generet filium de suâ substantiâ.*

**H**Æ præpositiones, *de*, & *ex* in hac materiâ indifferenter sumuntur; quamvis enim, *de*, vi suæ significationis importet consubstantialitatem producti cum producente; quomodo dicimus Filium esse de Patre; *ex* verò consubstantialitatem non importet ex se, quia latius patet, & dicit tantum habitudinem producentis ad productum, & è contra; siue dicat consubstantialitatem, quomodo potest dici Filium esse ex Patre; siue non dicat consubstantialitatem, ut quando dicimus domum esse ex architecto, non verò de architecto; quia domus non est de substantiâ architecti: Tamen, quia in divinis origines dicunt consubstantialitatem producti cum producente; idè uti licet sine distinctione, præpositione, *de* & præpositione, *ex*.

## CONCLUSIO.

**P**ATER producit Filium de suâ substantiâ. Sic Athanas, in Symbolo<sup>o</sup>, loquens de Christo: *Deus est ex substantiâ Patris, ante secula genitus*. Sic & Aug. libro de fide ad Petrum cap. 2. *Pater Deus, de nullo genitus Deo, semel de suâ naturâ genuit filium suum*. Sic Damasc. *De ipsâ Patris substantiâ Deum filium astruimus*. Ratio hujus est, quia generatio est actio quâ aliquid producitur de substantiâ generantis; sic homo hominem generat, non

verò sol ranam ; quia homo producit filium de suâ substantiâ , non verò sol ranam.

**O b j e c. 1.** Est una tantùm & simplicissima substantia in Patre , Filio , & Spiritu S. ergo si Pater generat Filium de suâ substantiâ , Filius generatur ex suâ substantiâ propriâ , & ex substantiâ Spiritus S. Resp. quòd Filius potest dici quidem esse ex substantiâ quæ est in seipso , & in Spiritu S. quia est eadem numero substantia in tribus personis ; sed non potest dici , quòd sit de substantiâ suâ aut de substantiâ spiritus S. quia hoc denotaret Filium producere se , aut Spiritum S. generare Filium , quod falsum est : dicitur ergo Filius de substantiâ Patris , non de substantiâ Filii ; quia est de substantiâ quæ est in Patre in primo signo originis , in quo signo nondum est Filius , aut Spiritus S. Dices , Ergo Filius est Filius substantiæ Patris , si autem est Filius substantiæ Patris , distinguitur realiter à substantia , quæ est in Patre. Resp. non dici Filium substantiæ Patris ; quia substantia Patris non generat Filium ; sed dicitur , de substantiâ , quia substantiâ est principium inadæquatum , quo generatur Filius. Quòd si Aug. ipsum vocat Filium substantiæ Patris : id est , Filium productum de Patris substantiâ.

**O b j e c. 2.** Si Filius esset ex substantiâ Patris , esset ex substantiâ divinâ ; si esset ex substantiâ divinâ , esset ex essentiâ divinâ , quia essentia & substantia sunt idem ; sed si esset ex essentiâ divinâ , tres personæ essent ex eâdem essentiâ , quod est contra August. 7. de Trinit. cap. 6. Respondet Scotus , Filium posse dici de essentiâ

Patris, non verò de essentiâ D. quia esse *de*, vel *ex*, dicit originationem unius ab alio; persona autem Filii non originatur ab essentiâ D. & sic non dicendum est, Filium esse de essentiâ D. quia tamen originatur à Patre, rectè dicitur, quòd sit de essentiâ & de substantiâ Patris.

---

### Q U A S T I O V I I .

*An substantia Patris ex qua generatur Filius, teneat rationem materiae aut formae*

**F**ILIUS in divinis non producitur ex nihilo, quidquid dicant Ariani, volentes illum esse creatum; quia hoc repugnat divinitati ejus, quam probavimus: producitur ergo de substantiâ Patris. An autem substantia seu essentia Patris teneat locum materiae, aut formae, hoc quaerimus: Henricus, Durandus & multi docent substantiam esse tanquam materiam.

### C O N C L U S I O .

**S**UBSTANTIA Patris ex quâ generatur Filius, non tenet locum materiae, sed quasi formae: nam materia involvit potentiam, & persona est actus; ubi autem est unio duorum, quorum unum est potentia, & aliud actus, ibi est compositio; & sic quælibet persona esset composita: substantia ergo Patris non tenet locum materiae; sed tenet locum quasi formae: vel potius tenet locum actus essentialis, qui incommunicabiliter determinatur per



relationem, quæ est actus notionalis : Unde ex essentia & relatione non fit compositum ; quia utrumque se habet ut actus. Hanc conclusionem confirmant Theologi, asserentes essentiam esse terminum formalem generationis, qui communicatur ; non verò qui producitur.

Objic. Illud est materia quod est subjectum generationis ; sed essentia D. est subjectum generationis : ergo est veluti materia. Probatur min. Quod manet sub utroque termino, est subjectum generationis ; sic v. g. materia ligni est subjectum generationis ignis, quia manet sub formâ ligni, & sub formâ ignis ; sed essentia D. manet in Patre & Filio : ergo est subjectum generationis. Resp. neg. min. quia licet essentia D. sit fundamentum generationis, non tamen est subjectum : Ad probationem dico ; quod manet sub utroque termino generationis, est subjectum ejus ; dist. si illa generatio sit mutatio, concedo ; tunc enim subjectum manet sub privatione & formâ : sic generatio non fit mutatio, sed tantum productio, nego : uti est in proposito, ubi essentia D. nunquam fuit sub privatione, licet manserit & maneat in producente & producto. Dices, Si essentia non se habeat quasi materia seu potentia, & persona ut actus, ex utroque fiet unum per accidens ; quia sunt duo actus simul. Resp. hoc esse falsum, quando unum sibi identificat aliud ; tunc enim fit unum per identitatem, non per accidens. Dices, non potest intelligi ; quomodo essentia non distinguat, & relatio distinguat ; nisi quia essentia est velut potentia, & relatio ut actus. Resp.

benè intelligi, quia unus est actus essentialis, qui non distinguit: est enim idem in omnibus personis; & alius est actus personalis qui distinguit. Dices, relatio est forma respectu fundamenti, & fundamentum est quasi materia respectu relationis. Resp. nomen subjecti & materiae non reperiri, nisi quando relationes sunt inherentes; in divinis autem relationes sunt subsistentes: ergo essentia D. non potest vocari subjectum aut materia, licet possit denominari fundamentum relationum.

---

### QUESTIO VIII.

*Quomodo essentia D. determinetur ad Patrem.*

**P**ATER quidem quomodo essentia D. ad Filium & Spiritum S. determinetur. Hoc fit enim mediante intellectu & voluntate; quia Pater, mediante intellectu, seu dictione, producit Verbum, & communicat illi essentiam D. Pater etiam & Filius, mediante voluntate, seu spiratione, producunt Spiritum sanctum & consequenter communicant illi essentiam D. essentia ergo D. communicatur Filio & Spiritui sancto mediatè: Quomodo autem determinetur ad Patrem, dicet

#### CONCLUSIO.

**E**SENTIA D. determinatur immediatè ad primam personam. Sic Scotus quæst. 4. quodlib. Sicut enim quælibet natura determinatur immediatè ad unum suppositum in quo subsistat, ut patet de natura humana, quæ de-

terminata fuit immediatè ad personam Adam, & mediante Adamo ad posteros, sic natura & essentia D. immediatè determinata est ad primam personam, & mediante primâ, ad secundam & tertiam: essentia Dei ergo non est in Patre per productionem, nisi latè sumptam, id est, per communicationem; sed postulat esse immediatè in eo per naturalem consequentiam.

Objic. 1. Si essentia Dei est determinata ad primum suppositum, non potest esse in aliis; quia redditur incommunicabilis per primam personam; ratio enim personæ est reddere naturam incommunicabilem: si ergo natura D. est immediatè determinata ad primam personam, non potest ampliùs communicari; quia per primam personam est incommunicabilis, & quod est incommunicabile, non potest communicari. Resp. per primam personam natura D. redditur incommunicabilis, immediate, concedo hoc tamen non impedit, quin per intellectum & voluntatem possit communicari; & sic mediatè; nego. Ad id quod dicitur, incommunicabile non potest communicari; eadem currit distinctio: immediatè, concedo: mediatè, nego; quod est incommunicabile immediatè, non potest ulteriùs immediatè communicari; potest tamen mediatè.

Objic. 2. Ideò essentia determinatur ad primam personalitatem, quia unaquæque essentia intellectualis ex se affert secum suam personalitatem connaturalem: ergo si sit capax plurium personalitatum, ut est essentia D. illas habebit immediatè: ergo in divinis nulla erit personalitas producta, Resp. dist. min. si sit capax im-

mediatè illarum, illas secum afferet; conc. si sit capax tantum mediatè, illas afferet, nego. Essentia autem D. est capax tantum unius personalitatis immediatè; ergo affert secum tantum unam, licet alias possit habere mediatè; mediantibus scilicet dictione & spiratione.

QUÆRES, quænam sit differentia inter potentiam proximam generandi, & remotam. Resp. hanc esse, quòd potentia proxima est intellectus cum essentia D. prout est in primo supposito determinatus; Deus enim ut Deus, non habet potentiam proximam generandi; quia debet esse in aliquo qui distinguatur realiter ab eo qui generatur: sed solum suppositum in divinis potest distingui realiter ab altero, & non Deus ut Deus: ergo Deus ut Deus, non habet potentiam proximam generandi; & proinde illa debet esse in supposito quod sit primum; quia generatio est prima communicatio quæ fit in divinis. Potentia remota generandi est tantum intellectus cum essentia D. in quocumque supposito reperiatur: & sic dici potest quòd in Filio & Spiritu S. sit potentia remota generandi: si enim per impossibile Patet non produxisset Filium, & Filius existeret; Filius posset illum producere: hæc autem potentia remota generandi in Filio non potest reduci ad actum: non tamen debet dici imperfecta; quia si non producat, hoc non procedit ex ipsius imperfectione, sed hoc oritur ex eo quòd talis potentia generandi in Filio habeat suum terminum adæquatum: & si posset producere, ut est in Filio; ex hoc sequeretur quòd Filius non esset adæquatus potentia generandi; & proinde

non infinitus : si ergo Filius non possit generare , hoc non arguit imperfectionem , sed perfectionem dicit , scilicet infinitatem. Porro potentia remota generandi est absoluta ; nihil enim est aliud , quàm intellectus cum essentiâ ; potentia verò proxima est relativa ; quia respicit terminum generabilem.

---

### QUESTIO X.

*An Pater producat Filium necessario & naturaliter.*

**N**OTANDUM est, quatuor esse necessitates: Prima est violentiæ , quæ accidit reluctanti naturæ , ut quando lapis projicitur sursum. Secunda est necessitas coactionis , quæ accidit reluctanti voluntati , ut quando quis mediante imperio & impulsu alterius, vult ire in carcerem. Tertia est immutabilitatis ; quâ fit , ut oppositum non possit succedere , suppositâ determinatione , licet absolutè possit esse. Tali necessitate vult Deus necessario *ad extra* quidquid semel voluit ; quando enim aliquid voluit pro aliquo instanti , non potest velle contrarium , aliàs mutaretur ; unde hæc necessitas dicitur necessitas immutabilitatis. Quarta tandem est necessitas omnimodæ inevitabilitatis , quando scilicet aliquid ita est necessario , ut non possit non esse ; sic Deus se amat necessario quia se amat inevitabiliter , ut diximus.

NOTANDUM 2. hoc verbum , naturaliter, tri-

bus præsertim modis posse usurpari. Primò , prout opponitur supernaturali ; & sic , alia est virtus naturalis , quam naturaliter acquirimus ; alia supernaturalis , quæ supernaturaliter infunditur. Secundò , prout opponitur artificiato : sic aqua elementatis dicitur naturalis , ubi aqua rosacea dicitur artificata. Tertiò , prout opponitur libero ; sic ignis dicitur naturaliter calefacere ; quia non liberè calefacit. Aliqui dicunt , esse distinctionem inter produci naturaliter , & produci per modum naturæ ; dicunt enim , illud produci naturaliter , quod dicit necessariam habitudinem ad producens ; & sic Spiritum S. produci naturaliter , quia necessariò producitur à Patre & Filio : dicunt autem illud produci per modum naturæ , quod producitur per potentiam naturalem ; & sic solus Filius , non Spiritus S. producitur per modum naturæ.

## CONCLUSIO.

**P**ATER non generat Filium necessitate violentiæ , aut coactionis , aut tantum immutabilitatis ; sed omnimodæ inevitabilitatis , seu indefectibilitatis ; imò ipsum producit naturaliter. Dux primæ partes patent , ex eo quòd tales modi producendi dicunt defectum & tristitiam , quod procul à Deo arcendum est. Tertia pars clara est ; si enim Pater produceret Filium necessitate tantum immutabilitatis , Verbum D. non esset magis necessarium , quàm mundus , qui sic producitur. Quarta pars colligitur ex eo quòd Verbum D. sit ens absolutè necessarium , & indefectibile : ergo producitur necessariò , necessitate absolutâ ; quia Pater non potuit ipsum non producere. Quinta

tandem pars est evidens ; quia Pater genuit Filium per intellectum qui est principium naturale , unde generatio dicitur opus naturæ : quoniam ergo Filius habet esse per generationem , proinde producitur naturaliter.

O b j e c. Agens necessarium est imperfectum ; quia non habet in sua potestate dominium suæ actionis : ergo Pater non generat Filium necessario. Resp. antecedens esse verum de agente necessario necessitate dependentiæ & oppositâ libertati ; non de agente necessitate indefectibilitatis & oppositâ contingentia & defectibilitati : Filius enim non est productus contingenter , nec defectibiliter. Si Patres dicant , Filium non produci necessitate ; intelliguntur de necessitate coactionis , vel violentiæ. Si dicant etiam illud esse coactum , quod est necessitatum in actione ; intelliguntur de necessitate quæ petitur ab efficiente , seu impellente extrinseco ; qui enim necessitatur ab extrinseco , cogitur : non intelliguntur verò de necessitate quæ petitur ex naturâ potentiæ ; Quando autem Pater generat Filium , non impellitur ab extrinseco , ut ipsum necessario generet ; sed ex naturâ intellectus , qui cum sit necessario foecundus , non potest ipsum non generare.



## Q U Æ S T I O I X.

*An Pater genuerit Filium voluntate?*

**H**Æc quæstio duplicem sensum patitur ; An Pater producat Filium voluntate , ut principio *quo* ; vel , an producat Filium voluntariè. Si primo sensu ; potest adhuc dubitari, an producat Filium voluntate concurrente ad illum , sicut ad productionem creaturarum , vel voluntate eliciente productionem Filii , sicut eliciente productionem Spiritus S. vel tandem, voluntate applicante aut copulante parentem cum prole ; id est , intellectum Patris ad generationem Verbi. Si autem quæstio intelligatur secundo sensu, possunt tria inquiri. Primum, an gignendo filium , talem gignitionem voluerit ; secundum , an postquam genuit , eam adhuc voluerit ; tertium , an antequam genuerit , eam voluerit gignitionem : licet enim hæc omnia sint simul duratione ; quædam tamen aliis sunt priora & posteriora origine , vel naturali consecutione.

## CONCLUSIO PRIMA.

**P**A T E R non producit Filium voluntate, tanquam principio productivo ; nec voluntate, eo modo quo produxit creaturas. Probat-ur prima pars : Memoria fecunda , seu intellectus est principium productivum Filii : ergo non voluntas : & sic Filius non producitur voluntate , ut principio : quodlibet enim principium unius productionis debet esse determina-



tum ad unicam productionem , & unicum terminum : ergo cum Spiritus S. sit terminus adæquatus voluntatis , solus producit per voluntatem , non Filius. Deinde , si intellectus admitteret secum voluntatem pro principio Filii , intellectus non esset principium perfectum ; ad productionem enim sui termini aliam potentiam exigeret. Pro objectionibus solent allegari Patres , dicentes Patrem generare Filium voluntate ; sed loquuntur de voluntate sumpta adverbialiter ; id est , voluntariè : non intelliguntur autem de voluntate sumptâ pro principio *quo*.

PROBATUR 2. pars, quòd non produxerit voluntate eo modo quo creaturas ; contra Arianos , dicentes Filium esse creaturam , & proinde produci more creaturarum . Probatum ex D. Hilario lib. de Synodis definit. 24. *Si quis voluntate Dei Filium dicat factum , sicut aliquam creaturam , anathema sit.* Ratio est ; quia ita voluit creaturas , ut eas non velle potuerit : non potuit autem Pater non velle generare Filium : est enim summè necessarius & absolutè ; Ubi creaturæ sunt tantùm necessariae ex suppositione divinæ determinationis ; & consequenter non genuit Filium voluntate , eo modo quo creaturas.

OBJICIUNT Ariani apud August. Pater aut genuit Filium volens , aut nolens ; si nolens , miser est ; si volens , non est Filius naturæ sed voluntatis : & sic producit voluntate , ut principio *quo* , vel eo modo quo creaturæ. Resp. Patrem genuisse Filium ut est volens ; non quidem voluntate ut principio , nec

voluntate deliberativa, aut consilii, sicut produxit creaturas, quas potuit non producere; sed voluntate complacentiæ, placuit enim Patri hæc naturalis necessitas, quâ Filium produxit, nec violenter, nec contingenter; sed indefectibiliter & inevitabiliter.

#### CONCLUSIO SECUNDA.

**P**ATER non genuit Filium voluntate applicante parentem cum prole; benè autem voluntate antecedente, concomitante, & subsequente. Primum patet; quia intellectus est potentia naturalis, quæ ex sua naturâ determinatur ad cognoscendum; ergo non genuit voluntate applicante; aliàs esset intellectus simul determinatus ex se, & determinatus ab alio; ac proinde voluntas non copulat parentem cum prole; id est, non determinat intellectum, ut producat Filium; sed producit eum naturaliter & determinatè: Sicut enim respectu cognitionis essentialis voluntas non determinat Deum, ut Deus est, ad hoc ut intelligat; aliàs operatio voluntatis præcederet cognitionem intellectus; imò intellectus essentialis determinatur naturaliter ad intelligendum; sic etiam Pater respectu intellectionis notionalis non determinatur à voluntate, imò determinatur ex se, & ex naturâ potentie; & sic voluntas non applicat parentem cum prole.

**P R O B A T U R** 2. quòd Pater genuerit Filium voluntate tum antecedente, tum concomitante, tum subsequente; in illo enim instanti, quo præsupponitur prima persona, antequam generet, non habet repugnantiam

ad generandum Filium ; ergo genuit illum voluntate antecedente. Cum etiam gignit Filium, non gignit invitus, sed volens ; ergo genuit voluntate concomitante : Postquam denique genuit, non habet tristitiam ex generatione Filii, imò sibi complacet in tali generatione, secundum illud Script. *Hic est Filius meus dilectus in quo mihi benè complacui* : ergo genuit eum voluntate subsequente. Attendite tamen, quòd quando dicitur, Patrem genuisse Filium voluntate antecedenti, consequenti, subsequenti ; hoc intelligitur de voluntate essentiali, quæ convenit Patri, ut Deus est ; quoniam enim Pater est Deus, habet nedum divinitatem, intellectum & voluntatem ; sed habet intellectionem essentialem, & volitionem talem : ergo Patet ut Deus, vult generationem Verbi antequam fiat, vult eam quando fit, & quando facta est ; prioritate & posterioritate sumptâ secundum ordinem præsuppositionis ; non verò prioritate & posterioritate durationis ; hæc enim repugnant Deo.

OBJIC. in primam partem, quòd licet volitio notionalis non copulet parentem cum prole, tamen volitio essentialis determinat intellectum notionalem Patris ; ut producat Verbum ; quia diximus ; quòd volitio essentialis præcedat generationem Verbi, quoniam Pater generat Verbum voluntate antecedenti. Resp. nec voluntatem notionalem, nec essentialem conjungere parentem cum prole ; voluntas enim notionalis non applicat Patrem, ut generet ; quia voluntas notionalis prius vellet quàm intellectus intelligeret ; ex quo sequetur

retur, quòd productio Spiritus S. esset prior generatione Verbi: quoniam Spiritus S. producit per volitionem, & volitio illa esset ante intellectum: nec etiam voluntas essentialis determinat Patrem ut producat; quia producit per intellectum, & intellectus determinatur à se, & non ab alio.

Objic. 2. Intellectus non est ita ex se determinatus, quin aliquando determinetur à voluntate, ut patet de nostro, quando enim non studeo, voluntas mea potest applicare intellectum ad studendum: ergo etiam voluntas essentialis, quæ est in Deo, ut Deus est, potest applicare intellectum Patris, ut se determinet ad productionem Verbi, quod est applicare parentem cum prole. Resp. antecedens verum esse in nobis, qui aliquando sumus indifferentes ad intelligendum, vel non intelligendum objectum, maximè quando objectum est absens; tunc enim voluntas potest jubere intellectui, ut perquirat objectum & intelligat illud; & sic voluntas in nobis applicat parentem cum prole: non tamen in Deo; quia intellectus Patris non est indifferens ut intelligat vel non intelligat essentiam D. nec etiam essentia est absens; imò est intimè præsens, & summè intelligibilis: ergo naturaliter intellectus Patris determinatur ad illam cognoscendam; & non à voluntate: unde licet dicamus Patrem producere voluntate antecedenti, non tamen producit voluntate copulante parentem cum prole.

INSTABIS; Non potest intelligi eum voluntas illa essentialis præcedat, nisi ut determi-

net Patrem ad generandum : ergo si genuit voluntate antecedente , genuit etiam voluntate applicante parentem cum prole. Resp. neg. ant. si enim volitio essentialis præcedat ; hoc non est , ut illa volitio copulet parentem cum prole , sed propter ordinem actionum , ubi essentielles & operativæ præcedunt notionales & productivas ; essentialia enim notionalia præcedunt : per volitionem ergo essentialem prima persona vult , & approbat illam naturalem necessitatem , quâ suus intellectus naturaliter determinatur ad productionem Verbi ; licet illa volitio non determinet intellectum.

O B. j c. 3. contra secundam partem , ubi habetur , quod Pater genuerit filium voluntate antecedente essentiali tantum. Pater ut Pater genuit volens ; aliàs genuisset invitus : ergo genuit filium voluntate antecedente notionali ; voluntas enim notionalis convenit Patri , ut Pater est. Resp. Patrem ut Patrem non genuisse volentem , sed Patrem ut Deum ; si enim genuisset filium volens volitione notionali , volitio notionalis præcessisset intellectiōnem ; cum autem volitio notionalis sit productiva Spiritus S. Pater produxisset Spiritum S. antequam genuisset Filium. Ad id quod dicunt , ergo invitus genuit : Resp. neg. consequentiam ; quia si genuisset invitus , genuisset vel contra voluntatem essentialē , vel contra notionalē : non genuit contra primam , quia genuit voluntate essentiali : non etiam contra notionalē , quia quando genuit Verbum ; nondum est actus voluntatis notionalis ; & proinde non genuit contra volitionem notionalē

tionalem, sed præter illam; quia genuit pro instanti, quo nondum produxit volitionem notionalem; unde patet quod non genuit invitus.

Obj. 1c. 4. contra eandem partem; Si Pater prius vult generationem, quàm generet; ex hoc sequitur quòd Pater prius naturâ velit seipsum, quàm sit; Filius etiam & Spiritus S. prius volent se, quàm sint; quoniam illa volitio est essentialis, & communis tribus. Resp. Patrem se prius velle quàm sit, sicut Filius & Spiritus S. ut Deus sunt; non ut sunt personæ. Dices, Si generatio Filii sit volita antequam ponatur in esse; ergo erit etiam intellecta: quod autem habet esse intellectum, antequam habeat esse reale, habet esse diminutum, & esse futurum: generatio autem Filii non debet esse futura: ergo nec præintellecta, nec prævolita. Resp. quòd, licet generatio Verbi sit præintellecta & prævolita; tamen non debet dici futura; quia ut aliquid futurum dicatur, debet habere aliquam durationem, in quâ non sit; semper autem fuit generatio Verbi: ergo non debet dici futura. Quod si dicatur volita antequam sit, hoc non dicit aliquod instans durationis, in quo Pater velit generationem, antequam ipsa sit; sed dicit tantum ordinem præsuppositionis unius ad alterum. Nec quis dicat, quod si Pater velit generationem, antequam sit; proinde habeat actum desiderii circa illam, ut vult Suares: negatur: desiderium enim propriè sumptum, est tantum circa rem absentem, nunquam autem fuit generatio absens.

## QUESTIO XII.

*An Pater sit beatus antequam generet.*

**R**ATIO dubitandi est, quòd persona Patris constituatur in esse proprio per generationem activam, ut diximus; ex quo videtur debere colligi quòd priùs in Patre debeat esse generatio quàm beatitudo; principium enim constitutum priùs est in re constitutâ, quàm id quod in re consequitur: sed beatitudo videtur supponere Patrem; est enim actio quâ Pater intelligit & amat; & sic videtur, quòd sit priùs beatus, quàm generet.

## CONCLUSIO.

**P**ATER priùs naturâ est beatus quàm generet; quia essentia & essentialia præcedunt notionalia, non modò inter se comparata, sed etiam ut in personis reperiuntur; sed beatitudo est prædicatum essentiali, consistit enim in visione & amore essentiali; generatio verò est prædicatum notionale, quoniam propria est unius personæ: ergo beatitudo præcedit generationem, non tantum ut comparantur inter se, sed etiam ut sunt in Patre: ergo Pater habet beatitudinem, priùs quàm generet.

**CONFIRMATUR.** Jure dicitur quòd Pater priùs sit Deus, quàm generet; quia idèò generat, quia habet intellectum cum essentiâ D. sed quando est Deus, habet omnia prædicata essentialia divinitatis, & proinde beatitudinem; ergo priùs est beatus quàm generet: est

inquam prius beatus prioritate naturæ, non verò originis. quia prioritas originis est inter ea, quorum unum originatur ab alio; sic Pater est prior origine Filio: sed generatio non originatur à beatitudine; ergo beatitudo non est prior origine, generatione; & sic Pater non est prius origine beatus, quàm generet: sed est prius naturâ beatus; quia prioritas naturæ dicit tantum præsuppositionem unius ad alterum; beatitudo autem tanquam quid essentialiter præsupponit ad generationem, tanquam ad quid notionale.

**O b j e c t.** In hac propositione, Pater est beatus antequam generet; ibi Pater vel supponitur pro Patre ut Deus est, vel pro Patre ut Pater est: Si primum, non dicendum est, Patrem esse beatum antequam generet; sed Deum esse beatum ante generationem. Secundum etiam dici non debet, quia Pater non est Pater nisi per generationem: ergo conclusio falsa est. **Resp.** ibi Patrem supponi pro Patre nondum adæquatè constituto, sed inadæquatè constituto per essentialia, & ulterius constituendo adæquate per generationem activam: sicut quando dicitur, homo prius est animal, quàm sit rationalis; ibi homo sumitur pro illâ naturâ constituta per animalitatem, & ulterius constituenda per rationalitatem. Dices, Beatitudo est actus: sed actus præsupponit agens: ergo beatitudo Patrem. **Resp.** beatitudinem præsupponere agens essentialiter & inadæquate constitutum, concedo, scilicet Patrem constitutum essentialiter, non verò præsupponit agens constitutum adæquate.



## QUESTIO XIII.

*Verùm Pater sit sapiens scientiâ genitâ.*

**O**LIM D. Aug. affirmativam tenuit, lib. 83. qq. q. 23. sed lib. 1. retract. cap. 23. resiliit ab illâ opinione, dicens de Patre & Filio: *Aliquando dixi, quod eam genuerit scientiam, qua sapiens dicitur; sed melius istam questionem libris postea de Trinitate tractavimus.* Unde alii Doctores ante & post illum hanc sententiam rejecerunt.

## CONCLUSIO.

**P**ATER non est sapiens scientiâ genitâ; nam scientia in hac propositione, vel sumitur pro perfectione D essentiali, & sic non est genita, & proinde Pater non est dicendus sapiens scientiâ genitâ, sed ingenitâ; vel sumitur pro Filio qui aliquando dicitur scientia Patris, & sic est falsa; quia persona Filii non est Patris forma, vel principium sapiendi, quod tamen per propositionem importatur.

**O**B J C. Filius ex ep. ad Corinth. dicitur scientia Patris, Filius autem est genitus: ergo scientia Patris est genita: ergo Pater est sapiens scientiâ genitâ. Resp. Filium non dici scientiam Patris, quasi scientia habeat rationem formalem principii sapiendi in Patre; dicitur autem scientia Patris, quia Filius habet suam scientiam, sicut & alia prædicata essentialia divinitatis à Patre: quoniam ergo scientia quæ est in Patre, est ea quæ est in Verbo,



---

 QUÆSTIO PRIMA.

*Utrum nomen Filii sit nomen proprium secundæ personæ.*

**N**OMINUM quæ conveniunt personis divinis, alia sunt propria, alia sunt appropriata: Propria sunt illa, quæ ita uni personæ conveniunt, ut alteri non possint convenire; sic nomina propria primæ personæ sunt esse Patrem, & esse ingenitum, sumendo ingenitum pro improducto: nomina propria secundæ sunt, esse Filium, Verbum, & imaginem: nomina propria tertiæ, sunt esse spiritum, & amorem. Nomina appropriata sunt ea, quæ licet tribus personis conveniant; tamen alicui harum præcipuè appropriantur, ob peculiarem ejus rationem producendi aut procedendi: sic Potentia appropriatur Patri, quia habet voluntatem à se & per se; quæ quidem voluntas est principium productivum *ad extra*; sic Sapientia appropriatur Filio, propter modum procedendi; quia procedit per intellectum, & sapientia in nobis est habitus intellectus: sic tandem Bonitas appropriatur Spiritui S. quia producitur per voluntatem, & bonitas residet in voluntate. Hic quæritur utrum nomen Filii sit nomen proprium, vel appropriatum.

CONCLUSIO.

**N**OMEN Filii est proprium secundæ personæ. Testatur fides vocans illum expressè Filium. Psal. 2. *Filius meus es tu, ego ho-*

*die genui te. Matth. 28. Baptizantes eos in nomine Patris, & Filii, & Spiritus S. Psal. 109. Ex utero ante luciferum genui te: esse autem genitum, & esse filium convertuntur. Ratio est, quia secunda persona procedit à primâ in similitudinem naturæ intellectualis; quia autem procedit in similitudinem naturæ, habet esse per generationem, & quia habet esse per generationem, est filius, maximè in entibus intellectualibus; brutum enim non est filius bruti.*

**O b j e c t.** Filius non procedit similis Patri, sed est idem cum Patre; natura enim Filii est eadem numero, ac natura Patris: ergo non procedit per generationem, quæ est origo in similitudinem naturæ; si autem non est genitus, non est filius. **Resp.** esse filium & genitum, licet, sit in identitatem naturæ; generatio enim tendit, ut eadem natura propagetur majori identitate quæ dari potest; ita quòd si natura sit finita, generatio tendit ad identitatem tantum specificam naturæ, ut in creatis; si verò natura sit infinita, generatio sit in identitatem numericam naturæ; quia communicatur sine sui divisione. Porro similitudo naturæ & identitas in definitione generationis pro eodem usurpantur.



## QUESTIO II.

*Vtrum nomen Filii sit univocum Filio divino  
& humano.*

**N**OMEN Filii dupliciter sumitur, late & proprie; late, pro Filio per adoptionem; sic iusti dicuntur Filii Dei: proprie vero pro Filio per naturam. Filius per naturam potest adhuc sumi dupliciter; proprie & improprie: improprie pro quocumque ente ab alio producto; sic homines & Angeli possunt dici filii Dei, quia sunt à Deo procreati & producti: proprie, pro producto à vivente simili in natura saltem specifica; sic homo productus ab homine dicitur filius ejus. Quia tamen ex hac definitione sequeretur, quod equus productus ab equo esset filius ipsius; ideo addendum est, quod propriissime filius sumatur pro producto in natura intellectuali; & sic brutorum proles non diceretur filius; quia ergo Deus est intellectualis, sicut homo, ideo persona producta dicitur Filius personæ producentis, tum in divinis, tum in humanis; Hic autem queritur, an hoc nomen, Filii, sit univocum.

## CONCLUSIO.

**N**OMEN Filii est vere univocum respectu Filii humani & divini, sicut & nomen Patris. Sic Scotus contra D. Thomam putantem hæc nomina esse tantum analogia. Probatur, Ratio Patris & Filii convenit tum Patri increato, tum creato; esse enim Pater, est producere.

viventem ex vivente in similitudinem naturæ intellectualis; & esse filius, est produci vivens à vivente in similitudinem naturæ intellectualis: utraque autem definitio convenit tum Patri & Filio increatis, tum creatis, ergo utrumque nomen est univocum.

Objic. ex D. Thoma, Ratio Patris & Filii prius convenit Patri divino, quàm humano: dicit enim Scriptura, quod omnis paternitas derivatur à Deo; sic etiam omnis filiatio; sed quod prius convenit uni quam alteri, non est univocum: ergo, &c. Resp. quod descendere prius & posterius ad inferiora, hoc non tollit univocationem; sed requiritur tantum ad eam, quod ratio sit eadem in inferioribus, licet prius descendat ad unum quam ad aliud; ut videre est in ente, quod est univocum respectu Dei & creaturæ, licet prius ens descendat ad Deum, quam ad creaturas. Deinde, si descendere prius ad unum, quam ad alterum, tolleretur univocationem, homo non esset quid univocum respectu Adami & aliorum hominum, prius enim Adamus fuit homo, quàm Abel.

---

### Q U Æ S T I O   I I I.

*Utrum nomen Verbi, sit proprium secundæ personæ.*

**A**LLOGIANI existentiam Verbi negabant in divinis, admittentes tantum ipsum per metaphoram; unde sic dicti sunt Alogiani, id est, sine Verbo; ex eo quod dicerent, Verbum

nihil esse aliud, quàm excellentem creaturam, quæ ob eximiam sapientiam sibi communicatam dicta fuit Verbum, sicut Joannes Baptista dictus fuit Vox. In eadem mente erant Ariani: Durandus vero in 1. dist. 27. q. 3. docet nomen Verbi esse essentiale, sed appropriatum Filio, sicut nomen Sapientiæ: Ratio ipsius erat, quòd crederet, Filium non procedere à Patre per intellectum, sed per naturæ fecunditatem, & ideò non dici Verbum; (sicut nec Spiritus sanctus Verbum dicitur) nisi appropriatè, & per quamdam similitudinem, quæ in eo consistit quod sicut processio verbi in nobis est ante processionem amoris; ita processio Filii sit ante processionem Spiritus S. Antequam explicemus; si Verbum sit nomen proprium secundæ personæ.

NOTANDUM est, quòd verbum duplex sit, aliud internum, aliud externum. Internum est imago intellectualis objecti remanens in ipso intellectu. Externum duplex est, vocale & scriptum; vocale est vox illa sensibilis, quæ ore proferunt, & quæ repræsentat verbum mentale, seu id quod est in mente. Scriptum, est vox scripta repræsentans conceptum mentis à vocali tantum materialiter differt in quantum unum voce proferitur, & aliud scripto exprimitur. Verbum est quid relativum; reponitur enim in genere signi & repræsentativi: duplicem respectum includit, unum realem ad producentem, aliud rationis ad rem repræsentatam: prior est respectus effectus ad causam, vel. principiati ad principians; posterior verò est respectus signi ad

significatum. Porro verbum mentis sic definitur ab Aug. Est imago objecti naturaliter expressa ab intellectu fecundo, manens in illo, quamdiu durat actualis cogitatio. Ut hoc intelligatur., recurrendum est ad ea quæ dicuntur de intellectu in Physicâ, lib de Anima: explicemus ergo tantum breviter hanc definitionem. Primo dicitur, *imago objecti*; nam species expressa; quæ est verbum mentis, repræsentat objectum cuius species impressa informat intellectum possibilem: Unde ait Aug. verbum esse simillimum rei notæ de quâ gignitur, & imaginem ejus. Dicitur secundo, *expressa*; duo enim officia habet intellectus possibilis; quorum primum est recipere ab intellectu agente species intelligibiles objectorum quibus informatur; & propter hoc, dicit Philosophus, quodd intellectus intelligendo evadit omnia; illæ autem species intelligibiles quibus informatur intellectus possibilis, dicuntur impressæ. Secundum est ex illis speciebus impressis procedere verbum mentis omnino simile speciei impressæ: verbum autem mentis dicitur species expressa. Unde rectè vocatur verbum mentis, imago objecti expressa. Tertiò dicitur *ab intellectu fecundo*; id est, ab intellectu habente speciem objecti; quæ species in intellectu, dicitur ab aliquibus habitualis scientia, & ab aliis, semen objecti. Tandem additur, *manens in illo quamdiu durat actualis cogitatio*: cessante enim cogitatione, cessat & verbum: Unde, si in memoriâ intellectuali videatur remanere verbum post intellectionem, hoc vocandum est potius phantaf-



ma intellectuale , quàm verbum. In hac definitione explicatur natura verbi in se , prout abstrahit à verbo creato & increato ; nomen enim verbi est univocum respectu utriusque : licet in nobis sit accidens , & in Deo substantia ; licet etiam in productione verbi nostri fiat inquisitio , seu consultatio objecti , quod non fit in productione Verbi D.

## CONCLUSIO.

**N**OMEN Verbi est proprium secundæ personæ ; Scriptura enim exprimit illam nomine Verbi Joan. 1. *In principio erat Verbum . & Verbum erat apud Deum ; Verbum caro factum est.* Epist. etiam Joannis cap. 4. *Tres sunt quæ testimonium dant in cælo ; Pater , Verbum , & Spiritus S.* Sicut ergo primam & tertiam personam nominibus propriis exprimit Scriptura , sic & secundam. Ratio est , quia quidquid produci-  
tur per memoriam fœcundam , idest , per intellectum simul cum specie intelligibili , vel cum objecto , habente rationem speciei intelligibilis , est propriissimè verbum ; sed secunda persona divinitatis hoc habet : ergo nomen Verbi propriè illi convenit.

Objic. 1. cum Durando Anselmum qui Monologii cap. 1. dicit , quòd Pater sit dicens , Filius dicens , & Spiritus S. dicens ; & quod dicere summo spiritui nihil aliud sit , quàm cogitando intueri : ergo dicere est actio essentialis : ergo Verbum , quod est terminus dictionis , est quid essentialiale : & sic non est proprium secundæ personæ. Resp. Anselmum impropriè accipere dicere ; usurpat enim , pro intelligere essentiali ; unde , quia Verbum , Pater , &

**S**piritus S. intelligunt essentialiter ; ideo asserit tres personas dicere ; hæc tamen acceptio est impropria. Dices , In nobis intelligere & dicere non sunt duo actus , quorum unus sit essentialis , & alius relativus : ergo nec etiam in Deo. Resp. neg. consequentiam ; cum enim natura D. ut sic , sit undequaque perfecta , & nihil accipiat à personis , debet habere intellectum & intellectiōnem improductam , & productam in Patre : Non sic autem in nobis ; quia , cum non simus perfecti adæquatè , nisi per actiones quas producimus ; idè non habemus duas intellectiōnes , quarum una sit improducta , & alia producta ; unde in nobis intellectus est tantum productivus , in Deo verò est & operativus , & productivus.

**O** 3 j 1 c. 2. Verbum ex Aug. est cum amore notitia ; sed cum amor , tum notitia , sunt quid essentialia : ergo & Verbum D. Resp. Aug. loqui de verbo nostro ; & si loquatur de divino , distinguendus est : est cum amore notitia ; genita & notionalis , concedo : notitia improducta & essentialis , nego. Dices , Secunda persona dicitur propriè Filius , & filiatio est proprietas constitutiva illius : ergo non debemus ei attribuere nomen Verbi , tanquam ipsi proprium. Resp. quòd nomen Verbi & Filii possint competere eidem supposito , cum hac tamen distinctione ; persona enim dicitur Filius , in quantum induit rationem viventis producti à vivente principio in similitudinem naturæ , non judicando per quam potentiam producat , sive sit per potentiam corpoream , sive per intellectualem : Verbum verò attribuitur personæ

productæ viventis à vivente principio , in similitudinem naturæ per potentiam intellectualem : secunda ergo persona Trinitatis induit rationem Filii , inquantum est producta in similitudinem naturæ ; induit verò nomen Verbi , inquantum est genita per potentiam purè intellectualem. Hæc responsio dilucidat quæstionem , quæ proponi solet sub his terminis ; an nomina verbi & Filii sint synonyma : cui quæstioni respondendum , quòd nomen Filii sit latiùs patetis nomine Verbi ; nomen enim filii convenit omni genito , saltem intellectuali ; siue producat per potentiam corpoream , siue per intellectualem ; nomen verò Verbi convenit tantùm genito per intellectum. Hic quæri solet ulteriùs ; utrùm sicut secunda persona dicitur Verbum , sic etiam possit dici Sermo , quo vocabulo utitur Calvinus ; ubi enim in Evangelio Joannis habemus , *In principio erat Verbum* ; Calvinus vertit , *In principio erat Sermo* , & *Sermo erat apud Deum* , & *Deus erat Sermo* : Ad quam quæstionem respondendum quòd Patres non prohibeant talem loquendi modum ; quia tamen Sermo videtur indicare complexionem plurium verborum simul junctorum , idèò utimur potiùs nomine Verbi , ob ipsius simplicitatem & unitatem. Porro peti potest , an nomen Sapientiæ possit applicari secundæ personæ , sicut nomen Verbi : Ad quod respondetur , non esse nomen proprium ; quia significat cognitionem absolutam , quæ convenit tribus personis ; est tamen nomen appropriatum secundæ personæ , quia procedit per intellectum ad quem spectat Sa-

piencia : Unde Apostolus Christum vocat Dei virtutem & Sapientiam : si tamen nomini Sapientia addatur , genita ; pro tunc nomen Sapientia genita est nomen proprium Filii.

Objic. 3. Verbum D. non est sicuti nostrum ; sed nostrum dicitur propriè verbum : ergo in divinis secunda persona non est propriè Verbum. Resp. quòd sit revera differentia & convenientia inter Verbum D. & nostrum ; quæ differentia non tollit rationem Verbi , ut dicit Athanas. Serm. contra Arianos ; *non tale est quarendum Dei Verbum, quale nostrum est ; quia non talis est Deus , quales nos sumus.* Differunt ergo Verbum increatum & creatum in aliquo , & conveniunt in alio : Primò conveniunt in hoc, quòd utrumque spirituale sit : Secundò , quòd utrumque sit permanens ; idest , tamdiù duret, quamdiù durat intellectio : Tertiò, quòd utrumque non repræsentet ad placitum ; sed naturaliter. Differunt autem ; quia verbum creatum est accidentale : Divinum autem est subsistens, & ratio subsistentis non aufert , sed potius perficit Verbum. Secundò , verbum creatum producit ex indigentia intelligentis : Verbum autem D. producit ex fœcunditate principii productivi : Tertiò , verbum in nobis est forma constituens intellectum intelligentem in actu secundo , ita quòd intellectus non intelligat sine verbo , Verbum autem D. non sic ; quia intellectus D. est formaliter intelligens per intellectionem essentialem , antequam Verbum producat : Quartò , differunt in hoc , quòd in nobis non sit eadem forma intellectus producentis , & verbi producti ; nam forma intelle-

ctus est substantialis , & forma verbi est accidentalis ; in Deo autem est eadem natura in producente , ac in producto.

---

#### QUESTIO IV.

*Verum nomen Imaginis soli secunda persona  
conveniat.*

**I**MAGO definitur similitudo totalis , producta seu expressa ad imitationem producentis. Dicitur primò , *Similitudo* , & hoc vocabulum ponitur loco generis ; nam secundum Aug. omnis imago est similitudo , & omnis similitudo non est imago ; nam ovum est simile ovo , non tamen est imago. Secundò additur , *totalis* , ad differentiam vestigii ; nam vestigium repræsentat tantum partem , imago rem totam. Dicitur tertio , *producta* : Unde Pater D. non est imago Filii , quia non est productus. Ponitur ultimò , *ad imitationem producentis* ; & sic ignis productus ab alio igne , aut canis ab alio cane , non est imago ; quia non fit ad imitationem : non enim intendunt ignis & canis producere sibi simile , cum neutrum sit agens intentionale. Quia est triplex similitudo , nimirum objectiva , exemplaris , & naturalis ; ita triplex est imago. Prima dicitur intentionalis , & est species ab objecto deducta , in sensu vel intellectu recepta , quæ repræsentat objectum ; unde species vocantur imagines rerum. Secunda dicitur artificialis , & est similitudo alicujus artificiati , ad imitandum exemplar facta ; sicut imago Cæsaris quæ

fit ad repræsentandum Cæsarem. Tertia tandem dicitur naturalis ; quæ est similitudo producti naturaliter ad suum producentem , in identitate naturæ , siue specificâ , ut in humanis ; siue numericâ ut in divinis ; & sic Filius est imago naturalis Patris.

## CONCLUSIO.

**N**OMEN Imaginis est proprium secundæ personæ ; S. Scriptura enim soli Filio nomen imaginis tribuit , ut ad Colossens. 1. *Imago Dei invisibilis* : & ab Hebr. 1. *Splendor Patris* . & *figura substantiæ ejus* ; unde Ambrosius dicit . *Solus Filius est plena imago Dei* : unde etiam August. habet , *Non potest dici Verbum de Verbo , nec imago de imagine , sicut dicitur Deus de Deo ; quia non simul ambo imago , sed solus Filius* . Ratio conclusionis est , quia solus Filius est similitudo expressa ad imitationem producentis , scilicet Patris : ergo solus Filius est Patris imago. Probatur ant. quia hoc neque Patri convenit , cum productus non sit ; neque Spiritui sancto ipse enim non est productus ad imitationem Patris & Filii ; licet sit productus ab utroque ; & utrique sit similis ; ad hoc enim ut producat ad imitationem producentis , debet produci per potentiam , quæ ex sua natura tendat in similitudinem ; quod non convenit voluntati , quæ est principium Spiritus sancti.

**O b j e c t .** 1. Si ratio imaginis conveniret Verbo , esset simile Patri , quod falsum est ; quia si esset simile ; vel esset simile in personâ , vel in essentia ; non in persona , quia

personæ sunt dissimiles ; imò paternitas opponitur filiationi : non etiam in essentia , quia Pater & Filius sunt idem in essentia , & unum & idem non est sibi simile. Resp. similitudinem stare non ex parte personæ , sed ex parte essentia ; ad similitudinem autem non requiritur quòd ratio similitudinis sit distincta in rebus quæ sunt similes , ut diximus cap. de relationibus ; si enim esset in duobus parietibus una & eadem albedo , parietes non essent minùs similes : Unde similitudo est in deitate : ita quòd Verbum sit imago Patris sub ratione divinitatis ; accedente tamen paternitate tanquam conditione necessaria , quia inter imaginem & imaginatum debet esse distinctio realis.

OBJ 1 c. 2. Patres vocant Spiritum S. Imaginem Patris : ergo nomen imaginis non est proprium secundæ personæ. Resp. Patres nomine imaginis intellexisse perfectam similitudinem in natura , & hæc est imago improprie sumpta ; quia autem ad rationem imaginis propriæ requiritur ut similitudo habeatur ex vi processionis , sic solus Filius est imago Patris. Si homo dicatur imago Dei , hoc est improprie , inquantum homo factus est ad exemplar divinitatis. Dices , Si nomina Verbi , Filii & imaginis sint propria secundæ personæ ; erunt plura constitutiva. Resp. nomine imaginis non importari peculiarem proprietatem , quæ non importetur nomine Verbi , & Filii ; quia Verbum & Filius idem dicunt , quod imago : hoc excepto , quòd Verbum & Filius dicunt primò processionem naturalem , & secundò similitudinem important : Imago verò dicit pri-

mo similitudinem, & secundariò processionem naturalem,

---

## Q U A S T I O V.

*Ex qua cognitione Verbum D. procedat.*

**I**N divinis alia est cognitio essentiae, alia attributorum; cap. enim de invisibilitate diximus, quòd essentia sit objectum primum; attributa, & personae secundarium. Hic sciendum est, quòd aliud sit quærere, an notitia essentiae & attributorum præcedat productionem Verbi; an verò Verbum producat ex tali notitia essentiae & attributorum. Primum constat; quia essentialia præcedunt notionalia: De secundo est quæstio: Ubi Scotus assignat duo instantia naturæ, in quorum primo complementum omnia quæ sunt *ad intra*; & in secundo complentur omnia quæ sunt *ad extra*. Primum habet adhuc duo alia instantia: primo complentur omnia essentialia; v. g. Intellectio & Volitio, & in secundo complentur omnia notionalia, nempe Generatio Verbi, & spiratio Spiritus S. Hic quæritur, an Verbum producat ex cognitione solius essentiae, vel essentiae cum personis & attributis; vel etiam ex cognitione creaturarum.

## C O N C L U S I O.

**E**X nullius rei actuali notitia procedit Verbum; sed ex notitia quasi virtuali & habituali solius essentiae; non verò personarum, attributorum, & creaturarum. Probatur prima



pars, quia Verbum potius est intellectio & notitia actualis genita, quàm producat per illam actualem notitiam; & hoc est quod dicunt Theologi, Patrem producere non per cognitionem; sed per memoriam fœcundam: sicut enim in nobis intellectio actualis, quæ est verbum nostrum, gignitur immediate ab intellectu informato specie, non intellectu, sed intelligibili; ita Verbum D. immediate gignitur ab intellectu & objecto, nimirum essentia illum fœcundante, non ut intellectu, sed intelligibili. Nec quis dicat, quòd Pater cognoscat essentiam suam, antequam intelligatur Verbum producere; & sic Verbum produci ex cognitione essentia: responderetur enim, quòd licet talis cognitio operativa præcedat; tamen Verbum non producit ex illâ cognitione; imò si per impossibile Pater non prius intelligeret & amaret essentiam, quàm diceret Verbum; non minùs tamen diceret & spiraret; unde cognitio essentia: non concutrit per se ad productionem Verbi.

PROBANTUR aliæ partes: Primò, quòd procedat ex notitiâ quasi virtuali; quia Verbum procedit per intellectum qui fœcundatur objecto; intellectus autem cum objecto dicitur scientia habitualis, seu virtualis. Secundò, quòd Verbum procedat ex notitiâ solius essentia:, constat; quia essentia est objectum, primum, quæ sola formaliter à Deo cognoscitur, ubi attributa cognoscuntur tantùm concomitanter, ratione essentia:, quæ habet vim repræsentandi illa, & repræsentat actualiter: quoniam ergo essentia est ens for-


maliter infinitum & perfectum, sufficit ad productionem Verbi; sicque si attributa non cognoscantur formaliter, proinde Verbum non procedit ex cognitione formali eorum. Potest tamen dici quod procedat ex cognitione formali essentiae, quatenus ipsa attributa repræsentat; & proinde ex cognitione materialium illorum, non verò formali. Tertio, idem dicendum est de personis, quod Verbum procedat ex cognitione materiali ipsarum; quatenus Essentia D. illas repræsentat, & non potest cognosci, quin personæ cognoscantur, ut repræsentatæ; non procedit tamen ex cognitione formali earum, quia non sunt formaliter & per se intelligibiles, ut diximus, agendo de invisibilitate. Quarto, liquet quod non producat Verbum ex cognitione creaturarum; quia priusquam creaturæ sint intellectæ, complentur productiones divinæ; est enim hic ordo, ut prius compleantur ea quæ sunt essentialia *ad intra*, ea quæ sunt notionalia postea, & denique ea quæ sunt *ad extra*; id est, quæ respiciunt creaturas; prius enim Deus est Deus, quàm sit Pater; & prius sunt in divinis Pater, Filius & Spiritus S. quàm creaturæ decernantur; productæ enim fuerunt à tribus personis indivisibiliter.

CONFIRMATUR hæc pars ultima conclusionis. Quando objectum motivum natum est movere potentiam ad terminum finitum vel infinitum, prius movet ad infinitum, quàm ad finitum; quia infinitum non præexigit finitum, benè autem è contrà; sed essentia est objectum movens intellectum D.

tum ad Verbum producendum, tum ad creaturas intelligendas : ergo prius movetur intellectus ad productionem Verbi, quàm ad cognitionem creaturarum. Adde quòd, creaturæ ut intelligibiles, & essentia D. non sunt perfectius objectum, quàm sola essentia D. quandoquidem ipsa sola est infinita : ergo ipsa sola sufficit ad productionem Verbi D. ergo Verbum non producit ex cognitione creaturarum : illa enim esset superflua. Idem dicendum est de Spiritu S. ac de Verbo : sicut enim Verbum non producit ex notitiâ, sed ipsummet est notitia producta ab intellectu D. & essentia D. ipsum fœcundante ; ita nec Spiritus S. producit ex amore actuali imò ipsemet est amor productus ex voluntate D. & essentia, non amata, sed amabili.

**O b j e c t.** Verbum D. non tantum repræsentat essentiam D. sed etiam attributa, personas & creaturas : ergo producit ex notitia habituali horum omnium. Resp. Verbum non repræsentare hæc omnia primariò & formaliter, sed solùm essentiam ; licet secundariò & concomitanter illa omnia repræsentet : Verbum autem nascitur tantum de objecto, quod primariò & principaliter repræsentat. Dices, Verbum ex Aug. 11. de Trinit. cap. 14. producit de omnibus, quæ sunt in scientia Patris ; sed attributa, personæ, & creaturæ sunt in scientia Patris, ante productionem Verbi : ergo ex illorum omnium notitia nascitur Verbum. Resp. Verbum esse ex illis quæ sunt in scientia Patris primò & per se intelligibilia : attributa autem non sunt primò intelligibilia,

sicut nec personæ, quoad creaturas non sunt in Deo ante generationem Verbi actualiter, & secundum suum esse formale; sed tantum virtualiter: & pro tunc nihil sunt aliud quam essentia D. ergo Verbum non oritur ex cognitione habituali creaturarum. Dices, Verbum produci- tur ex cognitione habituali eorum quæ declarat & exprimit; sed Verbum est declarativum crea- turarum: ergo, &c. Resp. produci ex cognitio- ne eorum quæ exprimit primariò; Verbum autem primariò exprimit tantum, & declarat essentiam D. & secundariò creaturas, sicut & personas & attributa.



## CAPVT VIII.

*De tertia Persona Trinitatis.*

**T**ERTIA Trinitatis persona dicitur Spiritus S. non à spiritualitate, quia Pater est Spi- ritus, & est sanctus sicut Filius; sed à spira- tione passiva; ita quòd per Spiritum S. intelli- gamus spiratum Sanctum. Postquam ergo egi- mus de Patre qui generat Filium, & de Filio qui cum Patre producit Spiritum sanctum, nunc postulat ordo, ut de Spiritu S. aliqua tradamus,



enim cap. 17. dicit Filius, omnia quæ habet Pater, sua esse; super quod ait Aug. *Quidquid habet Pater, habet Filius, excepta Paternitate*; sed Pater habet potentiam spirandi: Ergo & Filius Joannis etiam 15. & 16. Spiritus S. dicitur mitti à Filio, *Cùm venerit Paracletus, quem ego mittam vobis à Patre: si abiero, mittam eum ad vos*, sed omnis missio processio- nem arguit, ex D. Aug. qui 4. de Trinit. cap. 20. docet; *Filium mitti, nihil aliud esse, quam nasci, & Spiritum S. mitti, nihil aliud esse quàm procedere*. Nec dicant adversarii, hoc non concludere; alias Christus procederet à Spiritu S. quoniam Spiritus S. misit eum, Esayæ. 61. *Spiritus Domini misit me*: respondetur enim, Christum mitti à Spiritu S; non secundum divinitatem, sed secundum humanitatem. Joannis etiam eodem cap. 16. dicit Filius, *ille me clarificabit, quia de meo accipiet*; ubi loquitur de Spiritu S. sed persona D. nihil accipit, nisi ab eâ à qua procedit. Tandem ad Rom. 5. & Galat. 4. dicitur Spiritus S. Spiritus Filii: *Misit Deus spiritum filii sui*: ergo ab illo procedit.

• PROBATUR. 2. ex Conc. Latinis, Lateran. & Florent. quibus adfuerunt Græci, qui post longas disputationes admiserunt hanc particulam *Filioque*, quæ addita fuit in Conc. Nicæno 2. & etiam hoc definitum fuit in Concil. Lugdunensi, sub Gregorio X. cui etiam Græci interfuerunt; & omnibus consentientibus cantatum est Symbolum cum additione, *Filioque*, quæ ter Græcè, ter Latinè repetita est. Ratio autem quare durat schisma apud

Græcos post eorum consensum, ascribenda est eorum levitati, qui toties victi in disputationibus, semper ad vomitum redierunt. Antoninus refert illam unionem quæ facta fuit in Concilio Florentino inter Græcos & Latinos, præsentæ Palæologo Græcorum Imperatore, solutam fuisse; tum quia Græci, qui non fuerunt præsentés in illo Concilio, manserunt in suo errore; tum quia, mortuo Joanne Palæologo, novum elegerunt Imperatorem, cum quo novam à Latinis separationem fecerunt.

PROBATUR. 3. ex Conc. septimo Græcæ, nempe Nicæno 2. sub Adriano Papâ; ubi lectum fuit Symbolum Fidei factum in 1. Conc. Nicæno, cum additione hac, *Filiusque*; Ratio autem quare in præcedentibus non facta fuit talis additio, est; quia hoc non controvertebatur in Ecclesia. Quod ut sciatur distinctius: Notandum est, quodd septem prima Concilia apud Græcos celebrata fuerint. Primum fuit Nicænum, contra Arium de divinitate Christi; in cujus Symbolo nihil aliud legitur de Spiritu S. quàm hæc verba; *Credo in Spiritum sanctum*; quia pro tunc non erat orta quæstio de ejus divinitate, aut processione. Secundum est Constantinopolitanum, contra Macedonium, de divinitate Spiritus S. ubi in Symbolo additum fuit; *Dominum & vivificantem, qui ex Patre procedit*; ad denotandam ejus consubstantialitatem cum Patre, & proinde ejus divinitatem. Ratio quare non facta fuit mentio, an procederet ex Filio, est; quia contendebant Macedoniani Spiritum S. esse creaturam à solo Filio productam. Tertium est Ephesinum,

contra Nestorium asserentem duas in Christo personas : in quo approbata fuit Epistola Cyrilli ad Nestorium , in qua sunt hæc verba : *Spiritus S. appellatus est Spiritus veritatis , & veritas Christus est ; unde ab .sto. sicut à Patri procedit.* Quartum est Calcedonense , contra Eutichem & Dioscorum , asserentes unam tantum in Christo naturam , in quo etiam approbata fuit Epistola Cyrilli , sicut in duobus sequentibus : Constantinop. 2. & 3. in septimo tandem , quod fuit Nicænum secundum , addita fuit in Symbolo hæc particula , *Filiusque* ; & sic ex his videtur , quod in Conciliis 3. 4. 5. 6. & 7. etiam in Græciâ habitis , Spiritus S. sit procedens à Patre & Filio.

PROBATUR. 4. hac ratione Scoti : Suppositum habens perfectum principium productivum alicujus termini , antequam intelligatur terminus productus , potest illo principio uti , & hunc terminum producere : sed Filius Dei habet voluntatem divinam , quæ est principium perfectum productivum Spiritus Sancti , antequam Spiritus S. intelligatur productus : ergo per illam voluntatem potest producere Spiritum S. ergo producit ; quia in divinis idem est esse , ac posse. Probatur major , quia Filius & Spiritus S. habent voluntatem , quæ est principium productivum creaturarum *ad extra* , antequam intelligantur creature productæ ; ideo producunt illas cum Patre : ergo si Filius habet voluntatem fecundam , antequam intelligatur Spiritus S. productus à Patre , consequenter producit cum eo. Probatur minor : Inter actiones productivas intellectus & vo-

luntatis, est talis ordo, ut Pater prius dicat Verbum, quàm voluntas spiret: ergo prius Pater per intellectum fœcundum producit Verbum, quàm per voluntatem spiret Spiritum S. sed Pater producendo Verbum, communicat illi omnes perfectiones D. & inter eas voluntatem fœcundam: ergo cum eo instanti quò Verbum habet voluntatem fœcundam, Spiritus S. non sit productus: conseq. quando Pater ipsum, spirat, spirat & Filius.

**O b j e c.** primò, *In hoc mysterio non est quid audendum dicere, nisi quòd innotescit ex Scripturâ*, ut ait D. Dionys. cap. 1. de D. nominibus; sed non habetur ex Scrip. quòd Spiritus sanctus procedat à Patre & Filio. Resp. nihil esse dicendum, nisi quòd habetur ex Scripturâ, expressis verbis vel æquipollentibus; & hoc ultimo modo in primâ probatione conclusionis, habemus ex Scripturâ, quod Spiritus S. sit ab utroque. Dices, Spiratio passiva est propria uni personæ: ergo & activa. Resp. conc. ant. una enim persona unica productione producitur; aliàs productio esset inadæquata: negatur tamen consequentia; quia duæ personæ possunt unam producere, si habeant idem principium; non propter inadæquationem principii, sed quia principium est in utràque. Si D. Dionys. dicat, solum Patrem esse fontem divinitatis: hoc est, primum principium divinitatis communicatæ Filio, qui est principium de principio. Si dicat Nazianzen. *Quod habet Pater, habet Filius, excepta causalitate*: per causalitatem intelligit potentiam generativam, quam non commu-



nicavit Filio; non autem spirativam. Si dicat Damasc. lib. 1. de fide cap. 2. *Spiritum S. ex Patre dicimus, ex Filio non dicimus*; D. Thomas respondet, ipsum fuisse in errore Græcorum; non fuit tamen hæreticus, quia oppositum nondum erat ab Ecclesiâ definitum; alii tamen dicunt Damascenum non fuisse in tali errore; quia cap. 11. ejusdem libri docet Spiritum S. esse à Patre per Filium; non potest autem esse per Filium, nisi inquantum Filius influit in productionem ejus: sic ergo explicatur autoritas Damasceni, Spiritum S. à Patre dicimus, tanquam à primo principio; & à Filio non dicimus, tanquam à primo; sed tanquam à secundo. Sic intelligendi sunt sancti Patres, qui dicunt, Spiritum S. esse principaliter à Patre, & minùs principaliter à Filio; hoc est, à Patre, tanquam à primo principio & à Filio tanquam à secundo; non sunt enim duo principia *quo*, sed duo principia *quod*.

OBJ 1 c. 2. In Conc. Nicæno solùm positum fuit, *Credo in Spiritum sanctum*; in Conc. Constantinop. additum fuit, *qui ex Patre procedit*; in Conciliis vero Ephesino & Calcedon. prohibitum fuit, ne quid adderetur Conciliis Nicæno & Constantinop. ergo non debuit addi illa particula, *Filioque*; nec consequenter credi. Resp. prohiberetur aliquid addere; distinguo, contrarium doctrinæ aliorum Conciliorum, concedo; aliquid eorum doctrinæ magis expressivum, & eis consonum, nego: sicut ergo constat, Concilium Constantinop. sine scrupulo, addidisse Nicæno, *qui ex*

*Patre procedi* ; ita licuit posterioribus Conciliis addere particulam , *Filiusque* , pro temporum & hæresum occasione , ubi Ecclesia magis explicat ea quæ credenda sunt. Si instent Græci , dicentes Leonem tertium post istam additionem factam , jussisse Symbolum describi in lamina argentea sine illa additione , *Filiusque* , & retrò altare beati Pauli Romæ collocari : Resp. id fecisse , non quòd reprobaret illam particulam , sed ut posteris relinqueret memoriam Symboli Constantinop. cum illis quæ fuerunt constituta ab illo Concilio sine glossâ ; expedit enim quòd Ecclesia certa antiquitatis testimonia habeat , ut constet quid unoquoque tempore stabilitum fuerit.

OBJEC. I. ex D. Athanas. in quæstionibus anonymis cap. 15. ubi comparat Patrem Adamo Filium Seth Adami filio ; & Spiritum S. Evæ ; Eva autem non fuit desumpta ex Seth , sed ex solo Adamo : ergo nec Spiritus S. à Filio. Resp. aliquos tenere , has quæstiones non esse Athanasii : deinde , claudicat omnis comparatio ; & proinde ista , quæ se tenet tantùm in eo , quòd , sicut Seth est verè genitus ex Adamo , sic Verbum à Patre ; & sicut Eva non est verè genita , sic nec Spiritus S. non est enim verisimile , quòd Athanasius in hoc erraverit ; ipse enim dicit in Symbolo ; *Spiritus sanctus à Patre & Filio , non factus , nec creatus , nec genitus ; sed procedens*. Quod si in Concilio Ephesino , Patres Concili non reprehenderint Nestorium , qui affirmabat , Spiritum S. esse à solo Patre ; suo tamen silentio hanc doctrinam non approbarunt ; quia tunc non agebatur de pro-

cessione Spiritus S. sed de nomine Deiparæ, & de unicâ personâ Christi in duabus naturis. Deinde, satis suam mentem approbarunt Patres, approbando Epistolam Cyrilli in quâ habebatur, Spiritum S. ex Patre & Filio procedere.

O b j e c. ultimò, Spiritus S. est unus: ergo habet unum principium, non duo: ergo unâ processione procedit: ergo non est à duabus personis. Hac objectione utuntur Græci, ad quam Resp. negando ultimam consequentiam: non enim sequitur, mundus unus est: ergo habet unum principium: ergo non procedit à tribus personis: licet enim Pater, Filius, & Spiritus S. sint tres personæ, sunt tamen unum principium mundi, & una actione creant; quia unicam habent omnipotentiam: sic licet Pater & Filius sint duæ personæ, sunt tantum unum principium, & eâdem spiratione spirant, quia est unica vis spirativa in utroque, scilicet voluntas fecunda. Dices, Pater est sufficiens principium Spiritus S. ergo non requirit auxilium Filii. Resp. non sequi; quia Pater est principium sufficiens mundi, omnes tamen personæ creant; quia creant per omnipotentiam, quæ est communis: sic Pater spirat cum Filio, non quod indigeat illo? sed quia ambo habent eandem vim spirativam.



## Q U Æ S T I O II.

*An si Spiritus S. non procederet à Filio, ab illo tamen realiter distingueretur.*

**S**CIMUS quidem, rebus stantibus ut sunt quòd Spiritus S. realiter à Filio distinguitur, quia ab illo producitur; sed ulterius fit quæstio, an posito per impossibile, quòd Spiritus S. à Filio non procederet, utrùm tamen ab illo realiter distingueretur. Non absurdè proponitur hæc quæstio, quidquid dicat Godfredus, licet fundetur in suppositione impossibili; impossibile enim est quòd homo non sit animal; potest tamen quæri, utrùm si homo non esset animal per impossibile, esset tamen à bruto distinctus: Ad quam quæstionem responsio est affirmativa; quia homo & brutum non distinguuntur per animalitatem; sed per hoc quòd unum sit rationale, aliud irrationale. Cæterum non magis absurda est hæc suppositio, quàm ista, quæ est Divi August. dicentis; si per impossibile Pater non esset ingenuitus, nihil prohiberet ipsum genuisse Filium: Hanc suppositionem & similes admittit Godfredus; ergo nostram non debet rejicere, tanquam absurdam. Porro, ratio quare Doctor subtilis talem movet quæstionem, fuit occasione quæstionis præcedentis, in quâ probat D. Thomas Spiritum S. procedere à Filio, quia si ab eo non procederet, non distingueretur à Filio realiter: Scotus tenet, hanc rationem esse invalidam; quia secundum

ipsum etiamſi per impoſſibile non procederet à Filio, tamen ab illo realiter diſtingueretur.

## CONCLUSIO.

**E**T ſi Spiritus S. non procederet à Filio, non minùs ab illo realiter diſtingueretur. Probat<sup>ur</sup> authoritate D. Auguſt. 4. de Trinit. cap. 14. docentis in eo Filium diſtingui realiter à Spiritu S. quòd ille procedat, ut natus; iſte ut datus; id eſt, ille per modum naturæ, iſte per modum voluntatis: ſed ſi per impoſſibile Spiritus S. non eſſet à Filio, non minùs Filius eſſet natus, & Spiritus S. datus: non minùs ille eſſet per naturam, & iſte per voluntatem: ergo non minùs diſtingueretur realiter Spiritus S. à Filio, etiamſi ab illo non produceretur. Hoc idem habet Anſelmus in Epift. contra Græcos, & præſertim cap. 4. ſi per aliquid Filius & Spiritus S. non eſſent plures, per hoc tamen eſſent diverſi, quia alter nafcendo, alter procedendo exiſtit. Ex quo conſtat, Spiritum S. à Filio diſtingui, non præciſè, quia Spiritus S. eſt à Filio; ſed quia emanatio Spiritus S. eſt alterius rationis ab emanatione filii. Atqui datâ ſuppoſitione noſtrâ impoſſibili, productio Filii & Spiritus S. eſſent adhuc diverſæ rationis: ergo etiamſi unus ab alio non eſſet, non minus diſtinguerentur realiter.

**PROBATUR** ratione: Remanente eſſentiali & intrinſeco diſtinctivo unius rei ab aliâ, quocumque alio circumſcripto, remanet inter eas diſtinctio realis; ſed ſublato quòd

tum distinguitur per hoc, quod homo sit corpus animatum, & lapis inanimatum. Respondet sibi, negando antecedens; & dicendo, quod quicquid distinguitur ab alio in quantum tale, debet distingui per aliquid, quod sit de ratione intrinseca ipsius, in quantum tale; sed Filius distinguitur personaliter à Spiritu S. ut filius est: ergo debet distingui per aliquid, quod sit de ratione ejus, in quantum est filius: Sed spiratio activa non est de ratione intrinseca & essentiali filii, nec prout est Filius, nec prout est persona; quia talis spiratio advenit Filio jam constituto in esse personali: ergo per spirationem activam non distinguitur personaliter à Spiritu S. sed præcisè per filiationem. Exemplum hominis & lapidis non urget; quia, licet concedatur hominem distingui à lapide, solummodò quia est corpus animatum; semper distingueretur per aliquid sibi intrinsecum, corpus enim est de ratione hominis; ubi spiratio activa est tantum de extrinseca ratione filii. Deinde, per rationale homo non distinguitur tantum à bruto, sed etiam à lapide; quia si non distingueretur à lapide per rationalitatem, homo & lapis non esset diversæ speciei specialissimæ, quoniam tantum in sua specie specialissima homo constituitur per rationalitatem.

Obj. 2. Patres dicentes personas distinguere originibus, vel etiam solis originibus, ergo si Spiritus S. non originaretur à Filio: non distingueretur personaliter ab illo. Resp. origines esse in duplici differentia; alias enim sunt oppositæ, ut generatio activa &

risibilis, non minus distingueretur ab equo per medium intrinsecum; per hoc scilicet quod homo sit rationalis. Si aliqui dicant personas numerum insinuare per hoc quod sint adinvicem: hoc est dicere, quod relatio faciat numerum, non quidem sola relatio opposita, v. g. quod una persona sit produciens, & alia producta; sed etiam disparata, quod una sit per intellectum, alia per voluntatem: supposito autem quod Spiritus S. non esset à Filio, illæ relationes disparatæ remanerent in utroque & sic persisteret numerus, seu distinctio inter utrumque.

**O b j e c. 4.** ex Concilio Florent. Si Filius non spiraret, non esset Filius in divinis; sed si non esset filius, non distinguerentur Filius & Spiritus S. quia distinctio supponit existentiam distinctorum: ergo si Filius non produceret Spiritum S. non distinguerentur. Resp. quod revera non esset Filius, nec Spiritus S. si iste ab illo non procederet; sed suppositio nostra est de impossibili: Unde querimus, si per impossibile essent Filius & Spiritus S. & Filius non produceret Spiritum S. utrum distinguerentur inter se. Dices, ex Anselmo Epist. contra Græcos, *In divinis omnia sunt idem ubi non obviat relationis oppositio*; sed oppositio relativa est tantum inter produciens & productum: ergo si Spiritus S. non esset à Filio, ab eo non distingueretur. Resp. Anselmum stare à nobis, ut vidimus in probatione; unde ipsum distingo, omnia sunt idem, ubi non obviat relationis oppositio; hoc est, ubi non obviat relationum repugnantia, sive talis repugnantia sit

relative opposita , ut inter producents & productum ; sive disparata , ut inter genitum & spiratum ; spiratio autem & generatio sunt relationes disparatæ ; quæ disparitas consistit in hoc , quod non sit alia , imò una est impossibilis cum aliâ ; unde una persona non potest simul esse producta per generationem seu per intellectum ; & spirata , per spirationem , seu per voluntatem. Instabis , Si sufficeret repugnantia disparata inter relationes ad multiplicandum personas , Pater esset duæ personæ , quia habet duas relationes disparatas , nimirum paternitatem & spirationem activam. quod absurdum est. Resp. relationes disparatas esse compossibiles in eodem supposito , si illud sit producents ; incompossibiles autem , si supposita sint producta ; quia non requiritur tanta distinctio in principiante , quanta in principiatis ; ut constat de actione generandi & creandi in Patre , quæ realiter identificantur in eodem supposito ; ubi tamen res creatæ & genitæ non tantum distinguuntur suppositis , sed etiam natura : Dicendum ergo est , quod generatio & spiratio activa sunt compossibiles in eodem supposito producente ; non potest tamen fieri quod una & eadem persona producat per intellectum & voluntatem simul ; & sic filiatio & spiratio passiva non possunt eidem convenire supposito ; & ideo , ut distinguantur Filius , & Spiritus S. personaliter , sufficit dicere , quod Filius est filius , seu genitus ; & Spiritus S. est spiritus , seu spiratus.



## QUESTIO III.

*Verum productio Spiritus sancti sit necessaria & libera simul.*

**M**ULTIPLEX est libertas, ut diximus in primo tractatu, scilicet contrarietatis, contradictionis, & essentialis; sic & multiplex est necessitas, nempe coactionis seu violentiæ, immutabilitatis, & simplex seu omnimodæ inevitabilitatis. Certum est, Spiritum sanctum non produci libere, libertate contrarietatis aut contradictionis; quia non potuerunt Pater & Filius se determinare ad non volendum, vel volendum producere Spiritum S. sed opinio communis est quod producat libere, libertate essentiali. Certum est etiam spiritum S. non produci necessario, necessitate coactionis, quia Pater & Filius ad talem productionem non coacti sunt: Nec etiam necessitate tantum immutabilitatis, quasi Pater & Filius non potuerint non producere, supposito decreto de eo producendo; non enim magis necessario esset productus, quam creaturæ; sed productus est necessitate simplici seu absoluta, qua repugnat Spiritum S. non esse.

## CONCLUSIO.

**S**PIRITUS S. processio non est naturalis, sed est necessaria; libera tamen. Prima pars conclusionis clara est; quia sicut modus agendi naturaliter convenit intellectui, non potest proinde voluntari convenire. Secunda

pars est evidens ; quia Spiritus S. est Deus : ergo est ens necessarium , ac consequenter productione necessaria producitur ; productione enim contingenti necessarium existere non potest. Tertia pars probatur , quia modus agendi libere est essentialis voluntati : ergo Spiritus S. producitur libere , quoniam producitur per voluntatem ; libertate . inquam , essentiali , quæ consistit in hoc , quòd Pater & Filius se complacenter & delectabiliter determinaverint ad productionem Spiritus S. quod autem libertas & necessitas possint convenire eidem , patet ex Aug. qui Enchiridii cap. 105. ait , *Sic postea erit homo , ut male velle non possit , nec ideo libero carebit arbitrio ; multo quippe liberius erit arbitrium , quod omnino non poterit servare peccato.* Porro , libertas contrarietatis & contradictionis opponuntur necessitati , non vero libertas essentialis ; quæ opponitur tantum coactioni ; quasi illud quod fit coactè , non fiat liberè libertate essentiali.

Objic. Si Spiritus S. procederet liberè , procederet contingenter ; si autem procederet contingenter , posset produci , & non produci ; quod autem potest non produci , non est ens necessarium : ergo Spiritus S. non procedit liberè. Resp. distinguendo primam consequentiam ; si procederet liberè libertate contrarietatis aut contradictionis , conc. si procederet liberè , libertate essentiali , nego. Dices , Ergò saltem non debemus uti hoc vocabulo , quia liberum à sapientibus usurpatur pro contingenti. Resp. hoc esse falsum : latius enim patet liberum , quam contingens ; & potest liberum

dividi in liberum necessarium, & liberum contingens; sic v. g. Deus se amat libere necessario, & creaturas amat libere contingenter: sic D. Thomas & Scotus dicunt, Deum se amare libere & necessario; non vero contingenter: Non est ergo nobis formidandum uti modo loquendi talium Doctorum. Si Theologi morales dicant, hominem non mereri in his quæ facit necessario; bene autem in his quæ facit libere: ergo necessarium non potest esse liberum. Resp. quod duplex sit libertas, moralis, & essentialis: libertas moralis, quæ requiritur ad meritum, excludit necessitatem; libertas verò essentialis excludit coactionem tantum.

---

#### Q U Æ S T I O IV.]

*An Pater & Filius sint unum principium Spiritus sancti.*

**I**AM diximus generatim, duplex esse principium personæ productæ, & consequenter etiam Spiritus sancti; nimirum principium *quo*, & *quod*: principium *quo*, est vis spirativa, seu voluntas cum essentia amabili, principium *quod*, est suppositum habens vim spirativam. Non dubitatur quin sint duo principia spirantia, quoniam Pater & Filius spirant; sed dubitatur, utrum debeant dici unum principium simpliciter, quia vis spirativa est unica in Patre & in Filio.

**P**ATER & Filius dici debent unum principium Spiritus S. non verò debent dici duo spiratores, licet possint vocari duo spirantes. Ratio quare dici debeant unum principium, & unus spirator, hæc est; quia nomina spiratoris & principii sunt nomina substantiva; sed nomina substantiva non debent multiplicari, nisi multiplicetur forma; vis autem spirativa, quæ est forma spiratoris, est eadem in Patre, ac in Filio: ergo Pater & Filius possunt dici unum principium & unus spirator. Exemplificatur; Pater, & Filius, & Spiritus S. creaverunt mundum; quia tamen vis creativa, quæ est voluntas, est una in illis personis, non dicuntur tres creatores, sed unus creator; tamen possunt dici tres creantes: Sic in nostro proposito, potest dici quod sint duo spirantes; quia nomen spirantis est nomen adjectivum quod multiplicatur ad multiplicationem suppositorum; unde quia sunt duo supposita spirantia, ideo possunt dici duo spirantes; & hoc dicit Scotus, quando asserit, quod terminus numeralis, duo, appositus huic substantivo verbali, spirator, cadit supra significatum formale ejus, nimirum supra vim spirativam; quæ cum sit una, non debent dici duo spiratores; appositus autem huic participio adjectivo, spirans, cadit supra significatum materiale, seu supra personas. Hoc confirmat Concilium Lugdunense sub Gregorio X. *Fide Catholica fatemur, quod Spiritus sanctus ex Patre & Filio, non tanquam ex duobus principis, sed tanquam ex uno; non duabus spirationibus sed unica, procedit.*

**Objic.** Licet Pater & Filius possint dici habere idem principium, non tamen dici debent esse unum principium, cum sint duæ personæ principiantes. **Resp.** non tantum debent dici habere unum principium, sed & esse unum principium; sicut non tantum dicitur quod tres personæ habeant unum principium mundi, sed etiam quod sint unum illius principium: Unde licet sint duæ personæ principiantes, non tamen duo principia substantive, quia proprietates personales Patris & Filii, non dividunt per se rationem spirationis, sed rationem personæ.

**Objic.** Durandus: Vel nomen, spirator, supponit pro vi spirativa, vel pro suppositis spirantibus; si supponat pro vi spirativa, potius dicendum est, quod Pater & Filius habeant unum principium Spiritus S. quia habent eandem vim spirativam, quam quod sint unum principium; si autem supponat pro personis spirantibus, tunc sunt potius duo spirantes, quam unus spirator. Respondet Scotus, principium supponere pro vi spirativa, non simpliciter, sed quatenus connotat suppositum Patris & Filii; & tunc non recte dicitur, quod principium spirandi sit in Patre, aliàs suppositum esset in supposito: Spiritus S. ergo non dicit habitudinem ad Patrem & Filium, sub ratione Patris & Filii, sed sub ratione spiratoris; spiratio autem non involvit per se duplex suppositum, quod explicabitur in conclusione sequenti.



## QUESTIO V.

*An per se requiratur pluralitas suppositorum in  
productione Spiritus S.*

CONSTAT quidem, quodd requiratur pluralitas suppositorum ad producendum Spiritum S. debet enim procedere ab illis personis, quæ habent principium productivum ejus; sed Pater & Filius habent principium productivum Spiritus S. voluntatem scilicet fecundam, ac proinde plura supposita spirare debent: An autem ita per se requiratur illa pluralitas suppositorum, ut nullo modo posset produci nisi à duobus suppositis, hoc quaerimus.

## CONCLUSIO.

SPIRITUS S. necessario procedit à Patre & Filio, propter ordinem qui est inter intellectum & voluntatem; nihilominus hæc dualitas non ita per se requiritur, ut si per impossibile non procederet nisi ab unâ personâ, non foret ejusdem rationis personalis, ac nunc est. Hæc conclusio est contra D. Thomam dicentem, quod si hoc esset, tunc Spiritus S. esset alterius proprietatis caracteristicæ.

PRIOR pars convincitur ex his quæ diximus, ordinem potentiarum exigere, quodd prius Verbum producat, quàm Spiritus S. cum ergo producit Verbum, Pater illi communicat omnia.

nia quæ habet, & eo modo quo habet: communicat ergo illi intellectum exhaustum, & fecundam voluntatem; quia nondum Spiritus S. intelligitur productus: quando ergo in secundo instanti Pater producit Spiritum, non potest quin Verbum producat etiam illum; quia tunc Verbum habet eandem numero voluntatem fecundam, ac Pater; & sic Pater non potest producere per voluntatem, quin Filius etiam producat: dualitas ergo suppositorum requiritur ad productionem Spiritus S. propter ordinem potentiarum.

**PROBATUR** secunda pars, quia si per se requireretur pluralitas suppositorum; vel requireretur tanquam complementum virtutis spirativæ, vel tanquam conditio intrinseca principii spirantis; sed primum falsum est, quia vis spirativa est æquè perfecta in uno supposito, quàm in duobus: secundum etiam non potest esse, quoniam unum suppositum est æquè perfectum in ratione spirantis, ac duo; si enim Pater producendo Filium, non illi communicaret voluntatem fecundam, non minus posset producere Spiritum S. quam cum Filio, nec Spiritus S. esset alterius rationis, ac proprietatis, ac nunc est.

**CONFIRMATUR** has partes D. Aug. comparando potentiam spirandi potentie creandi: Pater, Filius, & Spiritus S. creant mundum, quia est eadem potentia numero in tribus personis; & sic una non potest creare, quin aliæ creent etiam: tamen hæc pluralitas suppositorum creantium requiritur tantum quasi extrinsecè, non vero per se, & essentialiter,

quia si per impossibile solus existeret Pater, non minus posset creare, nec pro tunc mundus creatus esset alterius rationis, ac nunc est: sic à pari, requiritur necessario Verbum cum Patre ad productionem Spiritus S. sed hoc est propter ordinem potentiarum, inquantum voluntas est in Filio, ac in Patre; hoc vero non fit per se, quasi Spiritus S. exigit essentialiter duo supposita spirantia; quia si Pater solus esset per impossibile, solus perfectissime produceret Spiritum sanctum.

Obj. c. 1. Dualitas suppositorum non requiritur quidem, tanquam complementum virtutis spirativæ; sed tanquam conditio virtutis spirantis; Pater enim non potest spirare, nisi Filius spiret: ergo, &c. Resp. esse quidem conditionem, sed extrinsecam, quæ petitur ex ordine potentiarum, non verò intrinsecam, quæ requiratur per se; quia ut diximus, si per impossibile non esset Verbum, Pater æquè posset producere. Exemplificatur, si esset una tantum anima in duobus hominibus, non posset unus producere intellectionem, quin & alius produceret, & sic in tali suppositione, requireretur pluralitas intelligentium, ita ut unus non posset intelligere sine alio: nemo tamen diceret quod illa pluralitas requireretur per se, sed tantum ex suppositione facta; quod intellectus esset in duobus: si ergo Pater exigit Filium; hoc non est per se, nec est conditio absoluta; sed tantum conditio extrinseca.

Obj. c. D. Thomas, Spiritum S. futurum alterius proprietatis caracteristicæ; si procederet tantum ab una persona: ergo dualitas suppo-



ditorum requiritur per se ad illius productionem. Probatur ant. Spiritus S. est nexus Patris & Filii, quoniam hæ duæ personæ quasi uniuntur in spiratione activâ, sed si Spiritus S. esset tantum à Patre, non esset nexus Patris & Filii: ergo non haberet eandem proprietatem caracteristicam, ac nunc habet. Resp. quòd non esset nexus, tamen non esset minùs Spiritus S. quia ratio nexus non spectat intrinsecè ad proprietatem personalem Spiritus S. ad rationem enim intrinsecam & primariò constitutivam Spiritus S. requiritur tantum quod sit amor infinitus objecti infiniti, productus à voluntate fecundâ; sed in hac ratione non includitur ratio nexus: ergo talis ratio nexus est tantum intinseca: quia sicut producitur à duobus necessitate tantum se tenente per locum extrinsecum, seu propter ordinem potentiarum; ita est tantum nexus necessitate se tenente per locum extrinsecum; quia nempe producitur à duobus. Dicet aliquis, Spiritus S. producitur per voluntatem mutuam: ergo requirit duo supposita. Hanc objectionem solvet sequens quæstio.



producitur. Resp. estò sit nexus per rationem extrinsecam, ut diximus, & amor unitivus, non producitur tamen amore mutuo, & sic negatur consequentia: ideò enim dicitur amor unitivus, non quòd uniat volitionem Patris cum volitione Filii, quia tunc essent duæ volitiones, quòd est contra fidem; sed ideò dicitur nexus & amor unitivus, quia Pater & Filius uniuntur in productione Spiritus S. Potest tamen dici, quòd Pater & Filius mutuò & concorditer spirent, non verò quòd spirent voluntate mutua & concordi. Ratio primi est; quia mutualitas attenditur penes personas spirantes, quæ concorditer & mutuò, id est simul, voluntate unâ spirant. Ratio secundi datur; quia in tali locutione, mutualitas attenditur penes vim spirativam, & actionem spirandi, in qua mutualitas non est, quia unitas est. Sic solvendi sunt Patres, qui dicunt Spiritum S. produci amore mutuo; hoc est enim, mutualitate se tenente ex parte personarum; non mutualitate se tenente ex parte vis spirativæ. Si dicat Richardus, voluntatem non posse habere perfectam fecunditatem, nisi sit in persona gemina: hoc ideò dicit, inquit Scotus; quia voluntas D. non est in potentiâ ad producendum Spiritum S. nisi jam Verbum productum sit.



---

 QUESTIO VII.

*Vtrum Pater & Filius spirant uniformiter  
Spiratum sanctum.*

**C**ONTAT quidem, Patrem & Filium spirare Spiritum S. explicandum tamen est; an spirant uniformiter. Hæc quæstio movetur ob modum loquendi Patrum, quorum aliqui dicunt; Spiritum S. oriri à Patre principaliter, alii propriè; alii oriri à Patre per Filium; alii denique mediatè oriri à Patre & immediatè à Filio; & sic videtur esse difformitas in modo spirandi; sed ante solutionem, sciendum est cum Scoto, actum spirandi spectari posse quadrupliciter. Primò, in se & absolutè: Secundò, in ordine ad terminum, nempe Spiritum S. Tertiò, in ordine ad vim spirativam, quæ est in Patre & Filio. Quartò tandem, in ordine ad supposita spirantia.

## CONCLUSIO.

**S**I actus spirandi sumatur tribus primis modis, Pater & Filius spirant uniformiter; si quarto modo spectetur, non omninò uniformiter spirant.

**P**ROBATUR prima pars; Si actus spirandi sumatur in se & absolutè, spirant uniformiter; quia est idem numero actus in Patre & in Filio. In ordine ad terminum uniformiter spirant, quia utrumque attingit Spiritum S. eodem actu: ergo uniformiter. In ordine etiam ad vim spirativam, spiratio est uniformis;

quia vis spirativa est omnino una. Quoad secundam partem; clara est; quodd scilicet non uniformiter spirent Pater & Filius, si actus spirandi referatur ad personas spirantes; quia Pater spirat à se, & Filius à Patre, quoniam Pater à se habet vim spirativam, & Filius eam habet à Patre: non spirant ergo uniformiter: Non sunt tamen admittendæ illæ locutiones, quibus dicitur Patrem spirare principaliter, propriè, & mediatè: quia videntur astruere majorem difformitatem in actu spirandi, quàm sit ea, quæ reperitur tantum in ordine ad supposita spirantia.

O B J E C T. Aug. dicentem, Patrem spirare principaliter. Resp. id est, à se. Dices, Hieronymum adstruere Spiritum sanctum propriè procedere à Patre. Resp. adhuc, id est; quia ut ait Doctor noster, ille dicitur proprietarius alicujus rei, qui eam à se possidet; usufructarius verò qui illam habet ab alio; unde, quia Pater habet à se vim spirativam, ideò dicitur spirare propriè. Quòd si Concilium Florent. Hilarius & Richardus dicant, Spiritum S. procedere à Patre per Filium; aut à Filio immediatè; & mediate à Patre; non sunt ita intelligendi, quasi velint spiritum S. oriri à Patre per Filium, sicut nepos ab avo generatur per filium; sed ita intelligendi sunt; ut velint, inter Spiritum S. & Patrem, mediare Filium. Nec quis dicat, si Pater spirat à se, & Filius à Patre, Pater priùs origine spirabit, quam Filius; ergo in illo priori signo originis Spiritus sanctus spirabitur: ergo in posteriori nil spirabit Filius. Resp. quod licet Pater spiret à

se, & Filius à Patre, spirant tamen in eodem instanti.

### QUESTIO ULTIMA.

*An nomina Doni, & Amoris competant Spiritui sancto.*

**A**LIA sunt nomina propria, alia appropriata, ut diximus. Propria sunt ea, quæ conveniunt alicui personarum DD. ut esse Pater, Filius, &c. Appropriata sunt ea, quæ conveniunt tribus personis; attribuuntur tamen alicui illarum propter modum specialem procedendi; sic Potentia est nomen appropriatum Patris, Sapientia Filii, & Bonitas Spiritus S. Ante solutionem quæstionis sciendum est; quòd nomen Doni, primariò & pro per se significato dicat respectum dationis ad creaturas, & connotat secundariò processionem per modum libertatis.


### CONCLUSIO PRIMA.

**S**I sermo sit de nomine Doni, latissime sumpto; potest dici, quòd conveniat Trinitati: si sermo sit de nomine Doni, improprie spectato, convenit Filio: si tandem sumatur proprie, est nomen proprium Spiritus S. Ratio primi est, quia ad rationem Doni latissime sumpti, sufficit quòd donetur; datur autem tota Trinitas creaturis, Joannis 14. *Ad eum veniemus, & mansionem apud eum faciemus:* nec est necessaria distinctio inter dantem & datum; pro tunc enim Trinitas non posset

dari ; quia non distinguitur à seipſa, nam homo potest donare & vendere se. Ratio secundi est ; quia nedum Filius datur in Incarnatione , sed præterea distinguitur à dante ; nempe à Patre , & hoc est sumere nomen Doni magis propriè , Quòd autem Filius detur ; patet ex Joan. 3. *Sic Deus dilexit mundum , ut Filium suum unigenitum daret.* Ratio tertii est , quia ad rationem. Doni propriè sumpti duo requiruntur, scilicet datio ad creaturas , & processio per modum libertatis ; licet autem datio ad creaturas convenire possit toti Trinitati , & Verbo seorsim sumpto ; solus tamen Spiritus S. procedit per modum libertatis ; & sic nomen Doni est illi proprium. August. probat Spiritum S. esse Donum , his scripturæ locis, Joan. 4. *Mulier , si scires domum Dei.* Actuum 2. *Baptizetur unusquisque vestrum , & accipietis Donum Spiritus sancti* Quia ergo Pater & Filius sunt spirator Spiritus sancti , sunt etiam dator ; non tamen possunt dici duo datores , sed duo dantes. Nomen doni , ut diximus , dicit duplicem respectum ; unum dationis ad creaturas , quibus datur ; alium realem ad Patrem & Filium à quibus datur ; quia autem illæ creaturæ , quibus datur , non sunt ab æterno ; ideo Spiritus S. non dicitur donum seu datus actualiter ab æterno , sed tantum aptitudine. Porro sciendum est , spirationem passivam & donum non esse duas proprietates Spiritus sancti , sed unam , licet distinguantur ratione ; dicitur enim Spiritus , quia à voluntate procedit ; & donum , quia est amor productus liberaliter , quatenus connotat creaturas quibus communicatur.

## CONCLUSIO SECUNDA.

**S**I sumatur nomen Amoris absolutè & sine adjecto, non est nomen proprium Spiritus S. si vero sumatur cum hoc adjecto Amor productus, Amor spiratus, tunc est verum nomen proprium tertiæ personæ. Ratio primi est, quia amor absolutè consideratus, est nomen essentialè conveniens tribus personis, & proinde non proprium Spiritus S. Potest tamen dici nomen appropriatum, quia Spiritus S. procedit per voluntatem, cui convenit amor. Ratio secundi est; quia si nomini Amoris addatur productus; nomen amoris producti convenit soli Spiritui S. & consequenter est illi proprium. Dicendum ergo est de nomine Amoris respectu Spiritus S. sicut diximus de nomine Sapientiæ respectu Verbi; si enim Sapientia absolutè consideretur, est nomen commune tribus personis, appropriatum tamen Filio, quia procedit per intellectum, ad quem pertinet sapientia; si verò addatur, genita; tunc nomen sapientiæ genitæ est proprium soli Verbo: sic nomen Amoris est commune tribus personis; nomen verò Amoris spirati, est proprium Spiritus sancti: & hoc dicunt Doctores scholastici; si nomen Amoris accipiatur pro actu quo Deus formaliter diligit omnia, tunc non est nomen proprium; si vero sumatur pro termino producto à voluntate fecundâ, est nomen proprium.



## CAPUT ULTIMUM

*De Notionibus, Circuminceffione, Ordine, & Missione DD. Personarum.*

**P**OSTQUAM egimus de quâlibet personâ in specie, nunc ad aliquas considerationes, quæ ipsas personas in speciali consequuntur, transeundum est; scilicet ad explicandum Notiones DD. Circuminceffionem, Ordinem & Missionem earum. Quia autem hæc non indigent prolixitate, ideo, quæ dicturi sumus de ipsis, uno & eodem capite constringere conabimur.

---

 QUÆSTIO PRIMA.

*Quot sint Notiones in divinis.*

**N**OMEN Notionis duobus modis sumi potest: Primò, idem est ac cognitio actualis alicujus rei; sic aliquis homo doctus dicitur multas notiones habere: Secundò est ratio cognoscendi & notificandi & distinguendi aliquid, ad quod ita singulariter pertinet, ut ipsâ auditâ, mox in ejus cognitionem deveniamus; sic auditâ paternitate & filiatione, devenimus in cognitionem Patris & Filii. Definitur Notio divina; ratio innotescendi personam D. pertinens ad originem, secundum



propriam & specialem rationem, positivè vel negativè: additur negativè, propter innascibilitatem, quæ est notio negativa.

## CONCLUSIO.

**Q**UINQUE assignantur Notiones divinæ, nimirum, innascibilitas, paternitas, filiatio, spiratio activa; & passiva. Ratio conclusionis est; quia tot sunt notiones, quot sunt formæ seu notæ, aut characteres, quibus cognoscimus unam personam distingui ab alia quoad originem; sed sunt quinque tales formæ: ergo quinque notiones. Primò, Innascibilitas est forma negativa, quæ significat Patrem non habere originem ab alio, & est prima notio. Secundò, Paternitas est forma, quæ significat Patrem esse principium generativum alterius; & sic est secunda notio. Tertio, Filiatio est forma quâ cognoscimus Filium esse ab alio, tanquam à generante; & est tertia notio. Quarto, Spiratio activa est forma, quæ significat Patrem & Filium esse principium spirativum Spiritus S. & sic est quarta notio. Quintò, Spiratio passiva est forma; quæ significat Spiritum S. spirari ab aliis; & sic est quinta notio. Ex his autem notionibus, duæ sunt propriæ Patri, nimirum Innascibilitas & Paternitas; una est propria Filio, nempe Filiatio; alia Spiritui sancto, nimirum Spiratio passiva; alia tandem est communis Patri & Filio, videlicet Spiratio activa. Porro, ex iisdem notionibus, quædam sunt proprietates constitutivæ, ut paternitas, filiatio & spiratio passiva: quædam tantum sunt relationes; ut spiratio activa, quæ est relatio referens Patrem & Fi-

lium ad Spiritum sanctum, licet neutrum constituat: quædam denique sunt notiones tantum, ut innascibilitas, quæ non est proprietas constituens, nec relatio, quia non dicit quid positivum, sed est tantum notio qua Pater distinguitur à Filio & Spiritu S. Proprietas ergo, relatio, & notio, se habent tanquam magis & minus commune: omnis enim proprietas constitutiva, est relatio & notio; sed omnis notio non est relatio, ut patet de innascibilitate; nec omnis relatio est proprietas constitutiva, ut constat de spiratione activa, quæ advenit personis jam in esse suo constitutis.

O b j e c. Ideò notio exigitur, ut una persona distinguatur ab alia, sed satis distinguuntur tres personæ per paternitatem, filiationem, & spirationem passivam: ergo non debet admitti innascibilitas, nec spiratio activa. Resp. admitti notionem, ut personæ distinguantur omnibus modis quibus distingui possunt; sed per spirationem activam distinguuntur Pater & Filius à Spiritu sancto; itaut si Pater non esset Pater, nec Filius, Filius; tamen per spirationem activam distinguerentur adhuc ab eo: innascibilitas etiam facit distinguere Patrem à Filio & à Spiritu sancto; quia si per impossibile Pater non esset Pater, distingueretur tamen ab utroque, inquantum Pater est innascibilis, id est, improducibilis; aliæ verò personæ sunt producibiles: & sic spiratio activa & innascibilitas faciunt distinguere unam personam ab alia suo modo: ergo sunt notiones,

## QUESTIO II.

*Utrum inspirabilitas possit assignari pro  
sextâ notione.*

**N**EMINEM latet, quòd sicut Pater est innascibilis, sic etiam est inspirabilis, veluti Filius; Pater enim & Filius non possunt habere esse per spirationem; quæritur ergo, si possit assignari inspirabilitas pro notione communi Patri & Filio, sicut innascibilitas est notio propria Patris: respondet affirmativè Scotus.

## CONCLUSIO.

**N**IHIL vetat dicere, Inspirabilitatem esse notionem Patris & Filii, sic Scotus; quia, inquit, hoc non est contra fidem, & non determinarunt Concilia esse tantum quinque; unde, sicut quatuor notionibus, quæ tantum exploratæ erant tempore Divi Ambrosii, addita fuit Innascibilitas, pro notione Patris; ita nunc, nil vetat sextam addere, nempe Inspirabilitatem; quoniam hoc tenent gravissimi Doctores.

**P**ROBATUR conclusio. Innascibilitas est notio Patris: ergo Inspirabilitas erit notio Patris & Filii. Probatur convenientia; quia sicut soli Patri convenit esse ingenitum, sic soli Patri & Filio convenit esse inspirabilis. Deinde, notio est ratio quæ notificat aliquam personam divinam, pertinens ad originem, vel positivè, vel negativè; sed Inspirabilitas est

nobis ratio notificandi Patrem & Filium: ergo erit notio. Probatur minor pro Patre; quia & per impossibile Pater non esset Pater, nec ingeneritus; innotesceret tamen ut distinctus à Spiritu S. per Inspirabilitatem; pro tunc enim Spiritus S. esset spirabilis & spiratus, & Pater inspirabilis. Probatur etiam pro Filio, quia sicut persona Patris innotescit magis per proprietatem positivam & negativam simul, quam per positivam tantum; ita persona Filii magis innotescet per proprietatem positivam & negativam simul, puta per esse genitum & inspiratum simul, quam per esse genitum tantum: ergo Inspirabilitas erit notio Patris & Filii.

O B j i c. Ergo præter has notiones, debet assignari septima notio; nempe Infiliatio, seu Ingenerabilitas, quæ erit notio Spiritus S. Resp. negando consequentiam; quia convenit Patri, qui cum sit improducibilis, quoniam est prima persona, est etiam ingenerabilis; nisi velis dicere, esse notionem communem Patri & Spiritui S. sed hæc nondum fuit in usu.

### Q U Æ S T I O I I I.

*An una persona sit in aliâ per Circum-  
incessionem.*

C I R C U M I N C E S S I O nihil aliud est, quam Calicujus subsistentis in subsistente realiter distincto, mutua & intima præsentia-  
litas, in eadem numero natura. Dicitur primò,  
*subsistentis in subsistente*, ubi subintelligitur,

incommunicabiliter; & sic essentia & attributa non sunt in personis per Circumincessionem, quia nec essentia, nec attributa incommunicabiliter subsistunt. Dicitur secundò, *realiter distincto*; & est alia ratio, quare essentia non sit in personis, nec personæ in essentia per Circumincessionem; quia non distinguantur realiter à se invicem. Additur tertio, *mutua & intima præsentialitas*: unde Deus non est in creaturis per Circumincessionem; quia licet Deus sit intimè præsens creaturis, & sit in illis; creaturæ tamen non sunt proprie in Deo; & sic illa in existentia seu præsentialitas non est mutua: licet etiam anima sit in corpore, corpus tamen non est in animâ. Additur quarto, *in eadem numero natura*; & sic ad Circumincessionem requiritur identitas numerica naturæ; idcirco duo corpora sese mutuo penetrantia non sunt in se invicem per Circumincessionem, ob distinctam naturam.

## C O N C L U S I O.

**P**ERSONÆ sunt in se invicem per Circumincessionem secundum se totas, non secundum partes; id est, non tantum ratione naturæ, sed ratione personæ.

PROBATUR prima pars, Joan. 14. *Qui videt me, videt & Patrem. Non creditis quia ego in Patre, & Pater in me est?* Et rursus, *Pater in me manens, ipse facit omnia.* Unde Fulgentius lib. de fide ad Petrum cap. 1. dicit, *Per hanc unitatem naturalem, totus Pater in Filio & in Spiritu S. totus Filius in Patre & in Spiritu S. est: & totus Spiritus S. in Patre & Filio.*

PROBATUR secunda pars, quia illa Circum-

Incessio est inexistencia subsistentis incommu-  
nicabiliter, in subsistente incommunicabiliter;  
sed subsistere incommunicabiliter, convenit  
personæ, ut persona est: ergo per Circumin-  
cessionem una persona est in aliâ, secundum se  
totam: Neminem etiam latet quia una sit in  
alia etiam per naturam: quia est eadem numero  
natura in tribus personis. Hæc secunda pars con-  
clusionis est contra Henricum, dicentem Pa-  
trem esse in Filio, sed secundum partem; itaut  
essentia Patris sit in Filio: & essentia Filii in  
Patre; non verò paternitas in Filio, nec filiatio  
in Patre.

O b j e c. Henricus, Si Pater secundum se to-  
tum est in Filio; erit in Filio secundum essen-  
tiam & paternitatem; & sic paternitas erit in  
Filio: ergo sicut Filius dicitur Deus, quia ha-  
bet deitatem; sic etiam dicetur Pater, quia  
habet paternitatem. Resp. paternitatem reve-  
ra esse in Filio, & vice versa; non tamen Fi-  
lius est Pater paternitate, sicut est Deus  
deitate: quia paternitas non est in eo per ve-  
luti informationem, sicut deitas; sed tantum  
per Circumincersionem, seu mutuam præsen-  
tiam. Exemplificatur: si per potentiam D. ho-  
mo doctus esset in homine indocto, homo in-  
doctus n n diceretur doctus; quia doctrina  
non esset in indocto per veluti informatio-  
nem, sed tantum per intimam præsentiam. Di-  
ces: Ex tali inexistencia unius personæ in alia,  
oriretur confusio personarum contra D. Atha-  
nas. *neque confundentes personas, neque substan-  
tiam separante* Resp. neg. talem sequelam: nam  
cum eâ Circumincersione stat distinctio realis

personarum, quoniam ponitur in definitione Circumincessionis, subsistentis in subsistente realiter distincto. Quod si Joannes dicat, Filium exire à Patre: Resp. quod non minus remaneat in illo; exire enim, vel est generari à Patre, vel mitti ab eo; quodcumque sit, semper remanet in Patre.

---

#### QUESTIO IV.

*Vnde procedat personarum Circumincessio?*

**I**D EST, quænam sit ratio talis inexistentiæ quâ una persona est in aliâ. Alii dicunt, quod origo unius ab alterâ sit ratio talis mutuae præsentialitatis: alii dicunt, quod sit essentia sola: Nos verò quod ratio Circumincessionis sit essentia simul & relatio. D. Thomas vult, quod origo sit præcisa ratio, quare Pater sit in Filio; sic enim argumentatur, Personæ divinæ producuntur per actus immanentes; atqui terminus actionis immanentis debet necessariò remanere intra agens, alioquin non esset actio immanens, sed transiens: ergo est necessarium, ut Filius sit in Patre; itemque Spiritus S. in Patre & Filio. Contra eum, & alios, erit

#### CONCLUSIO.

**R**ATIO Circumincessionis non est origo sola, nec essentia sola, nec sola relatio; sed essentia cum relatione. Primum patet; quia licet origo, seu productio immanens dicat ter-

minum productum remanere intra producen-  
tem ; tamen non infert , quod produciens sit in  
producto : ergo , licet rationis originis Filius sit  
in Patre , & Spiritus S. in Patre & Filio , pro-  
pter hoc tamen Pater qui est produciens , non est  
in Filio , nec Filius in Spiritu S. sicut licet  
quoddam verbum mentale sit in intellectu , non ta-  
men intellectus est in verbo. Hac ratione utitur  
Scotus ad infirmandam opinionem D. Thomæ.  
Secundum patet , quia Circuminceffio est mu-  
tua præsentia subistentis realiter distincti  
in subistente realiter distincto ; sed personæ  
non habent , quod distinguantur per essentiam ;  
nec quod subsistant incommunicabiliter : ergo  
ratio Circuminceffionis unius in aliâ non est es-  
sentia sola. Tertium probatur ; quia ad Cir-  
cuminceffionem , requiritur quod illa inexi-  
stentia mutua plurium , fiat in eâdem naturâ ;  
sed natura non est eadem per relationem ; imò ,  
si posset distingui & dividi , per relationem di-  
videretur ; per hoc enim quod Pater est gene-  
rans , & Filius genitus , divideretur natura D.  
si ex se non esset indivisibilis. Probatur quarta  
pars , quia ad Circuminceffionem duo præcipuè  
requiruntur , realis distinctio personarum quæ  
in se mutuò existunt ; & quoddam talis inexisten-  
tia mutua sit in eâdem naturâ : relatio primum  
facit , nempe quoddam personæ in se mutuò exi-  
stentes distinguantur ; aliud facit essentia , nem-  
pe quoddam talis præsentia mutua fiat in eâ-  
dem naturâ : ergo Circuminceffio desumitur  
sum à relatione , tum ab essentiâ.



## QUESTIO V.

*Verum sit aliquis ordo inter personas.*

**C**ONSTAT quidem non esse inter eas ordinem durationis, tres personæ enim sunt coæternæ, & in illis non est prius ac posterius; ergo quæstio est de ordine naturæ, & originis, quæ admittitur à Scoto & aliis gravissimis doctoribus ad tollendam æquum notionalium & essentialium confusionem; ubi

NOTANDUM est, duplicem esse ordinem in divinis, naturæ scilicet, & originis. Per ordinem naturæ intelligimus naturalem præsuppositionem unius ad alterum cum quo identificatur sine ullâ imperfectione: sic essentia est prior attributis, & præsupponitur ad illa sicut essentia & attributa ad relationes & personas: Iste ordo non fit tantum per intellectum; quia absque operatione in effectus adhuc essentia D. tanquam radicalis entitas præsupponitur ad relationes ab eâ emanantes, & ratio formalis illius præexigitur ad rationem formalem harum. Ordo originis est præsuppositio naturalis unius ad alterum, superadditâ originatione unius ab alio; & sic ordo originis addit aliquid ordini naturali, nempe originationem: ergo talis ordo reperitur tantum inter originans & originatum; sicque Patet est prior naturâ & origine Filio. Quod si Aristoteles dicat, relata esse simul natura: hoc verum est formaliter; Pater enim ut Pater, est in

eodem instanti naturæ ac Filius, ut Filius; falsum tamen est fundamentaliter, persona enim quæ est produciens, præsupponitur ad personam productam. Quod si dicat Scotus, notionalia originari ab essentialibus, & esse ordinem originis inter illa, ibi sumit originationem pro emanatione; in quantum notionalia fluunt ab essentiâ, non per productionem; quia essentia nec producit, nec producitur: sed per emanationem, in quantum radicanter relationes ab essentiâ, sicut proprietates à subjecto.

NOT. 2. Instantia naturæ posse spectari dupliciter, nimirum simpliciter, & comparatè, per comparisonem scilicet ad instantia, in quibus producit creaturas. Si primo modo sumantur, tunc sunt duo instantia naturæ indivinis; in primo complentur omnia essentialia, & in secundo omnia notionalia. Si sumantur secundo modo, comparisonem factâ ad ea quæ sunt *ad extra*, tunc dicit Doctor; in rebus quæ sunt *ad intra*, esse tantum unum instans comparatè, quo complentur omnia quæ sunt *ad intra*; quod quidem instans sumptum comparatè complectitur duo instantia simpliciter. Signa etiam originis dupliciter sumuntur; primo simpliciter; secundo, secundum quid. Signa originis simpliciter, sunt ea quæ reperiuntur in productione personarum; sic in primo signo originis Pater est potens generare & spirare: in secundo Pater generat & communicat Filio omnia essentialia, & consequenter potentiam proximam spirandi: in tertio Pater & Filius produciunt Spiritum S. Signa originis secundum quid sunt ea quæ conse-

quantur personas DD. ut sunt spirare à se, & spirare ab alio; & sic potest dici, quòd in uno instanti originis secundum quid sumpto, Pater spiret, & in alio Filius, quia Pater spirat à se, & Filius à Patre. Hæc omnia distinguenda sunt, ut intelligatur Scotus, quia aliquando ponit tantum unum instans naturæ in divinis, aliquando duo; modò dicit, Patrem & Filium eodem instanti originis spirare, modò duobus. Porro unum instans naturæ aliquando plura instantia originis involvit; sic secundum instans naturæ, in quo complentur omnia notionalia, complectitur tria instantia originis, in uno etiam signo originis sunt plura instantia naturæ, ut in primo signo originis, ubi est Pater cum essentiâ & essentialibus, essentia supponitur intellectui, & intellectus intellecti, & intellectio volitioni, etiam ut hæc omnia in Patre sunt; quæ præsuppositiones sunt signa naturæ.

## CONCLUSIO.

**I**N divinis est ordo, seu prioritas & posterioritas originis, quæ dici potest à parte rei: ita quòd verum sit dicere, esse prioritatem & posterioritatem inter personas divinas, seclusâ operatione intellectus. Primum patet ex his quæ diximus, Patrem in primo instanti habere potentiam generativam & spirativam; in secundo, Patrem generare Filium; in tertio spirare cum Filio Spiritum S. Quod autem illa prioritas sit à parte rei, patet ex divo Basilio lib. 1. contra Eunomium docente, in divinis esse prius & posterius, non positione nostrâ, sed naturali quâdam consecutione: & postea

explicans hunc passum Joannis, *Pater major me est*; dicit, quòd major dicatur, quia prior origine. Nostra opinio confirmatur ex communi usu Ecclesiæ, quæ vocat Patrem, primam personam; Filium, secundam; & Spiritum S. tertiam; ita quòd, non sit in nostrâ potestate vocare Spiritum S. primam personam, nec Patrem, tertiam; quod signum est, ordinem qui est inter personas, non pendere ab intellectu nostro: ergo est inter illas prioritas & posterioritas à parte rei; non quæ sit duratio; sed quæ est tantùm ratio quædam peculiaris quâ una persona aliam producit, vel ab aliâ producitur; & cùm illa ratio procedendi vel producendi sit à parte rei, talis ordo est à parte rei.

O. 3. c. Ex Augustino, *inter genitorem & genitum est ordo naturæ; non quòd alter sit prior altero, sed ab altero*; ergo propter ordinem originis, non est admittenda in divinis prioritas. Resp. non admitti prioritatem durationis, quæ sola est prioritas propriè dicta; bene tamen prioritatem originis, quæ est prioritas diminuta & secundùm quid. Quòd si Basilius libro 10. contra Eunomium admittat tantùm prioritatem & posterioritatem solâ cogitatione: per hoc negat tantùm prioritatem durationis; dicit enim, quòd intervallo non sint separandæ personæ: non verò negat prioritatem originis & naturæ, quam tamen dicit esse ab intellectu, quatenus apprehenditur ad modum durationis. Dices, Illa signa, vel instantia originis, quibus dicimus Patrem esse priorem Filio, vel sunt aliquid fictitium,

vel aliquid reale; secundum non est, quia essent vel persona, vel essentia, aut duratio aliqua: si autem sint duratio aliqua, Pater est prior Filio duratione. Resp. esse quid reale, non sunt tamen nec essentia, nec persona, nec duratio personarum; sed sunt rationes quædam essendi & procedendi; quia enim Pater est à se, & Filius est à Patre, idè Pater est in primo signo, & Filius in secundo; quia etiam Spiritus S. est à Patre & Filio, idè est in tertio.

---

### QUESTIO VI.

*Quid sit Missio personarum DD.*

**M**ISSIO potest fieri quinque modis. Primò, per imperium; sic dominus mittit servum: hæc non est in personis DD. quia sunt omninò æquales. Secundò, fit per modum consilii, aut suasionis; ut quando consilarii mittunt regem ab bellum: hoc non potest in personis DD. etiam reperiri; nulla enim persona ignorat, & sic consilio non indiget. Tertiò, orando & obsecrando; ut quando aliquis alium per preces mittit aliquid: de hac etiam non est sermo; qui rogat enim est inferior rogato. Quartò, fit per modum localem; sicut mittitur sagitta, vel Epistola, vel legatus, aut amicus ad aliquem locum: hæc non est etiam in personis; quælibet enim persona est Deus, & consequenter ubique. Quintò, sumitur pro manifestatione personæ productæ in aliquo effectu externo; de hac est quæstio.

## CONCLUSIO.

**M**ISSIO est manifestatio personæ productæ, in aliquo effectu externo de novo producto, vel qui significetur productus, visibili vel invisibili. Dicitur primò *manifestatio* ut denotetur respectus rationis ad ad eum cui fit Missio; Missio enim dicit duplicem respectum, unum realem ad mittentem, qui respectus est relatio originis; mitti enim à personâ est produci ab illâ: & alium ad creaturam; qui quidem respectus est tantum rationis: Si queratur autem, cui fiat Missio, communiter, respondetur, fieri ad naturam rationalem, sive Angelicam, sive humanam; non verò ad naturam irrationalem; quia persona D. mittitur ut cognoscatur, juxta Aug. 4. de Trinit. cap. 5. dicentem; *mitti, est cognosci de Filio quod à Patre sit*: non potest autem persona D. cognosci à naturâ irrationali: ergo illi non fit Missio. Dicitur secundò, *persona producta*; & sic Missio convenit solum personæ emananti; unde in Missione duo reperiuntur; manifestatio ad extra, & processio ad intra. Dicitur tertio, *in aliquo effectu de novo producto*; quia mittitur persona in tempore, ut creatura rationalis aliquid accipiat; sic Verbum missum fuit humanitati, ut illa ab eo reciperet terminationem; missus fuit Spiritus S. ad Apostolos, ut de novo reciperent gratiam. Dicitur quartò *Vel qui significetur productus antea*; cum enim missus fuit Spiritus S. ad Christum in Jordane, sub columbæ figurâ; talis Missio non significabat Christi

stum actualiter recipere gratiam à Spiritu S. sed denotabat, quòd antea Christus in suâ unione recepisset Spiritus S. gratiam: talis ergo descensus fuit signum gratiæ, non quæ actu conferebatur; sed quæ antea collata fuit; in instanti enim conceptionis fuit repletus gratiâ. Additur tandem, *visibili vel invisibili*; ut denotetur modus quo mittitur Spiritus S. quæ reverà mittitur visibiliter & invisibiliter, ut dicemus.

Obj. c. in secundam particulam definitionis, Verbum mittitur à Spiritu S. incarnandum; dicit enim Christus Esayæ 61. *Spiritus Domini super me, ad annuntiandum, misit me*; sed Verbum non procedit à Spiritu S. ergo falsum est dicere, quòd missio fiat personæ productæ à producente. Resp. & cum Hebræis, hoc intelligi de ipsomet Esayâ, qui missus fuit à Spiritu S. vel de Rege Cyro, ut vult Cyrillus; quia tamen Ambrosius lib. 2. de Spiritu S. cap. 9. & Aug. 2. de Trinit. cap. 3. & 15. hoc intelligunt de Christo misso à Spiritu S. idèd Resp. 2. id intelligendum esse de Christo incarnato & homine factò, quem mittit Spiritus S. non de Christo incarnando; in textu enim eodem habetur, Spiritum S. esse super Filium: non est autem super eum, quatenus Deus est, sed potiùs est in eo: ergo ipsum non mittit, ut Deum, sed ut hominem.

Obj. c. in eandem particulam: Si sola persona producta mitteret, & non tres personæ; una persona efficèret aliquid, quòd alia non efficèret; quia mittere est aliquem effectum producere. Resp. in missione duo reperiri: pri-

mō , manifestationem passivam personæ missæ ; & hæc est propria tantum personæ productæ , estque tantum respectus rationis : 2. productionem gratiæ , & hæc convenit toti Trinitati : quia est opus ad extra : sicut ergo in incarnatione tres personæ producunt humanitatem , sola tamen secunda terminat ipsam ; sic in missione Spiritus S. tres personæ producunt gratiam , quæ est effectus missionis ; sola tamen persona productiva propriè manifestatur ; & dicitur mitti.

---

## QUESTIO VII.

### *Quotuplex sit Missio.*

**A**SSIGNATIS modis quibus usurpari potest Missio , viso etiam sub quâ ratione illam attribuamus personis DD. & datâ tanquam definitione ejus ; nunc partitionem Missionis faciet

### CONCLUSIO.

**D**UPLEX est missio ; passiva & activa  
 Prima , de quâ hic specialiter est quæstio , duplex est iterum , visibilis & invisibilis. Invisibilis est ea , quâ persona mittitur sine ullo signo sensibili , ad producendum aliquem effectum insensibilem ; sicut quando persona Dimittitur ad animas interiùs sanctificandas per dona gratiæ , sine aliquo signo sensibili talis adventus ; sic dicitur ad Rom. 5. *Charitas Dei diffusa est in cordibus nostris per Spiritum S. qui datus est nobis.* Missio sensibilis duplex est , in



essendo, & in representando. Prima est ea, quæ ordinatur potius ad essendum, quàm ad representandum; sicut est Missio Verbi in Incarnatione, quæ potius ad esse unionis hypostaticæ ordinatur, quàm ad aliquid representandum. Dicitur sensibilis; quia per eam persona D. redditur aliquo modo sensibilis, si non in se, saltem ratione termini, seu hominis, cui unitur; unde dicitur, *Verbum caro factum est*. Missio sensibilis in representando, est ea quâ mittitur aliquâ persona sub signo sensibili representante effectum insensibilem; sic missus est Spiritus S. in formâ venti, & columbæ. Porro, Missio sensibilis duplex est adhuc; una quæ est representativa effectus, qui actu producitur; sicut quando Spiritus S. in die Pentecostes missus fuit ad Apostolos; talis Missio representabat gratiam quæ actu illis dabatur: Alia est representativa effectus, non qui actu producitur, sed qui jam antea productus erat; ut quando missus fuit Spiritus S. super Christum in Jordane, talis Missio significabat gratiam, non quæ actu illi conferebatur, sed quæ illi collata fuerat in conceptione. Tandem, Missio visibilis & invisibilis se habent ut includens, & inclusum; quia quando missus fuit Spiritus S. visibiliter super Apostolos, missus est etiam invisibiliter per gratiam.



## CAPUT VIII.

*Cui competit Missio.*

**E**X his quæ diximus satis patere videtur, quibus personis Missio conveniat; cum enim asserimus Missionem esse manifestationem personæ productæ, satis constat quod Missio passiva solis personis productis convenire possit, & activa solis producentibus: ne tamen aliquid inexplicatum maneat, hanc proponimus quæstionem.

## CONCLUSIO.

**P**ERSONÆ productæ convenit Missio passiva, & producenti convenit activa. Primum patet; quia sicut diximus, Missio passiva includit duo, relationem originis, sive processionem à mittente; & manifestationem ad extrā; sed sola persona producta dicit relationem originis ad mittentem, seu originantem: ergo sola persona producta mittitur; & sic solus Pater non mittitur, quia solus non procedit. Aliud etiam evidens est; quia sicut Missio passiva dicit relationem originis ad producentem à quo mittitur, sic etiam Missio activa dicit respectum ad personam productam, quam mittit; & sic Spiritus S. non mittit, Filius vero & mittit & mittitur.

Objc. Pater etiam mittitur Joan 13. *Pater meus diligit eum, & ad eum veniemus*: unde Aug. dicit, quamlibet personam dare, & dari; & proinde mittere, & mitti; itemque, Pa-

ter potest apparere in aliquo signo sensibili ; ut fortè apparuit in veteri Testamento sub formâ Antiquidierum ; sed illa apparitio est Missio passiva : ergo Pater missus fuit. Resp. Patrem non propriè mitti , ob rationem allatam ; quòd scilicet Missio importet productionem à Mit-  
tente : potest tamen dici quòd Pater veniat , detur , & appareat ; hæc enim nomina sunt essentialia ad extra , non notionalia ; undè possunt omnes personæ seipsas communicare , & venire ; mitti verò non possunt. Ita Aug. 4. de Trinit. cap. 2. *Pater , cùm in tempore à quaquam cognoscitur , non dicitur missus ; non enim habet à quo sit , aut à quo procedat ; & sic licet possit dici datus , non tamen missus , nisi improprie & latè .* Ad hoc quod dicunt , Patrem apparuisse , transeat ; non ex eo tamen colligitur , quòd Pater missus fuerit ; ad Missionem enim duo spectant : manifestatio , & processio ; cùm ergo secundum non habuerit , non potest dici missus ; licet habuerit primum.

---

### QUESTIO IX.

*An Missio sit æterna, vel temporalis.*

**H**Æc quæstio movetur , quia in Missione duo reperiuntur ; nimirum processio , quæ est æterna , & manifestatio quæ est temporalis ; unde videtur partim esse æterna , partim temporanea ; æterna , quoad principium ; temporanea , quoad terminum ; æterna , quoad processionem ; temporalis , quoad manifestationem : tamen erit

## CONCLUSIO.

**M**ISSIO est temporalis. Hoc patet ex Paulo ad Galat. 3. *Cum venit plenitudo temporis, misit Deus Filium suum.* Ratio est, quia licet missio connotet processionem æternam, tamen pro formali importat manifestationem; formale enim significatum Missionis est manifestatio, & connotatum processio: ergo simpliciter est temporalis.

**Objic.** 1. Sicut Missio dicitur temporalis, propter terminum temporalem; ita potest dici æterna propter processionem æternam. Resp. negando consequentiam; quia Missio non existit, nisi quando ipsius integra ratio existit; quod fit, quando ad processionem æternam accedit terminus temporalis; unde, quia per terminum temporalem completur & perficitur, verè & propriè dicenda est temporalis.

**Objic.** 2. Christus includit naturam humanam, quæ est temporalis, & Verbum D. quod est æternum; ratione autem Verbi dicimus Christum esse ab æterno: ergo à pari, quoniam Missio duo significat, unum temporale, & aliud æternum, ratione æterni potest dici æterna. Resp. non esse parem rationem; nam Christus pro persona Verbi supponit, cui convenit æternitas; Missio autem non supponit pro processione æterna, sed pro manifestatione, quæ connotat processionem, & sic dicenda est temporalis.

**Quæres,** sub quibus signis apparuerit Spiritus S. quando visibiliter missus est, & quæ denotent illa signa. Resp. quater missum fuisse visibiliter. Primò, in specie columbæ, quam

do Christus baptizatus fuit, quod denotat fecunditatem operum Christi & nostrorum per regenerationem spiritualem: columba enim est animal fecundissimum. Secundò, in specie nubis lucidæ in Transfiguratione Christi, ad monstrandam ipsius majestatem; multis enim in locis Scriptura solet majestatem Dei per nubem ostendere. Tertiò, sub specie flatus quod significat expulsionem peccatorum per poenitentiam. Quartò tandem, sub specie linguarum ignitarum, quod denotat virtutem fervidæ prædicationis concessam fuisse Apostolis, quando ad eos missus fuit Spiritus S.

---

### QUESTIO ULTIMA.

*De modo loquendi circa hoc mysterium.*

**Q**UONIAM multæ propositiones Theologicæ propter obscuram terminorum significationem generant diversos, & quandoque contrarios sensus; idè declarandum est, quibus propositionibus, & terminis utendum sit: unde.

Dico. I. hanc propositionem, esse verum: Filius est alius à Patre; hanc falsam, Filius est aliud; quia aliud substantivè sumptum denotat diversitatem essentiae; alius verò adjectivè, diversitatem tantùm suppositi importat: pote est ergo dici alius & alius, non verò aliud & aliud, nisi adjectivè, connotando suppositum; itaut sit sensus, aliud est suppositum Patris, aliud Filii. Si aliqui dicant esse aliud & aliud sub-

stantivè; ibi, aliud debet sumi inadæquatè, pro formalitate, inquam, quia formalitas Patris est aliquid aliud à formalitate Filii: si enim Aug. dicat; aliud est esse Deus, aliud Pater, propter distinctionem formalitatum; à fortiori potest dici, Aliud est Pater, aliud Filius: quia tamen aliud substantivè sumptum denotat communiter distinctionem essentiz; idè non est dicendum aliud & aliud, nisi cum explicatione allegatâ.

DICO 2. hanc esse veram: Deus est Pater, Filius & Spiritus S. Ratio Scoti est hæc. Illa propositio est vera, ubi prædicatum adæquatur subjecto; sed in hac, prædicatum, scilicet tria divina supposita, adæquantur huic subjecto, Deus; prædicatum enim non magis latè patet, quàm subjectum; ergo est vera, non formaliter, quia prædicatio formalis, quæ apud Logicos dicitur propria, est quando prædicatum est superius, vel quasi superius subjecto; ut si diceretur, Petrus & Paulus sunt homo; & in divinis, Pater, Filius & Spiritus S. sunt Deus: hîc autem contrarium accidit, subjectum enim est veluti superius, & sic non est formalis; sed est identica; & propositio identica est ea, in quâ propter infinitatem, prædicatum est idem cum subjecto, ut in proposito. Nec quis dicat nullum Deum esse Patrem, Filium, aut Spiritum S. ut patet inductione factâ: ergo nec Deum in se esse Patrem, Filium, aut Spiritum S. negatur enim consequentia; quia in antecedenti, Deus sumitur distributivè, pro suppositis, & in consequentiâ non distributivè, sed collectivè, pro individuo divinitatis.

Dico; has propositiones esse falsas: Essentia generat, aut spirat, aut producit, vel generatur, spiratur, aut producit, quia ut diximus, inter generans & genitum est distinctio realis; sed essentia non distinguitur realiter ab essentia, aliàs essent duæ, quarum una esset generans, & alia genita; & hoc incideret in errorem eorum qui dicebant, esse tres essentias in divinis, quarum una esset ab alia, & qui falsò asseriebant, Patrem esse essentiatorem, Filium & Spiritum S. esse essentiatos. Non distinguitur etiam realiter à personis, aliàs esset in divinis quaternitas, quia essent quatuor realiter distincta: essentia ergo non generat, nec generatur, bene autem communicatur; quia essentia, ut est in Patre, communicatur Filio per generationem; ut est in Patre & Filio, communicatur Spiritui S. per Spirationem activam.

Dico 4. Hæc propositio est vera, Deus generat: & hæc est falsa, Deus non generat; per priorem enim intelligitur simpliciter, infra naturam D. dari aliquod suppositum generans; & hoc verum est; & per secundam intelligitur, inter personas nullam esse quæ generet, & hoc est falsum. Dices, In priori propositione, quando dicitur, Deus generat; ibi Deus supponit pro Patre qui verè generat, & sic est vera; in secunda verò, Deus supponit pro Filio qui verè non generat, & sic utraque vera erit. Resp. in neutra Deus sumitur pro supposito, sed supponit pro concreto divinitatis, quatenus connotat suppositum aliquod quod generat: cum ergo in concreto divinitatis, connotando

supposita, est aliquod suppositum quodd generat; ideo verum est dicere, Deus generat, & falsum est dicere, Deus non generat; quia ad hoc ut verum sit, Deum non generare; requireretur, quodd intra concretum divinitatis nulum esset suppositum generans: est enim hoc discrimen inter propositionem affirmantem, & negantem, quodd ad veritatem affirmantis, satis est prædicatum convenire subjecto, sub aliquâ ratione; ad veritatem autem negantis, requiritur quodd sub nulla ratione prædicatum subjecto conveniat: v. g. ut hæc propositio vera sit: Petrus heri disputavit; satis est, ipsum disputasse aut manè aut serò: & ad veritatem istius, Petrus heri non disputavit; oportet illum non disputasse ullâ horâ: Ad propositum nostrum, Deus generat, est propositio affirmans; ad cuius veritatem sufficit generationem Deo convenire aliquo modo, hoc est ratione alicujus suppositi; cum ergo aliquod suppositum generet, verum est dicere, Deus generat: quando verò dicitur, Deus non generat, est propositio negans, ad cuius veritatem oportet remove generationem, respectu cujuscumque suppositi; quod cum non possit fieri, quoniam aliquod suppositum reverà generat; idcirco falsum est dicere, Deus non generat, negatio enim totum destruit.







• T R A C T A T U S

D E M U N D I C R E A T I O N E ,

U B I

D E A N G E L I S ,

E T P R I M O H O M I N E A G I T U R .



Rium personarum DD. quæ sine præjudicio unitatis existunt in divinitate una incarnata est, ut neminem Catholicorum latet. Quænam autem Incarnationis istius fuerit occasio, non tam in confesso est, quin Theologorum plurimi sentiant, peccatum hominis fuisse veluti causam, ob quam secunda Trinitatis persona nostram humanitatem assumpserit: alii verò, præsertim Scotistæ, hoc divinum opus in summam Dei bonitatem refundentes, acrius sustinent, non Christum propter creaturas, sed creaturas propter Christum ædificatas fuisse; ita quod bonitatis divinæ immensitas, cujus proprium est diffusio, exegerit à Deo, quatenus se summè communicaret, & nedum ad intrà, sed etiam ad extrà. Postquam ergo Pater suam essentiam dedit Filio, & Pater ac Filius eandem communicaverunt Spiritui S. omnes illæ admirabiles personæ in unitate principii Christum producere voluerunt, tanquam ens aliquod excellentissimum, quod

esset simul Deus & homo : & propter ipsum instauraverunt omnia, si ve quæ in cœlo, si ve quæ in terrâ, ut ad mentem Apostoli loquar, sic 1. Corinth. 3. homines alloquentis, *Omnia vestra sunt, vos autem Christi, Christus autem Dei*; quasi voluerit Deus, creaturas omnes in æterni Verbi Filii sui triumpho adesse, & velut captivas ante currum ejus triumphalem duci; unde cùm omnia sint creata propter Christum, & Christus sit omnium finis; antequam de Christo vel de Verbi D. Incarnatione agamus, congruum judicavi quædam prælibare de ipsa Creatione mundi, & de præstantissimi totius Vniuersi entibus, Angelo nimirum & homine, de quibus loquemur sigillatim, postquam creationem mundi examinaverimus in genere: Vnde Tractatus noster triplici Disputatione absolvetur; quarum prima erit, de Creatione mundi in se, secunda de Angelis, tertia de primo Homine.

\*\*\*

## DISPUTATIO PRIMA.

### DE CREATIONE MUNDI IN GENERE;

S E U

#### *De operibus sex dierum.*

**N**ON desunt qui putent, cœlum & terram creata fuisse ante primum diem; licet dicere non possint quanto tempore utrumque extiterit, priusquam in primo die Deus pro-

X v

duxerit lucem, sed quia hoc est formaliter contra Scripturam, quæ Exodi 10. asserit, Dominum sex diebus fecisse cælum & terram, & mare, & omnia quæ in eis sunt idè; melius erit, si asseramus, universam creationem mundi in sex dierum circulo contentam esse, & nullius entis præcessisse creationem: Unde acturi sumus tantùm de sex dierum operibus, si prius examinaverimus difficultatem de instantaneâ vel successivâ creatione mundi.

---

### QUÆSTIO PRIMA.

*Virum in instanti, vel successivè mundus productus fuerit.*

CONSTAT quidem quænam fuerint causæ creationis mundi; sed est controversia de modo, quo ipse sit productus. Causa materialis fuit nihilum: maximè respectu cæli, terræ, & aquæ, quæ immediatè producta sunt ex nihilo; ut patet ex Genes. 1. *In principio Deus creavit cælum & terram, & spiritus Domini ferebatur super aquas;* creare autem est aliquid ex nihilo producere: ergo mundus pro materia agnoscit nihilum, quantum ad has partes. Causa formalis est forma ipsius mundi; vel potius, cùm sit unum per accidens, est forma cujuscumque creaturæ. Causa efficiens est Deus; in quo errant Ariani, dicentes, quod Deus creavit Filium, Filius Spiritum S. Spiritus S. Angelos, & Angeli mundum. Tandem causa finalis est bonum & utilitas, non ipse

Dei, sed creaturæ; Deus enim qui in se ab æterno beatissimus erat, & sibi soli sufficientissimus, in tempore se effundere voluit in creaturas; & in hoc suæ bonitatis amplissimæ evidentissimum præbuit argumentum. Quantum ad modum quo supremus ille artifex mundum produxerit, Augustinus lib. 4. de Genesi ad litteram cap. 21. longè probabilius, omnes mundi partes simul esse perfectas, quam successivè formatas, arbitratur; unde Moysen, in sensu mystico, non literali, explicandum esse existimat; adeo ut per sex creationis dies, intellexerit sex varias cognitiones Angelorum, quarum prima terminata fuit ad res quæ conditæ dicuntur in primo die, secunda ad eas quæ sunt formatæ in secundo, sicque de aliis: & cum dupliciter Angeli cognoverint objecta; in Verbo scilicet, & in seipsis per species intelligibiles infusas: prima vocatur manè, seu matutina, quia perfectissima est: & secunda vespere, seu vespertina, quia obscurior; & ob hoc, ex mente Augustini, dicit Moyses, *Factum est vespere & manè dies unus; factum est vespere & manè, dies secundus, dies tertius, &c.* juxta cognitionem quam habuerunt Angeli de rebus factis primo, secundo, vel tertio die.

## CONCLUSIO.

**M**UNDUS non fuit creatus in instanti, sed sex dierum intervallo. Sic tanta Doctorum turba, ut illis refragari esset prorsus temerarium. Probatur primò, quia Moyses asserens mundum successivè factum, historicè scripsit: ergo debet intelligi non mysticè, ut illum interpretatur Augustinus; sed litera-

liter, ut eum intelligunt Chrysost. Homil. 3. in Genesim. Ambrosius lib. 1. Hexam. cap. 7. Basilius Hom. 2. in Hexam. Gregorius Nazianz. Orat. 48. Hugo à S. Victore in 1. lib. de Sacramentis, & ante omnes D. Greg. Magnus l. 32. Moral. cap. 10. & denique omnes scolastici. Si enim metaphoricè intelligeretur Moyses: nil certi ex eo haberi posset. Secundò, quia ipsemet Moyses testatur, aliquando tenebras fuisse super faciem abyssi: ergo aliquando non fuit lux; & sic omnia non sunt facta in eodem instanti. Tertiò, quia Moyses rationem reddens, cur Judæi religiosè observare deberent diem Sabbati, non aliam allegat, nisi quòd sicut Deus per sex dies mundum creavit, & requievit septimo, ita possent ipsi per sex dies operari, & die septimo ad imitationem Dei ab omni opere servili deberent cessare: quæ ratio esset infirma, si non per sex dies, sed in instanti produxisset mundum. Quartò denique, quia non est verisimile, quòd Moyses cum rudi populo agens, voluerit informare ipsum de cognitionibus Angelorum matutinis & vespertinis vix doctioribus cognitis, per verba tam figurata, & tam mystica obscuritate referta.

Objic. ex Ecclesiastici 18. *Qui vivit in æternum, creavit omnia simul.* Resp. creavit omnia simul; quantum ad entia propriè creata, concedo: quantum ad entia educta ex illis, nego: in primo enim Deus creavit coelum, terram, & aquam; & hæc in instanti, & consequenter simul: lucem autem in eodem die, & alias creaturas produxit in sequenti.

bus ; non ex nihilo , sed ex aquâ , vel terras ; & istæ factæ fuerunt successive , & non simul , sed sex dierum spatio. Deinde , illa vox , *simul* , non denotat simultatem temporis , nec refertur ad *creavit* ; sed simultatem collectionis , & refertur ad *omnia* ; ita ut sensus sit , Deum omnia sine exceptione creasse , sicut Psalmus 13. usurpatur , *Omnes declinaverunt , simul inutiles facti sunt*. Tandem , Deus dicitur omnia creasse simul , hoc est in eodem tempore continuato , non in eodem instanti. Quod si Genesis 2. habeatur ; *In die , in quo fecit Deus calum & terram , & omne virgultum agri* ; quasi hæc omnia facta fuerint simul : hoc verum est , quia in primo die Deus creavit virgulta , herbas , & arbores ; non in actu , & secundum formam ; sed in potentia , & secundum materiam , produciendo terram primo die ex quâ orta sunt. Deinde in die , idem est , ac in tempore. Prophetæ enim sæpius usurpant diem pro tempore. Porro Moïses repetitionem fugiens , ait Bonaventura , protulit tantum semel , in die ; illius tamen sensus fuit iste , in die quo fecit cælum & terram , & in die quo fecit omne virgultum. Si etiam Job 40. dicat illi Deus ; *Ecce Behemoth , quem feci tecum* ; non est quod diabolus & homo facti fuerint simul ; sed , tecum , idem est , ac pariter ; quasi Deus utrumque fecerit.

OBJIC. 2. non posse dici , cur Deus cujus potentia infinita est , tam lentè mundum produxerit. Resp. talem moram non accidisse ex materiæ resistantia , neque ex agentis im-

becillitate, sed ex summa opificis ratione; qui in hoc ostendere voluit suam omnipotentiam in statu creationis mundi, dum primò creavit cælum & terram; suam sapientiam in statu distinctionis illius, quando distinxit lucem à tenebris, aquas ab aquis, & mare ab arida: suam denique bonitatem in statu ornationis & perfectionis ejusdem, ornando terram plantis, mare piscibus, aërem volatilibus, & stellis firmamentum. Cur autem sex dies præcisè, nec plures, nec pauciores, insumpserit Deus in mundi fabricatione, non desunt qui rationes afferant, utpotè, quòd senarius numerus sit perfectus secundum Augustinum & Bedam: quod sit fecundissimus juxta Pythagoræos qui propterea ipsum connubium appellabant; vel tandem, quòd sicut componitur senarius numerus tribus partibus diversis, unitate scilicet binario, & ternario; sic mundus tribus entium generibus coalescit; nempe pure corporali, ut sunt bruta, plantæ & lapides; purè spirituali, ut sunt Angeli; & mixto ex spiritualitate & corporeitate, ut sunt homines: his tamen rationibus supersedeo; cum enim potius videantur inventæ cum ingenio, quam traditæ cum fundamento, doctorum animos certè non explebunt.

QUÆRES, in quo tempore mundus creatus fuerit. Respondet Gerardus Mercator, sibi probabile videri, mundum fuisse creatum in mense Julio; quia, inquit, tempore Noè annus incipiebat circa mensem Julium; ergo & mundus debuit hoc tempore incipere. Sed quia, præter illum, omnes fatentur mundi primor-

dia reduci debere ad æquinoctium vernum, vel autumnale; ideo Lyranus, Tostatus & multi Hebræi existimant mundum creatum fuisse in Autumno; tunc enim maturi erant fructus, ut patet ex pomo ab Adam manducato: Probabilius tamen est, creatum esse mundum in æquinoctio Veris; sic Eusebius, Athanasius, Cyrillus Hierosol. Gregorius Nazian. Damascenus, Ambrosius & permulti alii: sic etiam Concilium Palæstinum mandatum à Victore Papâ, & congregatum à Theophilo Episcopo Cæsariensi, ubi determinatum est, factum fuisse mundum 25. Martii, quo Christus incarnatus est, & quo postea mortuus; vel ut alii volunt, resurrexit. Ad hoc quod allegant Hebræi de fructibus maturis, alii respondent, arbores per miraculum produxisse fructus in Vere, & postea produxisse iterum per vim naturalem in Autumno, quod non est probabile; debuisset enim afferri novum miraculum, ut arbores fructificarent in Autumno; nam ut fructificent arbores, per totum ferme annum præparari debent; unde aliqui dicunt, proximo Autumno nullos fuisse fructus; nec inde usque ad sequentem annum; quod non est verisimile, repugnat enim fecunditati terræ, quod nullos fructus produxerit toto anno & dimidio. Melius ergo respondebimus ad Hebræos; dicendo, in Paradiso fuisse plura genera arborum, & quamlibet earum produxisse juxta genus suum, alias citius, alias tardiùs; & sic in istis erant flores, in illis maturescerent fructus, in aliis fructus maturi; & hoc mirum esse non debet, quoniam multis in locis fructus sunt maturi in Vere.



QUÆRES, in quo die Deus incœperit creare mundum. Jam respondimus conformiter Synodo Palestinæ, cujus definitiones sunt magnæ authoritatis, licet non sint de fide, quia non fuit Concilium generale, quòd hoc factum fuerit 25. Martii: Ubi addimus, illum diem fuisse diem Dominicum; licet ille dies vigesimus quintus non incidit in Dominicum, sed in feriam sextam eo anno quo Christus incarnatus est. Quòd autem fuerit dies Dominicus, patet; quia dies septimus quo quievit Deus, erat Sabbatum.

---

## QUESTIO II.

*Quid productum fuerit, in primo die?*

NON quæritur præcisè, quid creatum fuerit; quia in primo die alia fuerunt creata, seu producta ex nihilo, ut cœlum & terra, secundum dictum Moïsis, *In principio Deus creavit calum & terram*; alia verò fuerunt ex materia præcedenti educta, ut lux, quæ facta est eodem die; juxta id quod fertur ibidem, primo cap. *Et dixit Deus, Fiat lux, & facta est lux*: Sed quæritur sub termino universaliori, quid productum fuerit; ad quod responditur, postquam explicuerimus prima verba, sub quibus creationem mundi tradit Moyses, quæ ista sunt; *In principio Deus creavit*: Illa vox, *In principio*, multiplicem sensum patitur; id est, in Filio, ait Augustinus, sed hoc est mysticum. Id est, in initio temporis,

inquiunt Basilius & Concilium Lateranense , non temporis quod fuerit mensura primi mobilis , sicut nostrum . nondum enim primum mobile existebat ; sed alicujus temporis aliquanter similis nostro , in quantum erat mensura rei corporeæ ; tempore enim mensurantur corpora , sicut Angeli ævo , & Deus æternitate . Secundum alios , *In principio* , hoc est ante omnia ; itaut nihil creaverit Deus ante cælum & terram , eo si quidem sensu , quo dicitur Ioannis 1. *In principio erat Verbum* , id est ante omnia . Per vocem , *creavit* , intelligitur , produxit *ex nihilo* : in hoc enim differunt *creatio* & *generatio* ; quod *creatio* sit productio *ex nihilo* , & *generatio* sit *ex præexistente* subjecto . Quando tertio dicitur , *Deus* , refutantur plurimi , asserentes Angelos mundum produxisse , ipsis enim *creatio* competere non potest . Confunduntur etiam Manichæi , qui volebant duos esse Deos , unum bonum , conditorem spirituum , & alterum malum , corporum fabricatorem .

## CONCLUSIO.

**I**N primo die producta fuerunt cælum empyreum , Angeli , terra ; aqua , lux , & infernus , & præterea nihil . Hæc conclusio est contra eos , qui voluerunt Deum creasse cælum & terram ante primum diem , quod refutavimus ex Script. Exod. 20

QUANTUM ad primum , constat ex Genesis 1. Deum creasse cælum , *In principio Deus creavit cælum & terram* . Quod autem per cælum , non intelligantur omnes orbes cælestes , sed solum empyreum ; est mens B. Clementis ,

Origenis, Theodoreti, Alcuini, Rabani, Lyrazi, Abulensis & aliorum; veritasque hujus propositionis petitur ex eodem capite, ubi habetur, quòd Deus secundo die fecerit firmamentum: ergo in primo non fuit productum, nec alii cæli sunt isto inferiores, firmamentum enim est octavum. Nec dicant Perrerus & Valentia, per cælum intelligi, non tantum Empireum, sed & alios, quos in sequentibus diebus Deus ornavit motu, luce & astris; & propterea dictus est illos creasse in talibus diebus: hujusmodi enim explicatio contradicit Scripturæ, quæ eodem modo loquitur de firmamento, ac de luce; sicut enim Deus dixit; *Fiat lux, fiant duo luminaria*; sic dixit, *fiat firmamentum*: nullus tamen dubitat, quin per hæc verba lux facta fuerit, sicut sol & luna: ergo per alia verba factum etiam est firmamentum in secundo die. Non dicat etiam Perrerus, firmamentum revera factum fuisse secundo die, sed per firmamentum intelligi aërem qui separat aquas superiores ab aquis inferioribus, id est nubes, ab aquis fluminum & fontium; nam hæc interpretatio sustineri non potest; quoniam dictum est, quòd Deus posuerit duo luminaria in firmamento; nullus verò dicet, ea posita fuisse in aëre, sed in cælis, qui omnes præter empireum, continentur sub nomine firmamenti.

QUANTUM ad secundum, quod est de Angelorum creatione, non habetur expressè in scriptura; nullam enim mentionem facit de illis Moïses; quia pro rudibus Judæis scribebat, qui cum proni essent ad idololatriam, facilè An-

gelos pro diis adorassent : Constat tamen Angelos existere ; sed quando creati fuerint , dubitatur . Probabilius est illos creatos fuisse , non quidem ante mundum , ut voluerunt Origenes , Nazianz . Basilus , Ambrosius & Hieronymus ; sed cum mundo , & cum cælo empyreo cujus sunt cives : sic Augustinus , Gregorius , Rupertus . Beda & Scholastici Doctores : & hoc est conforme Concilio Lateran. ubi habetur : *Firma fide credendum est Deum ab initio temporis simul utramque de nihilo condidisse creaturam , spiritualem & corpoream , Angelicam & mundanam .* Quod Angeli fuerint in cælo creati , colligitur ex Apocal. 12. ubi habetur Angelos malos & in cælo peccasse & è cælo ejectos fuisse ; *Factum est prælium magnum in cælo ; Michaël & Angeli ejus praeliabantur cum Dracone , & Draco pugnabat , & Angeli ejus ; & non valuerunt , neque locus inventus est eorum amplius in cælo : Cùm ergo in cælo pugnaverint ( pugna scilicet voluntatum ) cùm è cælo mali deturbati fuerint , & cùm in cælo fuerit antea locus eorum , jure concluditur quod fuerint in illo creati ; non enim habetur , quod post creationem in cælum introducti fuerint .*

QUANTUM ad terram , quoniam creata est eodem instanti ac cælum , juxta hæc Genesis verba , *In principio Deus creavit calum & terram ;* nulli dubium esse potest , quin producta fuerit primæ die . Per terram , quam Moïses vocat inanem & vacuam , non intelligenda materia prima , omnibus formis privata , aut sola forma corporeitatis dotata , sed verum terræ elementum ; verba enim Moïses sunt

historica & proinde in sensu litterali accipienda. Quod si Sap. undecimo habeatur, *Creavit Deus orbem terrarum ex materia invisa*, seu informi; id est, Deus produxit plantas, arbores, &c. ex terra, quæ dicitur invisa; quia erat sine luce, sine decore, & sine omni ornamento, & ob hoc dicit Moïses; quod *terra erat inanis & vacua*; non quia fuit vacuum inter cælum empyreum & terram; aquæ enim terram operiebant & sese erigebant usque ad empyreum; sed quia erat vacua animalibus, plantis, fructibus, luce, fontibus, fluminibus montibus, vallibus, &c. Non est tamen dicendum, terram usque ad diluvium fuisse sine montium & vallium distinctione; nil enim verius, quàm quod montes extiterint ab origine mundi: quippe qui maximè faciunt ad decorem & commoditatem terræ, ad salubritatem aëris, maturitatem fructuum, & frangendos maris impetus: facti sunt, inquam, non hoc primo die, sed tertio, ut ibi dicitur.

QUANTUM ad tempus, quo infernus creatus fuerit, aliqui colligunt ipsum factum fuisse die tertio; quia in tali die ornata est terra, & infernus est in centro terræ: Sed melius alii dicunt, illum extitisse à primo, in quo sicut Deus divisit lucem corpoream à tenebris corporalibus, ita separavit lucem spirituales, nempe Angelos bonos, à tenebris spiritualibus nimirum à dæmonibus: cum enim Angeli celerrimi sint in suis actibus; probabile est bonos fuisse confirmatos in gratia primo die, malos verò peccasse, & in infernum fuisse precipitados.

TANDEM ad productionem lucis devenientes, dicimus, ipsam fuisse factam primo die: *Tenebrae enim erant super faciem abyssi, & spiritus Domini ferebatur super aquas. Dixitque Deus: Fiat lux & facta est lux: & pelavitque lucem diem. & tenebras noctem; factumque est vespere & mane dies unus* Unde patet, productam fuisse lucem in primo die mundi; sed hæc omnia sigillatim explicanda sunt. Primò, *tenebrae erant super faciem abyssi*; id est, super immensam aquarum quantitatem, quæ terram cooperiens, ad empyreum usque extendebatur. Quando postea dicitur; *Spiritus Domini ferebatur super aquas*; per spiritum Tertullianus intelligit ventum, quod tamen esse non potest; ventus enim nil est præter aërem agitatam, & aër tantum productus est in secundo die cum firmamento: Per spiritum, intelligunt multi Patres spiritum sanctum; sed hæc explicatio est mystica, non literalis; hoc enim attribueretur etiam Patri & Filio; quia est actio ad extra. Chrysostomus denique Hom. 3. in Genes. per spiritum Domini intelligit virtutem Dei, quæ dabat fecunditatem aquis; ut ex ipsis quamplurima producerentur. Quòd autem virtus Dei vocetur spiritus Domini, patet ex Judic. 14. ubi legitur; Spiritum Domini irruisse in Samsonem, dum leonem discerpfit. Tertiò, adjecit Moyses; *Dixitque Deus*; non verbo oris, sed verbo mentis, essentiali videlicet, non notionali; opera enim ad extra sunt indivisa: ita quòd sit sensus, jussit & decrevit Deus, ut fieret lux; & facta est lux illico, ac dixit, *Fiat lux*, ex aquâ scilicet,

dem corpus quarto die in pristinam materiam resolutum est, & lux ipsius affecta soli, vel ex ipso toto compositus est sol. Alii denique, ut Basilii, Theodoretus, &c. tenent Deum non produxisse corpus lucidum, sed produxisse illam lucem immediate, quam per integrum hemisphaerium diffundebat, eo modo quo sol nunc diffundit. Eo modo est probabilis.

---

### Q U A E S T I O   I I I .

*Quid factum fuerit in secundo die?*

C O N S T A T quidem ex primo Genesis capite, in secundo die factum fuisse firmamentum dividens aquas ab aquis; sed non consentiunt omnes, quid intelligatur per firmamentum, & per aquas, quæ dicuntur esse super illud; unde utrumque explicandum est.

#### C O N C L U S I O   P R I M A .

P E R firmamentum non est intelligenda media aëris regio, ut voluerunt Valentia & Perrerus; sed intelligendum est cælum stellarum, & omnes orbes cælestes illi vicini; tum superiores, ut cristallinum, & primum mobile; tum inferiores, qui sunt septem orbes planetarum; intelligendi sunt etiam per connexionem situs, ignis & aër. Hæc omnia patent, quia in quarto die Deus dicitur posuisse solem, lunam, & stellas in firmamento; non posuit autem hæc omnia in aëre, sed in octava sphaera, & in inferioribus: ergo per firmamentum non est intelligendus aer, nec

erant astra quæ nubes elevarent; erant tamen aquæ, quoniam erat firmamentum dividens aquas ab aquis. Ratio secundi est, quia ante firmamentum factum aquæ superiores erant conjunctæ inferioribus; aquæ autem fluminum & maria non fuerunt conjunctæ cælo cristallino, aut primo mobili: ergo per aquas superiores intelligi non potest cælum cristallinum, aut primum mobile. Debent ergo intelligi veræ aquæ, juxta narrationem Moïsis, quæ fuit simplex, historica, & literalis; & sic debet simpliciter intelligi. Adde quòd sola localis separatio non mutat naturas rerum; sed in primo die aquæ omnes erant conjunctæ & ejusdem speciei, per firmamentum verò separatæ tantum fuerunt: ergo manserunt veræ & propriæ aquæ super firmamentum. Nec dicatur, hoc esse contra naturam, si sint aquæ super cælos: nam, ut ait Augustinus l. 26. contra Faustum cap. 3. *Idcuique rei est naturale, quod ille fecerit, à quo est omnis modus, numerus, & ordo natura.* Deinde, illæ aquæ, quæ supra firmamentum remanserunt, sunt purissimæ. Quod si non cognoscamus rationes, ob quas Deus voluit tales aquas supra cælum reservari, non desunt tamen; quia Deus & natura nil moluntur frustra; & nobis sufficere debet quòd Scriptura dicat, aquas esse super cælos, Daniel 3. & Psal. 148. *Benedicite aqua omnes quæ super calos sunt, Domino* quoniam ex August. *major est hujus Scriptura authoritas, quam omnis ingenii capacitas.*



---

 QUESTIO IV.

*Quid factum fuerit in tertio die?*

**V**T sciamus, quid fecerit Deus in tertio die, audiendus est tantum Moïses qui in Genesis cap. i. narrat in die illo congregationem aquarum factam fuisse, & plantarum productionem; sed explicandæ sunt difficultates, quæ circa utrumque proponi possent.

CONCLUSIO.

**A**QUARUM congregatione non facta fuit eo modo quo putaverunt plurimi, quasi aqua antea totam terram circumcingens, ita fuerit tertio die in unum locum coacta, ut veluti in montem ascenderit; sed hoc sic factum est: ex una parte aquarum quæ erant super faciem abyssi, & quæ à terra usque ad empyreum replebant mundum, facti sunt orbes cælestes; alia pars remansit super firmamentum; alia denique condensata fuit; unde minorem locum coepit occupare; deinde; per potentiam divinam multi alvei & quamplurimæ cavitates factæ sunt sub terra, in quas maxima aquarum copia, quæ in mare recipi non potuit, ne elevaretur super terram, fuit recepta; quod probari potest, quia ubicumque quis fodit, ibi penè semper invenit aquam; quæ quidem aqua est veluti origo omnium fontium: quippe quæ certis quasi venis per totam terram dispergitur, & aliquando in fontes, rivos & flumina erumpit; alia verò aquarum copia in

unum locum congregata est, inquit Scriptura, id est in locum separatum à terra, ut fieret arida & habitabilis. Hic advertendum, quod sicut cavitates terræ factæ fuerunt in hoc die tertio; sic etiam eodem die erecta fuerunt montes super terram.

QUANTUM ad plantarum productionem, liquidò constat. Deum non tantum dedisse terræ virtutem producendi plantas in tertio die, ut vult Augustinus; sed illas actu produxisse, etiam perfectas, sicut & arbores cum fructu maturo: nam Moyses eodem modo de productione plantarum, ac de productione lucis, firmamenti, astrorum & animalium, loquitur; unde sicut hæc omnia sunt creata in statu perfecto, sic & plantæ & arbores. Deinde, non potest dubitari quin plantæ & arbores in sua creatione perfectæ fuerint; cum plantæ fecerint semen, & arbores fructum ab initio suæ productionis; ut patet ex verbis Dei, *Germinet, seu producat, terra herbam virentem & facientem semen, lignumque pomiferum faciens fructum juxta genus suum; protulit terra herbam virentem, &c.* Quod signum est, plantas & arbores in illo die fuisse perfectas; unumquodque enim est perfectum secundum Arist. l. 4. Meteor. dum potest generare sibi simile: quod poterant revera & arbores & plantæ, quoniam semen & fructum habebant. Solum superest videndum, an terra quæ concurrat passivè ad horum omnium procreationem, materiam illorum suppeditando, concurrerit etiam activè; ad quod negativè respondeo, non est enim verisimile, quod tantæ virtutis

fuerit terra, ut tam subito tot arbores & plantas produxerit: se habuit ergo terra tantum passivè, & Deus activè hæc omnia produxit, sicut lucem & animalia: Non est autem probabile, quòd aqua concurrerit activè ad lucem, nec terra ad animalia. Si dicat Moïses, *protulit terra herbam virentem*, hic loquendi modus denotat concursum materiale terre, non productionem activam. Tandem sciendum est quòd in hoc die tertio Deus produxerit spinas, tribulos, & plantas omnes venenosas; omnes enim rerum species sex diebus produxit, & quievit die septimo. Deinde spinæ & tribuli sunt convenientes brutis sicut plantæ venenosæ; ut Cicuta, quæ hominibus nocet; & Vaccis est in cibum delicatum. Denique, sicut serpentes fuerunt producti die quintâ cum aliis animalibus, sic & plantæ venenosæ cum aliis, Quod si dicat Scriptura, terram esse producturam spinas ob peccatum Adæ: hoc est, quia spinæ, quæ erant in decorem universi ob diversitatem ante peccatum, fuerunt in punitionem peccati, quando perpetratum est; in quantum homines qui in statu innocentie maximam habebant prudentiam; quâ ita cautè tractassent spinas, venena & lupos, ut sibi non nocerent; per peccatum amiserunt cum justitia originali illam prudentiam; & sic in culpæ punitionem hæc omnia illis nocuerunt.



## QUÆSTIO V.

*Quid in die quarto productum fuerit ?*

CONSTAT quidam in illo facta fuisse astra ; ut narrat Moyses , *Fecit Deus duo luminaria magna ; luminare majus , ut præset diei ; & luminare minus , ut præset nocti , & stellas ; & factum est vespere & mane dies quartus.* Sed aliqui putant illa fuisse tantum facta quoad accidentia in hoc die , & fuisse facta quantum ad substantiam in secundo , quando factum est firmamentum & alii orbes cælestes ; à quibus astra non differunt specie , sed tantum accidentaliter ; cum sint pars densior sui orbis , cui Deus indidit lucem, motum & influentias.

## CONCLUSIO.

ASTRA fuerunt à Deo producta quarto die, quantum ad substantiam & accidentia ; Deus enim eo modo loquitur de productione astrorum , ac aliarum rerum ; nam sic dixit , *Fiant luminaria , sicut , fiat firmamentum , aut germinet terra herbam virentem , aut producant aqua reptile animæ viventis :* Sed hæc omnia facta sunt suis diebus quoad substantiam , ergo & astra : Vnde dicendum est , quod Deus ita condensavit aliquas cælorum partes , ut expulsa forma cæli induxerit formam substantialem Solis , Lunæ & stellarum , indita in illis luce cum motu & influentiis ; sicut ex aquis secundo die firmamentum fecit. Nil mirum ergo est , si habeant astra aliam formam substantialem à forma substantiali sui orbis ; quia omnia

## 310 DE CREATIONE MUNDI.

( demptâ Lunâ ) ex se lucida sunt , & habent virtutem influendi in hæc inferiora ; neutrum verò habent orbés cælestes : ergo ab ipsis specie distinguuntur. Si quærat<sup>ur</sup> finis ob quem producta fuerint astra ; duo reperiuntur in Scriptur. primo cap. Genesis. Primus , - ut illuminent orbem , sol in die , & luna cum stellis in nocte , & sic dividant diem ac noctem. Secundus , ut sint in signa : non astrologiæ judiciaræ , ipsa enim condemnata est ; & licet astra influant in corporum dispositionem , & animam inclinent , ipsam tamen non necessitant : & sic sunt tantum in signa pluvix , serenitatis , ventorum , & in signa annorum , mensium & dierum ; in signa denique tempestarum , veris , æstatis , autumnî & hyemis. Quod si dicat Moy ses ; Deum fecisse duo luminaria magna ; non est existimandum lunam esse majorem stellis , longe enim minor est ; sed dicitur magna , quia major videtur quoniam vicinior est terræ , & in virtute influendi efficacior.

---

### Q U Æ S T I O VI.

*Quid productum fuerit in die quinto.*

**I**N primis tribus diebus Deus corpora primò creata distinxit , calum scilicet , aquam , & terram ; in primo enim , creando , lucem , distinxit diem à nocte ; in secundo , per firmamentum speravit aquas superiores ab inferioribus ; & in tertio separavit aquam à terra , ut appareret arida. Tribus vero aliis diebus

## DE CREATIONE MUNDI: 511

eadem corpora ornavit; cælum syderibus in quarto; aquam piscibus in quinto; & terram animantibus terrenis, & homine in sexto: De piscibus loquendum est.

### C O N C L U S I O.

**I**N quinto dei produxit Deus pisces & aves; Dixit enim Deus, *Producant aqua reptile anima viventis, & volatile super terram sub firmamento cæli.* Quænam eorum materia fuerit, Hieronymus, Augustinus, Cyrillus, Damascenus, & alii communiter sentiunt, tam aves, quàm pisces ex aquâ productos; & hoc patet ex textu præcitato, & ex hymno qui dicitur in vespers feræ quintæ, *Magna Deus potentia, qui ex aquis ortum genus, partim remittis gurgiti, partim levas in aëra.* Quod si est dissimilitudo inter aves & pisces; respondet August. lib. 3. de Genesi ad lit. cap. 3. pisces factos esse ex aquâ densiori, aves verò ex subtiliori, unde sunt magis temperamenti aërei, quam aquei. Quod si dicatur Gen. 29. *Formatis igitur de humo cunctis animantibus terræ, & universis volatilibus cæli, adduxit ea ad Adam:* conjunctio præcedens non apponitur ratione formationis; quasi sit sensus, formatis animantibus terræ & volatilibus cæli de humo; sed ponitur ratione adductionis: itaut sic textus debeat intelligi; adduxit Deus cunctos animantes terræ productos ex humo, & volatilia cæli. Si Moyses vocat pisces, reptilia; hoc est propter similitudinem; quia sicut reptilia carent pedibus & supra pectus moventur, sic & pisces. Quando dicitur quod Deus creavit cete grandia; per hoc intelliguntur pisces grandiori

112 DE CREATIONE MUNDI;  
corpore existentes, & sic nomen Cete est commune omnibus magnis piscibus.

---

### QUESTIO ULTIMA.

*Quid in sexto die productum fuerit?*

EODEM modo agere videntur Deus & natura; ista enim ab imperfectioribus incipiens, ad perfectiora progreditur, sic quoque Deus in primæva rerum creatione: nam primò res inanimatas produxit, nempe, cælum, terram, aquam, firmamentum, & astra; secundò plantas & arbores quæ vita vegetante gaudent; postea pisces, deinde aves; tandemque animalia terrestria & hominem in eodem die. De homine caput speciale instituetur,

### CONCLUSIO.

PRODUXIT Deus in sexto die animalia terrestria, & deinde hominem; ut videre est Gen. i. cap. ubi Moïses tria animantium genera distinguit his verbis: *Dixit quoque Deus: Producat terra animam viventem in genere suo, jumenta & reptilia, & bestias terra secundum species suas.* Per jumenta, intelligit animalia quæ sunt magis domestica & familiaria homini, ut sunt canes, equi, boves, &c. Per reptilia, intelliguntur illa, quæ brèves aut nullos pedes habent, ut serpentes, vermes, lacertæ, formicæ, &c. Per bestias, significantur anima-

## DE CREATIONE MUNDI. 513

lia ferocia & agrestia, quæ humanum imperium non patiuntur, ut leones, pantheræ, tigres, &c. Quoad animalia quæ generantur ex putrefactione, Basiliius Homil. 6. in Genesim docet in exordio mundi à Deo condita fuisse; Augustinus verò lib. 3. de Genesi ad lit. vult. tales species fuisse tantùm causaliter productas, in quantum animalia perfecta creata sunt in illo die, ex quibus ista naturaliter erant oritura. Quantum autem ad illa animantia quæ generantur ex diversorum specie animalium commixtione, & fiunt præter naturam, ut sunt mulus qui producitur ex equa & asino, leopardus ex leæna & pardo, lynx ex lupo & cerva; non est necesse, quòd dicatur hæc animantia adulterina fuisse producta sexto die; hæc enim commixtio est præter naturam, & ob hoc verita fuit Judæis Levit. 19. *lumenta tua non facies coire cum alterius generis animantibus: agrum tuum non seres diverso semine*, imò Hebræi ex Genes. 36. colligunt, hanc adulterinam generationem attribui cuidam nomine Anæ. Satis ergo est ad perfectionem universi, quòd Deus perfecta animalia produxerit, ex quibus generari possent ista. Porro, quoad hominem qui eodem die cum animalibus terrenis creatus est, tot & tanta dicenda sunt, quòd disputationem integram exigat talis materiæ amplitudo; ipsam aggrediemur, postquam quæ sunt dicenda de Angelis, à quibus paulominus minoratus est homo, fuerint explicata,





## DISPUTATIO SECUNDA.

*De Angelis.*

**C**UM egerimus in præcedenti disputatione de creatione mundi in universum, & de sex dierum operibus in particulari; ad nobiliores creaturas, quæ ipsum mundum exornant, explicandas descendere cupientes, de Angelis primo agere debemus, locuturi postea de primo homine.



## QVÆSTIO PRIMA.

*Verum existant Angeli, an sint corporei,  
& incorruptibiles.*

**N**OMEN Angeli non est naturæ, sed officii; nuntium enim significat, quoniam venit à verbo græco ἀγγέλλω, quod est nuntio; hinc qui nobis voluntatem divinam annuntiant, dicuntur Angeli, ut Joannes Bapt. de quo Malachiæ 3. *Ecce ego mitto Angelum meum ante faciem meam.* Communi tamen usu, nomine Angelorum intelliguntur creaturæ spirituales, quæ voluntatem divinam annuntiare solent hominibus, de quibus instituitur sermo in præsentia.

## DE CREATIONE MUNDI. 515

## CONCLUSIO PRIMA.

**A**NGELOS existere suadet Scriptura, contra Sadducæos, qui tempore Christi negabant existentiam spirituum, & mortuorum resurrectionem. Matth. enim 1. habetur, *Apparuit Angelus Ioseph. Lucæ. 1. Missus est Angelus Gabriel. & multi contextus tùm veteris, tùm novi testamenti de eadem veritate convincunt*: Angelorum tamen existentia naturaliter probari non potest, nec à priori, nec à posteriori; omnes enim effectus Angelorum refundi possunt in Deum, vel in animas separatas, ut motus cælorum, & energumenorum operationes; dum enim energumeni loquuntur variis linguis, hoc possunt facere animæ separatae, quæ varias linguas dum essent in proprio corpore, callentes, possunt illis uti, dum possident corpus alienum; maximè quando plures animæ arripiunt idem corpus; possunt etiam mentiri, blasphemare, verba impudica profere, &c. Quoad effectus verò qui nullam involvunt imperfectionem, Deo attribui possunt. Locus creationis Angelorum communiter creditur esse cælum empyreum, ut diximus in secunda quæst. cap. præcedentis: Unde si Lucifer dixerit, *in calum conscendam*, non loquitur de cælo empyreo; in illo enim erat, sed de cælo divinitatis, nam addidit, & *similis ero Altissimo*.

## CONCLUSIO SECUNDA

**L**IET aliqui inter Patres antiquos putaverint probabile, quod Angeli aliquale corpus habuerint, contrarium tamen est commune; Angeli enim, ad Hebræos primo, vo-

antur administratorii spiritus; & Psal. 103. habetur, *Qui facis Angelos tuos spiritus*; id est, qui facis nuntios tuos, creaturas spirituales; Vnde in Conc. Lateran. sub Innoc. VIII. cap. *Firmiter de summâ Trinitate*, statuitur, Deum utramque naturam de nihilo condidisse, spirituales & corporales, nempe elementarem & Angelicam; & tertiam, humanam scilicet, compositam ex corpore & anima. Nulla de hoc dari potest ratio, à priori, à posteriori tamen suadetur; quia si Angeli essent corporei, non possent esse tam multi numero in eodem corpore, ut fuerunt Luc. 8. in dæmoniaco ab una legione obfesso, quæ componitur ex 6666. non possent etiam discurrere per aërem sine murmure, nec cubiculum omni ex parte oculum ingredi.

O b j c. Angeli patiuntur ab igne inferni, horruerunt fumum jecoris; quæ omnia corpora sunt insuper Conc. Nicænum II. approbavit Epistolam Episcopi Thessalonicensis, dicentis, Angelos pingi posse, quia sunt corporei. Resp. Angelos torqueri igne inferni qui corporeus est, sed non hoc physicè; quomodo enim dæmones in aëre existentes torquerentur ab igne inferni per contactum physicum, cum longè distent ab eo? sed cruciantur moraliter, ex viva apprehensione, quam Deus producit in illis ad præsentiam ignis, quæ apprehendunt ipsum ignem, tanquam sibi maximè noxium & disconvenientem. Sic dicendum est de fumo jecoris de quo Scriptura loquitur Tobie 6. Quoad Concilium; approbat quidem ex professo Angelos posse pingi; non approbat autem

nisi per transfennam conclusionem, quod corporei sint; primum enim erat in quæstione, non secundum.

## CONCLUSIO TERTIA.

**A**NGELI sunt ab intrinseco corruptibiles, quoniam in se non habent materiam primam, quæ est principium corruptionis; sunt tamen corruptibiles ab extrinseco, non quidem ab agente creato, quia nullum est tantæ virtutis ut ipsos destruere valeat; sed à Deo, qui sicut illos creavit, sic & eos annihilare potest.

**O**BJIC. contra primam partem conclusionis, sextam Synodum, quæ actione undecimâ statuit Angelos & animam rationalem habere immortalitatem ex gratia Dei; ergo Angeli non sunt incorruptibiles ex natura sua. Rcip. per gratiam Dei intelligi liberum Dei concursum, & gratuitam ejus voluntatem, quæ vult conservare Angelos & animam rationalem; cum posset hæc omnia annihilare, si vellet; sicque conservantur per gratiam Dei.

## QUESTIO II.

*Quantus sit numerus Angelorum, & quomodo distinguantur?*

**DD.** Basilius, Gregorius Nicenus, & Anselmus ita de Angelis, ac de hominibus philosophati sunt putantes omnes Angelos esse ejusdem naturæ & speciei, ut omnes homines; & solum differre officio, vel pene;

aliquos gradus gratiæ vel gloriæ; secundum quos alii vocantur Archangeli; isti Cherubim, illi Seraphim, &c. Secundum Divum Thomam, omnes differunt specie, ita quod duo non reperiuntur ejusdem naturæ specificæ.

## CONCLUSIO PRIMA.

**N**UMERUS Angelorum certò haberi non potest viâ naturali; tot enim creati sunt, quot voluit Deus, qui plures vel pauciores producere potuit; eorum ergo numeri cognitio pro hoc statu à revelatione pendet: Ex Scripturâ tamen habemus, Angelos esse in maximo numero: Danielis enim 7. habetur, *millia millium ministrabant ei, & decies millies centena millia assistebant ei.* Habemus insuper, quod singuli homines singulos recipiant Angelos ad sui custodiam, qui omnes ex inferiori ordine assumpti sunt: Vnde colligitur longè major numerus Angelorum, quàm hominum: Non enim dicendum est, eundem Angelum successivè custodire plures homines; quilibet enim Angelus satis occupatus erit in diè judicii, ut cineres unius hominis sibi commissi colligat, & quasi in temporis momento eum comitetur ad judicium. Aliqui volunt, tot esse Angelos damnatos, quot erant homines salvandi; quia homines debent reparare ruinas Angelorum apostatarum: Non valet tamen consequentia, aliàs nulli fuissent salvandi homines, si Angeli non peccassent; verum quidem est, quod homines beati instaurabunt omnes dæmonum sedes, non præcisè secundum numerum, sed secundum

proportionem gloriæ; quatenus gloria unius hominis erit æquivalens gloriæ plurium Angelorum; vel gloria plurium hominum æquivaleret gloriæ unius tantum Angeli.

## CONCLUSIO SECUNDA.

**D**ISTINCTIO Angelorum non est de fide; Augustinus enim libri contra Priscillianistas cap. II. dicit, se hanc Angelorum differentiam ignorare, nec tamen in ista ignorantia periclitari: quia nempe res ad fidem non pertinet. Probabilius tamen est, Angelos omnes non differre specie, nec omnes solo numero; sed esse plures species Angelorum, & in quâlibet plura individua ejusdem speciei; sic Alensis, Bonaventura, Scotus & alii gravis notæ scolastici. Ratio probabilitatis est, quia pertinet ad perfectionem universi, ut sit in eo diversitas cum unitate, & sic debent esse plures Angelorum species ob diversitatem, & plura individua quæ eandem speciem participant ob unitatem; illa verò multiplicatio individuorum ab omnipotentia Dei procedit.

**O B J E C T** Divus Thomas, Multiplicatio individuorum sub unâ specie petitur à materiâ, quæ diversa est in diversis individuis: cum ergo in Angelis non sit materia, non potest proinde in illis esse multiplicatio individuorum: ergo nec plures Angeli sub eâdem specie; & sic tot erunt species Angelorum, quot Angeli. Resp. negando fundamentum D. Thomæ, principium enim individuationis non petitur à materiâ, sed ab ultimâ differentiâ cujuscumque rei, quæ vocatur à Scoto *hæcitas*.

---

 QUAESTIO III.

*An vera corpora assumant aliquando Angeli.*

**D**IXIMUS in primâ quæstione, Angelos ex se non habere corpora; aliena tamen possunt assumere, cum quibus aliquando hominibus sensibilibus apparent: An autem sint vera, vel imaginaria, ita quod ea sensus videntium illudent, quæritur.

CONCLUSIO.

**L**ICET aliquando corpora, sub quibus apparent Angeli, sint tantum imaginaria, aliquando tamen vera & realia sunt, secundum mentem Augustini 15. de Civit. Dei cap 23. quod confirmatur exemplo; Genesis enim 32. Jacob luctatus est cum Angelo, & ex lucta remansit claudus: Matthæi etiam 4. Diabolus ad Christum accessit in deserto, cui obtulit lapides in panem mutandos: Hoc autem non factum fuit per solam illusionem: non potuisset enim dæmon Christum decipere, nec ejus perturbare phantasiam & judicium. Ratio conclusionis est, quod multo facilius unum corpus possint componere Angeli externum & visibile, quam producere tot imaginationes in multis hominibus, & fascinare v. g. oculos Sodomitarum, qui videbant Angelos domum Loth ingredientiæ, Genesis 18.

**O**BJEC. si corpora ab Angelis assumpta sint vera & realia, Angeli erunt uniti illis pro unionem hypostaticam, vel ut forma

materiæ, quod est absurdum. Resp. 1. hanc unionem non esse hypostaticam; unio enim hypostatica est maximum potentiæ divinæ miraculum, cujus exemplum non habemus, nisi in Christo; unde si Joannes Bapt. dictus est in Scripturâ Angelus, hoc est ratione gratiæ, non verò per unionem hypostaticam, quidquid dicat Origenes. Resp. 2. unionem Angelorum cum corpore non fieri per informationem, contra Tertullianum; quia Angelus est substantia completa & perfecta, forma verò est pars tantum compositi, & quid incompletum. Resp. 3. Angelos conjungi corporibus assumptis per assistentiam & per præsentiam localem in quantum postquam composuerunt corpus ex aëre, vapore, exhalatione, aut similibus, quod taliter configurant qualiter voluerint, se ipsi præsentem reddunt, illudque movent, quocumque libuerit.

---

#### QUESTIO IV.

*Vtrum Angeli actiones vitales in corpore assumpto elicere valeant.*

Sicut Angeli naturali virtute corpora producere possunt, mediante solo concursu Dei, sic & illud movere valent de facili. An autem in illis elicere queant actiones vitales affirmare potuit Tertullianus; quoniam voluit Angelos esse formas corporum assumptorum, donec suum ministerium impleverint: Nos autem qui volumus illos esse tantum



corporibus assistentes, contrarium, habemus respondere.

#### CONCLUSIO.

**A**NGELI in corporibus assumptis vitales operationes elicere nequeunt propriè; sed tantùm metaphoricè, in quantùm producunt actiones externas, quæ vitalibus sunt similes; sic omnes cum D. Thomâ, Bonaventurâ, & Scoto; unde Tobiz 12. Raphaël Tobiam alloquens, & parentes ejus, dicebat, *quando eram vobiscum, videbar manducare; sed ego cibo invisibili utor*: non fuit ergo vera, realis, & organica manducatio, sed tantùm apparens. Ratio nostra est, quia actio vitalis est à principio vitæ conjuncto; illæ autem actiones formatæ ab Angelo, non sunt à principio vivente conjuncto; quia corpus illud non vivit, nec Angelus est illi conjunctus intrinsecè, tanquam forma informans: Angeli ergo nec possunt loqui in corporibus assumptis, nec audire, nec videre, aut manducare, aut generare, quæ sunt actiones vitales. Quod si dæmones incubi generare dicantur, Divus Thomas respondet in primâ parte, quæst. 51 art. 6. ad 6. non esse veram generationem; quia hoc non fit per semen à dæmonibus demissum, aut à corporibus assumptis, sed per semen alicujus hominis acceptum, quando scilicet idem dæmon, qui est succubus ad virum, fit incubus ad mulierem.

**OBJEC.** Abraham præparavit cibos, quos obtulit Angelis; ergo cognoscebat Angelos posse manducare; manducatio autem est actio vitalis, Resp. Abraham existimasse illos tres

juvenes esse homines prophetas à Deo missos , in quibus Deum venerabatur : quòd si ab illo Angeli manducare visi fuerint ; non tamen verè manducaverunt ; comestio enim non consistit in sumptione cibi , nec in contritione ejus , aut in trajectione oris ad stomachum ; sed in sumptione cibi convertibilis in substantiam comedentis , si ve convettatur , si ve non ; sed alimentum sumptum ab Angelis non potuit converti in illorum substantiam , quia sunt spirituales ; nec in substantiam corporis , quia est mortuum : ergo illa manducatio non erat vitalis. Si dicatur , motum progressivum competentem Angelis in corpore assumpto , esse tamen vitalem : responderetur illum motum esse vitalem , quando est à motore conjuncto & intrinseco ; Angelus autem respectu corporis conjuncti , est motor extrinsecus. Si dicat Augustinus 13. de Civit. Dei cap. 22. Angelos reipsà manducasse , non tantum in phantasmate ; id est sumpsisse verum & reale alimentum ; & non phantasticum , non tamen manducasse vitaliter. Quòd si loqui videantur Angeli , hoc est rantum , quia edunt sonos humanis vocibus similes. Quando Angeli dicuntur loqui , volare , manducare , ridere , &c. hæ actiones sunt quidem veræ & reales in genere motus localis , sed sunt tantum metaphoricæ in genere motus vitalis ; quia illa corpora non informantur ab Angelis.



---

 QUESTIO V.

*Quomodo Angeli sint in loco, & an habeant terminum parvitatatis & magnitudinis?*

**R**ATIO difficultatis, quæ reperitur in prima quæstionis parte, petitur ex natura loci: cum enim locus sit superficies quanta, videtur quod locatum debeat etiam esse quantum, quod non competit Angelis, qui indivisibiles sunt, & non quanti. Quoad secundam partem quæstionis, sic intelligitur; utrum Angelus sit in loco ita parvo aut magno, ut minorem aut majorem tenere nequeat.

## CONCLUSIO PRIMA.

**A**NGELUS est in loco per substantiam: sic Scotus contra Divum Thomam, qui asseruit, Angelos esse tantum in locis per operationem; in quantum scilicet, habent aliquam operationem in illis: ubi Scotus vult, Angelum esse in illis per substantiam, in quantum substantia spiritualis & indivisibilis Angeli est indistans à loco. Ratio ejus est, quia si Angelus existens in aliquo loco, & in illo operans, cessaret à sua operatione per voluntatem Dei, non desineret esse in loco, in quo antea operabatur; aliàs vel esset annihilatus, vel in alium locum migrasset, quod falsum est: ergo remanet, ut sit in loco per substantiam. Deinde, prius Angelus est præsens alicui loco secundum essentiam & substantiam, quàm secundum operationem; omnes enim actio-

res creatæ sunt hîc & nunc ; id est, sunt ab agente existente in loco, & in tempore determinato ; & sic omne agens debet prius esse alicubi, quam illic operari.

**O**bjic. quantitas locati est ratio existendi in loco, sed Angelus qui est spiritualis, non est quantus ; ergo non est in loco per præsentiam. **R**esp. dist. majorem, quantitas est ratio existendi in loco, circumscriptivè & commensurativè, concedo : definitivè, nego, hoc est, ut aliquid sit circumscriptivè in loco, debet esse quantum ; aliàs partes locati non corresponderent partibus loci, in quo consistit præsentia circumscriptiva ; ut aliquid tamen sit definitive in loco, id est, totum in toto, & totum in qualibet parte, non requiritur quantitas ; Angelus autem dicitur esse definitive in loco, & non circumscriptivè. Dices, Angelus qui est indivisibilis, non potest esse in loco qui est divisibilis. **R**esp. licet Angelus habeat existentiam indivisibilem, quia indivisibilis est ; habet tamen coexistentiam, seu in-existentiam divisibilem, ratione loci, qui est divisibilis ; existit enim totum in toto loco, & totus in qualibet parte : exemplum habemus animæ rationalis, quæ licet sit indivisibilis, est tamen in corpore divisibili secundum substantiam.

#### CONCLUSIO SECUNDA.

**A**NGELUS habet terminum magnitudinis quoad locum ; si enim non limitaretur ad esse præsens alicui loco limitato, posset majori & majori semper inexistere, & sic posset esse præsens toti mundo ; quod est contra

## D E CREATIONE MUNDI.

omnes Theologos, dicentes, ubiquitatem solâ Deo competere, & omnia entia creata nedum esse limitata secundum essentiam, sed & secundum præsentiam. Quoad terminum parvitas, nullum habent Angeli; non possunt enim tam parvum tenere locum, quin minorem possint habere, imò se coarctare possunt ad punctum, si detur: Angelus enim est indivisibilis, partibus carens, non informans corpus; & sic nulla est ratio, quare necessariò debeat esse præseus loco quanto & divisibili.

---

### Q U Æ S T I O V I.

*Vtrum Angeli possint esse in pluribus locis?*

P O S S U N T quidem plures Angeli esse in eodem loco; sacra enim Scriptura meminit hominis possessi à dæmonum legione, & nil mirum videri debet; cum enim Angeli non sint materiales, neque quanti, non se expellunt ab eodem loco: Sed quæritur, utrum vice versâ Angeli possint esse in pluribus locis; & hoc potest intelligi, vel de locis adæquatis, etiam discontinuis, ut v.g. hîc & Romæ, vel inadæquatis & continuis, ut v.g. in aulâ & in horto adjacenti.

### C O N C L U S I O.

A N G E L U S supernaturaliter potest esse in pluribus locis discontinuis & adæquatis, ut Parisiis & Romæ; naturaliter verò esse potest in multis locis continuis & inadæquatis. Primum patet ex eo, quòd cum nulla sit con-

traditio, ut idem corpus sit circumscriptivè in pluribus locis per potentiam divinam, à fortiori Angelus in pluribus locis, etiam sine implicantiâ, esse poterit. Quodd autem unum corpus possit esse supernaturaliter in pluribus locis simul & semel, hoc docuimus multoties in Physicâ, & per fidem ostenditur, quæ defendere non potest, corpus Christi esse in pluribus locis, ratione Sacramenti, nisi fateatur unum corpus posse in pluribus locis simul esse præsens. Secundum evidens est, cum enim Angelus possit esse totus in loco suo adæquato, est consequenter naturaliter in pluribus locis inadæquatis, qui faciunt tantum unum locum adæquatum, ut diximus de aulâ & horto contiguis, quibus simul potest esse præsens.

O B J E C T. Doctores, qui dicunt posse esse naturaliter in pluribus locis discontinuis. Resp. posse esse in illis, non quidem primariò & per substantiam; sed secundariò, & per operationem transeuntem, non immanentem: si v. g. Angelus esset in acervo lapidum, posset movere unum lapidem, non movendo alium distantem: si esset etiam in corpore assumpto, posset movere caput & pedes, non movendo brachia; & sic potest esse in pluribus locis discontinuis, per operationem transeuntem; non tamen per operationem immanentem, quia operatio immanens, ut intellectio & volitio, competunt Angelo secundum omnem locum in quo est per substantiam.

---

 QUESTIO VII.

*An Angelus possit moveri motu locali continuo  
& instantaneo?*

**N**emo dubitat quin Angelus moveatur motu locali; Tobia enim 12. Angelus Raphaël dicit, *Tempus est, ut revertar ad eum qui misit me*; & Luc. 2. Gabriel ingressus est ad Mariam, & recessit postea: Cujus ratio est, quia Angeli sunt in loco determinato; ergo se ab uno ad alium transferre possunt; hoc enim non denegatur creaturæ inferiori. An autem motus illorum possit esse continuus & instantaneus, queritur.

## CONCLUSIO.

**A**NGELUS potest moveri motu locali continuo; motus enim continuus est, quando posterior locus non relinquitur totus simul, nec prior totus simul acquiritur; sed per partes, ita quod tantum acquiratur de uno, quantum de altero relinquitur; sed hoc est possibile Angelo; licet enim substantialiter sit indivisibilis & partibus catens, habet tamen virtuales quendam extensionem, in quantum totus existit in loco extenso; potest ergo relinquere unam partem loci, quem occupabat antea, & acquirere novam partem novi loci; ergo moveri potest motu continuo: Imò Angelus non potest moveri motu discreto, hoc est, non potest eodem instanti priorem locum deserere, & alium discontinuum acquirere;  
transit

transiret enim de extremo in extremum, impertransito modo ; v. g. de empyreo in terram, impertransito aëre ; si enim in primo instanti esset in empyreo, & in immediatè sequenti esset in terra, nunquam esset in aëre : Nec est eadem ratio de corpore Christi, quòd existens in empyreo redditur præsens in terra, vi verborum Sacerdotis, absque eo quòd transeat per aërem ; quia non fit præsens per adductionem localem, sed per productionem substantialem.

## CONCLUSIO SECUNDA.

**A**NGELUS non potest moveri in instanti ; Augustinus enim dicit, substantiam corpoream moveri per loca & tempora, spiritua-lem verò tantum per tempora ; & hoc est quod dicitur communiter in Physicâ, successionem esse de essentiâ motus, aliàs mobile quod moveretur in instanti, esset simul in termino à quo, & in termino ad quem. Licet tamen Angeli non moveantur in instanti, celerissime tamen moventur ; unde Tertullianus dicens Angelos esse ubique per momentum ; intelligitur, quòd moveantur per brevissimum tempus.

**O**BJEC. Sei motus Angeli esset successivus, illa successio procederet, vel ex resistantia mediæ, v. g. aëris, qui Angelo resisteret, vel ex partibilibitate mobilis, quod esset partim in unâ parte loci & partim in aliâ ; respectu autem Angeli non est resistantia, quia fit tantum inter corpora, quæ sibi invicem resistunt ; nec etiam est partibilitas, seu divisibilitas in Angelo, non est enim quantus ; ergo nulla est ratio, quare motus Angeli sit successivus : ergo est in



530. DE CREATIONE MUNDI;  
instanti. Resp. ex neutro capite oriri succes-  
sionem motus in Angelo, sed tantum proce-  
dere ex finitate virtutis moventis, quæ est in  
illo; quod enim virtus movens est fortior, tan-  
tò minori tempore movetur mobile. Ut ergo  
moveretur Angelus in instanti, deberet habere  
virtutem mottricem infinitam; quam cum non  
habeat, movetur in tempore; & quia illius  
virtus est maxima, idè movetur brevissimo  
tempore.

---

## CAPUT VIII.

*Quanam cognoscat Angelus & quomodo?*

**H**Æc quæstio multas continet; quæri  
enim potest, an Angelus seipsum cognos-  
cat; an alia à se; an ea quæ sunt naturalis or-  
dinis; an illa quæ ad gratiam pertinent, & quo-  
modo ea attingat.

### CONCLUSIO.

**A**NGELI seipfos cognoscunt per substan-  
tiam suam, alios per substantiam eorum;  
Deum etiam aliquo modo naturaliter cognos-  
cunt. Ratio primi est, quia intellectus non in-  
diget specie, ubi objectum est actu intelligibi-  
le & intimè præsens; sed substantia Angeli  
est sibi talis; ergo Angelus se intelligit per  
substantiam, sicut & anima separata: Non sic  
tamen conjuncta; nam ut conjuncta, tantum  
per phantasmata intelligit. Ratio secundi est  
eadem; quando Michaël v. g. est præsens Ga-  
brieli, ipsum cognoscit per substantiam co-

gniti, quia est præsens & actu intelligibilis : secus dicendum est, si Michaël distet : quia Angeli limitantur in intellectu, sicut in substantia & in loco. Tertium asseritur, quia ex creaturis quas cognoscunt naturaliter, deveniunt in cognitionem creatoris ; sicque cognoscunt Deum naturaliter, abstractivè saltem, non intuitivè.

## CONCLUSIO SECUNDA.

**A**NGELI cognoscunt omnia, quæ sunt ordinis naturalis, tam spiritualia, quam corporalia ; hæc enim omnia intellectui sunt proportionata Angelico : non possunt tamen cognoscere volitiones nostras, licet enim sint proportionatæ intellectui Angelico, quoniam veræ sunt, ob specialem tamen providentiam, Deus non concurrit cum Angelis ad illas cognoscendas, ut vitet detrimentum ex hoc hominibus proventurum : ex eo enim instanti, quo bonas cogitationes haberemus, tentarent dæmones illas extinguere, & augere malas : Cognoscunt tamen illas per signa exteriora, ut sunt verba, nutus, incessus, vultus mutatio, &c. Quòd autem non cognoscant nostras cogitationes naturaliter, patet ex 2. Paralip. 6. *Tu solus nosti corda hominum* ; unde si quis dicat, dæmonem in articulo mortis accusaturum esse homines de peccatis, quorum plurima fuerunt tantum in voluntate commissa ; respondendum est quòd dæmon accusabit de peccatis, quæ ad exterius deducta sunt, conscientia verò arguet de illis, quæ in corde fuerunt reservata.

**A**LIIQUA contingentia futura cognoscunt Angeli, alia non cognoscunt, sicut nec gratiam, nec habitus infusos fidei, spei, charitatis & aliarum, virtutum. Cognoscunt inquam, futura contingentia, quæ sunt in proximis causis, v. g. pluviam casuram, serenitatem futuram, vel sterilitatem, aut fertilitatem talis anni, per conjunctionem scilicet astrorum, & causarum secundarum dispositionem: Non cognoscunt verò contingentia futura, quæ à libertate humanâ dependent; aliàs si ea certò scirent dæmones, nunquam homines tentarent; viderent enim hominem vel esse lapsurum, & tunc non indigerent tentatione; vel non lapsurum, & tunc non tentarent; quia per tentationem augerent victoriam & meritum hominis. Quoad gratiam denique & virtutes, non possunt cognosci naturaliter ab Angelo; quia sunt supernaturalis ordinis; unde non inferendum est, quod quia Angelus potest cognoscere alium Angelum naturaliter, possit à fortiori cognoscere gratiam, quæ ignobilior est Angelo, quoniam est accidens, & Angelus substantia; non valet enim hæc consequentia, quia comparatio non debet fieri nisi inter res quæ sunt ejusdem ordinis; aliàs posset inferri, quòd homo volare posset, quia potest intelligere, quod est nobilius.

## CONCLUSIO QUARTA.

**A**NGELI non potuerunt cognoscere mysteria gratiæ antequam fierent; dependent enim à libera determinatione divinæ voluntatis, quæ tantum per revelationem inno-

tescere potest: quoad mysteria gratiæ jam facta non cognoscuntur ab Angelis, si sint supernaturalia in entitate: Unde non possunt cognoscere naturaliter incarnationem, quia includit pro termino Verbum D. quod supernaturale est; nec transsubstantiationem in Eucharistia, quia ibi reperitur Verbum unitum hypostaticè corpori Christi: si verò sint supernaturalia tantùm in modo, possunt illa cognoscere Angeli: sic Angelus resurrectionem mortui jam factam attingere potest naturaliter sicut & restitutionem visus, aut restorationem sanitatis; Angelus enim clarè videt hominem antea mortuum postea vivere, hominem cæcum postea videre, & ægrotum convalescere postea; quia hæc omnia sunt naturalia in entitate: vita enim, visus & sanitas sunt quid naturale, licet sint quid supernaturale in modo; nullum enim agens naturale hæc omnia reddere potest; dum cognoscunt tamen illa Angeli, hoc est argutivè, non intuitivè; quia non cognoscunt illum modum, qui supernaturalis est; sed videntes nullum agens naturale hæc miracula potuisse edere, inferunt ea esse operata ab agente supernaturali.

## CONCLUSIO QUINTA.

**A**NGELI cognoscunt objecta corporea per species. Sic omnes Scolastici, cum D. Dionysio cap. 4. & 7. de D. nom. dicente, Angelos esse plenos formis & rationibus omnium rerum. An autem illæ species sint acquiritæ ab objectis, ut in nobis sit communiter; an autem concreatæ, & infusæ à Deo; alii primum tenent, facilius tamen asseritur secun-

dum ; difficile enim explicatu est , quomodo Angeli possint intelligere objecta corporea per species ab illis deductas , quæ corporeæ sunt ; unde melius est , si asseveretur , Deum Angelis indidisse omnium rerum species , quæ tamen non repræsentant objecta distinctè in individuo , nisi existant , aut extiterint ; unde per illas species sibi inditas , non cognoscunt Angeli futura contingentia . An illæ species sint universaliores in superioribus Angelis , quàm in inferioribus ; affirmat D. Thomas volens superioribus Angelis inditas fuisse species , quæ plures naturas , & plura genera repræsentarent , nedum in communi , sed & in particulari , v. g. speciem , quæ distinctè repræsentet equum & hominem simul , non tantùm ut animalia sunt , sed ut sunt homo & equus : negat verò Scotus ; quia , inquit , species impressa est similitudo rei cognoscendæ , & non potest una imago repræsentare plura objecta ; quæ sunt diversæ rationis ; & sic eadem species non potest simul repræsentare equum & hominem , nec species universalis rem singularem ; aliàs non esset vera conformitas & similitudo inter speciem & objectum . Nobis ergo cùm Scoto dicendum remanet , dari Angelis species universales , quæ genera & species repræsentant , & singulares , quæ singulæ ; etsi Dionysius dicat Angelos superiores cognoscere per universaliorē sciētiā , hoc est per clariorem .

**A**NGELI cognoscendo objecta per scientiam matutinam, quam habent in Verbo, non discurrunt; per scientiam. verò vespertinam, quâ cognoscunt res in proprio genere, discurrere dicuntur. Ratio primæ partis est, quia Verbum Divinum est speculum, in quo relucent omnia objecta clarè & distinctè, & sic Angeli, viso Deo, vident unico actu naturam & proprietates, causamque cum effectu. Ratio secundæ est, quia sicut res habet ad esse, ita ad cognosci; atqui causa est prior effectu, & natura proprietate, saltem prioritate naturæ: ergo Angeli videntes objecta in proprio genere, prius cognoscunt causam quàm effectum; & sic discurrunt, deducentes ex præmissis conclusionem: talis tamen discursus ita velox est, ob perspicacitatem intellectus Angelici, ut plures illæ cognitiones videantur esse unicus actus intellectus, & in unico instanti fieri.

---

### QUESTIO IX.

*Virum detur loquutio & illuminatio inter  
Angelos?*

**L**OQUUTIO Angeli nihil aliud est, quàm manifestatio sui conceptus, aut suæ volitionis; sic quando Michaël vult manifestare suam mentem Gabrieli, Michaël dicitur loqui & Gabriel audire: Hoc autem vocatur loquutio propter analogiam cum nostra; sicut enim

per verba exteriora manifestamus conceptum mentis, & ob hoc dicimur loqui, sic etiam Angeli loqui dicuntur, dum manifestant suos conceptus per species, quas imprimunt.

## CONCLUSIO.

**I**NTER Angelos est loquutio & illuminatio; ut enim sociabiliter inter se vivere possint, necessarium est, ut actus internorum intellectus, tum voluntatis sibi invicem manifestent; quod sic fit: quando Angelus superior cognoscit aliquid, pro tunc suæ cognitionis producit speciem intelligibilem quæ intuitivè repræsentat actum interiorem, & quam imprimit Angelo cui loqui intendit; ille qui imprimit speciem, dicitur loqui, ille qui recipit eam, dicitur audire. Quia autem Angelus libere confert speciem, Deo concurrente specialiter ad hoc, idè potest unum sic alloqui, si velit, ut alii non audiant; illa tamen species, cum sit actu intelligibilis, potest à quolibet Angelo intelligi; non intelligitur tamen, quia Deus non concurrit cum illis, ut eam intelligant, & concursus ille, quem Deus dat Angelo inferiori, quem vult alloqui superior, non est supernaturalis, quia est conformis naturæ angelicæ.

**Q**UO AD illuminationem, constat illam reperiri inter Angelos; in hoc enim tantum differunt loquutio & illuminatio, quod loquutio sit manifestatio cujuscumque veritatis: illuminatio verò est manifestatio veritatis supernaturalis pertinentis ad gratiam, vel gloriam. Exemplum habemus de illuminatione in Scriptura, ubi aliqui Angeli petierunt.

*Quis est iste Rex gloria?* Alii verò respondent, *Domini virtutum ipse est Rex gloria.* Ad Angelos superiores spectat inferiores illuminare, purgare & perficere, quæ omnia fiunt eodem actu; quatenus enim superiores accipiunt aliquam cognitionem supernaturalem à Deo quam imprimunt in inferioribus, dicuntur eos illuminare, quatenus liberant à nescientiâ, dicuntur purgare; quatenus verò intellectum afficiunt nova cognitione, perficere dicuntur.

---

### Q U Æ S T I O X.

*Quid dicendum sit de gratia Angelorum?*

**D**I XERUNT aliqui, Angelos in primo instanti fuisse creatos in puris naturalibus, & in secundo Deum illis contulisse gratiam; hæc opinio suos habet fautores, contraria tamen est probabilior.

#### C O N C L U S I O.

**A** N G E L I, in primo instanti creationis gratiam sanctificantem acceperunt & actuales gratias, mediantibus quibus meruerunt aliqui, alii verò non, licet potuissent mereri si voluissent: sic August. lib. 12. de Civit. cap. 9. *Deus in Angelis erat condens naturam, & largiens gratiam.* Ratio est, quia juxta communem Doctorum mentem, homo cum gratiâ creatus est, & nos ipsi gratiam ab origine habuissemus (quæ ideo vocatur originalis,) si non prævaluisset peccatum; ergo & Angeli in gratiâ creati sunt. Deinde in primo instanti erant



perfectè ordinati ad beatitudinem supernaturalem, ad quam sola gratia ordinat. Tandem mali Angeli habuerunt gratiam ante lapsum, in secundo autem instanti lapsi sunt; ergo in primo gratiam habebant. Quòd si Joannes Papa dicat, diabolum erubescere, quòd non habuerit charitatem in cœlo, quam habent in terrâ homines; loquitur de charitate perseverante, quam multi homines habuerunt.

## CONCLUSIO SECUNDA.

**A**NGELI gratiam quæ fuit proportionata naturæ, obtinuerunt ex meritis Christi. Quòd illorum gratia sit proportionata naturæ Angelicæ, asserunt Patres; unde Basilus lib. de Spiritu S. cap. 10. ait, Angelos, juxta proportionem eminentiæ inter se, sanctificationis mensuram accepisse à Spiritu S. & sic qui perfectiores erant in natura, eminentiores inventi sunt in gratia, non quod perfectio naturæ gratiam meruerit, sed quia ex libera voluntate Deus destinavit perfectiorem naturam ad perfectiorem gratiam & gloriam. Quòd illa gratia concessa fuerit ex meritis prævisis Christi: sic Scotistæ, contra Thomistas; Christus enim in Scriptura dicitur caput hominum & Angelorum; caput autem influit in membra; ergo Christus influit in Angelos gratiam, quæ est vita spiritualis; & hoc latius pater in tract. de Incarnatione cap. de merito Christi.

Objec. Decretum incarnationis factum fuit post prævisionem peccati originalis ob illius reparationem, & sic incarnatio decreta fuit post prædestinationem Angelorum: ergo Angeli non habuerunt gratiam, quæ est medium

prædestinationis , à Christo. Resp. decretum incarnationis secundum substantiam factum, præcessisse prædestinationem Angelorum & hominum , & prævisionem peccati , licet secundum modum decreta fuerit incarnatio post ruinam Adami prævisam ; quandoquidem Christus venit in carne passibili ad redimendos homines , ut videre est in 1. c. tract. de Incarnat.

---

## QUESTIO XI.

*Quid dicendum sit de gloriâ Angelorum ?*

**D**UPLEX est beatitudo ; una naturalis , quæ consistit in perfectâ contemplatione Dei naturali , & hanc habuit Angelus ab instanti creationis ; supernaturalis altera , quæ excedit vires cujuscumque intellectus creati ; & quæ consistit in clarâ Dei visione & amore supernaturali ; & de istâ procedit quæstio.

### CONCLUSIO.

**A**NGELI non fuerunt beati in instanti creationis , quia beatitudo est inamissibilis ; illam tamen non habent mali Angeli , ergo nec boni in instanti creationis habuerunt : fors enim creationis æqualis est pro omnibus. Deinde , impossibile est ut peccent illi qui Deum vident ; potuerunt autem peccare omnes Angeli in suâ creatione , & de facto aliqui peccaverunt ; ergo non fuerunt à creatione beati.

Objic. ex Isayæ 14. *Quomodo cecidisti de Cælo Lucifer ?* ex Ezechielis 24. *Tu Cherub in*  
Z. vj.

*delitiis Paradisi fuisti.* Resp. per primum intelligi tantum creatum fuisse in empyreo; & per secundum, collocatum fuisse in loco ameno & per jucundo. Si dicat Chrysostomus, dæmones à superna gloria excidisse; quam obtinere poterant, concedo; quam obtinebant, nego. Si dicat Aug. Angelos nunquam fuisse peregrinatos; loquitur de bonis, qui nunquam peregrinuatī sunt a Deo; id est, nunquam ab illo discesserunt, licet fuerint in viâ, & potuerint discedere à Deo.

CONCLUSIO SECUNDA.

**I**N toto negotio Angelorum, circa gloriam, tria intervenerunt instantia: In primo, omnes fuerunt in gratiâ creati; in secundo, boni meruerunt per actum fidei, spei & charitatis, qui actus sunt media ad beatitudinem supernaturalem; in tertio, boni consecuti sunt gloriam, mali verò damnationem incurrerunt. Illæ morulæ non mensurantur reverà tempore, quoniam Angelus & operationes angelicæ mensurantur ævo; tamen correspondent aliquibus partibus nostri temporis; ita quod fuerit mora quædam temporanea inter creationem Angelorum, & ipsorum beatitudinem: quandiū autem duraverit; afferri non potest, sed tantum quod fuerit brevissima: Joannis enim 2. asserit Scriptura, Diabolum fuisse homicidam ab initio & in veritate non stetit.

---

 Q U A S T I O XII.

*In quo mali Angeli peccaverint.*

C O N S T A T Angelos peccasse irreparabiliter, & ideò damnatos esse, ut dicit Scriptura; quo autem peccato peccaverint, annuntiabit

## C O N C L U S I O.

S U P E R B I A fuit peccatum Angelorum, quæ ab aliquibus luxuria nominatur, quia est inordinatus amor sui; & ob hoc dicit Isayas cap. 14. *Detracta est ad inferos superbia tua.* Discrepant tamen Doctores in assignanda ratione superbix dæmonum; alii enim tenent ipsum fuisse superbum, quod appetierit beatitudinem tantùm naturalem, non curando de supernaturali, ad quam ordinabatur per gratiam, alii dicunt fuisse superbum, quia appetiit beatitudinem supernaturalem ex solis viribus naturæ; alii quod appetierit unionem hypostaticam fore in suâ naturâ; sed melius est, si uno verbo dicamus, Angelum fuisse superbum, appetendo æqualitatem Dei, quæ stat in his omnibus: Quòd appetierit æqualitatem Dei, patet ex *Matæ 14. in cælum conscendam, similis ero Altissimo*: quòd aurem æqualitas cum Deo reperiatur in his omnibus patet; appetendo enim unionem hypostaticam, fuisset similis Deo: nam per illam Angelus fuisset Deus; appetendo beatitudinem naturalem in quâ quiesceret, fuisset Deo similis, Deus enim in suâ beatitudine naturali, & intra

se quiescit; appetendo beatitudinem supernaturalem sine gratia, fuisset similis Deo, qui, propriis viribus, per sui contemplationem beatificatur; apperendo summum dominium, petiit æquari Deo, qui est independens; & sic concordant opiniones Patrum. Ex his patet non appetiisse esse æqualem Deo vel similem secundum substantiam; nullibi enim invenitur Angelum appetivisse substantiam divinitatis; potuit tamen appetere, inquit Scotus, non voluntate absoluta, quæ media applicet ad comparandum finem, sed conditionata, quæ consistit in simplici complacentia, qua voluisset se esse Deum, si fieri potuisset; quod fundatur in Aristotele dicente; voluntatem esse impossibilem, non verò electionem; sic damnati appetunt Deum non esse, si hoc fieri posset.

Objec. In voluntate conditionata, seu simplicis complacentiæ non est meritum aut demeritum, sed dæmones per suam volitionem demeruerunt; ergo illa non fuit tantum conditionata, sed absoluta. Resp. neg. maj. quando est vera volitio conditionata & non tantum velleitas; licet enim in velleitate non sit meritum aut demeritum, utrumque tamen reperitur in voluntate conditionata; meretur enim homo per voluntatem conditionatam, quâ vellet se non peccasse, & demeruit Angelus per voluntatem conditionatam, qua æqualitatem Dei appetiit.

## QUESTIO XIII.

*Quinam Angeli peccaverint ?*

## CONCLUSIO.

**P**RIMUS omnium Angelorum peccavit, & cum illo quamplurimi. Primum patet ex Job 40. ubi vocat Luciferum qui primus peccavit, principium viarum Dei; Isaias etiam 14. vocat Angelum peccantem Luciferum, *quomodo cecidisti Lucifer, qui mandoriebaturis ?* Quia sicut Lucifer alias præcellit stellas, sic ille Angelus omnes alios superabat. Ratio hujus esse potest, quia primus Angelus inter omnes habuit majus motivum peccandi, motivum enim superbix est propria excellentia, quæ fuit major in eo quam in aliis. Secundum habetur ex Apoc. 12. *Draco secum traxit tertiam partem stellarum*, ex Matth. etiam 12. *Hic igitur demones in Belzebub principe demoniorum*; ex quo patet, plures Angelos fuisse damnatos cum primo, & peccatum primi fuisse causam peccati aliorum.

Objic. contra primam partem: Primus Angelorum qui lapsi sunt, fuit ex ordine Cherub, ut testatur Ezechiel, qui vocat illum Cherub; ordo autem Cherub est secundus, non primus. Resp. fuisse ex ordine Seraphim; quod si vocetur Cherub, hoc est, quia non amisit scientiam, quæ Cherubinis propria est; sed charitatem, quæ Seraphinis competit; unde, post peccatum non vocatur Seraphim, sed Cherub.

---

 QUÆSTIO XIV.

*Quomodo potuerit peccare Angelus?*

**S**OLUTIO hujus quæstionis aliquo modo difficilis est, quia peccatum procedit ex eo quòd voluntas appetat aliquid secundùm dictamen intellectus, vel ignorantis, vel errantis; cùm autem Angelus, ratione suæ perfectionis, non potuerit ignorare, neque errare; idè quæritur quomodo peccare potuerit.

## CONCLUSIO;

**P**ECCAVIT Angelus, non ex ignorantia, nec ex errore intellectus, nec ex actuali inadvertentia; sed ex sola libertate voluntatis eligentis unum præ alio. Primum probatur: cùm enim petiit se æquari Deo, non ignoravit se esse creatum ab illo & dependere, tùm secundùm esse, tùm secundùm conservari. Secundum patet, quia error intellectus est pœna peccati; pœna autem non antecedit peccatum; ergo non peccavit ex errore. Tertium clarum est; illa enim inadvertentia seu inconsideratio actualis, vel fuisset culpabilis, vel non: si culpabilis, peccatum ex illa procedens, non fuisset primum, loquitur autem de causa primi peccati; si inculpabilis, peccatum ex eâ procedere non potuit. Deinde peccatum ex inadvertentia non est tam grave, ut ita severè puniatur. Tandem, idè Patres dicunt An-

gelos non fuisse admissos ad poenitentiam, quia peccaverunt ex malitia, & homines ex infirmitate; inadvertentia autem non minùs excusat à peccato quàm infirmitas. Quartum sequitur ex antedictis: si enim Angeli non peccaverunt ex ignorantia, aut errore, aut inadvertentia intellectus, ex solâ libertate voluntatis peccaverunt.

**Objec.** Voluntas sequitur dictamen intellectus: ergo non potest errare voluntas in appetendo, nisi intellectus erret in intelligendo. **Resp. anteced.** sic intelligi: quod scilicet voluntas non eligat, nisi antea intellectus proponat objectum ut bonum; triplex verò est bonum, honestum scilicet, utile, & delectabile; intellectus autem omnia bona voluntati proponit, & voluntas se applicat ad quodcumque voluerit; & sic, licet intellectus non erret in proponendo, errat tamen, & erravit voluntas in Angelo, eligendo bonum delectabile, nempe se æquari Deo, & relinquendo bonum honestum, scilicet se submittere Deo. Nec quis dicat, intellectum errare si non dicat voluntati bonum honestum esse præferendum delectabili; hoc enim reverà dicit intellectus; sed voluntas, ratione libertatis suæ, præfert minus bonum majori; unde si Aristoteles dicat, electionem esse majoris boni, loquitur ut plurimum, non semper.





## QUÆSTIO XV.

*Quanam fuerit poena peccati demonum?*

**C**OGNITIO naturalis dæmonum speculativa remansit in illis post peccatum ; unde Ezechielis 28. Lucifer post peccatum vocatur Cherub ; & Cherubini dicuntur à scientiâ ; & idè Patres dicunt , naturalia non fuisse sublata Angelis ; cognitio autem practica seu moralis respectu boni non fuit in dæmonibus secundum actum ; quia dirigit actiones voluntatis in bonum , & nullus actus bonus est in dæmone , neque in voluntate , neque in intellectu , imò semper averfi sunt à Deo.

## CONCLUSIO.

**P**ROPTER peccatum privati sunt dæmones cognitione supernaturali , eorum voluntas in malo obstinata fuit , ipsique ad ignem æternum condemnati sunt. Ratio primi est , quòd cognitio supernaturalis est donum Dei ; qui admittit autem peccatum mortale , indignus est omni Dei beneficio ; ergo habitus supernaturales post peccatum non remanserunt : Aliqua tamen cognitio supernaturalium potuit remanere , vel per effectus , vel per manifestam experientiam conjunctam signis & miraculis ; sic cognoverunt mysterium redemptionis in morte Christi , in ejus descensu ad inferos , in Ascensione ad cælum ; & in Resurrectione : Deinde possunt meminisse illius cognitionis quam habuerunt in viâ respectu supernatura-

lium, mediantibus speciebus à Deo infusis; licet enim Deus abstulerit illas post peccatum, remansit tamen aliqua de illis, recordatio, & ob hoc dicitur, quod *dæmones credunt & contremiscunt*, non per habitum fidei, sed per recordationem.

Secundum consentaneum est omnibus Theologis; dæmonum tamen obstinatio non oritur ex hoc, quòd Angelus immobiliter objecto adhæreat, seu quòd iudicium ejus non possit mutari, nec consequenter voluntas; quia dæmon, suscitando Judam, voluit mortem Christi, tamen considerando ipsam omnibus profuturam, voluit eam impedire suscitando uxorem Pilati, ut maritum averteret à Christi condemnatione; ergo mutata fuit ipsorum voluntas. Hoc sentit Fulgentius lib. de Fide ad Petrum cap. 23. *Non est natura, sed gratia quòd Angeli in cælo peccare nequeant*; ergo, respectu dæmonum, non est attribuendum naturæ quòd converti non potuerint, sed tantum defectui gratiæ; unde nobis dicendum est, idè obstinatam fuisse eorum voluntatem in malo, quia Deus subtraxit gratiam, mediante qua possent resurgere; quare autem Deus eos in primo instanti post peccatum damnaverit, & gratiam quâ resurgere possent, negaverit, quod non fecit respectu hominum, plures rationes afferri solent à Patribus. Primò, quia alio suadente, occidit homo; Angelus verò suâ sponte; secundò, quia homo ex infirmitate peccavit, non perfectè penetrando objecta; Angelus verò ex malitia, ob perfectionem intellectus. Tertiò, quia cadente uno homine, tota natura lapsa est; cadente autem uno Ange-

lè, non tota natura corrui, sed plures ex quâlibet specie.

Quoad tertium, evidenter colligitur ex sacra Scriptura, Matth. 28. *Itē maledicti in ignem æternum, qui paratus est diabolo & Angelis ejus;* quodd etiam habetur 2. Petri 2. *Angelis peccantibus non pepercit.* sed rudentibus flammis tradidit cruciandos. Quomodo autem dæmones eruciari possint ab igne infernali, qui corporalis est, non potest certò statui, inquit Augustinus lib. 20. de Civit. Dei cap. 10. Alii dicunt, idè ipsos eruciari igne, quia in eo detinentur contra suam voluntatem: Alii eruciari physicè ab igne, qui agit per vim supernaturalem in spiritus, tanquam instrumentum divinæ justitiæ; sed quia intelligi non potest, quomodo corpus agat in spiritum; alii, ut Scotus, respondent ignem inferni cruciare moralitèr per apprehensionem, in quantum per speciem à Deo productam in intellectu, Angeli & animæ separatæ, putant se torqueri igne, & tantam pœnam patiuntur, ac si torquerentur physicè, ut patet cum proportionem de illis, qui somniant se esse in igne, vel inter gladios aut nives, qui torquentur reverà; à fortiori longè crudeliores experientur pœnas dæmones & animæ, dum species producentur immediatè à Deo.



## QUESTIO XVI.

*Quinam sit ordo inter Angelos?*

## CONCLUSIO.

**A**SSIGNANT communiter Patres inter illos tres Hierarchias reperiiri. Hierarchia autem secundum vim nominis, est sacer principatus; in quâlibet verò Hierarchia sunt tres chori. In primâ sunt Seraphim, Cherubim & Throni, qui immediatè à Deo illuminantur, & ab ipso audiant consilia ad Ecclesiæ gubernationem, ad quam regendam in communi præficiuntur. In secundâ sunt Dominationes, Virtutes, & Potestates; ista illuminatur à primâ, & illuminat tertiam, exequiturque ea opera, quæ ad generalem providentiam spectant. Tertia constat Principatibus, Archangelis, & Angelis; exequiturque ea opera, quæ spectant ad specialem Dei providentiam; unde ex hâc deputatur Angelus cujuslibet hominis custodiæ. Post idem judicii, illa subordinatio est permansura inter Angelos quoad diversitatem naturæ, gratiæ, & gloriæ; sed non quoad officia quæ nunc circa homines exercent, & hoc est quod dicit Paulus 1. ad Corinth. 15. *Cum evacuaverit omnem principatum; & potestatem & virtutem.* Porro, sicut inter Angelos, sic inter dæmones est prælatio; non proveniens ex aliquâ amicitia (nullus enim inter eos ordo, sed sempiternus horror

*inhabitat*) sed ex sola nequitia, livore, & invidia erga Deum; itaut illi, qui majores sunt in potentia, magis nobis noceant, & providentiæ divinæ effectus impedire conentur.

---

## QUESTIO ULTIMA.

### *De custodiâ Angelorum.*

POSTQUAM multa diximus de Angelorum natura & distinctione, & de eorum cognitione & gratia, explicuimusque omnia, quæ de ipsis dici solent; superest tantum, ut de custodia & cura quam habent circa homines, aliqua dicamus.

### CONCLUSIO.

QUILIBET homo singularem habet Angelum, sibi ad custodiam deputatum; Matth. 18. *Sinite parvulos venire ad me, Angeli enim eorum semper vident faciem Patris mei, qui in cælis est*; ubi, ait Hieronymus, *magna dignitas animarum, quarum unaquaque habet Angelum sibi in custodiam deputatum*; sic & alii Patres, nemine excepto; sic & Ecclesia, quæ festum Angeli custodis celebrare curavit. Ubi sciendum quod non solum justi, sed & peccatores omnes suum Angelum custodem habeant; talis enim deputatio ad gratiam sufficientem pertinet, & homo per se solus ad resistendum Diabolo non sufficeret. Cum ergo gratia sufficiens omnibus detur, quilibet homo Angelum custodem debet habere: Quamvis autem reprobis non salventur, per Angelos ta-

men à quibusdam peccatis revocantur, & per illam custodiam redduntur inexcusabiles. Quòd si ad Hebr. 1. Paulus dicat, *Omnes sunt administratorii spiritus missi propter eos, qui hereditatem capiunt salutis*; ex hoc non ritè concluditur, quòd Angeli dentur tantum prædestinatis; nam Apostolus non addit particulam, solum, sed simpliciter dicit, *propter eos*, hoc est, præcipuè & specialiter in gratiam prædestinatorum, licet secundariò destinentur quoque pro aliis.

Ex communi Patrum sententia, Angeli seu Archangeli præficiuntur regnis, provinciis, civitatibus & populis; quod patet ex Danielis 12. ubi inter principem Persarum, id est, Angelum hujus regni, & Gabrielem principem populi Dei captivi in Perside, orta est disputatio, an Judæi essent liberandi à captivitate. Princeps Persarum postulabat à Deo non liberari; tum quia Persæ discebant à Judæis verum cultum, & veram religionem, unde Persæ convertebantur; Gabriel verò petebat, ut liberarentur Hebræi, ne manendo apud Persas deteriores fierent; ex quo patet regnis, provinciis, civitatibus & populis; Angelos custodes dari.

QUANTUM ad Christum, non habuit Angelum custodem, quia non fuit purus viator, sed comprehensor erat; unde non indigebat Angelo custode, qui datur communiter propter tria: primò, ut nos doceat & instruat ne decipiamur: secundò, ut moveat ad bene agendum: tertio, ut removeat occasiones & pericula peccati; Christus autem nullo horum in-

digebat; quia primo in scientia superabat Angelos; quia secundò erat plenus gratia, & sic poterat se excitare ad benè agendum; quia denique impeccabilis erat per unionem. Quòd si quis dicat; illum qui exponitur tentationi dæmonum, indigere Angelo custode, Christum verò fuisse à dæmone tentatum; hoc verum est, quando ille qui exponitur tentationi, per illam vinci potest. Licet ex his pateat, Christum non habuisse Angelum custodem, habuit tamen Angelos ministrantes; nam ratione unionis hypostaticæ est Angelorum Dominus, & sic sunt ministri illius; unde Matth. 3. dicitur, quod Angeli accesserunt, & ministrabant ei.

ANTICHRISTUS quamvis reprobus foret, & nulli monitioni angelicæ consensurus, aramen Angelum custodem habebit, quia Deus quantum est ex se, vult omnes salvos fieri, & sic ex sua parte nulli deest: cùm ergo custodia Angelorum sit unum ex præfidiis gratiæ, Deus illi non denegabit, sicut nec induratis & obcecatis, quia sunt semper in via, & converti possunt. Quod si aliqui dicantur deserì ab Angelo; hoc non est absolutè, sed tantùm secundùm quid; in quantum Angeli permittunt, ut in tribulationem vel peccatum decidant. Porro Angeli non dolent de malis eorum quos custodiunt, cum sint beati, illorumque voluntas subjiciatur divinx.

NEDUM dantur Angeli custodes singularibus, sed etiam præficiuntur Congregationibus, Pontificibus, Regibus, Prælatibus, & aliis personis publicis; quæ præter Angelum  
quem

quem habent ut personæ privatæ, habent & alium que diriguntur in his que spectant ad reginam multitudinis sibi commissæ.

Quoad tempus quo datur Angelus cuilibet homini, non satis constat; liquet quidem dari à nativitate; an detur autem pro eo instanti, quo anima infunditur corpori in utero materno, controversum est: alii negant, ut D. Thomas, asserentes puerum, quandiu est in utero matris esse partem ejus, sicut fructus pendens in arbore est pars ipsius, & sic eundem Angelum conservare & matrem & prolem: alii tamen contrarium affirmant, quia, inquiunt, infans in utero materno est persona distincta à matre & ordinata ad beatitudinem.

Porrò, an sicut cuilibet homini datur Angelus bonus ad custodiam, sic etiam detur malus ad impugnationem; mens est D. Thomæ & aliorum, licet non habeatur in Scriptura, cujus rationem refundit Doctor Angelicus in divinam providentiam, quæ tentationes diabolicas permittit, ut quilibet homo ipsis resistens, in virtute proventum faciat.



## DISPUTATIO TERTIA.

### *De primo homine condito.*

SEX nobis dicenda sunt de primo homine, majori brevitate quàm poterimus. Primò, de ipsius creatione & circumstantiis ejus: Secundò, de excellentia scientiæ: tertiò, de



justitia originali : Quartò , de gratia gratum faciente : Quintò , de immortalitate illius : Sextò , de dominio quod habuit in omnia animalia. Sex quæstionibus hæc omnia patebunt.

---

## QUÆSTIO PRIMA.

*Quid dicendum sit de primi hominis creatione.*

**SCIENTIA** quâ intellectus Adami illustratus est, justitia originalis quâ ipsius potentia instructa sunt, gratia quæ voluntatem præcipuè exornavit, immortalitas quam illi Deus præparaverat, & dominium quod dederat ipsi super omnes creaturas, erant quædam primi hominis prærogativæ, ipsius creationem consequentes; unde prius de Adami formatione, quam de hisce perfectionibus nobis agendum venit.

**DICO** primò, Adamum productum fuisse ex limo terræ, Genes. cap. 2. *Formavit Dominus Deus hominem de limo terra*: Non quòd ejus corpus productum fuerit ex solâ terra; fuit enim compactum ex quatuor elementis, quoniam erat corpus mixtum, sed solum lutum nominatur à Scriptura, id est terra & aqua inter se commixta, quia corpus humanum primario resolvitur in terram & aquam; & insuper ignis elementaris & aër sensu percipi non possunt, nec proinde à rudi populo potuissent intelligi. Quantum ad ætatem, staturam, & figuram corporis Adæ, dubitari non potest, quin hæc omnia in illo perfectissima fue-

runt ; Sicut enim omnia alia in statu perfecto fuerant condita, sic & Adamus à fortiori ; cum longè major sit ipsius dignitas : unde quoad ætatem, omnes dicunt eum productum fuisse in juvenili, ad procreandum liberos magis idoneâ ; nam formatis Adam & Eva, dixit illicò Deus, *Crescite & multiplicamini* : Sed non conveniunt omnes in quibus annis initio mundi computanda esset illa juvenilis ætas ; aliqui enim eam reponunt inter trigessimum annum & quadragesimum, ut nunc est ; & sic dicunt, eâ ætate Adamum creatum fuisse, quâ Christus resurrexit : alii verò dicunt, vitam pro tunc fuisse longissimam, & quamlibet ætatem fuisse longiorem ac nunc ; ideoque pueritiam & adolescentiam fuisse longius productas, tardiusque accessisse juventutem ; unde volunt eam computari debere circiter quinquagesimum annum, quâ ætate formatus est Adam ; ex quo infertur, quod Adam longius vixerit, aliquo modo omnibus hominibus, licet enim Mathusael vixerit nongentis sexaginta novem annis, & Adam tantum nongentis triginta, quia tamen ætas qua creatus est, correspondet quinquagesimo anno, sic vita Adam longior fuit ætate saltem perfecta, vitâ ipsius Mathusalem. Quoad corporis Adami staturam, non lucide loquitur Joannes Lucidus, putans ipsum fuisse giganteâ mole præditum, & omnium gigantum maximum ; talis enim monstruosa est, & præter naturam ; sed dicendum, eam fuisse perfectam ; & talem, qualis regulariter contingit hominî in ætate provecâ. Quoad figuram denique ; quis dubitat

omni formositate fuisse adornatum corpus Adami; cùm omnibus constet, illud extitisse perfectissimi temperamenti, & à constitutione exquisita pulchritudinem derivari.

Dico secundò, Evam productam fuisse de costa Adami dormientis in ipso Paradiso, & hoc in sexto die. Aptè producta fuit ex costa Adami, seu latere ejus, ut per hoc ostenderetur, mulierem nec esse dominam, nec ancillam, sed viri sociam: aptè etiam formata est ex latere dormientis, tum ut Adam dolorem non sentiret; tum ut videretur Dei potentia, quæ tam suaviter latus dormientis aperuit; tum denique ad significandum, quòd Ecclesia nasceretur ex latere Christi in cruce mortui. Ille sopor Adami fuit verus somnus, & non tantum extasis, quæ distinguitur à somno, quòd in somno ligantur sensus exterhi, & impeditur usus rationis; in extasi autem, ligatis sensibus externis, remanent actiones intellectus: fuit inquam verus somnus; Scriptura enim dicit, *Cumque obdormisset*; in somnò tamen potuit intervenire ectasis; mens enim ipsius fuit à Deo illustrata, aliàs non dixisset ex perfectus, *Hoc nunc os de ossibus meis; & caro de carne mea.* Ex istis ultimis verbis patet, cum costa extractam fuisse carnem ex qua producta est Eva; & quia non tanta extracta est, quanta erat necessaria ad productionem corporis Evæ, vel alia creata est à Deo, vel potiùs ex aëre circumstante formata. Porro, illa costa erat Adamo necessaria, ut erat caput naturæ humanæ; & superflua, ut erat homo particularis. Quoad locum ubi creati sunt primi parentes, Adamus

extra Paradisum est productus, & deinde vel ductus vel translatus ab Angelo in Paradisum; Genes. 2. *Tulit Deus hominem & posuit eum in Paradiso voluptatis*: Hoc autem fecit Deus, ut sciret Adam, talem incorruptionis locum non esse ex natura, sed ex gratia; quia verò posuit Eva de hac veritate instrui ab Adamo, ipsa in Paradiso existimatur formata, ut patet ex narratione Moïsis qui subjungit productionem Evæ translationi Adæ in Paradisum. Tandem, quantum ad tempus creationis utriusque, constat quidem ex Script. Adamum factum fuisse sexto die, sed aliqui putant Evam factam fuisse postea; hoc tamen non est probabile; cessavit enim Deus in fine sextæ diei ab omni opere. Quod si post opera sex dierum loquatur Moïses, de formatione Evæ, narrat quomodo producta fuerit; narrando enim quæ facta sunt in sexto die, dicit, *masculum & foemina creati sunt eos.*

Dico tertio, quod licet multi gravis notæ authores crediderint, animam Adæ fuisse productam cum Angelis, & proinde aliquo tempore ante corpus; tamen communior opinio est, eodem instanti fuisse factum corpus Adæ, & animam ejus creatam, atque infusam. Sic D. Aug. lib. 12. de Civit. Dei cap. 23. qui in hanc opinionem fortiter inclinat, licet contrariam judicet aliquando probabilem cum multis aliis, quorum rationem allegat D. Bonaventura in 2. dist. 13. art. 1. q. 3. ut scilicet declararetur, animam rationalem non pendere ex corpore; nec educi ex potentia materiæ, sed per se subsistere; & à solo Deo creatam, extrinsecus

corpori adjungi : Non obstantibus tamen rationibus illis , idem D. Bonaventura loco citato, à nostris stat, sicut & D. Thomas, quorum ratio est ; quia Deus in prima mundi constitutione omnia perfecta produxit ; anima autem, quæ est ordinata ad componendum hominem, fuisset in statu imperfecto, si fuisset sine corpore : ergo est cum corpore creata. Eodem modo dicendum est de animâ Evæ ; licet enim Scriptura non meminerit creationis animæ illius, fuit tamen producta eodem instanti, ac ejus corpus, & illi infusa. Ex tali infusione animæ rationalis in corpus Adami & Evæ resultat ratio imaginis & similitudinis, quam Deus utrique indidit, juxta dictum ipsiusmet Dei : *Faciamus hominem ad imaginem & similitudinem nostram* ; moxque subdit, *masculum & feminam fecit eos* ; ut demonstraretur, rationem imaginis utrique competere ; illa autem similitudo & imago non consistit in corpore, ut Anthropomorphitæ malè opinati sunt ; sed in anima, quæ potest dici imago Dei in donis naturalibus ; in quantum est spiritualis, intelligentiæ compos, tota in toto corpore, & tota in qualibet parte ejus, &c. & ipsius similitudo, in donis supernaturalibus & gratuitis, ut in gratia & virtutibus.

Dico quartò : Si status innocentiae perseverasset, procreati fuissent homines per naturalem generationem, contra Greg. Nyss. Chrysost. & aliquos putantes multiplicandos fuisse homines sicut Angelos, nullamque in statu innocentiae fuisse distinctionem sexuum, Deumque formando mulierem, habuisse respectum ad peccatum futurum quod prævidebat ; in talem

autem opinionem adducti sunt propter turpitudinem quæ inest in ipso generationis actu ; sed ille libidinis ardor actum generationis turpificans non fuisset in statu innocentiae , in quo pars inferior fuisset ita subdita rationi & voluntati , ut quâ facilitate ac moderatione moveremus nunc pedes aut labia ad ambulandum vel loquendum ; pari moderatione in illo statu , & sine perturbatione rationis aut libidinis ardore , aut foeditate ulla moturi essent homines ea membra quæ generationi inserviunt. Quod si Augustinus dicat , consanguinitates & cognationes carnales profluxisse ex peccato ; hoc est non coepisse nisi post peccatum ; antea enim non cognovit Adam uxorem suam , sed tantum postquam ejectus est à Paradiso. Si queratur ratio nostræ conclusionis , est , quia sicut homo erat essentialiter animal , sic essentialiter erat vivens ; naturalissimum autem opus viventium , est generare sibi simile , ex Arist. l. 4. Meteororum : ergo in statu innocentiae homo fuisset generativus. Sicut ergo fecit Deus masculum & foeminam , ut generarent ; sic , si durasset status innocentiae , tot natæ fuissent mulieres. quot viri ; unde probabile est ex quolibet partu processurum fuisse unum filium & unam filiam , omnesque juncti fuissent in matrimonium , quod fuisset unius tantum cum una ad imitationem primi conjugii ; unde si fuissent plures viri , quàm foeminae , aut è contra ; unus maritus habuisset plures uxores , aut una uxor plures viros , aut aliqui non fuissent matrimonio conjuncti.

## QUESTIO II.

*Quid dicendum sit de scientia Adami?*

EX impositione nominum quæ dedit Adamus omnibus animantibus terræ & volatilibus cœli, non immeritò concludunt Doctores perfectionem scientiæ illi hominum primo collatæ; sed antequam de ipsius amplitudine loquamur, videamus quomodo adducta sunt ad Adamum animalia. Caietanus existimat non fuisse corporaliter illi adducta: sed intellectui eius fuisse quodammodo repræsentata: quia tamen hoc est contra Patrum & Interpretum sententiam, dicam adducta fuisse corporaliter, non ut videret, an eorum aliquod sibi esset conveniens adjutorium ad proli generationem, ut voluerunt aliqui; sed ut illis nomina imponeret conformiter scientiæ infusæ quam Deus illi indiderat: adducta autem fuerunt (ait Augustinus ( vel per Angelos, vel per impulsu Dei, producentis in phantasia illorum, quæ est facultas animæ sentientis, phantasma aliquod repræsentans duobus individuis cujuslibet speciei, conveniens esse, adire locum ubi erat Adamus, qui illis imponeret nomina, tanquam servis quorum obsequio usus erat: non fuerunt autem ad illum adducti pisces, quia extra aquam positi confestim interiissent. Adamus singulis animalibus nomina imponendo per hoc

ostendit, se accepisse nedum scientiam, quæ nomina conformia naturæ cujuslibet imposuit; sed & linguam perfectam qua loquebatur & Deum loquentem secum audiret, secundum quam linguam cuncta animantia vocavit proprio nomine petito aut à differentia specifica, aut à proprietate; vel ex motu, figura, aut operatione; hæc autem lingua, quæ ante linguarum confusionem erat communis omnibus, vocata fuit postea Hebræa, quia fuit exactè conservata in familia Heber, qui extitit in illa confusione.

Dico primò, Adamo in sua creatione omnem scientiam rerum naturalium inditam fuisse: sicut enim Deus ipsum corpore perfectum fecit, sic & animam illi donavit omni scientia ornatam; aliàs si absque scientia fuisset conditus, eamque sibi paulatim comparare debuisset, scientia rerum fuisset molestissima homini sciendi cupidissimo: unde, ne propter ignorantiam earum afficeretur tristitia, procul arcenda à jucunditate status innocentiz, omnem scientiam habere debuit, maximè cum productus fuerit, nedum ut esset posterorum factor & parens per generationem carnalem, sed & ipsorum doctor & rector, quod utique sine scientia præstare non potuisset: illa autem scientia quam ab ortu suo habuit Adamus, fuit quidem infusa, non per se, sed per accidens, quia naturalitèr illam comparare potuisset, & licet fuerit infusa per species intelligibiles quas Deus immediatè produxit in intellectu patiente Adami, non fuit tamen distincta specie à nostra; sicut nec Adamus specie differebat ab



aliis hominibus, estò longè aliter procreatus fuerit.

Tanta fuit Adami scientia, ut in ea omnes mortales, excepto Christo Domino, longè superaverit; status enim innocentiae erat perfectior statu naturae lapsae: ergo scientia in illo statu concessa Adamo, excellentior erat scientia concessa hominibus in natura corrupta existentibus. Quòd si dicatur de Salomone 3. Reg. 3. *Dedi tibi cor sapiens & intelligens in tantum, ut nullus antea similis tibi fuerit, nec post te surrecturus sit*; respondendum est, sapientiam posse sumi vel pro dono Spiritus sancti quod gratiam habitualement sequitur, & sic B. Virgo & Apostoli majorem Adamo habuerunt sapientiam; vel pro cognitione rerum divinarum & mysteriorum fidei quae naturaliter acquiritur, aut gratis à Deo infunditur; & credibile est quòd fuerit perfectior in Apostolis & in quibusdam doctoribus; quoniam mysteria fidei post adventum Christi clariùs cognita sunt, vel pro cognitione rerum civilium, quae eadem est ac scientia benè regendi alios, & sic sumpta, fuit perfectior in Salomone qui eam praecipuè à Deo petiit; vel denique sumitur pro scientia rerum naturalium, & in hoc Adamus superavit Salomonem, qui excelluit quidem super Reges & principes qui dominati sunt in Jerusalem, aut qui labore & studio sibi scientiam compararunt; longè tamen inferior fuit Adamo cui divinitus indita est.

PORRÒ, licet mirabilis fuerit Adami scientia, tum in habitu qui perfectissimus fuit illi inditus à Deo cum speciebus; tum in actu

quem facillimè elicere poterat , cùm non haberet corporis aut passionum impedimenta quæ in nobis sunt ; tum in modo sciendi , quia cognoscebat res per causas ; tum in latitudine objectorum , quoniam rerum omnium naturalium scientiam dicebatur habere : tamen non cognoscebat futura contingentia , nec secreta cordium , nec omnia individua cujuslibet speciei ; hoc enim non exigebat perfectio intellectus , nec status innocentiae excellentia. Unde in tribus crescere poterat Adami scientia ; cognoscendo scilicet successivè individua specierum creaturarum ; cognoscendo insuper novas species quæ generari poterant ex putri materiâ & ex diversarum specierum commistione ; & cognoscendo denique per experientiam ea quæ tantùm antea cognoscebat speculativè ; & sic explicandus est textus Genesis , ubi habetur , quòd post comestionem pomi , aperti sunt oculi eorum.

Hic sciendum , primos parentes non potuisse decipi in statu innocentiae , nec proinde falsum ferre judicium assentiendo propositioni falsæ , aut dissentiendo veræ , in quo consistit error & deceptio ; error enim est pœna peccati , juxta August. lib. 3. de lib. arbit. cap. 12. dicentem , *Approbare vera pro falsis non est natura instituti hominis , sed pœna damnati* : Unde si Eva Genes. 3. dixerit , *serpens decepit me* ; respondet Augustinus , non fuisse seductam in statu innocentiae , sed peccati : ita quòd prius admiserit peccatum internæ elationis , quàm crederet se fore similem Deo : non potuit ergo uterque decipi in quacunque propositione ; quia

vel fuisset penitus nota, & tunc non potuissent errare; vel penitus ignota, & super eam non tulissent iudicium; vel dubia, & tunc suspenderent assensum; vel probabilis, tuncque iudicassent eam esse tantum probabilem: hoc autem non sic in nobis reperitur, qui in redubia & probabili ex perturbatione voluntatis iudicamus, & ob hoc decipimur.

Dico secundò, Adamum scientiam rerum supernaturalium habuisse; creatus enim erat principaliter in ordine ad finem supernaturalem, quàm naturalem; si ergo ad comparandum sibi finem naturalem ornatus erat scientia rerum naturalium, debuit etiam recipere cognitionem supernaturalium ad finem adipiscendum supernaturalem, *sine fide enim impossibile est placere Deo*, inquit Paulus ad Hebr. II. Qualis autem fuerit illa cognitio supernaturalis quam habuit Adamus, constat non fuisse visionem beatificam; erat enim viator & *nul- lus hominum Deum vidit unquam* beatificè: non fuit etiam infusa, quæ soli Christo concessa est, & non erat accommodata statui puri viatoris qui debet per fidem ambulare, ubi scientia infusa est clara & evidens, licet sit abstractiva: remanet ergo ut res supernaturales cognoverit per fidem & per revelationem, quam non habuit per auditum corporeum, ut nos; sed per interiorem Dei locutionem. Hæc cognitio Adami fuit nostra præstantior, tum ob scientiam qua pollebat, quæ ipsum poterat adjuvare, ut facilius mysteria revelata crederet; tum ob evidentiam revelantis, nos enim habemus obscuritatem in nostra fide ex parte

objecti revelati, & ex parte Dei revelantis, cum evidenter non sit nobis notum mysteria nostræ religionis esse à Deo revelata; at licet Adamus non habuerit evidentem notitiam objectorum quæ credebatur, noverat tamen ipsa esse revelata à Deo, sentiendo suum intellectum interiùs illuminatum ad cognoscenda ea quæ naturaliter non possunt cognosci; & ob hanc evidentiam revelantis dicit Bonaventura, cognitionem quam habuit Adamus, medium quasi tenere inter visionem beatificam & fidem quam habemus in naturâ corruptâ.

QUANTUM ad objecta supernaturalia quæ cognovit Adamus, dicendum est; quòd cognoveris mysterium incarnationis; dicendo enim, *Hoc nunc os ex ossibus meis, & caro de carne mea*, significavit juxta Paulum Ephes. 5. magnum sacramentum conjunctionis Christi cum Ecclesiâ: non cognovit tamen suum peccatum futurum, ex August. l. 1. de Genesi ad lit. cap. 18. quod signum est, incarnationem non pendere à peccato Adami; & Christum venturum fuisse, etiam non peccante Adamo; aliàs cognoscendo incarnationem, prævidisset suum peccatum. Secundò, cognovit Trinitatis mysterium; non potuisset enim cognoscere incarnationem, per quam una Trinitatis persona assumpsit naturam humanam, nisi ipsam Trinitatem agnovisset. Tertiò, novit præmia supernaturalia esse justis in cœlo parata, & impiis supplicia; *Accedentem enim ad Deum oportet credere, quia est; & inquirentibus se remunerator sit*, inquit Paulus ad Hebr. 11. Quartò, notum

tiam habebat de fine supernaturali naturæ humanæ, ex cognitione enim finis dependet directio vitæ, & actorum humanorum ordinatio. Quintò, non ipsum latuerunt ea quæ sunt absolutè necessaria ad illum finem supernaturalem capessendum, ut sunt gratia, fides, spes & charitas. Sextò, non ignoravit lapsum Angelorum è cœlo in tartara, propter superbiam dejectorum; ut per tale exemplum se in humilitate & obedientia contineret.

Possit hic quaeri, an posteri Adæ nati fuissent cum scientia, si status innocentiae perseverasset. Ratio dubitandi est, quia ignorantia est poena peccati, quod non extitisset in illo statu; ergo nec ignorantia. Deinde, cur potius concessa fuisset scientia parenti, quàm posteris, manente eodem statu? Resp. quòd sicut posteri Adæ non fuissent nati in ætate perfectâ, nec perfectâ corporis magnitudine, ita nec cum scientia; naturale enim est homini scientiam acquirere per sensus & experimenta unde ad primum dico, habituros quidem ignorantiam negativam, seu nescientiam, quæ non oritur ex culpâ, sed ex conditione naturæ creatæ, quæ non potest scire omnia & in omni tempore, & hæc est in Angelis; non tamen habituros ignorantiam positivam, quæ consistit in hoc, quòd quis nesciat id quod scire debet; ista enim oritur ex peccato: Ad secundum etiam respondeo multa debuisse concedi Adamo qui futurus erat omnium hominum parens & doctor, quæ non debebant competere suis posteris. Licet filii Adæ scientiam innatam non habuissent, facile tamen & breviter sibi

comparassent scientias ; in illis enim erant summa docilitas & capacitas ad discendum ob ingenii & memoriæ excellentiam , & ardorem cognoscendi verum ; erat deinde in illis omnium sensuum tum internorum , tum externorum præstantia , quorum ministerio scientiæ acquiri poterant ; erat doctorum copia ad docendum alios accommodatissimorum , erat vitæ longitudo , valetudo corporis , omnium passionum moderatio , singularis denique erga omnes homines cura Dei , quæ mirabiliter in cognitione omnium illos adjuvasset , etiam Angelorum ministerio , qui tunc familiarissimè visitassent homines.

---

### QUESTIO III.

*Quid dicendum sit de iustitia originali primis parentibus concessa.*

**A**SSE R U I M U S cum Scoto in 2. dist. 29. q. 1. iustitiam originalem esse diversum habitum à gratiâ sanctificante ; aliàs qui haberet gratiam sanctificantem , haberet etiam iustitiam originalem : Et insuper si essent unus & idem habitus , Angeli qui in sua creatione habuerunt naturalem rectitudinem , quæ vocari potest iustitia originalis , habuissent etiam naturaliter gratiam sanctificantem ; unde dicendum est quòd illi habitus sint diversi , & quòd unus ( nempe iustitia originalis ) perficiat hominem in ordine ad finem naturalem ; alter vero ( nempe gratia ) in ordine ad finem su-

pernaturalem ; & ob hanc rationem agendum est prius de originali iustitia , quam de gratiâ sanctificante.

Dico primò , quòd iustitia originalis & gratia sanctificans se habeant ut excedens & excessum ; excedebat enim iustitiâ originalis in hoc quòd non modò rationem subdebat Deo , sed & sensum rationi , & corpus animæ. Deinde conjungebat mentem cum Deo promptius , quia nullum erat impedimentum retardans : delectabilius , quia omnes potentix superiores & inferiores ferebantur in idem bonum delectabile : & firmius , quia nullum erat peccati pondus à Deo sevocans. Tandem , iustitia originalis hominem reddebat promptum ad omne bonum morale obeundum expedite & sine interiori molestiâ ; & hæc omnia non confert gratia sanctificans , benè autem sequentia ; primò , excellentius hominem jungit Deo , nempe supernaturaliter ; secundò , nos reddit filios & hæredes Dei , cohæredes autem Christi ; tertio , nos facit capaces meriti & præmii æterni. Ex quibus differentibus effectibus patet , esse differentes habitus , quos Deus conjungere voluit in primis parentibus , ut nihil perfectionis nihil deesset.

Dico secundò , quod licet iustitia originalis non possit propriè definiri , quia non erat unus & simplex habitus , sed plurium habituum complexio in diversis facultatibus residentium ; potest tamen sic explicari , quædam collectio habituum quibus homo secundum omnes facultates suas rectus & perfectus reddebatur , & idoneus ad perfectè omnes actiones naturæ

suz convenientes exercendas. Quia illa justitia est complexio diversorum habituum, in diversis potentiis residet justitia originalis; per eam enim Adamus in intellectu speculativo habebat scientias speculativas; in practico habebat admirabilem in agendo prudentiam, in voluntate erat habitus quo Deo ut supremo principio & fini naturali cultum, honorem & amorem reddebat; in appetitu concupiscibili habuit temperantiam, & in irascibili fortitudinem: omnia ergo hæc præstabat justitia originalis, sed per illos omnes habitus; non est enim probabile, quod hæc omnia fieri potuerint per unicum: quia tamen præcipuus finis justitiæ originalis erat facere hominum rectum, & cum rectitudo consistat principaliter in voluntate, ob hoc merito Scotus asseruit, justitiam originalem in voluntate habere sedem.

Dico tertiò, justitiam originalem fuisse donum supernaturale, ex spiritu enim & carne componitur homo; per spiritum propensionem habet ad bonum spirituale, & per corpus habet inclinationem quandam ad bonum sensibile; ex his autem duabus contrariis propensionibus, pugna quædam naturalis consurgit in homine, & ex illâ pugnâ grandis agendi difficultas; idcirco providentia D. contulit homini donum aliquod supernaturale, justitiam scilicet originalem, impedientem ne pars inferior superiori reluctaretur; & hoc est quod determinarunt Pius V. & Gregorius XIII. damnantes ut hæreticam opinionem asserentium, quod integritas primæ conditionis fuerit na-



turalis ejus conditio. Hujus ratio est, quod ut voluntas se retraheret ab omni delectatione proposita per sensus, oportuerit illi conferri à Deo aliquid delectabilius impediens suggestionem sensuum; cum autem nihil tale possit haberi à naturæ principiis, debuit haberi consequenter à Deo, tanquam aliquid supernaturale, & fuit justitia originalis, quâ homo omnem delectationem sensitivam respuebat. Quod si per peccatum homo dicatur læsus in naturalibus, hoc est, quia justitia originalis dicitur naturalis improprie, in quantum collata est homini à productione sua, licet sit supernaturalis proprie, quoniam non à principiis naturæ, sed à solo Deo haberi potuit. Si quis dicat, Rectitudo est donum supernaturale; ergo peccatum originale est tantum carentia doni supernaturalis; ergo nulla est differentia inter hominem in puris naturalibus constitutum, & hominem in peccato: Negabitur utraque consequentia; peccatum enim est carentia doni supernaturalis possessi, & amissi per prævaricationem, & sic constituit hominem reum; quod non dicitur de homine in puris naturalibus constituto. Si quis instet, justitiam originalem dari tantum in ordine ad finem naturalem, ergo non esse supernaturalem: Resp. dici supernaturalem, quia est indebita naturæ, & ex naturæ viribus haberi non potest; deinde ordinat ad finem supernaturalem, saltem virtualiter; quia removet peccatum, quod deviat à fine supernaturali.

Dico quarto, sex assignati effectus justitiæ originalis; primò enim illuminabat in-

tellectum, ne in suis actionibus errare posset; secundò, continebat voluntatem, nè actus inordinatos eliceret; tertio, arcebat à phantasiâ omnia quæ illam turbare & contaminare poterant, sicut & dæmones, nè cogitationes turpes aut tristes excitarent; quartò, cohibebat appetitum sensitivum, ne commoveretur ante iudicium rationis ad aliquid appetendum, vel fugiendum, etiam præsentè objecto; quinto, præservabat corpus à mortiferis, & impediebat ne molesta & noxia possent illi accidere; sexto, erat in causâ quòd Deus decreverit expleto quodam tempore, animas hominum cum corporibus in empyreum elevare. Ex quarto affectu patet, in statu innocentie fuisse reverà passiones, ad naturam enim hominis pertinent; sed non fuissent tales, quales sunt in naturâ lapsâ; excitatæ enim fuissent à voluntate humanâ, non anticipassent iudicium intellectus, & earum intensio & remissio plane fuisset subiecta rationi. Porro præter habitus justitiæ originalis qui concurrissent ad effectus prædictos, superaddebatur singularis Dei assistentia erga homines, impediens ne quid illorum foelicitatem perturbaret.

Dico quintò, hominem per justitiam originalem potuisse non peccare, non potuit tamen, sine speciali gratiæ excitantis & adjuvantis concursu opera meritoria exercere. Ratio primi petitur ex hoc, quòd Deus per justitiam originalem fecerit hominem rectum; sed non fuisset rectus, si non potuisset vitare peccatum: ergo poterat in bono perseverare. Ratio secundi sumitur ex eo quòd justitia originalis

naturam tantum perficiebat, & ordinabat hominem ad Deum, tanquam ad finem suum naturalem: ergo non potuit ad opera supernaturalia & vitæ æternæ meritoria evehere. Hoc est conforme Augustino lib. de Naturâ & Gratiâ dicenti, *Sicut oculus corporeus etiam plenissime sanus non potest cernere, nisi candore lucis adjutus; sic homo etiam perfectissime iustificatus, nisi æterna lucis iustitiâ divinitus adjuvetur, recte non potest vivere.* Dices: Si per iusticiam originalem poterat vitare peccatum, poterat tentationibus malis resistere, quod est meritorium. Resp. in illo statu, non consentire tentationi, non esse meritorium; nihil enim erat quod pro tunc ad malum impelleret. Si contra hoc instet Augustinus lib. de Corrept. & Gratiâ, Angelos bonos tentationi resistentes meruisse debitam mercedem; respondendum non meruisse propriè per resistantiam, sed per conversionem in Deum, junctam cum illâ resistantiâ, quæ quidem conversio per gratiam elicitæ est. Si Augustinus lib. de Corrept. & Gratiâ cap. 7. de Adamo dicat; *Opus non habebat adiutorio quod implorant isti, cum dicunt, Video aliam legem repugnantem legi mentis meæ;* per hoc non negat necessitatem gratiæ excitantis & adjuvantis, sed removens obstacula quæ difficultatem benè agendi inducunt in naturâ corruptâ; in statu enim innocentiae nulla erant.

## QUESTIO IV.

*Quid dicendum sit de gratiâ sanctificante  
primi hominis.*

**D**Eus qui hominem fecerat rectum intra limites naturæ per justitiam originalem, voluit postea ipsum perficere in ordine ad finem supernaturalem, ipsius animum ditando gratia sanctificante, quæ dabat illi jus ad vitam æternam; sed quædam dissensio suborta videtur inter Doctores de tempore quo illi concessa est gratia: super quam

Dico primò, gratiam sanctificantem Adamo collatam fuisse in ortu suo & in primæva constitutione; *Vidit enim Deus cuncta que fecerat, & erant valde bona*: cum ergo Deus reliqua condiderit perfecta, secundum capacitatem naturæ cujuslibet, non est credibile quòd hominem reliquerit vacuum gratiæ, cujus erat capax. Deinde, hoc confirmant Patres explicantes illa verba, *Faciamus hominem ad imaginem & similitudinem nostram*, de similitudine quam habet homo cum Deo per gratiam & virtutes; sic Origenes, Basil. Ambr. Chrysost. Aug. & alii, cum ergo illa similitudo fuerit indita Adamo ab origine sua, habuit ab ortu gratiam quæ est fundamentum illius similitudinis. Tandem, principalius creatus est Adam propter finem supernaturalem, quàm propter naturalem; sed ab instanti creationis habuit necessaria ad finem naturalem, nempe justitiam

originalem: ergo eodem instanti debuit habere gratiam quæ necessaria est ad fidem supernaturalem obtinendum. Adde quòd in instanti creationis Adamus habuit usum expeditum rationis; ergo potuit peccare; ergo in eodem potuit mereri, hæc omnia enim sunt indivisibilia quæ successione non indigent; ergo habuit gratiam ab illo instanti qua mereri posset. Si quis dicat, gratiam non dari nisi dispositio præcedat ex parte recipientis: hoc verum est respectu illorum qui post amissionem ejus volunt illam recuperare, non aliorum; decet enim ut plus exigatur à peccatore, quàm ab alio. Si dicatur, gloriam dari post gratiam; ergo gratiam debere dari post naturam, quia plus distant: respondebitur, aliquando gloriam datam fuisse cum gratiâ, ut in Christo; & sic Adamo potuit dari gratia cum natura, hoc enim pendet à voluntate divina.

Dico secundò. quòd si perseverasset Adamus in statu innocentie, posterius ejus fuissent in gratia geniti, contra quosdam sentientes justitiam originalem fuisse quidem propagandam à patre in filios: non verò gratiam. Utrumque definitum videtur in Concilio Arausicano, cap. 5. & in Trident. sess. 5. de peccato originali, ubi determinatum est, Adamum peccando sanctitatem & justitiam perdidisse, non sibi tantum, sed & posteris: Si autem posteris perdidit sanctitatem & justitiam, habebat utramque perfectionem illis communicandam; per sanctitatem verò intelligitur gratia, quæ vocatur sanctificans, & per justitiam intelligitur justitia originalis: ergo utramque illis com-

municasset. Ratio est, quia Adamus, transgrediendo mandatum Dei, non tantum fuit causa, ut sui posterii sine peccato privati sint iustitia originali, sed & transfudit in ipsos peccatum: ergo si adimplevisset præceptum, iustitiam originalem transfudisset, quæ opponitur privationi, & gratiam communicasset, quæ opponitur peccato: Licet tamen cum natura data esset gratia posteris Adæ, non tamen dici deberet naturalis, nisi sumendo, naturale, improprie, pro eo quod cum natura datur; non verò esset naturalis proprie, quia non erat debita homini, nec nisi per solius Dei potentiam haberi poterat. Quod si non data fuisset scientia filiis Adæ: hoc est quia scientia necessaria tantum erat Adamo, ut omnium hominum parenti & doctori, non suis filiis; gratia verò est perfectio personalis; & sic licet scientia non communicata fuisset filiis Adæ, transfusa tamen fuisset gratia; non quidem per propagationem naturalem, sed per voluntatem Dei, qui eam gratis contulisset.

D I C O tertio, etiamsi Adamus non peccasset, non propterea posterii ejus fuissent in gratia confirmati; hoc tamen non est ita certum, quin aliqui Doctores contrarium dixerint, Anselmus enim l. 1. *Cur Deus homo* cap. 8. ait, *in illa iustitia in qua erant primi homines constituti, videtur, quod si vicissent, ut non peccarent tentati, ita confirmarentur cum omni propaggine sua, ut peccare ultra non possent.* Alii restringunt hanc propositionem, dicentes, quod si Adam primam tentationem vicisset, in gratia confirmatus fuisset, & etiam omnes posterii

ejus, si cùm adulti fuissent, primam tentationem superassent: Non obstantibus tamen his authoribus tales opiniones probabiliter sentientibus, supra allegata mihi viderunt probabilior; si enim fuissent confirmati in gratia, vel fuissent confirmati in illa, eo modo quo Beati in cælo confirmati sunt, vel eo modo quo B. Virgo & Apostoli sunt confirmati in terra. Primum dici non debet; nam cùm summum bonum non fuisset ab illis clarè visum, & omne aliud bonum sit finitum & ita limitatum, ut illi aliqua ratio boni desit, non potuisset per illud voluntas hominis necessariò averti à malo, & in bono confirmari. sicut fit in cælo per visionem claram essentia D. quæ induit rationem omnis boni. Secundum etiam asseverari non potest; Apostoli enim fuerunt confirmati in gratia per specialem assistentiam Dei qua à peccato præservabantur. Si autem posterius Adæ debuissent habere talem assistentiam, vel fuisset ex pacto, vel ex merito; de pacto non constat, meritum verò non potest astrui; perseverantia enim non cadit sub merito: ergo gratis loquitur, qui dicit posteros Adæ confirmatum iri in gratia, si innocentia status perseverasset; unde melius est, si dicatur, quòd sicut patet cecidit in justitia & in gratia existens, sic labi poterant & filii; rarius tamen hoc contigisset, quia in tali statu homines fuissent recti, nec in rationem impetum fecisset concupiscentia.

Dico quartò, problematicum esse, an status innocentia potuerit secum compati peccatum veniale; Aletius enim, D. Bonaventura, & D. Thomas hoc negant, dicentes, quòd si debuissent

debuisset committi aliquod peccatum in illo statu, debuisset esse mortale; & pro tunc destituisset illum statum respectu illius qui peccasset, peccatum enim mortale aufert gratiam Dei, & reddit hominem amore divino & divinis beneficiis indignum. Quoad peccatum veniale, dicunt illud non posse destruere statum innocentiae, quia non reddit hominem absolutè indignum beneficiis Dei; nec esse impossibilem cum eo statu, quia peccata venialia accidunt vel ex surreptione sensualitatis, vel ex motu indeliberato rationis, vel poenam merentur, & cum dolore deleri debent; quæ omnia erant repugnantia statui innocentiae; & sic sentiunt non potuisse in statu innocentiae reperiri peccatum veniale. Scotus verò 12. sent. dist. 21. q. 1. ait, quod si peccatum mortale fieri potuerit in illo statu, à fortiori potuit & veniale; donum enim justitiæ originalis non magis jungebat hominem cum Deo, quàm gratia gratum faciens; sed quancumque gratia gratum faciens potest simul esse cum peccato, ut patet de Apostolis; ergo & status innocentiae. Unde ad rationes in contrarium allatas respondet, quod præter peccata venialia quæ ex sensualitate aut ex deliberato motu rationis accidunt, fieri possit tertium quod ex genere suo sit veniale, ut verbum otiosum vel mendacium jocosum, quod non sit impossibile cum statu innocentiae. Ad id quod dicunt omni peccato deberi poenam, & omnem poenam esse contrariam illi statui; respondet Scotus solam poenam mortis corporalis esse impossibilem illi statui, ut patet ex verbis Dei ad Adam, *In quacumque die comederis, morte morieris.* Ad il-



lud tandem quod obijciunt, requiri dolorem ad diluendum peccatum veniale; responderi potest ipsum eriam dilui per actus amoris divini.

### QUÆSTIO V.

*Quid sciendum sit de primorum parentum immortalitate.*

**Q**UÆ hætenus diximus, ad animam primorum parentum spectant; nunc de corporis immortalitate differendum est: & in hac materia fuerunt duo errores oppositi; Pelagiani enim affirmabant hominem fuisse moriturum, etiam si non peccasset; alii è contra sentiebant, hominem fuisse quidem moriturum adveniente peccato; sed immortalitatem in statu innocentiae fuisse illi naturalem, volebant. Mens Catholica aperienda est.

Dico primò, in statu innocentiae Adamum potuisse immortalem & mortalem censerì: Erat, inquam, immortalis, prout immortale significat negationem actus moriendi, & idem importat ac non moriturum; si enim præcepto divino fuisset obediens, nunquam incidisset in mortem, sed post elapsa quædam tempora, in cælum translatus fuisset; at quia peccavit, ideo mortuus est, in executionem sententiæ prolatae à Deo, *in quacunque die comederis, morte morieris*, idest moriendi necessitati subiacebis: Si autem immortale significet impotentiam moriendi, Adam non poterat dici immortalis; erat enim corpus ejus compactum ex quatuor elementis: ergo naturâ suâ erat corruptibilis. Hæc sunt conformia doctrinæ Augustini lib. 7. de Genesi

ad litteram c. 25. dicentis, *corpus Adami ante peccatum, & mortale erat, quia poterat mori; & immortale, quia poterat non mori: aliud enim est non posse mori, sicut quasdam naturas immortales creavit Deus; aliud est autem posse non mori, secundum quem modum primus creatus est homo immortalis.* Ex verbis ergo Augustini patet, primum hominem in statu innocentiae fuisse mortalem & immortalem modo explicato; idest potentem mori, non tamen moriturum: ut autem pateat, quâ ratione mortem non incurrisset Adamus:

Dico secundò, idèd Adamum non fuisse moriturum, permanente statu innocentiae, quia mori non potest homo, nisi his quatuor modis: primò vi externa; secundò fame, vel siti; tertio humorum intemperie, aut perturbatione passionum; quarto denique extabescente senio: Sed primus homo, ut pote sapientissimus, hæc omnia vitare poterat; cognoscebat enim primò omnia quæ erant sibi nociva & omnibus rebus dominabatur; & sic impedire poterat, ne illi mortem inferrent per externam violentiam; & nè ipsi dormienti noxium aliquid accideret, aut aliquomodo extrinsecus læderetur, vigilabat providentia D. & custodia Angelorum: intelligi enim potest de Adamo manente in gratia, quod de homine iusto habetur Psal. 90. *Angelis suis mandavit de te, ut custodiant te in omnibus viis tuis.* Secundò, nè ex ciborum inopia moreretur, Deus providerat illi fructus salubres Paradisi, de quibus vesci poterat, juxta hoc dictum Genes. 2. *de omni ligno Paradisi comedè.* Tertio, ne ex humorum intemperie, aut passionum pertur-

batione mors præcederet, justitia originalis corpus animæ subiciebat, qualitates contrarias in statu pacifico retinebat, & inordinatos impedi-  
bat passionum motus. Quintò, ne senio & debilitate virtutis nutrientis deficeret homo, statue-  
rat Deus vim nutrientem corroborare per usum ligni vitæ; quamvis enim per communes cibos repararetur humidum radicale, quod deperdi-  
tur per actionem caloris naturalis; attamen ex-  
tranea illa substantia quæ ex alimento accidit, nunquam esset tantæ virtutis, ac illa quæ deper-  
ditur; & sic paulatim vis nutriens fuisset dimi-  
nuta, & periisset funditus, & illa pereunte, ex-  
tincta fuisset vita hominis; usus autem ligni vi-  
tæ vim nutrientem roborasset, reparassetque  
deperditionem humidi radicalis; & sic homi-  
nem à senio & à morte per senectutem prove-  
niente præservasset. Hæc est mens Aug. l. 14.  
de Civit. Dei c. 26. dicentis, *Cibus aderat, ne  
esuriret; potus ne sitiret; lignum vitæ, ne illum  
senectû dissolveret; nullus intrinsicus morbus, nul-  
lus ictus metuebatur extrinsecus.*

IMMORTALITAS concessa Adamo in statu in-  
nocentiæ, erat non naturale, sed supernaturale  
aliquod donum; sic omnes Patres & præsertim  
Augustinus, l. de Genes. ad literam cap. 15.  
*Mortalis erat ex conditione corporis animalis, im-  
mortalis autem beneficio conditoris.* Ratio est, quia  
illud non est naturale homini, nec debitum ip-  
sius principiis quod est præter naturam ejus; sed  
esse incorruptibile est præter naturam corporis  
humani; de natura enim ejus est quod sit cor-  
pus mixtum & compactum ex quatuor elemen-  
tis, & consequenter corruptibile; ergo immor-

## DE CREATIONE MUNDI. 158

talitas non erat illi naturalis; & est unus ex articulis nuper damnatis à Pio V. & Gregorio XIII. qui sic habebat, *Immortalitas primi hominis non erat gratia beneficium, sed naturalis ejus conditio.* Quòd si dicant adversarii, immortalitatem procedere ex causis naturalibus, nempe ex ligno vitæ: ergo fuisse naturalem: Resp. aliqui cum Scoto, lignum vitæ habuisse quidem virtutem protrahendi vitam hominis in longissimum tempus, intrà quod Deus elevarset homines ad gloriam, non verò protendisset in perpetuum: cum ergo talis elevatio quæ erat principium immortalitatis, esset supernaturalis, immortalitas naturalis non erat. Resp. alii, quòd si aderat virtus in ligno isto reddendi hominem immortalem, talis virtus planè supernaturalis erat. Quòd si dicant, animam hominis esse immortalem: ergo deberi uniri corpori naturaliter immortalis. Resp. ex unâ parte corpus immortale congruum quidem fuisse animæ immortalis secundum se spectatæ; quia tamen ex aliâ parte instituerat Deus, ut anima esset forma corporis, debuit illi adaptari corpus capax exercendi functiones suas, & proinde ex quatuor elementorum qualitatibus formatum; quia autem ex illis oritur corruptibilitas, illa proinde est conditio naturalis corporis humani.

---

### QUÆSTIO ULTIMA.

*Quid dicendum sit de dominio hominis?*

**C**UILIBET Scripturam legenti patebit, dominium concessum fuisse Adamo paulò postquam ipsum creavit Deus; cum enim dixit Moyses hominem esse factum ad imaginem

Dei, illicò addit; datum illi fuisse principatum super omnes animantes, ut habetur Genesis 1. *Dominamini piscibus maris & volatilibus cœli, & universis animantibus, quæ moventur super terram.* De dominio autem hominis duo præsertim dicenda sunt; nimirum quale fuerit ante peccatum, & quale post illud.

Dico primò, In statu innocentiae Adamum habuisse dominium in omnia animalia, ut habetur nedum loco citato, sed & Psalmo 8. *Gloria & honore coronasti eum, & constituisti eum super opera manuum tuarum*: quod voluit confirmare Deus, cum animalia adduxit ad Adam, ut ipsis nomina imponeret, tradens per hoc illi sui domini executionem; & quasi faciens, ut illa ab Adamo nomina accipiendo, ei obedientiam & servitutem sponderent. Si quærat autem, quomodo animalia præsertim ferocia submissa homini effici potuerint: respondebitur, hoc factum fuisse per summam hominis solertiam; cum enim maxima prudentia & industria præditus fuerit, & absolutissimam quorumcumque animalium habuerit notitiam, penetraveritque omnes modos quibus ferocissima quæque domari possent, per hoc Adamus faciliter ipsa sibi potuit subicere. Adde quod talis subiectio referri potest in singularem Dei providentiam circa hominem, qua factum fuit ut animalia non solum non nocerent homini, sed & ipsi obedirent; & providentiam exercebat per Angelos, sicut adducta fuerunt per illos ad Adam ut illis nomina imponeret, & ad Noë ut introducerentur in arcam.

Dico secundò, etiam in statu naturæ corruptæ hoc dominium competere homini; erat

enim naturale, & illi debebatur propter naturæ rationalis excellentiam, quam non perdidit per peccatum, sicut nec imaginem Dei propter quam præcipuè dicitur cunctis animalibus dominari: ergo in statu peccati remansit, juxta id quod Deus Noè & filius ejus dixit Genes. 9. *Terror vester ac tremor sit super cuncta animalia terra, & super omnes volucres cœli, cum universis quæ moventur super terram: omnes pisces maris manui vestra traditi sunt.* Tandem post lapsum Adæ dominium illud, quantum ad executionem seu usum, maximè diminutum est: nam in præsentī paucis animalibus imperat homo, nec illud sine labore; unde perbellè notat Chrysostomus Homiliâ 12. in Genesim, Deum continuisse tantum sub dominio hominis spoliati originali justitia, ea animalia quæ sunt ipsi utilia, & quæ ad ejus emolumentum, adjumentum, ornamentum, & oblectamentum inservire possunt; ut sunt oves, canes, equi, simiæ, psittaci & similia; ad denotandam hominis infirmitatem & necessitatem, quæ tanta est, ut vilissimis animalibus indigeat: Non verò reliquit illi imperium in illa animalia quæ indicant potestatis humanæ excellentiam, ut sunt magna & sæva animalia: quod si quædam ex ipsis cicurentur aliquando, hoc fit vel labore, vel industriâ.

Dico tertio, quod in statu innocentie fuisset aliquod imperium hominum in homines; cum enim numerosè multiplicatum fuisset genus humanum in illo statu, & homo sit animal sociabile, jucundius illi fuisset in societate degere vitam quàm in solitudine: ergo fuisset quædam congregatio inter homines; & nè aliqua confu-

fio in tanta hominum multitudine suboriretur ; debuit certè ordo aliquis statui , per quem aliqui essent superiores , alii inferiores ; isti regerentur , & illi regerent ; non secus ac inter Angelos , ubi constat , quòd licet sint beatissimi , alii tamen sunt aliis superiores. Quòd si mulierem Deus viro subjecerit in pœnam peccatis ; hoc est , quia imperium viri fuit mulieri involuntarium & molestum in statu peccati ; fuisset verò jucundum & voluntarium in statu innocentiz ; natura enim utriusque fuisset integra & ratio recta ; sicque vir nihil imperasset nisi rectū , mulier autem amasset quidquid esset æquū , & ideò nihil fuisset ægrum in tali imperio : adveniente verò lapsu hominis per peccatum , cœperunt mariti duriores esse uxoribus , & uxores propter depravatam voluntatem , ægrè tulerunt maritorum imperium ; unde , quod erat jucundū in statu innocentiz , molestum esse cœpit in punitionem peccati. Eadem currit solutio ad eos qui dicunt , quòd subjici aliorum dominio sit contra naturalem appetitum ; illis enim respondendum est , quod duplex sit dominium ; unum in servos , quod est coactum , involuntarium , & proinde molestum , quia totum refertur in utilitatem dominantis , & istud est contra naturalem appetitum hominis , qui magis in sui , quàm in alterius utilitatem laborare peroptat ; unde in statu innocentiz nequaquam repertum fuisset : aliud in liberos , quod est voluntarium & prægatum cū ad bonum dominantis non præcisè referatur , sed in subditorum utilitatem cedat ; & istud non est contra appetitum hominis , ideoque in statu innocentiz fuisset.

*Finis Primæ Partis.*

---

: *Extrait du Privilege du Roy.*

**P**AR Grace & Privilege du Roy , donné à Versailles le 12. Octobre 1677. Signé, Par le Roy en son Conseil DESVIEUX: Et scellé: Il est permis à E D M A COUTEROT Marchand Libraire-Imprimeur à Paris, d'imprimer ou faire imprimer, *P. Ioan Gabriellus Boyvin Theologia Scoti à prolixitate, & subtilitas eius ab obscuritate vindicata, &c.* en telle marge, caractère, & autant de volumes qu'il voudra, pendant le temps de vingt années, à compter du jour que Volume dudit Livre sera achevé d'imprimer pour la premiere fois, en vertu dudit Privilege; avec deffenses à tous Libraires & Imprimeurs de l'imprimer, d'en vendre & debiter d'autre impression que de celles dudit COUTEROT, & de ceux qui auront droit de luy, à peine de confiscation des Exemplaires contrefaits, trois mille livres d'amande, & de tous dépens, dommages & interests, aux charges portées par ledit Privilege, & aux peines y contenues.

*Registré sur le Livre de la Communauté des Libraires & Imprimeurs de Paris le 20. Octobre 1667.*

*Signé E. COUTEROT Syndic.*

Achevé d'imprimer le premier Tome de *P. Boyvin Theologia* pour la premiere fois en vertu dudit Privilege le 15, Mars 1682.



INDEX

CAPITUM, DISPUTATIONUM,

ET QUESTIONUM

PRIMÆ PARTIS.


TRACTATUS PRIMUS:

DE DEO VNO.

<b>T</b> <i>Tractatus dispositio.</i>	<b>fol. i</b>
<b>CAPUT I. DE PRÆDICATIS PURÆ</b>	
<b>QUIDDITATIVIS NATURÆ D.</b>	<b>2</b>
<b>QUEST. I. Quid intelligatur nomine Dei?</b>	<b>3</b>
<b>II. Vtrum Deus sit substantia proprie dicta?</b>	<b>4</b>
<b>III. Vtrum Deus sit substantia completa?</b>	<b>6</b>
<b>IV. Vtrum sit substantia spiritualis?</b>	<b>ibid.</b>
<b>V. Vtrum Deum esse, sit propositio per se nota?</b>	<b>8</b>
<b>VI. Vtrum existentia sit de essentia D.</b>	<b>11</b>
<b>VII. Vtrum existentia D. demonstrari possit</b>	
<b>naturaliter?</b>	<b>14</b>
<b>CAPUT. II. DE MODIS INTRINSEC'S NAT. D.</b>	
<b>QUÆRES 1. Quid sit modus intrinsecus in se?</b>	<b>21</b>
<b>2. Quomodo differant modus intrinsecus &amp;</b>	
<b>differentia?</b>	<b>ibid.</b>
<b>3. Qualis sit distinctio inter modum &amp; modifi-</b>	
<b>catum?</b>	<b>22</b>
<b>4. Quid sit modus intrinsecus naturæ D.</b>	<b>23</b>
<b>5. In quo convenient pradicata purè quiddita-</b>	
<b>tiva cum modis?</b>	<b>24</b>

# INDEX.

6. In quo convenient modicum attributis ?	24
7. Quanam sit distinctio inter modos intrinsecos ; & essentiam D	25
DISPUTATIO I. De Infinitate Dei.	
QUEST. I. Vtrum Deus sit infinitus ?	27
II. Quid sint continentia formalis & eminentialis ?	31
III. Quid sit perfectio simpliciter , & perfectio secundum quid ?	33
IV. Qualiter Deus omnes perfectiones contineat ?	35
V. Quid sit Infinitas D.	37
DISPUTATIO II. De Simplicitate Dei.	
QUEST. I. Quid sit simplicitas D.	41
II. An Deus sit omnino simplex ?	42
III. An Deus sit physicè compositus ?	44
IV. An Deus sit compositus metaphysicè ?	45
V. Vtrum aliqua creatura sit omnino simplex ?	49
DISPUTATIO III. De Immutabilitate D.	
QUEST. I. An Deus sit immutabilis quoad existentiam ?	50
II. An Deus sit immutabilis quoad accidentia ?	51
III. An Deus sit immutabilis quantum ad locum ?	54
IV. An Deus sit immutabilis quantum ad scientiam ?	55
V. An Deus sit immutabilis quantum ad voluntatem ?	57
DISPUTATIO IV. De Æternitate D.	
QUEST. I. Quid sit Æternitas ?	52
II. An Deus sit æternus , & ipse solus ?	64
III. An Æternitas sit quid positivum ?	65
IV. Quomodo differant tempus , ævum , &	6 ij



# INDEX

CAPITUM, DISPUTATIONUM,

ET QUESTIONUM

PRIMÆ PARTIS.

TRACTATUS PRIMUS.

DE DEO VNO.

<b>T</b> <i>Tractatus dispositio.</i>	Fol. i
<b>CAPUT I. DE PRÆDICATIS PURÆ</b>	
<b>QUIDDITATIVIS NATURÆ D.</b>	2
<b>QUEST. I. Quid intelligatur nomine Dei?</b>	3
II. <i>Vtrum Deus sit substantia proprie dicta?</i>	4
III. <i>Vtrum Deus sit substantia completa?</i>	6
IV. <i>Vtrum sit substantia spiritualis?</i>	ibid.
V. <i>Vtrum Deum esse, sit propositio per se nota?</i>	8
VI. <i>Vtrum existentia sit de essentia D.</i>	11
VII. <i>Vtrum existentia D. demonstrari possit naturaliter?</i>	14
<b>CAPUT. II. DE MODIS INTRINSEC'S NAT. D.</b>	
<b>QUÆRES I. Quid sit modus intrinsecus in se?</b>	21
2. <i>Quomodo differant modus intrinsecus &amp; differentia?</i>	ibid.
3. <i>Qualis sit distinctio inter modum &amp; modificatum?</i>	22
4. <i>Quid sit modus intrinsecus naturæ D.</i>	23
5. <i>In quo conveniant prædicata purè quidditativa cum modis?</i>	24

# I N D E X.

6. *In quo convenient modi cum attributis ?* 24

7. *Quanam sit distinctio inter modos intrinsecos ; & essentiam D* 25

DISPUTATIO I. De Infinitate Dei.

QUÆST. I. *Utrum Deus sit infinitus ?* 27

II. *Quid sint continentia formalis & eminentialis ?* 31

III. *Quid sit perfectio simpliciter , & perfectio secundum quid ?* 33

IV. *Qualiter Deus omnes perfectiones contineat ?* 35

V. *Quid sit Infinitas D.* 37

DISPUTATIO II. De Simplicitate Dei.

QUÆST. I. *Quid sit simplicitas D.* 41

II. *An Deus sit omnino simplex ?* 42

III. *An Deus sit physice compositus ?* 44

IV. *An Deus sit compositus metaphysice ?* 45

V. *Utrum aliqua creatura sit omnino simplex ?* 49

DISPUTATIO III. De Immutabilitate D.

QUÆST. I. *An Deus sit immutabilis quoad existentiam ?* 50

II. *An Deus sit immutabilis quoad accidentia ?* 51

III. *An Deus sit immutabilis quantum ad locum ?* 54

IV. *An Deus sit immutabilis quantum ad scientiam ?* 55

V. *An Deus sit immutabilis quantum ad voluntatem ?* 57

DISPUTATIO IV. De Æternitate D.

QUÆST. I. *Quid sit Æternitas ?* 52

II. *An Deus sit æternus , & ipse solus ?* 64

III. *An Æternitas sit quid positivum ?* 65

IV. *Quomodo differant tempus , ævum , & ij*

# I N D E X.

<i>æternitas ?</i>	67
V. <i>An Deus per æternitatem coëxistat tēpori ?</i>	68
IV. <i>An Deus coëxistat tēpori divisibiliter &amp; successivè ?</i>	70
VII. <i>An res temporales coëxistant æternitati ab æterno ?</i>	71
DISPUT. V. De Immensitate D.	
QUEST. I. <i>An Deus sit immensus ?</i>	73
II. <i>Qui sint modi communes quibus Deus in rebus existat ?</i>	74
III. <i>Qui sint modi speciales quibus Deus certis in rebus existit ?</i>	76
IV. <i>Verum Deus sit in rebus, ut in loco ?</i>	77
V. <i>Verum existentia Dei in rebus ritè colligatur ex ejus operatione in illis ?</i>	79
VI. <i>Verum Deus sit extra mundum ?</i>	80
VII. <i>Verum Immensitas alicui creatura competere possit ?</i>	83
DISPUT. VI. De Visibilitate & Invisibilitate Dei	
QUEST. I. <i>Verum Deus sit visibilis ab intellectu creato ?</i>	85
II. <i>An Deus possit videri oculo corporeo ?</i>	87
III. <i>Verum Deus naturaliter possit videri ab intellectu conjuncto ?</i>	90
IV. <i>An supernaturaliter intellectus conjunctus possit videre Deum ?</i>	91
V. <i>An aliqui in via Deum viderint ?</i>	93
VI. <i>An intellectus separatus agens naturaliter possit videre Deum ?</i>	96
VII. <i>An intellectus ad videndum Deum indigeat lumine gloria ?</i>	98
VIII. <i>An intellectus indigeat specie intelligibili ad videndum Deum ?</i>	101

# I N D E X

<b>IX.</b> <i>An visiones beatifica sint aequales?</i>	103
<b>X.</b> <i>Vnde procedat inaequalitas visionis beatifica?</i>	106
<b>XI.</b> <i>An viso Deo, omnia videantur quae sunt in illo?</i>	110
<b>XII.</b> <i>Vtrum possit videri essentia sine personis?</i>	111
<b>XIII.</b> <i>An possit videri una persona sine alia?</i>	114
<b>XIV.</b> <i>An possit videri essentia sine attributis?</i>	116
<b>XV.</b> <i>An possint videri attributa sine essentia, unum attributum sine alio, essentia sine modis, &amp; persona sine essentia?</i>	ibid.
<b>XVI.</b> <i>An beati videant creaturas in Verbo?</i>	117
<b>DISPUT. VII. De Incomprehensibilitate D.</b>	
<b>QUAEST. UNIC.</b> <i>An Deus sit incomprehensibilis?</i>	120
<b>DISPUT. VIII. De ineffabilitate D.</b>	
<b>QUAEST. UNIC.</b> <i>Vtrum Deus sit ineffabilis?</i>	122
<b>CAPUT III. DE PRÆDIC. NON PURE QUIDDITATIVIS, SEU DE ATTRIBUT. ESSENTIAE D.</b>	
<b>DISPUTATIO I De Attributis in communi.</b>	
<b>QUAEST. I.</b> <i>Quid sint attributa D.</i>	126
<b>I.</b> <i>An attributa D. ab essentia &amp; inter se distinguantur realiter?</i>	128
<b>II.</b> <i>An attributa distinguantur tantum nominibus, vel ratione?</i>	129
<b>IV.</b> <i>An attributa distinguantur formaliter, &amp; ex natura rei?</i>	132
<b>DISPUT. II. De attributis in particulari.</b>	
<b>QUAEST. UNIC.</b> <i>Vtrum Deus sit verus, bonus, &amp; unus?</i>	140
<b>DISPUT. III. De Intellectu D.</b>	
<b>QUAEST. I.</b> <i>Vtrum in Deo sit intellectus?</i>	145
<b>II.</b> <i>An sit in Deo intellectus sub ratione potentia?</i>	146
<b>III.</b> <i>An intellectus Dei sit attributum?</i>	148

# INDEX.

- IV. *An intellectus D. sit talis, qualis est humanus?* 149  
 V. *Quodnam sit objectum primum, & secundarium intellectus divini?* 152  
 VI. *An intellectus D. omnia unico actu intelligat?* 154

## DISPUT. IV. De Scientia Dei.

- QUEST. I. *An sit scientia in Deo?* 156  
 II. *Vtrum scientia Dei sit habitualis?* 157  
 III. *Vtrum scientia Dei distinguatur ab ipsius essentia?* 159  
 IV. *Quotuplex sit scientia Dei?* 160  
 V. *Quid addat scientia visionis super scientiam simplicis intelligentia?* 163  
 VI. *An Deus cognoscat seipsum, & quomodo?* 166  
 VII. *An Deus cognoscat creaturas possibles?* 167  
 VIII. *An Deus cognoscat creaturas existentes?* 168  
 IX. *An Deus cognoscat creaturas in proprio genere?* 170  
 X. *Vtrum Deus cognoscat futura contingētia?* 171  
 XI. *In quo Deus cognoscat futura contingētia?* 175  
 XII. *An Deus cognoscat futura conditionata?* 177  
 XIII. *An Deus cognoscat non entia, mala, & impossibilia?* 180  
 XIV. *An in Deo sint virtutes intellectuales?* 181

## DISPUT. V. De voluntate Dei.

- QUEST. I. *An sit in Deo voluntas per modum potentia?* 183  
 II. *Quid, & quotuplex sit voluntas D.* 184  
 III. *Quotuplex sit voluntas Beneplaciti?* 185  
 IV. *Quotuplex sit voluntas Signi?* 187  
 V. *Quid addat volitio contingens supra necessariam?* 189

# INDEX

VI. <i>An Deus velit seipsum, &amp; quomodo?</i>	190
VII. <i>An Deus velit creaturas possibiles, &amp; quomodo?</i>	192
VIII. <i>An Deus velit creaturas futuras, &amp; quomodo?</i>	194
IX. <i>Vtrum voluntas sit causa rerum, &amp; sub qua ratione?</i>	196
X. <i>Vtrum voluntas D. semper impleatur?</i>	199
XI. <i>An voluntas D. sit immutabilis?</i>	200
XII. <i>Vtrum possit dari causa voluntatis?</i>	202
XIII. <i>Vtrum voluntas D. imponat necessitatem rebus?</i>	203
XIV. <i>Vtrum possit libertas humana conciliari cum Immutabilitate D.</i>	206
XV. <i>An Deus velit malum?</i>	208
APPENDIX. DE AFFECTIBUS VOLUNT. D.	
QUÆRES I. <i>Vtrum in Deo sit amor?</i>	212
2. <i>Vtrum in Deo sit Odium?</i>	ibid.
3. <i>Vtrum in Deo sint Gaudium &amp; Tristitia?</i>	ib.
4. <i>An sit in Deo Desiderium &amp; Fuga?</i>	213
5. <i>An sit in Deo Spes &amp; Desperatio?</i>	ibid.
6. <i>Vtrum sint in Deo Timor, Audacia &amp; Ira?</i>	214
7. <i>Vtrum in Deo sit Iustitia?</i>	ibid.
8. <i>Vtrum sit in Deo Misericordia?</i>	217
CAP. ULT. DE RELATIONIBUS AD EXTRA.	
DISPUT. I. De Providentia Dei.	
QUÆST. I. <i>An sit in Deo Providentia?</i>	219
II. <i>An Providentia sit actus intellectus, aut voluntatis?</i>	221
III. <i>An Providentia semper habeat suum effectum?</i>	223
IV. <i>An causalia &amp; fortuita subsint Providentia D.</i>	224



# INDEX.

V. *An peccata subsint providentia D.* 229

VI. *An actiones libera subsint providentia D.* 226

## DISPUT. II. De Prædestinatione.

QUEST. I. *Quid sit prædestinatio secundum nomen?* 228

II. *Quid sit prædestinatio secundum rem?* 229

III. *An prædestinatio sit actus voluntatis?* 230

IV. *An prædestinatio sit aeterna?* 231

V. *Quis fuerit error Pelagii circa prædestinationem?* 233

VI. *Quis fuerit error Semipelagianorum?* 234

VII. *Quis fuerit error Calvini?* 235

VIII. *An prædestinatio fiat ex praevisis meritis?* 237

IX. *Utrum infantes post baptismum decedentes ex praevisione meritorum prædestinentur?* 253

X. *Utrum Christus nobis meruerit primam gratiam?* 254

XI. *Utrum purus homo possit alteri mereri prædestinationem?* 257

XII. *Utrum numerus prædestinatorum sit certus respectu Dei?* 258

XIII. *Utrum numerus prædestinatorum possit nobis esse certus?* 260

XIV. *Utrum numerus prædestinatorum sit ita certus, ut nullus possit reprobari?* 261

XV. *Quinam sint effectus prædestinationis?* 265

XVI. *Quid sit dicendum de Ligno vitae?* 266

## DISPUT. III. De Reprobatione.

QUEST. UNICA. *Quid sit Reprobatio, qua ejus causa, & effectus?* 269

# INDEX.

## TRACTATUS SECUNDUS.

### DE DEO ET VINO.

#### CAP. I. DE COGNOSCIBILITATE HUIUS MYST.

QUEST. I. *Utrum Deum esse trinum, sit propositio per se nota?* 272

II. *An possit cognosci à priori, Trinitatem esse in Deo?* 274

III. *An possit cognosci naturaliter à posteriori Trinitatis mysterium?* 281

#### CAPUT II. DE PERSON. GENERATIM SUMPTIS.

QUEST. I. *An plures sint in Divinit. persona?* 286

II. *Utrum sint tres persona in divinis?* 287

III. *Utrum tres persona divina realiter distinguantur?* 291

IV. *Utrum Verbum sit Deus?* 294

V. *Utrum Spiritus S. sit Deus?* 300

VI. *Utrum tres persona sint unus Deus?* 303

VII. *Utrum in Deo sint tres existentia relativa?* 306

VIII. *Utrum in Deo sint tres substantia relativa?* 309

IX. *Utrum in Deo sint una existentia & una substantia absoluta?* 312

X. *Utrum in Deo sint tres substantia?* 315

XI. *Quanam sint entia qua in Deo multiplicentur, vel non?* 317

#### CAPUT III. DE PRODUCTIONIBUS DIVINIS.

QUEST. I. *An sint productiones in divinis?* 319

II. *Quot sint productiones in divinis?* 324

III. *A quo sint processiones?* 330

IV. *Quomodo voluntas sit principium communicandi naturam?* 332

# I N D E X.

V. *An solus intellectus & voluntas sint principium quo productionum divinarum?* 333

VI. *Quanam actiones sint processiones personarum divinarum?* 335

VII. *Quanam sit distinctio inter productionem Filii & Spiritus S.* 341

## CAPUT IV. DE RELATIONIBUS DIVINIS.

QUÆST. I. *An in divinis sint relationes reales?* 347

II. *Quomodo relationes DD. distinguantur ab essentia?* 349

III. *Quomodo relationes originis distinguantur inter se?* 351

IV. *An relationes originis dicant perfectionem simpliciter?* 354

V. *Utrum persona DD. constituentur per relationes?* 359

VI. *Utrum persona DD. distinguantur per relationes?* 368

VII. *An solæ tres relationes constituent personas?* 370

VIII. *An præter relationes originis alia rependantur in divinis?* 372

IX. *Quot sint relationes communes inter personas divinas.* 376

X. *An relationes communes sint reales in Deo?* 377

## CAPUT V. DE PERSONIS DIVINIS IN SPECIE; ET PRIMO DE PATRE.

QUÆST. I. *Utrum nomen Patris propriè conveniat primæ personæ?* 382

II. *Utrum nomen Principii conveniat primæ personæ?* 384

III. *Utrum nomen Causæ, conveniat primæ personæ?* 386

# I N D E X.

IV. <i>Vtrum Ingenitum competat Patri?</i>	388
V. <i>Vtrum Ingenitum sit proprietas constituti- va Patris?</i>	392
VI. <i>An Pater generet Filium de sua substantia?</i>	393
VII. <i>An substantia Patris ex qua generatur Fi- lius, teneat rationem materiae aut formae?</i>	395
VIII. <i>Quomodo essentia D. determinetur ad Patrem?</i>	397
IX. <i>An Pater producat Filium necessario &amp; naturaliter?</i>	400
X. <i>An Pater genuerit Filium voluntate?</i>	403
XI. <i>An Pater sit beatus antequam Filium generet?</i>	410
XII. <i>Vtrum Pater sit sapiens sapientia geni- ta?</i>	412
CAP. VI. DE SECUNDA PERSONA TRINIT.	
QUEST. I. <i>Vtrum nomen Filii sit proprium se- cunda persona?</i>	414
II. <i>Vtrum nomen Filii, sit univocum filio di- vino &amp; humano?</i>	416
III. <i>Vtrum nomen Verbi sit proprium secunda persona?</i>	417
IV. <i>Vtrum nomen Imaginis soli secunda per- sona conveniat?</i>	414
V. <i>Ex qua cognitione Verbum divinum proce- dat?</i>	427
CAP. VII. DE TERTIA PERSONA TRINIT.	
QUEST. I. <i>An Spiritus S. procedat à Patre &amp; Filio?</i>	432
II. <i>An si Spiritus S. non procederet à Filio, ab illo tamen realiter distingueretur?</i>	440
III. <i>An productio Spiritus S. necessaria simul sit &amp; libera?</i>	447

# INDEX.

IV. <i>An Pater &amp; Filius sint unum principium Spiritus S.</i>	449
V. <i>An per se requiratur pluralitas suppositorum in productione Spiritus S.</i>	452
VI. <i>Utrum Spiritus S. producat voluntate mutua &amp; concordia?</i>	456
VII. <i>Utrum Pater &amp; Filius spirent uniformiter Spiritum S.</i>	458
VIII. <i>An nomina Doni &amp; Amoris competant Spiritui S.</i>	460
CAPUT ULTIMUM. DE NOTIONIBUS, CIRCUMINCESSIONE, ORDINE ET MISSIONE DIVINARUM PERSONARUM.	
QUÆST. I. <i>Quot sint Notiones in divinis?</i>	463
II. <i>Utrum inseparabilitas possit assignari pro sexta notione?</i>	466
III. <i>Utrum una persona sit in alia per Circuminceptionem?</i>	467
IV. <i>Vnde procedat personarum Circumincepsio?</i>	469
V. <i>Utrum sit aliquis ordo inter personas?</i>	472
VI. <i>Quid sit Missio personarum divinarum?</i>	476
VII. <i>Quotuplex sit Missio?</i>	479
VIII. <i>Cui competat Missio?</i>	481
IX. <i>An Missio sit æterna, vel temporalis?</i>	482
X. <i>De modo loquendi circa hoc mysterium?</i>	484

# I N D E X:

## TRACTATUS TERTIUS. DE CREATIONE MUNDI.

*Vbi de Angelis, & primo homine agitur.*

DISPUTATIO I. De creatione mundi in genere;  
seu De operibus sex dierum.

QUÆST. I. *Vtrum in instanti, vel successivè  
mundus productus fuerit?* 490

QUÆRES I. *In quo tempore anni creatus fuerit  
mundus?* 494

2. *In quo die Deus incepit creare mundum?*  
496

QUÆST. II. *Quid productum fuerit in primo die?*  
496

III. *Quid factum fuerit in secundo?* 503

IV. *Quid factum fuerit in tertio?* 506

V. *Quid factum fuerit in quarto?* 509

VI. *Quid factum fuerit in quinto?* 510

VII. *Quid factum fuerit in sexto?* 512

DISPUTATIO II. De Angelis.

QUÆST. I. *Vtrum existant Angeli, an sint cor-  
porei, & an sint incorruptibiles?* 515

II. *Quantus sit Angelorum numerus & quo-  
modo Angeli distinguantur?* 517

III. *An Angeli aliquando assumant vera cor-  
pora?* 520

IV. *An Angeli actiones vitales in corpore as-  
sumpto elicere valeant?* 523

V. *Quomodo Angeli sint in loco, & an Angeli  
habeant terminum magnitudinis & parvi-  
tatis?* 524

VI. *An Angeli possint esse in pluribus locis?*  
526

# INDEX.

- VII. *An Angeli possint moveri motu locali continuo & instantaneo?* 28
- VIII. *An Angelus cognoscat se, & quomodo?* 30
- QUÆRES I. *An Angeli cognoscant omnia qua sunt ordinis naturalis?* 31
2. *An Angeli cognoscant futura contingentia?* ibid.
3. *An Angeli cognoverint mysteria gratia, antequam fierent?* 32
4. *An Angeli cognoscant objecta corporea per species?* ibid.
5. *An Angeli discurrant in sua cognitione?* 35
- QUÆST. IX. *Vtrum detur locutio inter Angelos, & utrum detur illuminatio?* ibid.
- X. *Vtrum Angeli habuerint gratiam in instanti creationis?* 37
- QUÆRES I. *An gratia Angelorum fuerit proportionata illorum natura?* 38
2. *An gratia Angelorum fuerit ex meritis Christi?* 39
- QUÆST. XI. *Quid sit dicendum de gloria Angelorum?* 39
- XII. *In quo mali Angeli peccaverint?* 41
- XIII. *Quinam Angeli peccaverint?* 43
- XIV. *Quomodo Ang. peccare potuerint?* 44
- XV. *Quanam fuerit poena peccati Daemonum?* 46
- XVI. *Quinam sit ordo inter Angelos?* 48
- XVII. *An quilibet homo Angelum custodem habeat?* ibid.
- QUÆRES I. *An Christus habuerit Angelum custodem?* 49
2. *An Antichristus Angelum custodem sit habiturus?* 50

# INDEX.

3. Quo tempore detur Angelus in custodiam ?

551

4. An sicut bonus Angelus datur ad custodiam, sic malus detur ad impugnationem ?

552

DISPUT. III. De primo homine.

QUÆST. I. Quid dicendum sit de primi hominis creatione ?

554

QUÆRES I. Ex quo, & quando producta fuerit Eva ?

556

2. Verum anima Adami fuerit producta ante corpus ?

557

3. An si perseverasset status innocentia, procreati fuissent homines per generationem naturalem ?

558

QUÆST. II. Quid sit dicendum de scientia Adami ?

559

QUÆRES. I. An illi indita fuerit in sua creatione rerum naturalium cognitio ?

561

2. An in scientia omnes homines superaverit Adamus ?

562

3. An cognoverit Adamus futura contingentia, secreta cordium, & omnia individua cujusbet speciei ?

563

4. An potuerint decipi primi parentes in statu innocentia ?

ibid.

5. An Adamus scientiam supernaturalium habuerit ?

564

6. Qua objecta supernaturalia cognoverit Adamus ?

563

7. An posteri Ada nati fuissent cum scientia, si status innocentia perseverasset ?

566

QUÆST. III. Quid sit dicendum de Iustitia Originali ?

567

QUÆRES I. Quomodo distinguantur iustitia ori-



# INDEX.

<i>ginalis, &amp; gratia sanctificans?</i>	568
2. <i>Quid sit iustitia originalis?</i>	569
3. <i>An iustitia originalis fuerit donum supernaturale?</i>	ibid.
4. <i>Quinam sint effectus iustitia originalis?</i>	570
5. <i>An per iustitiam originalem potueris non peccare Adamus?</i>	571
QUEST. IV. <i>Quid sciendum sit de Gratia sanctificante primo homini concessa?</i>	573
QUÆRES I. <i>An illi fuerit concessa in sua creatione?</i>	ibid.
2. <i>An permanente innocentia posteris fuissent in gratia geniti?</i>	574
3. <i>An fuissent in gratia confirmati?</i>	575
4. <i>An status innocentia potuisset compati secum peccatum veniale?</i>	576
QUEST. V. <i>Quid dicendum sit de primorum parentum immortalitate?</i>	58
QUÆRES. <i>An immortalitas fuisset naturale, vel supernaturale donum?</i>	58
QUEST. ULT. <i>Quid dicendum sit de dominio hominis?</i>	581
QUÆRES I. <i>Verum in statu natura corrupta remanserit dominium in homine in animalia?</i>	582
2. <i>An in statu innocentia fuisset imperium hominis in hominem?</i>	583

FINIS.



THEOLOGICÆ





